

報唐仲言書

去歲得呈下書若詩感不相忘
得今書又得詩以章吉日益遠
為意益篤何以得此於有道足
下目不見世上浮薄情態可謂
洞裡真人想于人之無所阿私



而繫心於僕意誠而過厚僕不
能當然不可以不告吾在彼得
足下所為詩史賞其音而笑其
有蜀賈人之跋編蓬集唐詩
選雖示我舟中未得讀而還
之若欲假我以鍾期之聽于後

各寄一部吾當以所見高下
作序若不見而序必不肯以如
君說我貌何以信觀者諸篇
皆雅什如拙是文園客倦遊
可謂病夫鮑子白雲幽作秋字
尤為精美至于注離騷作著

豈合作盍青槐作繩此小誤不
足言刻集家付此手必受郭公
之累豈不玷於鈔語須求細心
者校讐為快故以告方有大計
不及詳悉恨言下不能書字不
見吾此紙為尔看措案門生

之快之造化於人固不如意此
勞曷極

乙巳九月晦日葺齋居士許維
新後

編蓬集目錄

一卷

五言古一百一十九首

二卷

五言古八十二首

三卷

七言古四十五首

四卷

五言律八十七首

五卷

七言律八十六首

六卷

七言律八十首

七卷

五言排律十八首

八卷

七言排律十三首

九卷

五言絕一百四十四首

六言絕二十七首

十卷

七言絕一百四十八首

國家圖書館, NATIONAL CENTRAL LIBRARY, TAIWAN, R.O.C.

酉陽山人編蓬集

雲間唐汝詢仲言父著
友人張希曾唯卿父校

五言古

擬古十九首 并序

詩自三百篇後無古矣而十九首猶然稱古者其性情則古三百篇也魏晉以來作者代有廼陸平原模詞而失則艷韋蘇州布情而傷於薄有古十九首哉 明興北地李獻吉

狎主詞壇倡復大雅而濟南李于鱗出始為古詩後十九首似欲凌厲千古而直接之漢俾魏晉諸君子遂不得位堂廡之間今其文具在總之亦于鱗之十九首而非古十九首也余於古詩詎能為之優孟而過不自揣聊寫吾性情所自得者藉于鱗復作得無目攝我而世有疾邑將歎廣陵散不絕於人間哉

行行重行行

悽悽重悽悽送君之遠方行行時且止攜手共悵惶
傍徨終難留去去令心傷魚游樂深淵鳥飛思故鄉
今君在萬里何以慰中腸思君忽已久不覺羅帶長
紅塵滿天地遊子限河梁歲月不我留秋葉時飄揚
何當一來歸挾瑟上高堂

青青河畔草

萋萋臯上蘭藹藹堂前竹婉婉牕中女楚楚顏如玉
翩翩服羅衣皎皎揚雙目延佇念所思蕩子行不復
榮華人所憐何能久榮獨

青青陵上栢

灼灼風中花離離垣上草人生一世間百歲誰能保
相期共行樂聊以舒懷抱挽轡駕輕軒遊彼長安道
鬱哉帝皇居冠蓋相紛逸雙闕入雲中宮門何窈窕
夷猶放情志携手相歡好何為長戚戚沉歎令人老

今日良宴會

置酒邀衆賓歡娛及良辰肆筵既已集簫管何紛紛
悲歌發慷慨中心聊自伸人生天地間朝花相與新
百年如旦夕少壯能長存自當翺雙翼高飛凌青雲
安能久貧苦戚戚勞心神

西北有高楼

高楼百餘尺飛宇何陰陰櫺軒結朱綰重櫳危且深
中有悲思婦泠泠調玉琴一彈行露詩再彈葑菲吟
音聲何激烈悽然傷我心師涓沒已久誰將知此音
曲終聲轉悲使我不能任願假晨風翼相期集北林

涉江采芙蓉

夷猶江水傍薄暮不能歸念彼故鄉人戚戚令心悲
相去若秦胡會面將何時仰視還山雲俯折芙蓉枝
路遠終難贈何以慰離思

明月皎夜光

高秋月光滿唧唧虫鳴悲氣清天自朗列星一何稀
繁霜萎秋草歲月忽改移離鴻悲失群孤雲欲何依
昔我同袍友託身青鎖闥不念貧時交棄捐天一涯
東園桃李花灼灼有光輝當春豈不媚歲寒將何為
冉冉孤生竹

鬱鬱青松枝女蘿蔭其傍與君初婚時情好結衷腸
歡娛在衾枕臥起同衣裳相看人自好相捐人自老
云去各天涯悠悠空遠道遠道多風塵佳期苦不早
盛年能幾時妾貌同芳草零落在須臾榮華難自保
思君何所言默默傷懷抱

庭中有奇樹

佳樹生中庭芳菲襲我堂念與君別時花枝正低昂
君行忽已遠花色忽已晚離思不能言坐覺衣裳緩
迢迢牽牛星

浮雲何冥冥河漢何潺潺牽牛處其東織女在其西
終朝織綺羅長夜不遑眠綺羅無成文離恨自纏綿
臨流見所思依然隔長川欲表平生心相看無一言

廻車駕言邁

驅馬遠行遊遙去鄉國曠野何蕭條荒草被長陌
涼風一以厲幽蘭忽改色冉冉歲月馳人生如遇客
來日能幾何念當各努力何不及清時垂功於竹帛

東城高且長

南山入浮雲下臨千里道四望何悠悠商飈動秋草
良時忽不留寒氣一何早栢舟懷隱憂河清念將老
逍遙遺世慮何迺傷懷抱西方有美人儀容多窈窕
手揮白玉琴新聲時縹緲上弦遏行雲下弦驚棲鳥

欲往觀其人閔山湯浩浩安得瓊樹枝遺之結永好
驅車上東門

逍遙步九原四顧何寥廓古墓鬱纍纍秋風正蕭索
賢聖在何許一往不復作天地眇悠悠人生忽無着
寓形宇宙間朝露棲葵藿高堂曲未終白日已西落
茫茫大海中豈有長生藥神仙未可期富貴終難托
願及時未暮杯酒聊相樂

去者日已踈

逝者不復還來者忽相迫登高山遠望丘墳何厯厯

悲風西北來蕭蕭動松栢遊蒐在何所乃為狐兔宅
感此懷故鄉無由一喘息

生年不滿百

河清難久俟人壽能幾何來日常苦短何不鼓瑟歌
懷憂令人老行樂恐不蚤富貴須何時榮名總非寶
役役塵網中凋枯同野草羨門何為者携爾結永好

凜凜歲云暮

悠悠歲月逝春秋互相乘涼颼一蕭瑟促織夜悲鳴
蕭蕭羅帷中孤燈暖自明遊子在萬里得無故鄉情

長夜夢君還歡笑若平生怡然引素手命我彈秦箏
絃聲未及發須臾遂成別皎皎空庭間唯有清秋月
月影何朧朧猶疑照君容君容忽難覓徬徨復驚惕
引領心獨傷淚下空沾臆

孟冬寒氣至

凜凜孟冬月霜露一何繁朔風日以厲奈此客衣單
不眠知夜永獨宿覺天寒故人遺素書叙此平生歡
既言離索苦且復勸加飡懷書想其人沉憂忽經年
吾情固以爾君心倘亦然

客從遠方來

故人為遠別交情一何深有客來遠方贈我綠綺琴
朱絃玉為柱泠泠有悲音一彈長相思再彈遊子吟
相見未有期離思將難任獨有琴中意千里結同心

明月何皎皎

清風飄我衣明月照我牀孤客未安席輾轉夜何長
侯門信多樂何如還故鄉憂來步前庭草露忽霑裳
東西安所歸四顧復徬徨入門撫鳴琴絃絕聲不揚

擬古百首

有序

梁江文通雜體詩三十首自古離別至休上人止矣我明王元美嗣響廣自蘇屬國而下終韋左司凡七十人余閒居多暇乃益廣之從元美止時更十代詩幻百體詎敢謂馳驟江王譬之臨摹古帖庶幾得其影似云爾

李都尉陵餞行

人生無定在良會豈有常今夕共歡娛明旦各一方
念子當遠別中心悽以傷何以叙離情置酒南山陽
四顧無人聲悲風自飄揚邊馬思其群孤鴻動南翔

胡秦路殊絕山川浩茫茫執手永無時且各盡餘觴
子其不我留將何表衷腸行行忽已遠欲別復牽裳
願為雲間鳥相隨還故鄉

蘇屬國武留別

胡天霜露繁旅鴈忽南飛遊子思故鄉歸心正依依
柰此同袍友念當生別離棄捐金石交能不令心悲
幸有清管曲與子共徘徊乃命絲竹音慷慨布中懷
烈烈神飈起清響一何哀對酒悄無言涕淚從橫垂
更勗奏新聲白日忽西馳駟牡向路鳴行人當告辭
關山修且阻相見詎有時行行不忍別驅馬復來歸
願子長相憶千秋以為期

卓文君怨情

堅如山上石飄若風中翼妾心終不移君心固難測
昨宵共杯酒今夕隔丘山悠悠東流水去去何時還
桃李含春風女蘿萎秋露哀榮各有時慷慨將焉愬
皎皎雙鳴鶴千載長相依人心易飄忽白頭安可知
戚戚復戚戚相思亦何益惟應寃夢中歡笑如疇昔
羅衣不復縫明鏡對飛蓬豈曰無膏沐已矣為誰容

離合自有常何用傷寒落月魄當渡圓君恩豈終薄

班婕妤咏扇

團扇素為質皎若冰霜姿因懷合歡意繡成連理枝
托身帷幄中俛仰生光輝圓影蔽君面清風動君衣
惜哉時不留商飈忽相隨悠悠委塵匣情好渡何為

班令史固詠史

聖王貴施仁用刑非得已齊都太倉公坐法行當死
生子不生男緩急誰當使小女褰衣泣聞言痛心髓
悵然自請行懷書奏天子斷者不可續死者長已矣

父情或可原妾身如敝屣心悲聲激揚淒風振丹陛
明君感其言哀詔因之起遂除肉刑法萬國咸稱美
丈夫苟偷生磨滅將誰紀賢哉女緹縈矯矯垂青史

張尚書衡感恩

在昔逢嘉運絲蘿遠相尋既蒙顧盼恩歡情不自禁
徘徊帷戶中夙夜念所欽採蠶薦宗廟提筐向桑林
兢兢脩婦職常愁力不任願為秦樓鏡願作龍門琴
鑑以照君顏彈以悅君心置酒金閨中良夜何沉沉
蘭膏耀明光絲竹發清音度曲未能終朗月下庭陰

解我羅襦裳就彼鴛鴦衾斯情宛如昨念之意彌深
趙漢陽壹疾邪

清時不可值濁世不可居鷹鷂逐鳥雀有勢者馳驅
繁霜一夕降芳草為薪芻三冬雖足用誰當賢詩書
懷金取高位抱道守空廬天命使之然弗渡空長吁
且各從所好歸卧北山隅

鄙徵士炎言志

大海吞江河灑池灌阡陌騏驥思騰空鳳凰無棲棘
騁我追風足振此排雲翮卓犖窮烟霄浩蕩誰能測

俯觀斥鷃輩謀生一何迫天道無險夷世路有通塞
功名如可圖賢聖不隱跡姜公釣渭濱傳說築巖側
不逾殷周王鐘鼎何所勒孤蘭秀空山衆草沒其色
含香豈不媚飄零竟誰惜賢才世所重良遇鮮能值
公孫調漢鼎仲舒獨見黜豈無王佐才時論不相得
卞和歿已久疇能辨荆璧造父今不存騷耳將奚適
安得陶唐君明明揚陋側

重用側字
有二義

孔北海融述懷

峩峩函谷關踽踽新豐道千古振雄都一旦生秋草

矯矯華巔士為謀信深奧馬援老禿翁翩然願征討
終軍狂少年樹勳一何早人生度一世倏爾如飛鳥
微軀輕鴻毛况值衝風擾安能共流俗浮沉騁機巧
案廓達士心鄙夫安足曉誰能首陽下躊躇懷昔老

秦功曹嘉贈婦

人生如颺塵世事同轉燭憂思每有餘歡笑恒不足
與子結燕婉恩情重山嶽柰何棄子去遠遊徇微祿
迎子欲偕行微車空往復遺我尺素書開緘不能讀
蕭蕭空室中皎然還獨宿明月照羅帷秋風振庭綠
長夜不安枕披衣起躑躅離恨將何言托物表衷曲
明鏡照爾容寶釵悅爾目琴可消離憂香堪助膏沐
物菲情自深聊以慰幽獨

徐夫人淋荅夫

賤妾自無祿早歲遇憂艱抱病深閨中輾轉忽經年
歡愛無由達離思正綿綿君今何所適遊宦歷闕源
本期相與偕中道竟空還君行日已遠軒車不可攀
中心徒自結遠望隔丘山沉吟無已時夢想見容顏
感君念我深贈物相周旋雖蒙君所賜恐非妾所憐

雙鬢如飛蓬何以掛釵鈿蛾眉不復描明鏡亦空懸
鳴琴雖可樂還當奏君前沉香空自馥金爐久不然
惟願君餐飯可以慰愁煩

魏武帝操述邊

長驅出塞北遠哉何遙遙白登路脩阻戎車正飄搖
深谷暗無光朔風方怒號豺狼夾轂鳴狐狸向人驕
四望無人居飛雪蔽旌旄馬飢人力殫寒山更岌嶷
冰漿未易炊凍木何可樵薄莫無所歸結轡頓蓬蒿
去鄉日已邈歸心方鬱陶夜寒不能寐徒倚望雲霄
嚴霜斷我肌驚飈裂我袍北山匪靈作誰當念劬勞

魏文帝丕夜宴

夷猶屬清夜飛蓋臨華池綠水生微波芙蓉正參差
丹葩覆金塘馨香襲人衣宿鳥歸深林向我池邊飛
明月來東方繁星自相依長空一何朗纖雲淨無遺
我生非彭聃千秋安可期但願長閑暇杯酒遇良時

甄皇后怨思

靡蕪生後苑芬香入重闈精誠信難掩妾心君所知
念君願我時情好何依依青蠅一相點中道成分離

分離永無會鬱鬱空懷思懷思入夢寐彷彿見容輝
恩情終已矣望君猶未已無以下體故棄捐對與非
無因桃李艷棄捐桑與梓無因涇水濁不察其清泚
朝亦望君來夕亦望君來明月照空宮金扉為誰開
何當陪夕宴重醉洪波臺

陳思王植贈友

秋夜何蕭索涼風淒以清微月淡無光浮雲互泛橫
賢才負經濟愚士多所營聊為長夜遊逍遙步西城
雙闕造天起銅臺鬱崢嶸鳴臬鳴高榭白露沾群英
感物增憂思悵然懷友生守道蒞華間終年抱幽貞
泌水難療飢縣鶉詎掩形感激興悲歌烈烈有哀情
世途多險巇知音共沈冥陽春豈不妙誰能察其聲
神龍且深潛儀鳳有時鳴負此凌霄翼終期戾高明
投詩見情愫當不媿生平

劉文學楨陪宴

公子信愛士華屋聚群賢清晨集東閣薄莫讌西園
衣冠會如雲車馬何闐闐華棖臨曲池絲竹布其間
芙蕖發紅彩秀木夾長川鱸鮓戲清流幽禽鳴樹巔

明月池上來照我金罇前羽觴行若飛清酒如流泉
四坐咸忘懷極夜未云還斯遊良可賦援筆遂成篇

王侍中粲旅情

中原昔喪亂避地來蠻荆異鄉安可居駕言渡西征
漾舟越江濤日暮涼風生登艫望四裔関山杳冥冥
百鳥相追飛孤猿向我鳴清霜沾客衣寒月為誰明
懷憂夜不寐抱琴寫中情絲桐渡何恨三奏不成聲

應文學瑒自述

孤鴻遵幽渚翩翩若魚依舉翼未能翔哀音何慘悽

我本生塞北飄飄至南疑春還翰海濱冬棲江漢湄
啣蠶避矰弋終年長渴飢勁風鏃我翮嚴霜切我肌
常恐遭瘡痍聞弦不能飛明珠委魚目疇能辨其非
願因長風歎一舉造天池明時未易逾彈冠竟何時
公子施汎愛高宴日相携賓客咸傾蓋微軀有所歸
蒙恩既遇望卮酒安能辭樂哉今夕會千秋一相期
賦詩謝知己叙此平生悲

陳書記琳遊覽

秋日風氣厲孤客心悠悠舉觴不能飲振足起遨遊

道遙涉原野徙倚臨清流颯颯回颺起英英白雲浮
餘香出蘭桂殘葉下梧楸駛哉白日馳年光不可留
勲業竟何成玄髮忽已秋抱恨還空廬發卷探竒謀
庶幾揣摩就可以干諸侯

徐文學幹閨情

穆穆東風起吹我閨中樹君行殊未還柰此春光去
人生能幾何恍若花間露良辰難再逢斜陽看淩暮
試覽明鏡中容顏已非故鳥飛歸舊巢君何久長路
故劍未可捐終期一相遇毋為雨後雲一離不復聚

阮倉曹瑀客懷

商飈應時興秋氣方慘烈羈人情易傷百念從中發
長夜獨徬徨悲歌聲轉切俯觀霜下草仰視雲間月
清光將幾時綠艷從此滅我生亦淩然曷為久離別
何當與親友斗酒相怡悅

繆侍中襲哀挽

眇身寄洪鈞來去殊恍惚氣變而為人形變成異物
昨居白玉堂今歸九泉室晚日潛餘光淒風自蕭瑟
精神一飄散百骸非我質雖有安期方誰能起枯骨

應侍中璩百一

負下未易居智者宜預防名不可虛作何為空激昂
唯予久宦遊解綬還故鄉放情畎畝間逍遙以相羊
不知何年少譏我於路傍功業何所名三為侍中郎
歸身衡茅下自謂輕侯王詩書闕刪述竹帛無輝光
數者無一可何以稱賢良余聞默不語恍然若有仁
寄言當途者空名安足揚

繁主簿欽咏蕙

蕙草抱幽性結根北山岑既為危石掩淩此寒泉侵
所居險且僻將何表貞心白口不蒙照蹊谷長陰陰
春榮良已矣秋氣忽已深涼風日相迫柔條將不任
幸逢楚屈子惕然為我吟庶幾孤芳在當不慚知音

嵇中散康言志

夙齡負幽操樂道耽重玄紛華非所好踈懶任自然
流俗競馳驅咸為榮利率高下橫相傾怵惕生憂艱
咄哉非我鄰傾心慕羲軒老聃去周柱武仲逃箕山
逝將謝時輩抗跡凌雲烟逍遙北山曲枕石漱流泉
飛鴻脫網羅神龍得其淵遺形絕氛垢從容養耆年

散髮青林中援琴揮七絃莊生信我師赤松永周旋
清虛足自樂人世復何言

阮步兵籍詠懷

步出東都門徘徊霸陵陌漢主今安歸陵墓生荆棘
榮華豈長在勲名復何益白日鹵南馳光景忽相迫
斥鷃翔蒿蓬鴻鵠遊天極卑枝可以棲高飛鳥所適
秋風鳴庭柯歲暮空悽惻

傅司隸玄感時

憂人苦長夜烈士傷暮年圓光照帷幕轉展不能眠
屣履起出戶逶迤步庭前矯首望飛鴻傾耳聞鳴蟬
明河燦如素三星在中天良夜詎幾許對景空流連
大火流西隅時序忽已遷常恐秋氣肅霜露一朝繁
百卉俱飄落芳蘭寧獨鮮脩名不早立歲晚欲何言

張司空華離情

蕭蛸在房戶雙燕鳴雕梁所思今安在臨風獨彷徨
鳴琴忘舊曲枕席尚餘香昔嫌冬夜短今悲夏漏長
自君從遠役無復織流黃萱草雖消恨何忍變衷腸
何司空劭殺贈

結構山水際喬木多清陰幽泉湧微液危石羅高岑
時來春氣嘉四望綠草深握蘭念同志抱瑟懷知音
張侯臨衡宰雅度宿所欽恭儉豈獨古休容良在今
清淨民以壹朝野聞謳吟既歡偕省署復憶同園林
逍遙泉石間魚鳥共浮沈功成宜止足早晚幸抽簪

陸平原機羈宦

予本倦遊士偃卧谷水陽綵旃降天惠厲翮思遠翔
懿親餞南浦知友訣北梁肅命絕思戀擲耒希恩光
馳驅赴京洛怨彼岐路長揚舲遡驚湍策馬超崇崗

哀猿徹曙響遊子情獨傷明發入承華厠身英彥行
珥貂趨博望鳴玉憇巖廊長裾發麗色丹紱令我莊
飭躬眷榮寵戀本懷舊鄉綢繆銅龍內三覩秋草黃
碩逐南歸鴈一舉渡江湘

陸清河雲贈婦

宦遊辭舊邦遙遙至京國戒棲洛水傍子在崑山側
關河阻且修魂夢不可測振衣想芬芳覽鏡改顏色
迨惟燕婉初結言固金石契濶無二心浮沈豈云隔
何意中道乖抱影各悽戚宛洛多妖姬眉宇恣彫飾

織手楊素輝羅襦散薤澤傾城誰不羨流盼忽相迫
皎日良在茲寸心終不易

潘黃門岳述哀

冉冉日月逝春秋更代遷念子歸泉下悠悠忽經年
愁思安可忘俯仰涕潺湲入門似無依羅幃止蕭然
蕭然誰與同寒月照房櫳流光入屋梁恍忽覩儀容
儀容隨光滅彷徨待明發饑禽號北林猶疑哭聲咽
青鳥來何時雙鳶竟長別薄言登高岡臨墓情悽切
蕭蕭寒木零皎皎嚴霜結孤魂今何之狐狸自成穴
冥冥松楸間何當共奄沒奄沒終有時驅馬暫來歸
閑房寂無人形影自相隨餘芬猶未滅笑言不可期
徒勞擊莊丘彌令心不爽

潘中書尼迎駕

伊洛湧奔流脩却望如霧廣陌被荆榛平原挺高樹
戴星趨前途指景倦末路疾飈動地起白日下山暮
野有採薪客息肩適相顧問我奚所之逼迫嬰立務
乾坤方板蕩河山信非固豺虎日相啗狹狹橫馳騫
長離遭彈射驂騑羈棧輅天子亟蒙塵群公苦中露

文德宿所希武功豈足慕大駕猶未還奔命不遑卧
何當舞干羽遐邇悉歸附

左記室思咏史

亭亭凌霜桂在彼南山幽翩翩達世士抱道棲林丘
巖陵釣江水龐公耕綠疇豈無濟時策豎子不足謀
鬱鬱天子邦擾擾羅公侯甲第連雲興簫管震皇州
田實恩既密金張寵復優誰憐賈太傅默默渡湘流

張黃門協苦雨

屏翳號雲興望舒脩離畢海氣成朝霞山雲掩秋日
霏霏迅雨零浩浩長河溢臯蘭摧華英園菓落朱實
感時多所懷慕類情非一伯牙方絕絃郢人遂巨質
戰勝遺在榮屏跡戀幽室惜無同心者共此杯中物

張著作作載悲秋

逍遙登高城遠望南山隅白日半淪匿餘光在桑榆
涼風起中野蕭蕭振平蕪叢林慘無色密葉日夜踈
仰瞻明月來俯視白露濡衆鳥咸歸林孤鴻獨焉如
淒淒感節物皇皇思敝廬干戈日相侵故國為丘墟
坟墓不復掃親朋盡離居積思令人老容華日凋枯

歸期尚未卜奈此歲將徂

曹襄陽攄感舊

晏嬰罷齊相門巷生荆棘翟公辭漢廷烏雀入其宅
居高信多士在約寡相識鮒魚悲涸轍遊鱗樂深澤
伊余獨遭迴奚所托其跡同袍棄我去翻然振六翮
總有千金裘詎憶無衣客鄉人敦故交落魄每相惜
命酒歌豐年邀賓進燔炙傳語當途人南山視松柏

傅司隸咸退隱

衆星環北極百川走滄溟藹藹帝王都萬國來豪英
平津啓東閣驃騎開西營淮陰迎枚叔成都徵長卿
鷄鳴天未曙車馬紛從橫中途何珊珊唯聞雜珮聲
余固骯髒士懷書入帝京十年不一調何為久承明
飛鴻思故鄉翩翩將遠征朝辭丞相府晚出洛陽城
歸卧東臯陽蕭然謝浮名進當佐廟謨退當終耦耕
惟願堯天茂四海共清平

劉太尉琨傷亂

素景奄昏霾九有競龍戰鼙鼓振邊庭戎馬生郊甸
咨余忝國恩慷慨抱忠眷投筆揮龍淵捲衣披組練

矯矯烈士風寸心宿所羨望諸將五軍齊器入燕殿
舞陽一怒目脫此鴻門宴魯連解趙焚孟明報秦怨
夙夜自感激將從數子願奈何髮種種勲名未及逮
時乎不再來逝矣若飛電勁草摧寒飈榮條萎霜霰
干將使補履何為空百鍊廢興難預謀疇能策時變
靈卽中謔感交

蕙圃合衆芳崑丘聚群璧赫赫雄俊士濟濟生王國
河海無擇流微軀時見辟恨非扶搖翰繆比鷦鷯翼
締好薄金蘭抵掌傾胷臆處安信同聲迫險豈殊則

中原橫風塵太陽遭薄蝕將騁萬里圖因追千古跡
五賢輔晉君霸功何赫奕四臣佐齊后疆土日已斥
藺生會渑池秦缶終一擊伍胥涉漢川楚君忽三北
勲業未暇謀飄蕩不遑息感別令人悲懷思使心惻
神由魂夢交形以閔山隔賦詩良未工聊以慰離析
一部弘農璞遊仙

朝士憇朱門羽人集丹丘蜉蝣不足群飄然遂遠遊
息駕鍾山巔迴翔十二樓白雲在簷下玉樹羅庭幽
中有千歲翁端坐彈箏篴養志默無言餐霞挹清流

王喬來何方跨鶴驟青虬朝遊崑崙圃晚宿鳳麟洲
千年當一返舉手謝巢由

孫馮翊楚述感

北風捲飛蓬白雲起秋色肅駕時遠征將為萬里客
親友念乖離握手問所適天地皆送旅何往非我宅
有生信大夢千齡同一夕彭錢苟不存殤子未為迫
泰山等秋毫朝菌即松柏得失如循環倚伏難窺測
智人貴遺形愚士空怵惕去去何所言與物同消息

張司馬翰時興

老不可更壯賤不可再榮頗懷古人志不與流俗并
蹇劣乏世用歸來守柴荆青陽忽已暮百卉方含英
落紅如布錦啼鳥疑吹笙徜徉東海隅長歌激新聲
且醉生前酒安知身後名

孫廷尉綽雜述

大塊育庶類擾擾相回薄衆妙由自然渾沌奚可鑿
純樸久已澆大庭不復作將隨北冥翼矯跡思遠托
深惟養生義縣解實寥廓滓雉棲藩中疇復能飲啄
夷跖咸亡羊彭殤均冥漠槁木吾形骸斯可窺橐籥

遁逸離人群西山有笙鶴
鼎、秋雲飛長嘯臨絕壑
鼓腹呼蒙莊濠梁韻如昨
蕭然物無違允識儵魚樂

許徵君詢自叙

丈人恥桔槔海客狎鷗鳥
養真太素中恬然滌機巧
攜予希母情浪跡青雲表
天府何寥々埃氛滅如掃
採秀昇群峰厯覽窮所討
輕霞抱高岑靈飈擊豐草
精爽日飛揚彌覺洪爐小
天闕上空濛巖扉下窈窕
坡美巢居士樓遲信深奧
棄世遊冥々捫心謝蒼昊

殷東陽中文興矚

朱明徂暄濁金天肅清妙
惻時動遊興振策起臨眺
厯險超驚流追竒陟群峭
賞心與物遇水石朗相耀
萬竅歎涼颼孤猿遁幽嘯
沉冥性所耽林壑豈虛好
世榮香不及長川永垂釣

謝僕射混遊覽

駛矣六龍逝窘哉百憂侵
磅礴泥滓間未獲清煩袪
睠然念徂秋飛轡越長林
尋香入蕙若望遠厯川岑
丹葩散竒彩青松垂茂陰
迅商乍北至扶光倏西沉
時宴將如何憂思互相尋
佳人隔天末躊躇勞寸心

勞心將誰慰几上有鳴琴

陶徵君潛陶居

生平好閒逸所樂在琴書悠々南山下聊以卜其居
孤松夾憲牖叢菊羅庭隅清風有時來浮雲自卷舒
晝遊東臯陽日莫歸我廬何以終長夜一觴聊自娛
人生貴適志舍此復何如

謝臨川靈運遊山

生平希遠遊所歷窮車轍矧延依丘園身名兩相減
拂曙躋霓巔望昏憇風穴暝昭景氣殊行子倦不散

扶光半淪徂巖阿增缺軋雲移岫欲來谷咀泉疑咽
仰觀長河流俯惜羣芳歇木落聞驚焱山明來皎月
桂芳咸在斯瓊枝若可折沉吟感物化慷慨嗟窮節
恋賞誰為心探竒性所悅逝將理行艫越海窺窮髮
攀援若木林想像金銀闕永矣青雲棲豈伊歸路絕
賦奪陽林葩心契寒巖雪我行疇與偕偃佺在天末
顏特進延之侍駕

衡岱涖虞鑣瑤崑殫周轍燕鳩惕睿思豫遊俾庶悅
叩鯨鏗大呂羅貂降朱闕駕肅金根飛天行玉虬發

赤羽燦歲豨風輪轟激洌鶩目歷封畿騰聲震胡粵
侯甸既呈環閭闔亦霧列脩谷冒春葩遙峯吐朝晰
陟險超嶽岑藉芳耽酷烈歌蕭會群后頌觴聚時哲
版築徵胥靡涓蕞迎黃髮敷恩洵汪濊濫吹嗟薄劣
假翼非晨風揮絃慙郢雪陳詩良未工庶幾瘳鬱結

謝法曹惠連叙別

東風扇洲氣萬象含春色遊子羨芳時理棹將遠適
臨岐眷親友下堂思几席關河路有涯鄉土情無極
伯氏念行役餞我南浦隈揮觴懣中道交手臨高臺

種種十年心悠悠千里懷危檣望弗及舉目空雲霾
飄飄越長川鬱鬱傷懷抱朝發臨江樓暮入西陵道
悽風忤時興寒雪霑芳草飛華混遙天積玉埋江島
孤舟靡所逝逗纜河之湄望鄉隔遠岫觸物增離思
飢鳥號中林落雁迷空陂淒其旅客歎筑獨居人悲
煙波攪歸心忽憶東山側風驚池草亂雪盡山桃坼
昔與同琴書今誰共朝夕迴風且莫定使我歸帆亟

王徵君徵養疾

商飈動高樹葉落秋山空寒蟬咽不鳴流螢滅魚踪

明月川上來照我羅帷中藥餌心所關瑤琴調難工
形骸漸枯木衰鬢成飛蓬緱山王子晉飄忽何時逢
三花徒在想九轉疇能窮獨此徑寸翰可以慰幽衷
袁太尉淋從軍
結髮抱遠畧挺身出幽燕始逐嫫姚軍長駘度居延
功就賞不行歸來還戍邊蕭索薊門北四顧無人烟
悲風日夜興冰霜春夏繁夜卧不解甲朝食長控弦
心居魏闕下身老燕然巔壯圖空自許竹帛誰為宣
還念漢飛將數竒誰使然

謝光祿莊郊遊

巾車越平莽騁目遵郊圻雲天乍清迥洲島啣徂輝
潺湲碧流駛鬱律丹嶂竒風掣石溜響露浥山英被
晻曖憇深竹颯沓來陰霏決肯送征雁傾耳聆天鷄
度世欲投組耽雲思拂衣神棲閭風樹心繫珊瑚枝
杳然隔囂滓曛黃以為期

鮑參軍照戎行

大漢恥未雪匈奴氣猶驕邊霜下秋草胡馬奔臨洮
君王震赫怒飛書召嫫姚伏鉞晝辭闕揮鞭宵度遼

星飛集羽騎雲合羅旌旄刁斗震虜營
沙摧漢貂微風且透骨輕寒猶折膠
馬汗凍成雪鐵衣寧可袍懸軍有絕險
追虜無還鑣報國但死戰疇論勲與勞
沙漠苟靈寤戰骨隨蓬蒿

休上人怨別

日落楚山碧涼風正蕭然伊人竟何許
金波空自懸叢蘭被秋露高樹寒蟬
玉杯罷新醪芳塵生舊編心飛雲夢澤
目斷瀟湘天謾草詎消恨浮雲難寄言
江水流不息何如客愁煩

南平王鏐登眺

靈嶠鬱峻嶒標竒瞻遊觀攀崖躡蘿踐
霄漠危峰聳欲隨幽泉奔且散谷寒迷
冬春林冥混宵旦咨予困囂塵覲茲攄
憤憑舉手謝喬松携爾卧巖畔王將軍
僧達荅友

司馬瞰石室東方官金門麟獲緒斯紹
陸沉道彌尊我友秉靈異邁古超常倫
懸河吐微言操觚振清芬愧茲鷦鷯翼
頡彼翔鳳羣交深絕市道情洽由性真
曲室畫同偃醴醪宵共醺歡餘忘景逝
倏忽值莫春

芳萸被脩畛初鳥騰荆綦行樂感徂節投詩展慙懃
三瓊徒懷報七襄詎成文

王著作融遊印

機息禪始悟地偏心愈寂懿彼梁王臺翻為給孤宅
桂棟垂長虹璇題布綺翼砌遶丹葩明庭聳孤桐植
岫影落瓊筵山靄騰瑶席風起松門清露下荷珠白
象外信多美區中豈投跡樂哉名園遊罍塵從此隔

謝吏部朏旅望

魯叟題龜岑荆臣睠郢道臨景情凄其千古齊懷抱

芳林錯如繡遙空澹疑掃輕風韻脩篁落日邀歸鳥
目隨長江盡神飛故山杳歸心方鬱陶離思徒紛擾
未果白雲期已覩朱顏老何當解朝衣去宿東園草

沈光祿約直省

西風乘夕起蕭條滿禁林啓扉候明月高閣更沉沉
玉琯晚涼映金門秋氣深螢火當軒度寒虫遶戶吟
虛壑想垂釣華省未抽簪幽蘭與叢桂空滿北山陰

江記室淹客遊

客遊倦登陟荆門復險艱北踰方城塞南阻穉陵關

陰雲曠空谷白日淪秋山涼颼動嘶馬凝霜彫客顏
淒其歲方晏俯仰涕潺湲抱影對孤月依芳惜叢蘭
瑤琴徒在御琅玕詎能餐試為關山曲方知行路難

范僕射雲貽友

貧交古人重斯道久陵夷惟我徐方牧不為世情移
予本負薪士結搆南山陲清晨從所務薄暮未云罷
不意軒冕客枉駕碩蓬茨旌麾蔽原野車馬溢川池
叩扉鷲鳥雀主人竟何之龍媒難久駐浮雲送金羈
相告軒車不可追君抱巨卿信予慙元伯期

情 共徒此秋風悲願因江上月千里寄離思

深簡文帝閨懷

金風啓玉戶銀河應綺扉月挂秦樓鏡霜侵趙女衣
良人方北戍陽鳥復南飛芳年值遠別長夜守空帷
紅妝罷七寶華燈摧九微羞織鴛鴦錦德上流黃機
閨中歲月促遼陽音信稀妾如籬下菊誰為惜芳菲

何水部遜示

江寒夕颼厲纜解宵征肅金波漾中流玉露溥平綠
潺湲湍瀨響泱泱扶輝昱柷鼓蘊遊鱗曙開喧羽族

即事倦孤遊懷人阻川陸窈窕金閨深透遲江路曲
睽離且歲時羈旅更涼燠束髮秉微尚潔志棲幽獨
園廬久踈蕪世網苦羈束請謝簪裾行歸來候樵牧
陰常侍鏗傷別

北梁開餞席南浦送歸橈不獨風波險其如閔塞遙
芳洲草初綠春林鶯欲嬌雲迷望鄉處柳折送行條
孤帆天外轉朱顏客裡凋縱有楚臣賦離魂詎可招

庾開府信對酒

春花爛成綺春酒凝如玉管調羸女音琴奏羅敷曲

白日歡未終良宵猶秉燭嵇康玉山倒淵明葛巾漉
素落開芳顏竹葉含新綠朝從吏部眠暮就黃公宿
人生譬奕棋百年終一局請賣橐中裝慰此窮途哭
徐僕射陵春情

歲除殘雪盡節換物革新淋氣梅間吐晴光柳上頻
椒花春作頌桃葉晚留賓片月裁歌扇驚鴻象舞人
回眸貽玉澤度曲動梁塵只是瑤臺上何須洛水濱

江記室總咏琴

龍門標異質焦尾布朱絃未許周郎聽能令卓女憐

座中飛急雨石上瀉流泉別雒朝還啖孤鷺夜不眠
鍾期久矣沒彈罷一悽然

楊司空素坐懷

結構巖石間峯壑並竒厰古木騰幽陰飛泉激清響
山空白日寒地古蒼苔長麈麈繞戶鳴猿狖攀條上
丘壑饒孤興空齋蕪遐想芳蘭坐消歇故人各天壤
登高望白雲冷然使心往安得同懷客共此西山爽

薛內史道衡酬憶

河流隔如帶蓮峰望似雲別路在俛仰離思徒氤氳

氤氳心愈結俛仰音書絕淚霑羈客衣夢斷函關月
關月照行舟理楫漾中流雲開遠山曉葉落長林秋
秋林正搖落日夕傷離索故人信同心獨贈瑤華作

唐太宗遊幸

壽丘曾繞電弱水舊流虹愧予承曆數夢日有茲宮
束髮值草昧揮劍掃群雉澄清四海一滌蕩百蠻空
越裳爭入貢肅慎亦來同白登雪漢耻干羽盛虞風
偃革敷文德垂裳戢武功少昊清西陸金風送遠鴻
巡遊逢景麗省稼樂年豐還鄉訪耆舊高宴饗群公

大風應有作歡賞寄絲桐

王參軍勃夢遊

至人性本靈入俗塵不沒區中思鬱紆方外情
寥泬卧隨蝴蝶遊倏爾超天闕閭闔乃瑤扃
帝宮盡金埒拂霧披霞裳乘雲追日轍
濯濯臨咸池回翔憇月窟瓊娥遺桂漿
玉女授丹訣大塊苟幻泡華胥非妄說
從此悟真詮滅跡棲岩穴

楊盈川炯泛峽

三峽天下險䟽鑿維禹功千尋石壁斲
萬里飛流通

蛟龍日鳴吼煙雨恒空濛帆檣出地窟
草木生雲中我來值秋水畫鷁如浮空
睇目極岩岫尋古懷英雄卧龍有古廟
躍馬無遺宮客心正惆悵空山聞夜鴻

靈典籤照鄰詠史

周網既解結策士方從橫宇內亂無主
山東困強羸吁嗟魯連子倜儻稱狂生
片言折魏將談笑開秦兵解紛不受爵
布衣欣自榮千金豈不重乃與鴻毛并
遁跡人莫識飛書下聊城蹈海亦何恨
千載留雄名

駱臨海賓王述懷

酣歌燕趙日落魄高陽年始期賈太傅弱冠趨甘泉
晚同揚執戟白頭草太玄讎書車五兩比劍客三千
叩商誰識甯躡屩不逢田退飛終鍛翮點額獨沉淵
函谷貂裘敝公車草履穿未蒙天子召徒惜歲華遷
十上書何益三啼玉可憐范橐馮誰載韓灰倘復然
漢兵屯紫塞竇騎入幽燕方投定遠筆直受繞朝鞭
烏號持隴月魚貫掃胡烟靈龍堪運策瀚海日開邊
詎邀茅土薦但使竹帛宣捐軀赴國難起冢象祁連

陳正字子昂感遇

涼風起西北鷓鴣鳴枯枝感物心多懷慟堪令人悲
天道良難測哀榮安可知春陽未及翫秋霜忽在茲
吾生隨物化大運與時移唐虞世已矣去去將何之

杜學士審言送遠

長安春草芳灞橋楊柳結天書出未央使臣持漢節
飲餞千官集和羗萬里別路遶白龍堆心羈丹鳳闕
皇威播遐荒匈奴掃將滅逝將覽崑崙非閑探虎穴
尋源擬封侯橫草垂遺烈母為蘓子卿空飲天山雪

沈詹事佺期訪道

桐栢蘊仙靈石梁標神秀曠哉司馬氏憑靈結雲構
簷端宿煙霞庭際羅岩岫俯聆瀑水丞仰荷長松覆
瀑水流魚已丹液實堪漱長松寒不凋蒼顏與俱茂
九轉刀圭成三疊琴心就夙昔慕仙源棲遲此中舊
排霧謁真人談玄依石竇形骸委靈魚洞壑絕氛垢
自縮簪纓來斯遊不可復追隨青鑠班局促明光奏
徒懷鷹鶴心未息蝸蠻鬪令喜棲函關葛洪請勾漏
丹砂信可求青牛豈虛覲逝將探黃庭從君挹丹溜

宋學士之問祀海

當春巡明祀齊宿卧瀛岫無風濤自翻近日天易旦
寥廓萬象分朝宗百川灌天地此沉浮雲霞更燦爛
鷓鴣空際翔鷗鷺沙中亂疾浪長鯨吹霧山巨鰲冠
馨香冀神高斟酒臨風裸因思上古來幾睹桑田換
秦王費登臨徐福終誇誕驅石詎成橋採藥徒興嘆
伊余方奉使乘槎思上漢未瞻牛女亭且憶儲胥觀
金閨幸通籍鳳池類染翰慈闕心雖勞賦海文尤煥
王澤信云敷群靈良已衍庶幾永無波白雉來天畔
薛少保稷渡陝

孤客倦行役，陝路何悠悠。單車既蕭索，况乃值深秋。
四顧心多感，非止越鄉憂。長陵盡蔓草，咸陽唯古丘。
古人復誰在，黃河空自流。天地無窮已，人生忽若浮。
百年同物化，皇天何所求。

張曲江九齡感遇

臨風默不語，所思天一方。美人今何在，秋蘭徒自芳。
浮雲蔽山嶽，江海浩無梁。豈不願從之，柰茲天路長。
俯視淵魚遊，仰觀高鳥翔。浮沉各自適，安知我衷腸。
淹留歲將宴，庭草被微霜。

崔員外顥游俠

幽并尚游俠，結髮氣從橫。彎弓石為開，揮劍魚留行。
翩翩青絲騎，繚繞縵胡纓。射鵰丁零塞，穿楊嫖騎營。
邊庭適警急，鳴鞭出長城。連摧右賢陣，再倒單于旌。
歸來拜甘泉，英風震咸京。天子賜顏色，羣公競逸
迎朝回飲平樂，千鍾坐自傾。談兵詫劇孟，擊筑笑荆
卿。憑君誚輕薄，麟閣有勲名。

李翰林白自叙

三十六洞天，往々棲羣僊。僕本寡廊士，傾心慕紫煙。

蚤歲逢真人寶訣授長年方期跨鸞鶴抗跡崑崙巔
何意迫世務局促墮迷川壯圖苦自矜咲詫風雲生
擊劍搖五嶽振筆麾群英非無匡時畧軒冕不足榮
未敢逃商山海內方清平丹書落九天奉詔入承明
奏頌金鑾側一旦生顏色聖主親調羹金盤傳綺食
朝下銀臺門走馬長安陌新豐十萬家美酒三千石
胡姬豔如花當壚善吹笛笑投珊瑚鞭就醉龍鬚席
賢豪昔傾慕片言成莫逆遨遊未終朝歸心湍山澤
浮雲掩太陽明珠溷砂石被褐謝簪纓還為釣鰲客

臨別望金門躊躇淚沾臆一辭京師去飛蓬任所適
非上昭王臺南過賈生宅湘江空自流駿骨誰能識
功名不可謀歸卧廬山幽星辰簷下列天地杯中浮
霞明三岳曙雲白九江秋身披宮錦袍昂藏上扁舟
牛渚夜堪泛赤松朝共游閒歌白石爛醉爇滄浪謳
有時夢釣天徘徊丹鳳樓未能忘魏闕聊且棲滄洲
乾坤忽崱摧輦鼓震幽州長蛇吞上國奔鯨觸飛流
胡塵暗四海蒼生靡所投潼關渡豺虎京師困豺貅
帶甲三十萬接踵填鴻溝天子夜奔蜀公卿並縲囚

兩京佳麗地一夕成荒丘予時隱浚谷永無天下心
不意潯陽騎逼迫來相尋雖為淮南客不受梁王金
安知天網密靈戮下驚禽人生百年中變故那能測
昔辭供奉班今就夜郎謫萬重關塞遙千里音塵隔
迢迢閶闔門叩之安可得南陽氣色改聿來天地清
金鷄忽放赦浥浥夜郎行螢光生腐草寒谷發春榮
試登黃鶴樓將逞萬里目楚山入戶青漢水揺天綠
襴衡如可作邀爾醉江曲我生能幾許屢遭此翻覆
翻覆將如何不如且酣歌倒却鸚鵡洲飲盡瀟湘波

鯨鯢未剪滅戎馬尚星羅常慕魯連子笑談解兵戈
夙夜自感激思一渡黃河功成報明主飄然入大羅

杜拾遺南述懷

男兒志四方窮老未改轍天步恒艱難請陳其曲折
自余束髮初襟懷頗踈豁讎書竟今古非徒帚編絕
元元吐文藻勢擬奔濤決岑王及高李和歌相激烈
雕蟲詎足多經濟庶不乏思佐唐虞君身與夔龍埒
安知終落魄浩蕩游吳越奔走風塵間旅服常百結
三載客京華生涯轉蕭瑟寒當就密樹飢則拾橡栗

時來仰恩波獻賦蓬萊闕天子下明詔尚方傳筆札
染翰中書堂光彩動毛髮勉趨朝班委身聊釋褐
未幾值天怒土崩九州裂胡塵起漁陽旌旗蔽日月
哥舒稱宿將前旌已先折潼關百萬師一夕為枯骨
翠華西南行蜀道殊恍惚中原半丘墟蒼生百遺一
都人盡西望計畫安所出叩馬留儲皇中興庶有日
上皇親授璽詔令復舊物龍飛鳳翔縣四方集將卒
甫雖儒生輩眷國心不輟愴惶赴行在路險難具述
下者歷地庑高者超木末不睹漁樵人但經豺狼窟

有時遇胡騎千群正馳突心驚成死灰至今猶戰慄
辛苦到岐陽謁帝陪鵷列春陵佳氣滿妖氛計將滅
矯矯郭將軍破胡方仗鉞秦中既滌蕩東都不日拔
車駕還長安平明天仗簇肅穆司隸章寮寮青瑣闥
輝輝宣光業區中望若渴至尊警宵旰戰士憤未雪
雄哉房相國生平負竒節帥師徇關右任舉欠明詰
頓令陳濤水半擁官軍血君王按劍怒公卿咸卷舌
甫也有言責上書陳激切惓惓為國意吾君苦未察
玉焚有餘燎瓦石亦被孽華州非遠謫柰與金門別

丈夫本昂藏屈首就羶綆拂衣去幕下蹭蹬還蓬蓽
妻孥經年望及見轉食卒溫涼不復叙執手但嗚咽
嬌兒衣不完老妻面如漆小女喜父歸蓬首不遑櫛
生還且自慰敢言生計拙邦家尚多難賊勢猶猖獗
羽書從橫至戎馬何時歇蹙踞幽燕都兵疲玉關雪
終宵撫枕嘆哀時每中熱揮涕望京師昭陵久蕪沒

孟襄陽浩然訪僧

雨霽南山青斜陽照芳草偶來訪幽人登陟隨飛鳥
半嶺聞鐘聲禪房出雲表入門檢法華一樽聊共倒

李無津梁意愛此園林好亭空明月來頓覺山光曉
長河挂簷端飛泉懸樹杪因想浮槎人何處尋三島

王右丞維山居

晚歲悟禪寂結茅輞川陰夾堦萬木秀繞戶清溪深
興來或策杖偶爾竄幽林好鳥若有待閑雲總無心
野老挈我坐相與談古今悠然遂志返不知齒日沉

高常侍適臨邊

仗劔臨絕域北望陰山頭沙漠三萬里但見黃雲愁
漢武昔開邊衛霍封公侯勲業竟誰在白骨填山丘

空餘黃河水千年入塞流

岑嘉州參旅宿

悠悠遠行客日暮投孤村
田家酒新熟邀我傾芳尊
蕭條寒木落淒其霜露繁
臨風動歸思當杯慘無言
鄉國久以曠親朋無復論
且當投簪去空山永閉門

王江陵昌齡齋心

古木鬱森藹石室無纖埃
蒼苔日復長白雲常自來
饑餐金鵝蕊渴飲流霞杯
長空萬里碧使我胸襟開
澄潭淨無染何如明鏡臺

儲參軍光羲述耕

平居厭塵紛性本耽幽獨
所以棲田畝躬耕欣自足
春郊時雨霽百卉含新綠
命嬾烹藜羹呼兒牽白犢
清晨向東疇薄暮歸草屋
林鳥晚自喧各還舊巢宿
我亦入我門甕頭春酒熟
百年如夢幻紛華非所欲
但願禾黍成聯以供饘粥

常徵君建聽琴

幽人揮七絃匡坐鹵山巔
山空白日靜曲度風蕭然
俄驚石壁下颯々飛流泉
行雲落空際碧宵淡魚烟

清角四五奏，淒斷江南天。再為幽蘭操，滌我區中緣。
心靈身若妄，頓欲凌風旋。從此悟縣解，飄飄逐九僊。
劉隨州長卿懷古

扁舟汎楚水，覽古襄王宮。高臺無遺址，喬木多悲風。
吁嗟高唐客，朽骨隨秋蓬。前瞻巫山渚，古廟青林中。
神女知有無，雲霧空濛濛。日落江色暝，携舟傍漁翁。
滄浪歌未已，離騷恨無窮。逐塵心易感，揮淚濕江楓。
錢郎中起獨遊

獨遊任所之容與，長溪側解帶臨清流。濯足冰壑石

坐久不覺暝，鳥棲林窈窕。何來雀髮翁，持竿遠相覓。
夜深溪更寒，月明魚不食。對景復懷人，遙見天路隔。

韋蘓州應物幽居

野人奔踈曠，于世無所求。散髮欣自得，樂此山居幽。
時來春氣和，黃鳥鳴枝頭。北窓晏方起，逍遙步林丘。
芳草自滿徑，儵魚戲清流。朝與山僧期，晚同麋鹿遊。
特以養真性，非敢傲王侯。

柳柳州宗元檢經

焚香禮空王，齋心洗煩慮。開函檢真經，沉默探其趣。

苦海原無涯
靈空安有住
寂滅了此生
始與三車遇
試覽庭除間
白雲滿高樹
幽鳥靜不飛
于道若有悟
得意便忘言
迷津庶可渡

李北地夢陽離憤

亭亭孤生栢
托根江水傍
白日麗中天
浮雲蔽其光
乾坤安所之
河漢邈無梁
結言寄高鳥
將以吐衷腸
安知天威肅
五月下嚴霜
豺狼夾轂鳴
胡馬互相望
男兒心許國
兒死復何傷
念我平生親
能不一徬徨
鴻飛失其群
孤鷺天一方
戚戚同袍友
奈此幽蘭芳

中情良難化
長歌獨慨慷

何信陽景明詠懷

采蘭紉作佩
裁荷以為裳
所服信自潔
人誰知我芳
荼薺不同畝
臯鸞豈准翔
骯髒投路隅
伊優升北堂
一朝海西侯
出自鄆邯娼
百戰李將軍
獨不被恩光
所以陶彭澤
歸來卧柴桑

李濟南攀龍雜興

驅車適帝都
北上軒轅臺
黃雲淡無色
遙自陰山來
古木鬱蕭蕭
清秋氣悲哉
翹首望塞門
萬里空塵埃

燕昭邈以遠駿骨埋蒿萊無路不羊腸楊朱徒自哀
吁嗟名利場自古多徘徊

王弇州世貞述恨

弱植工雕龍灌奧靡不測巧梅羣玉殫冥搜石函拆
觀光尚髮燥及弁乃通籍陳祿中郎班跼踖三輔後
京邑燎方揚崑峰遭煽赫閭闔詎可排虎豹守其側
緹縈徒上書偉元遂號栢捫心肝瞻灰灑淚平原赤
雉經甘自輸盆覆令誰白亢九昏氛盈維新天地革
睿鑒燭幽隱涸轍咸蒙澤庶女起號天齊臺振風擊

帝曰嗟無辜哀詔姦褒恤白骨良已肉死灰更生色
載追鴛鴦行謬叨開府職邯鄲風旆翻斜谷星軺飭
九折方魂消七奔緣命亟羈宦倦囂塵懷歸甘閭窳
揚帆截五湖葺宇邀三益浮榮曷足耽去掃祗園石

酉陽山人編蓬集

雲間唐汝詢仲言父著
友人周紹節希允父校

五言古

感懷五十九首

并序

晉阮步兵作咏懷唐陳拾遺賦感遇青蓮則
有古風五十九首此皆意有所鬱結不得通
其道而發之於言余既盲廢等此身於蜉蝣
渡安所悵恨第蓬心不死世變百出偶觸於

懷若感霜之鐘不叩自鳴每有所得輒令故人書之久而成編如青蓮古風數雖不足以驅馳大雅聊以寄傲當時儻山人之瓢不隨烟波淪沒俾百世而下知唐生非沒沒牖下者云

成周沒已久風雅寢銷亡素王既絕筆騷客復沉湘四海何紛紛七雄趨戰場秦人逞虎視焚書滅舊章赤帝馬上雄頌聲終不揚河梁悲絕國鄴下惜無王陶以孤松秀謝似芙蓉光毫端日龍戰變極於齊梁唐家好文主復古自巖廊翩翩釣鰲客颺起青蓮鄉雄哉杜陵老彬然相頡頏自從二子逝詞苑遂蒼黃江西小孺子顛倒吾衣裳聖朝屬休明逐胡靖封疆乾坤幸再闢文物喜重昌律和正聲作詞人滿朝陽北地既鳳舉濟南復龍驤三吳英俊域二美獨昂藏群才鬱雲興槐棘燦成行誰知幽谷底別有秋蘭芳

其二

湯武稱革命不魚臣伐君邠金縞素師杯羹何為分

秦王謀劫父雪耻垂空文趙氏凌孤弱黃袍令三軍
嗟哉五明主咸有非常勲白璧一為瑕千秋議所聞
孰若我 高皇應圖解世紛長驅左袵俗衣冠燦成
雲制作叅三五儀章稽典墳謀謨邁千古永與黃虞
群

其三

嘗聞姬叔旦負袞安少主藉令成不君天位寧自處
如何曲沃間倒施冠與屨白石一興歌儻君置何許
已矣余何言豈惟曲沃然

其四

漢德夙已茂乾坤方太和明明十二葉四海澹無波
燕安易淪溺鴆毒常苦多安得憂勤主起問夜如何
其五

武侯初未遇潛身藝禾黍管樂徒自矜時人莫之許
魚水存風期遇合英雅主炎光滅復然鼎足分疆宇
丈夫信龍變未易觀出處世無崔州平咄嗟誰與語
其六

鳴鶴羈樊籠志乃棲窳廓誰云閭巷士獨無經世畧

飛書想聊城飲馬思河洛遇合雖無時放情常卓犖
豈同斥鷃輩甘心戲籬落

其七

漢家全盛時三十始稱貢太倉有紅粟四海安耕種
如何中葉主誅求恒擾衆截水成閔梁傾山出銀甕
乾坤箴匣中未必充國用何當惜露臺毋使蒼生慟

其八

象緯煥森羅河山錯如繡文質天使然哲匠豈能構
神聖闡其幽人文於此就如何斐然子雕虫競馳驟
棄彼黃鐘音瓦缶欣自叩傷哉此靜俗疇能正其謬
予心何所依三百周家舊

其九

漢武逞雄心征討窮天末吾皇本神武應敵兵始
發越海東夷平梯山南寇滅賀蘭小牧豎未足污斧
鉞威行寰宇清革偃群生悅外寧多內憂杞人念方
切安得烹弘羊一試周家徹

其十

土木陳王師熒惑方入斗胡兵動地來天子下車走

龍囚穹廬室金湯不復守桓桓忠肅公謫畧非世有
定策立邨王安危繫諸手謀謨宗社勲不在阿衡後
爽起來青蠅功成烹走狗所以漢廷中忠臣咸杜口

其十一

嘗觀魏晉間內地棲戎狄狡胡乘釁興陸沉王者宅
吾 羽奮天威驅戎歸漠北就磧分華夷肯使逾疆
場安知受降城竟為胡虜得套中水草甘六畜日蕃
息居山令虎衛禍機終不測巖廊肉食士疇抱安邊
策嘆息曾將軍捐身空為國

其十二

鹿臺錢作室西苑金為穴四海咸王家茲藏將安設
歛苛民力殫財聚河山裂殷鑒信不遠誰當思履轍
其十三

丈人抱甕灌公輸刻木飛巧拙各自好疇能定是非
惟魯信無術安劉乃周勃賫金非不竒亡秦竟李斯
其十四

秋夜涼風生凭軒覺蕭爽明月能鑑人靈臺共虛朗
流螢遠相照陰虫發清響憂來誰與言茫茫此天壤

其十五

矯矯金華士探古良已勤何患名不達剖琴動時人
我觀襄陽老終身棲鹿門天子識姓字千秋名亦聞
文成自不朽沽名無乃醜試覽感遇篇聲華信不苟
豈如季世士碌碌惟奔走徒有相門期無藉鳴琴剖

其十六

昔有巢居子乃在箕山陰三旬方九食布衣寒不禁
窮苦將何為終年無改心世情了無跡名利安能侵
沈耳溪水波徜徉松栢林清節傲當世千秋仰徽音

其十七

張公有龍劍銛能斷金石一旦沉深淵千載忽無跡
精光搃未滅淪沒誰能識長吁復長吁此其非命與

其十八

周道信平直黃河亦無波方舟去不怠民力將如何
瓊林良已溢箕歛常苦多東南天府國所恃非山河
物極有返時人誰甘網羅仰天歆號訴閭闔高嗟峨

其十九

絳侯嘗幽囚賈生方慟哭如何調鼎臣徃徃遭殺戮

君稱漢武明學教孫弘曲徘徊鼎鑊傍獨能享天祿
宦巧顏王網刑濫銷醇樸鈎曲反封侯今古嗟相續

其二十

悠悠五葦北川路走姑蘇樓船蔽水下自云來上都
青宮傳相臣聲價逸天衢嬪御逞容色陽橋競追趨
舜榮空照灼蒲柳易凋枯春風促去馬薤露引歸途
所以楊朱子臨岐淚如珠

其二十一

賣藥諱名姓鬻僑潛行踪隱淪性殊絕肯與時人通
如何喜遊子自謂商山翁紫芝不一採談笑傾王公
寄言謝玄晏作傳難為工

其二十二

大塊勞我形餘生苦無樂饑寒能驅人岩居復城郭
高尚夙有志壯心日零落役役置塵中誰辨雞群鶴
其二十三

魚游趨深壑鳥飛集喬林高門填朱履榮華人所欽
傷哉窮巷士落落卧川陰鵬鶚無雙翼不如蒿下禽
豈無高山曲誰將知此音

其二十四

季子東出關行路何遲遲
入門呼妻嫂妻嫂不為知
一朝佩相印親戚皆爭馳
壯士不易心愚者互推移
使其終草澤但為爾輩嗤
嗟哉巖穴士惆悵當何為

其二十五

古人貴節義聲華留竹帛
今人誇世榮造天羅第宅
運集車塵飛運虛堂廡寂
朝為登龍地暮為羅雀澤
外物徒紛紜身名竟何益
請書穆州言持謝當途客

其二十六

錢刀為何物非吾性
所有嗟尔世路人何益
充腸但一飽所餐不及斗
挂體惟禦寒短褐
棲身但容膝衡茅亦可久
奈何高門中財積
不見石季倫肌骨為此朽
榮啓長帶索淵明

其二十七

朝來天氣寒負暄茅簷下
四顧悄無人誰當
悲風正蕭條哀鴻鳴曠野
感物心多懷衷情

其二十八

蜉蝣何楚楚來往自相逐
人間日易斜爾何

卑枝可以棲慎勿思高木高木空爾思白日下崦嵫
其二十九

桃李開東園無言笑春風鸚鵡能言語羈此黃金籠
處世貴默默多言徒自躬不見王右軍終日嗅花叢
食其稱辯士身死誰成功人情不可測世事如飄蕩
嗟嗟弗復道悲歌寄絲桐

其三十一

河流初發時乃在崑崙側始出何涓涓涓涓史忽衝擊
奔沙走千里石動如蟬翼已矣君莫言人情恐亦然

其三十二

拙哉石季倫豪侈誇中壤梓澤開名園樓臺極宏敞
巖沼擬昆明累石齊仙掌雜卉散奇花珍禽發清響
無難窺化工未易離塵網山水為誰佳終年不一賞
身非金石固年逐東流往高臺一夕傾令我空悽愴

其三十三

明君務聞過設木求謗言暗主防民口一決如頽川
輝輝我熙朝德與唐虞宣如何列柏下不復收群賢
傍無批鱗士誰與回蒼天秦臣稱獨斷我未以為然

其三十三

貞臣抱寒寒抗疏固宜然水媚石無補徒多贅空言
藉此沽名譽豈足稱忠賢君看羊祜子諫草削無傳

其三十四

乾坤終始同風俗古今易濟濟長安途簪纓混蘿薜
嘗聞讓王士洗耳見清白豈意箕山雲飛入王侯宅
宣尼今不存令誰辨夷跖

其三十五

在昔殷深源高卧遺簪組管葛深自負聲華動江左

颺起濟蒼生四海期霖雨經綸無一陳師旅徒然舉
事蹟身無依書空誰與語多謝岩間人虛名無足取

其三十六

曜霧燁西征歲華不復返望古意悠悠所思恒恐晚
壯士無虛生托志每不淺起垂鐘鼎勳退葳竹素苑

其三十七

管鮑不復作古道何寥寥譬之霜下蘭芬香日夜消
賤者以利合貴者以市交利盡各星散市罷門蕭條
所以張仲蔚白首沒蓬蒿

其三十八

仲蔚避世士塊然無與儔劉龔何為者獨能與之遊
脫身名利場屏跡齊林丘當年或未顯垂名且千秋
其三十九

蕭曹刀筆吏申屠蹶張卒奮跡登岩廊勲名咸足述
叱鄧見風度聞歌知畫一如何禹光輩彬彬擅儒術
素餐以終身漢鹿由此失六經濟世具出自宣尼筆
安知千秋下竟為群蠹窟當其釋褐初自謂伊周匹
逢君改風心貪祿變初質請看執政年何似譚經日

其四十

唐家李北海姓青冥四方士從遊往往填街巷
金錢聚如丘食所每方丈處顯名易聞居幽跡難浪
少陵豈不偉獨立還惆悵

其四十一

吁嗟杜少陵垂老生計拙孺弱飢且死賦詩仍不羈
狂夫每自嘲夔龍尚思埒庶幾千秋下篇章懸日月

其四十二

伐檀岐山陽掩戶構輪轂制自殷人傳巧由工扁屬

車成東南馳水國鮮平陸器堅靡所用迷年寘河曲
艱難天使然懶拙性所歆疇能與時人越浪相追逐

其四十三

明時易表豎濁世難建勲夔龍處殷季亦是佯狂人
資稟且盈室幽蘭寧獨分
儿海晴已著田園隱長孺
所在稱中庸人人薦胡公

其四十四

孝武求羨門涉海窮其窟
歲星在金馬不悟趨凡骨
在遠每傾慕處近恒見忽
吾將謝爾曹乘桴浮溟渤

其四十五

饑鳥號空簷殘月入幽幔
羈人恒鮮歡撫枕獨吟嘆
生年定幾許前途去應半
傲在骨未消想深髮屢換
誰與滄洲期空悲白石爛
孟夏夜非遙漫漫不能旦

其四十六

素王歿已久舉俗喪其真
六籍雖具在種種成空文
夷貊道日貴中原盡無人
不見西忝子高足咸縉紳
天主非有教何以籠斯民

其四十七

井水溢金門漢祚果中缺幽閒高阜地霖雨何漂沒
簪纓盡巢居生民半魚鱉未聞哀痛詔徒嗟西苑設
杞人爾何知中心憂不絕

其四十八

黃生持金至深為伯起羞如何彈冠士苞苴橫追求
明經信古道文藝稱末流末流及古道種種非時謀
要津一相援魚目高隋侯劉蕡終下第馮唐空白頭

其四十九

長卿著子虛弘麗非凡藻壁立無人知草木同枯槁
孝武一興嘆遂為經國寶名由大人成文非愚士曉
狗監今不存沉淪以終老

其四十

亭亭孤生桐結根龍門曲本為稀世材朽蠹成空木
半心幸未死春還且舒綠旦為饑鳥棲莫為迷鳥宿
牧豎苦侵凌牽牛繫其足可憐清廟資棄置誰收錄
金微終無時灶爨日已促安得蔡中郎聞聲起躑躅

其五十一

夸父思逐日愚公欲移山為志已如此疇復計其難

精竭石自徙身殲林亦繁勞生豈非拙微尚性所關
嗟嗟千秋意難與俗人言

其五十二

明月出朱崖本是隋侯寶一朝墮沙石魚目相傾倒
暗投愁按劍幽潛以終老何當獻梁王照乘光未了

其五十三

淮陰始登壇吐論風雲起漢主用人秋聞言輒傾耳
食分青玉案身與均羅綺如何垓下平棄置同螻蟻
烏盡藏良弓豈惟隆準公

其五十四

泛舟輪晉粟閉糴觀秦飢古人尚云爾今人安足悲
受者宜懷報施者應忘之喁喁交相責怨毒無已時

其五十五

大鵬摩蒼天所向靡終極鷲鳩遶艾間欣然意亦得
小大咸有志飛沉各自適不知精衛鳥何事啣木石
滄海詎能填奚用疲心力物性固多竒變化疇能測

其五十六

生平倦叅禪於道絕無悟欲澹心自虛靜默鮮思慮

試問譚經人真詮竟何處上者耽簪纓下者趨岐路
雖云了世緣實以資聲譽未信阿堵中能長菩提樹

其五十七

羲軒去已邈世途日流薄局躋塵埃中忽忽常不樂
思登閭峰巔採彼長生藥王喬相娛戲容成命杯酌
流霞一入口不復思飲啄恬然洗積慮靈臺轉虛廓
乘雲臨舊鄉下顧見城郭問我來何年遼城有歸鶴

其五十八

人生能幾何百歲同旦暮俯仰宇宙中忽忽如朝露
自當早行樂無令髮改素奈何長戚戚終年理章句
朝來見落花始覺春光去逍遙步荒園聊以舒煩慮
黃鸝向我鳴芳草迷行處萬物皆得時我生獨無遇
憂來何所言茫然倚庭樹

其五十九

孫子昔遭臆仍為大國師左丘失明後傳經騁文詞
齊王既加寵孔門亦不遺曰余少岐嶷卓卓凌雲姿
明珠翫掌上婉孌在瞻依自謂矯雙翼翻飛薄天池
豈其構天罰投散西河湄骨肉日星離交遊莫與期

蕭蕭遶草間風雨常慘悽有婦無完裙有子恒苦飢
時時能發憤探古無端倪二漢上窺測三唐下思惟
元白每凌轢曹劉期並馳跡隱寧賣賦名卑誰問奇
青雲士難值附驥終無時生前已如此身後良可知
因嗟生平志慨然令自嗤

幽居

買山苦無貲幽居在鄉曲雖無千章木亦有萬竿竹
流水日泠泠芳草覆溪綠春光長不斷幽花自相續
人生貴適志寸心於此足何必希松喬飄飄去邦族

二月晦日醉後作

二月盡今日春光復幾何流鶯已滿樹花色徧山阿
念茲歲月促使我心如束何以消吾憂亭中酒新熟
葛巾漉美酒輕杯入我手醉後忘此身天地亦何有
醒來復長嘯林中見落照願言懷青蓮深知飲者妙

贈開美甥二首

黃生後來秀夙稟生民英探道測深奧風雅紛從橫
葆光桃李默摘藻芙蓉生駒虞不世出鸞鷲豈虛鳴
今子青雲器終懷拯物情歲華易荏苒勗哉脩令名

其二

積雪代然燭青蒲堪作編丈夫信有志古人豈虛言
斥鷃棲蒿下鴻鵠摩蒼天朗然明月珠念當出深淵
翻經落星斗吐氣成雲烟不見江都相下惟且三年

酬陸伯達三十韻

弱齡邁迤遭寢瘵淪丹壑槁木寧再陽孤蓬絕飛泊
既罹天罰年得果巖居諾結宇西河陰終然願棲托
抱琴懷卜生風期宛如昨草腐螢光流桐枯逸響作
神遇辨蚪蚪支策揮玄鶴雖無漸離巧擊筑咸驚愕

匪曰丘明艷魯史堪酬酢悼彼知音稀惜此生涯薄
藜藿足音杳柴荆永蕭索澆俗眩紛華南金競銷鑠
皇琴曷足論椰榆坐相譎偉哉平原相摘藻麗金腹
浮槎出上林英聲振東洛脫屣簪纓間晨省還庭幙
入室浣中裙調膳收靈藥觀濤挺逸興採菊留清酌
心虛狎隱淪道積存葵藿伊余駕蹇資豈宜煩伯樂
中途一顧眄頓解鹽車絡燕石媿非珍隋珠遂彈雀
燦燦鳥跡書迥若從天落開編忽高咏清響何寥廓
白雪灑江瀾神飈生嘯嘒行雲遏不流魚鳥爭飛躍

向風歎遐想龍門若可踰心飛司馬臺夢遶揚雲閣
荆璆喜暗投連城慚爽約長歌非報章聊以申寤莫
寄懷顧處士四首

垂楊已嫋嫋落花滿空園感物多所思臨風正茫然
別君是何時春光忽已闌音書久不達衷情何以宣
悲來但長吟長吟徒自憐知音日已遠已矣將何言

其二

遊彼東林阿念我同心者窮巷寂無人終歲無車馬
芳草何萋萋楊花滿中野不見鶴髮翁林風自蕭灑
何當一來遊抵掌蒹葭下

其三

吾鄉郭有道隱身甘靜默終年窮一經不知雙鬢白
深懷上古風時人莫之識余固草中人就君為莫逆
來往烟波間談笑每忘食所嗟會面稀春秋互遷易
對此江邊花誰能不相憶

其四

鬱鬱南山松歲寒無凋落眷眷金石交在遠情不薄
豈無新相知故人心所樂分手倏經時音塵久寂莫

母將遠別心不果林中約贈君白頭吟聊以慰離索
夏日林下效謝體

卧疴謝人群養拙洽幽獨豈伊滌垢氛兼得寶淳樸
靜推晷運移坐觀群生育時暑倏炎蒸火雲團臯陸
萬族苦囂塵孤遊得所歆逍遙長林間偃卧清溪曲
蔓草成華茵幽簧結翠幄振足濯長流脫巾懸古木
日移嵐氣清風動江蓮馥鄭生耕谷口揚子宦天祿
荷鋤信云疲執戟亦煩促安知肥遁者欣然方鼓腹

早秋

洪鈞運瑤光曜靈無淹度迅商忽颺疾朱火避金素
涼生松下雲響滴竹間露蜩鳴金奏作荷動明珠墮
幽客感蕭晨躑躅起游顧靡迤摘叢蘭徘徊拾芳杜
壯志逐飄蓬徂生迫遲暮頗懷安期術難訪丹丘路
嘗聞玄豹安屏跡南山霧余亦謝時人超然釋塵務
戲贈顧繩甫客中七夕

携手共行遊逍遙步明月夜涼天氣清金風何烈烈
久客思故鄉感時心歆絕仰視雲間星紛然自成列
黃姑與織女今宵正怡悅而我獨何辜相思各天末

歸途豈云遙長川固難越愁深遊子吟腸斷新婚別
抱影不能眠悲歌待明發

訪孟熙從祖不遇

百里挂帆席來訪蘇門生幽人竟何之林壑空冥冥
依樹白雲起扣門山鳥驚沉吟夜忘歸慷慨懷深情
無由共杯酒奈此江月明

移居有感

丈夫志有在所遇那可知弱齡美毫素陶謝相與期
炊糜季方聽夢草惠連辭自謂永如此皓首長追隨

涼颺一凄厲女蘿去松枝栖栖失群鴈孤飛天一涯
慈母恤我去涕零如縷縻告別不能言中心徒自悲
今宵故園月應是倚門時

歲杪還舊廬作

憶昔抱幽志誅茅向原野拮据兩三廛聊從耦耕者
雲卧藤蘿間不復聞車馬何意舍此去潦倒風塵下
歲暮還舊廬虛室正潇洒
鱗蛸網門戶烏雀亂簷瓦
覓紙欲書懷哀多不能寫

正月十五夜作二首

火樹依星羅簫鼓振地起踏月歌者誰輕薄冶遊子
珠履飄香塵春羅散雲綺日落相飛奔鐘鳴殊未已
安知貧病客閉門讀秋水

其二

濟濟茸城內綦綦畫高門華燈競佳節賓客如雲屯
花鳥非一狀歌舞千人喧一經耽鴆毒疇惜消靈根
君看北門道日夜飛輶軒

春雨晏起偶題

急雨洒窓牖烈風飄四壁愁人卧不起滯慮盈胃臆
然桂鬻敝裘依萱阻脩陌曲突晝無烟衡門類寒食
妻奴強綢繆披衣日將夕鬢似秋蓬飛面有死灰色

感春

窮巷日掩户春事杳無跡但聞啼鳥喧未覩芳草碧
誰家有飛花點我簷下石感此傷年華慨然空大息
夏杪苦熱周水亭招飲

杜門避暑卧遙憶高梧陰不意青鳥使亭午來相尋
倒衣趨山家科頭就幽林涼飈蕩暄濁清談滌煩襟
欣然懽所慕清醕相與斟傍晚興不淺投以滄浪吟

願言後大隱一悟羲皇心

寄懷沈公路

古人心相期信宿弗忍別吾每從君遊往往迷年月
卧久江籬生吟長啼鳥歇棄子歸衡茅朱明忽改節
心與灰共死身與世交絕門無貢公綦巷無巨卿轍
草際聞蛙聲懷人念猶結累夜不遑眠倚楹候明發

酉陽山人編蓬集

雲間唐汝詢仲言父著
友人朱長芬幼裳父校

七言古

百不遇歌

少年不得意抱病沉空林漢庭射策事已矣谷口巖
耕力不任詩就難期錦袍賜賦成不得長門金商山
種荳荒蕪盡東海投竿波浪深賣卜成都人莫識采
芝深谷路難尋此生飄泊將衰朽世事蕭條何所有

少陵囊中無一錢彭澤門前惟五柳百結鶉衣寒不
禁行歌商頌發悲音篋中幸有相如草窓下猶存榮
啓琴窮居澹落無行迹蔓草繫花空遶宅入門方聽
泣牛衣出戶猶聞笑糠覈抱琴惆悵坐荒臺擊節悲
歌聲轉哀流俗相看如楚越交遊棄我若塵埃十載
窮愁惟有骨千年心事已成灰丈夫落魄有如此仰
天大笑秋風來

雲夢歌

楚騎長驅入函谷漢王歛衽走巴蜀蕭曹絳灌不足

謀此時未得淮陰侯軍中一朝拜大將漢主山河懸
掌上三秦席卷齊趙平龍且再斬重瞳驚為漢不從
分鼎榮收齊終發合圍兵既平垓下干戈息天子臨
軒布恩澤轉餉唯思蕭相功折衝誰念齊王力解衣
推食豈不厚烏盡弓箴何太迫駸駸車駕西南馳壯
士束手如嬰兒人生得意莫誇詡功就誰無雲夢時
放歌七首

三江之東有狂客偃蹇支離鬢將白一生抱病淪西
河出戶不知阡與陌詩篇卓犖還自驚蓬室依然無

四壁嗚呼一歌兮聲激昂坐來庭樹沾秋霜

狂客狂客何所求著書豈欲干王侯日抱一編就人
讀三冬不足常懷憂薄暮歸來釜中淨婦啼兒泣聲
啾啾嗚呼二歌兮自悲叱饑鳥為我啼清夜

春風飄飄起深谷谷底幽蘭藹初綠抽蔓含英未及
吐暴雨卒至委溝瀆彷彿豈無餘香在花葉離披厭
人目嗚呼三歌兮增鬱陶昔為芳草今蓬蒿

委羽山高白石爛上有喬松下羣鴈終年飲啄蘆葦
間儔侶和鳴集深澗人傳此中多蝮蛇偶一觸之恐
為患嗚呼四歌兮思其居歆去不忒空躊躇

清晨挂帆渡江曲薄暮孤村暫投足蒼苔古屋無四
隣冽冽寒飈動枯木征鴻夜啼悲失群我生何以甘
窮獨嗚呼五歌兮心思歸古來遊子戀庭闈

萬里胡風吹漢月遼海烟塵何歲滅君王自虜昭陽
宮浮雲半掩蒼龍關栢梁既災建章起采山使者紛
成列嗚呼六歌兮神茫然杞人何事長憂天

吁嗟長孺骨已朽孔光諾諾居台斗侍中多著鷄鵝
冠邊庭誰薦雲中守江海非無抗疏人雖有丹心不

能剖嗚呼七歌兮魂歆飛香爐伏枕終相違

開山歌贈余山空上人

余山萬古青濛濛兩峰却立橫
西東蘭若綿連若鼎足空公之刹居其中
憶昔茲山被兵火古寺莽蒼無遺堵
空公不識來何方錫杖忽卓山之陽
投跡徘徊思築室荒草茫茫正蕭瑟
殘碑磨滅不復知故老傳言名慧日
空公聞之心欣然開山便歆冀其巔
採茨剪棘尋遺址果得往日洗心泉
寧獨結茅開淨域方期樹刹供金仙
是時文貞適罷相歸來馳向白雲眠

蕭散日尋方外友因共空公接杯酒
給孤不惜揮黃金海若自能驅石走
買山未許深公笑卜築悉為支遁有
俄看梵宇連雲興高閣崢嶸逼星斗
龍象儼如天竺下飛薨照耀臨山口
危樓百尺懸洪鐘清夜叩之獅子吼
徐公陸公襟懷爽佛前自覺丹心剖
當年天子曾賜衣官袍出自才人手
今朝留作祇園物庶使君息長不朽
已開詩卷標新題復向雲崖作蚪蚪
此中勝事難具陳空公度法意彌真
種竹俄成十里徑看山坐使九峰春
傳經復發龍宮歲阿閣重扉儼

相向三車絡繹來帝鄉天花貝葉生輝光直令吳山
作鷲嶺比丘衲子奔相望我來空山值秋暮白雲紅
葉填歸路鐘梵能清塵外心蓮泥頓悟虛中趣便就
空公問空果空中那有菩提樹此生不識為何物更
有三身在何處空公空公真禪那為君作此開山歌
君不見漢朝冠蓋盡陵墓涼秋九月西風多鏘金鳴
玉鈴如何何如挂衲棲藤蘿雲邊樓閣長嵯峨

廬山歌贈雅上人

任公飛錫週寰區忽來就我吳門居自言勝地靡不

覽安禪祇是一匡廬吾聞此山逼南斗香爐更作群
峰首石屏九疊龍鱗見瀑布千尋獅子吼青牛道士
跡尚留白鹿高人骨已朽山頭雲霧日奔騰其中曾
隱六朝僧遠公一去三千載爰有吾師來攀登息機
面壁青崖裏異代神交得其髓頓令本來明鏡臺照
見宇宙無纖埃因憐衆生苦海滅隨緣遂與廬山別
衲衣蕭蕭衝雨雪朝遊幽燕暮吳越投杖到處飛寒
泉負鉢有時眠虎穴鷓鴣鳴秋江草歇忽思歸卧廬
山月廬山回首路迢迢丹楓琪樹夢中凋異師還山

惜師去短歌草艸留師住茫茫大塊總空華廬山一粒恒河沙世界誰非化人宅何須更掃匡廬石給孤長者方布金曇華結菴珠作林時上人居顧中翰所構曇花庵願師留此開胸襟淵明之輩時相尋虎溪一咲斜陽沉

丹青歌贈汪山人

山人十五膽氣雄濁涇清渭藏胸中虜酒千鍾醉春月黃金百鎰揮秋蓬初鍊丹砂葛洪并終年不就荆山頂晚學丹青顧虎頭綵筆一掃傾神州蛟龍彷彿毫端走萬壑千岩落君手朝遊雲夢射鵬鸚暮憇吳

門宴花柳遨遊四海隨所之傳神寫照日益奇曹霸亦君名下士鄭虔不敢相追隨脫巾露頂王侯側見者咸如舊相識虛翠忽落屏帳間便覺几席生顏色予卧西河長隱淪聞君俠骨壯心神短褐蕭蕭挂蘿薜未顏落落絕風塵生涯已作夢中夢浪跡何須身外身惟當一奏丹青曲動爾壺中萬樹春

顧中翰畫山水歌

嘗聞至人奪天巧呼吸元氣乾坤小吾公雄筆信神妙萬里江山能一掃賓客填堦盡英彥花邊不惜金

尊倒興酣席上起抽毫坐覺平地生波濤五岳歌傾
三島裂瀟湘洞庭交噴雪巫山行雲凝不飛赤城霞
氣明還滅武陵源深路殊絕流波觸石聲疑咽不見
尋津漁者舟但看夾岼桃花發洞中鷄犬竟何處青
猿倒掛松間月目眩神飛若夢遊俄驚山冥黃雲愁
天地黯慘變氣候萬木搖落江潭秋目前倏忽萬象
改果然筆力驅山海借問古人誰與偕輞川千載遺
芬在憶昨君為侍從臣甘泉落筆生湯春賢豪戶外
發長滿肝胆豈是尋常人拂衣歸卧錦江宅綠波淡
淡層岨碧樹點千家天際青雲生三泖窓中白名園
山水觀無窮為我翻入新圖中便令萬古丹青空

北風行

胡天十二月北風起自青海頭走驚沙激飛流飄雪
萬里迷荒丘白日滅精景舉目但見黃雲浮樓蘭征
戍當此日戎衣不解懸戈矛胡笳折柳隴山北羌笛
梅花落戍樓思故鄉空悲愁南望長安道不見長安
城長安歌舞時時起誰聞邊外北風聲北風于北風
為我吹寒入金殿一使天子知邊情

燕歌行

別君何促思君長君何杳杳隔他鄉關山千里遙相望
望言託豐隆不我將日夕含愁淚滿裳願作清歌寫
中腸歌成吟咏轉淒涼願將萱艸樹蘭房心曲思君
不敢忘夜闌燈燭照空牀蜻蛚聲悲鳴我旁起看星
月自成行折盡庭蘭夜未央

前魚行

君不見枝上花須臾飄落沉泥沙君不見雲間月昨夜
夜團團今夜缺人生得意能幾時昔同肝膽今吳越
南山白石有轉移世事翩翩那可飛燕入宮班女
黜子夫乘寵阿嬌悲新芻後至翻居上蒲柳先容即
早衰君看永巷春歌者往日歡遊百子池秋風搖落
傷懷抱玉簪棄置秋田草金蘭膠漆誰復存唯有蒼
天長浩浩相歡相怨在須臾爭名爭利總成虛古來
萬事皆如此龍陽何必泣前魚

前有尊酒行

前有樽酒後有烟花折花携酒臨江沙仰天長嘯情
無涯人生百年若夢寐安能鬱鬱長咨嗟恨起悲歌

動江海興來飛思凌烟霞君不見杜陵野老常悲愁
曳裾王門誰見收何如青蓮載酒江水頭興酣椎碎
黃鶴樓功名富貴亦何益古來萬事隨東流酒自斟
花相酬丈夫生無所成死阡陌猶當一醉輕王侯

行行且遊獵篇

五陵年少膽氣雄銀鞍金絡胡青驄新豐九月美酒
熟半酣驅馬章臺東朱袍落落照寒日綉帶飄飄生
朔風漫舞吳鉤轉赤電高懸鳴鏑垂長虹角鷹初下
秋艸空手接飛猱如轉蓬迴身掉臂彎繁弱飛鶩一

縱連雙鴻路傍觀者皆歎息猛氣英風誰與同君不
見漢家李廣號飛將捐身百戰誰成功君不見燕丹
之客稱壯士他年卒死秦王宮少年意氣何氛氲平
生不識信陵君笑向青天發慷慨功名於我如浮雲
朝入咸陽看花柳五侯七貴皆迴首日暮平原遊獵
歸歸來還醉新豐酒

還山吟寄謝諸父昆仲

束髮嬰數竒坎壈西河側一卧三十春親知斷消息
今歲香山忽見招片帆始得還鄉國著書欲獻五千

言命酒須傾三百石親朋相見共依然握手捫心稱
可憐竹林二阮原同調華萼連枝色更艱買賦問奇
爭載酒還問阿咸能飲否經年無復醉蒲萄今日猶
當傾大斗鞘裏吳鉤忽有聲當筵紫氣衝長纓抱琴
奏曲山雲落握槩題詩野鳥驚自言相對無厭歇寧
知離恨從中發井鮒難隨海上波山禽終戀林間月
拂衣明日上扁舟行子翩翩不可留悵別同傾桑落
酒臨分將解鷓鴣裘詰旦征帆渡南浦那知正值瀟
瀟雨黑雲萬里暗長空白浪千重翻遠渚丈夫遇險

心怡然倚檣笑傲風波前浮鷗片片烟中落零雨飄
飄衣上懸孤舟縹緲隨所去薄暮始見郊園樹當門
稚子笑寒衣遶徑蒼苔失行處夜思桑梓更傷心揮
毫遂作還山吟他時親友如相憶江上浮雲夜夜深

秋夜吟

秋風起兮振庭柯天清朗子燦星河仰明月兮發浩
歌彈鳴琴兮憂思多時既晏兮君如何

春雨嘆四首憶士雅兄及從子伯安

春日江天雲不開霏霏飛雨洒輕梅梅花半開後半

落隨風飄入虛牕來愁人對此腸欲斷西向浮雲淚
空滿

烟雨淒淒晝不歇凭闌聽之心欲絕春光已半人不
遠一樹梅花開似雪人生百年能幾何何爲見少別
離多

空堦寂寞烟草生深院無人春鳥鳴荆扉落落晝長
掩無日不聞愁雨聲阿咸一別音信斷思爾令人衣
帶緩

春草青青已滿池春風幾度憶連枝蕭蕭窗外無情
雨偏值愁人離別時倚遍疎闌方寐莫一聲孤雁空
中落

春雪歎

連空飛雪何浙瀝幽人對之悲王室往年草色霜下
榮今歲春光雪中出同雲蔽野群山昏潢潦爭波白
川溢終朝只是聞驚風累月何曾窺白日春水不解
春草凋春雪偏能損麥苗麥苗未秀萎阡陌眇眇平
疇雪深尺江邊玉樹亂飛花江上人家絕行跡凭欄
獨坐正書空酒盡爐存火似紅孫康硯頭冰已合王

子山陰路豈通此時遙憶金門裏平樂春遊開角抵
東風先發上林花寒氣不侵雕玉几紛紛朔雪下丹
墀聖主能無黃竹詩請粟誰為齊晏子舉觴新有趙
昭儀五侯七貴咸開宴簷前飛雪正相宜可憐高門
酒如乳可憐田家淚如雨曲突無烟杼軸空男呻女
吟在墻堵瞻仰昊天何悠悠獨不鑒此蒼生苦

後春雨歎二首

春雨經旬暗茅屋屋間貧士勞心曲抱病難耕郭外
田療饑那有瓶中粟大澤刈新泥苦澣首陽採薇春
未熟寂寥西舍烟火遲累日一食但饘粥餒婦攢眉
向壁啼痴兒索飯當門哭老夫對此默無言倚窓且
抱殘書讀讀書未竟聞叩門朋友催租來尺牘仰指
白雲空嘯歌丈夫命窮將奈何

其二

往春敝廬苦未葺霖雨十日筐床濕今歲堂成風雨
除無奈釜底常生魚荆門落落長晝掩何人更訪楊
雄居愁霖暗暗迷昏曉亭下苔深不能掃東隣濁酒
那肯賒南陌夭桃空自好三旬九食藜為羹千古一

編瓢聚草虛名身後未可知骸骨生前已枯槁兩滋
百卉日夜新寒岩宿草何時春

擬四愁詩

我所思兮在青州寒裳欲往路何脩孟諸入海揚洪
流東望悠悠使我愁美人贈我蕙與荃願一酬之椒
與蘭天高地濶空悲歎

我所思兮在錦城寒裳欲往路難登蠶叢之道何峻
嶒南望悠悠傷我情美人贈我荆山璆願一酬之狐
白裘山高路阻空悲愁

我所思兮在咸京寒裳欲往路難征秦塞嵯峨與天
平西望悠悠心不寧美人贈我金雀釵願一酬之鸚
鵡杯關山險阻空徘徊
我所思兮在太行寒裳欲往路何長羊腸之阪日無
光北望悠悠心自傷美人贈我玉搔頭願一酬之珊
瑚鈎道遠無因空淚流

又別離寄顧處士爾卿

西馳日月不可駐人生在世如朝露營營萬事總浮
雲夢裏那知年歲暮已知為樂當及時奈何戚戚多

傷悲傷悲欲捐不能去但為心交久別離與君分袂
冰雪中思君幾度來春風春風吹我庭前草艸色青
青為誰好昨日開簾花滿蹊今朝花落惟鶯啼風光
忽忽誠如此而我思君安得已江天雨暗雲不開思
君拂雨猶登臺細雨飄飄侵我衣別淚與之交紛飛
却憶舊時同遊處踏遍荒堦不忍去荒堦如舊人不
來黃鸝空自啼春樹惆悵入門心愈結空案無書音
信絕惟有河梁離別辭袖中芳氣還不滅開編吟罷
聲轉哀淒風颯颯從空來

春日憶顧處士爾俎

相逢梅未花相憶柳垂線江天日出鶯亂啼吟斷新
辭君不見百尺游絲牽恨長一溪流水空如練坐久
林間日又斜天桃時落兩三花愁心願逐落花去隨
風飄入幽人家

顧氏濯錦園酬張魯叟

吾聞荆山之璞潛幽冥卞和一盼傾連城伯牙調弦
山水表鍾期聞聲恒絕倒片言何以心相知文章有
神交有道僕本西河抱疴客好探二酉披群籍月旦

時蒙許劭評龍文未遇張華拭歲杪尋盟入剡中雪
晴寒月何朧朧斗間紫氣幸未滅登樓果值張司空
張司空豪俠骨妙年擢桂堪馳突攀檻披鱗紫殿旁
臨邊飲馬長城窟竭來解組辭甘泉綵華歸耕種玉
田聞道東吳峰泖勝片帆直掛海雲邊是時辟疆羅
綺筵坐中傾蓋皆英賢唐球自笑饑歎死何意出此
瓢中篇瓢中篇聲激烈張公讀之歌按節林端颯颯
悲風生堂上絲桐絃亦絕古來郢曲知音稀甌瓠瑜
璠誰是非今日逢君一振拂便令槁木揚春輝金蘭

何以期同好慷慨長歌為予艸霞綵驚飛白練裙金
聲欲下丹山鳥謬將魚目酬明珠敢謂長楊擬子虛
眼中知己桓譚在從此楊雲不廢書

春日閑居聽百舌鳥

郊扉晝掩烟蘿深白日半吐春雲陰凭欄無伴空長
吟忽有好鳥來相尋始疑玄鶴下空谷復似伶倫楊
妙音間闕初從花底發須臾忽隱幽篁林尋聲到處
行相逐却援藤蘿卧深竹竹下無人更悄然惟有幽
禽相對眠再聞一轉聲猶妙清歌與爾堪同調行雲

淡淡澗不流一院花枝盡含笑君不見銅臺歌舞三
千人笙歌日日醉陽春簫管爭調鳳皇曲聲遠飛梁
振林木一朝人去高臺傾城郭為墟秋草平獨憐枝
上無情鳥萬古千秋是此聲

題君實弟高吾圖

吾聞高吾之山深且幽下有武陵溪流武陵漁人
昔遁跡曾於此地浮扁舟菟花鷄犬今安在唯有青
山長不改群仙往往棲其間流水浮雲晝掩關我欲
登之樂心意仙山杳杳愁難至幸逢健筆曹將軍丹

青寫出還相似攢峰峭壁何崢嶸毫端彷彿烟霞生
落落青松蔭茅屋萋萋芳草侵堦綠中有無心太古
民抱甕灌園得其真垂竿鼓腹欣自得荷衣終不沾
風塵高歌一曲巖下卧忘却人間秋復春

夏日林下和曹懷古高吾篇

溽暑侵人醉如酒散髮高眠蔭榆柳炎氣薰蒸松下
無清風瀟颯林間有向空長嘯方悠然忽逢青鳥來
天邊遺我一封雲錦牘中有百鍊高吾篇開函試向
林間讀擊節長歌對修竹浮雲在野澗不飛啼鳥舍

愁斷還續吟罷復披山水圖烟霞迥若來仙都突兀
高峰壁星斗巉岩危石臨菰蒲坐來忘却丹青巧恍
疑身在蓬萊島蓬萊仙人不可期茫茫宇宙吾將老
高吾山在何處我欲乘槎便歸去此中應有秦時人
岩下桃花幾千樹沈吟欲洗匣中綠彷彿還思洞裡
天傳語高吾山人多置酒邀君同醉石崖巔

臨高臺

臨高臺望曠野曠野何蕭條不見驅車馬白日半虞
淵清風正瀟灑此時壯士心飛揚解帶臨風歌且狂

浮生幻世一大夢奈何戚戚多悲傷悲傷亦何益空
令顏色成枯桑君看古來名利人杜陵韋曲起黃塵
功名不得垂竹帛仙山可以藏吾身仙山杳杳路何
脩玉液金丹豈易求赤松王喬如不死蓬海何為亦
淺流仙人非我顧名利非我心但願時時逐鷗鳥浮
雲流水成知音採芝深谷苔為席倚杖空林松作琴
臨高臺高臺四顧令心哀世人視我如浮埃我亦不
能與爾輩相徘徊臨高臺意悠悠安得千杯桑落酒
一洗胷中萬古愁

絲道集 卷之三
徒步行

白日照樹群鳥呼西河病夫趨道途道間不復辨高
下藜杖且有童兒扶傍人問余奚所徂家貧取薪南
浦隅此行實為飢所驅渡浦缺舟楫長年三老怒目
裂含笑向之五情熱囊無一錢語言咽嗚呼安得聖
王御世養廢疾老夫閉門不渡出

青氈歎

雨中禾黍未可刈田雀野鳥方得意貧客閉門還苦
飢累日一食不能繼床頭惟餘一敝裘欲典猶患寒

風道朝來乞食因遠出白晝偷兒入我室傾囊發篋
無一錢席卷那復留青氈暮歸茅屋井竈冷一榻蕭
條無被眠皇穹不仁苦相迫烈烈疾風飄四壁驕兒
畏寒終夜啼我執其手心酸嘶丈夫不應久羈旅且
須留舌視山妻

避火嘆

七月望雨冬未有城中買水如沽酒溝洫經旬潮不
來倉卒變生安措手天灾流行古有之豈知波及西
河叟疇昔之夜天正寒友人招飲杯常寬半酣歸來

卧未妥鼎沸西隣言失火裳衣顛倒那復知驚叫妻
孥奔閭左老妻猶思舊緼袍覓之不得聲嗷嗷大兒
披衣不及帶手抱幼弟呼天號我亦倉皇計無出但
向架上收書帙須臾烟焰天地昏轉盼敝廬無一存
徘徊道傍待明發赤脚踐霜皮肉裂丈夫數竒誰使
然饑寒徹骨還懼孽宇內名山千萬重未信此身長
不容扁舟明日掛帆去白茅結屋香爐峰

慧驪歌為李徵之作

育引

徵之有馬牝而驪能解人意予命之而作歌

吾聞漢室龍媒出西極五花散漫黃金勒又聞唐家
沙苑中千羣磊落雲錦同文采爭竒亦何益性靈不
與吾人通李生卓犖青雲客有馬慧驪神莫測竦身
欲踏秋天雲臨危解辨風塵色目若長庚宵不迷走
如滅沒途偏識驍騰才力不足陳聞言會意斯稱神
疾徐行止皆中節崎嶇高下恒宜人憶昔李生偶遭
厄驅馬夜歸原野黑涉波超澗險非一足不一蹶行
轉疾更闌叩戶家人驚非爾何以能橫行乃知古人
不虛作緩急死生真可托竭來顧我西城闌四蹄騰

矯輕無塵世人未暇識神駿躑躅似若悲沉淪李生
經年困書史壯心與爾稍相似何當看遍長安花併
鬻瑤池穆天子

秋日徐唐運過訪因東海上諸公

憶昔君來駐輕舸花底焚香乞新火唐運嘗以清
明日訪予今
日空齋復遇君西風吹斷江城雲故人握手情不改
春草春花竟誰在百年倏忽將幾何歡笑常少悲常
多即今相見臨秋樹他日相逢復何處寄言海上諸
心知心似江流日東注

否極子歌

否極子吾友沈明卿自號也明卿早喪父與
母兄居為讐家所中闔門俱死獨明卿存
出身求報讎吏不之白反枉罪之於是計窮
耻自比于人廢家苦形妻死不娶子出不養
慨然曰我不識書以至於此乃從鄉老究所
字辨而畫解之久亦義漸通曉今老矣因悲
世俗漓薄意不可一世居作避世歌示余余
悲其志而贈以否極子歌

否極子否極子茫茫大塊若不容偃蹇一身幾萬死
母屍灰滅兄骨飛報讐不就身無依雙髻歆星時已
失探竒問字無寧日鼎鑊在前身且烹許人一諾能
無行舟轂朱輪封萬戶非義與之若塵土擊鐘陳鼎
富薰天生平入眼如浮烟玉衣朱履邀作客歸去空
山卧幽石藜羹藿食夕不謀肝膽一吐欣從遊天高
地迥分川陸何鄉可以投君足否極子良苦心食淡
有不厭衣單任寒侵杖頭百錢不恒有袖裏一歌長
自吟新知落落頗難合何幸就我長松陰日炊黃粱

秋非抵掌片言方寸剖殷勤便復索長歌愧余燕
石非瓊玖君不見今人如御溝骨肉各自東西流安
吾卿抱孤操髮白難消兄母讎君今去去何所求
明月之珠寧暗投齊國相君苦難值朝陵醉尉殊可
夢請君桑梓聊淹留柳下三黜終首丘黃鵠一舉信
難測安知不與梁鴻儔否極子人莫識豫生擊衣志
士悲我亦為君三嘆息

贈吳湛瑩

男兒本龍變肯為轅下駒班生傾虎穴夙昔嘗傭書

三冬據梧苦不足一言拜相頗有餘吳生窮經非草
艸探竒望古披懷抱看殘白雪不知寒然盡青藜恒
徹曉董生策就本驚筵和氏淚零因獻寶如今詞場
非昔時璵璠甌甌無妍媸西子鬻薪趨曠野魚鹽傳
粉入州墀群鷄戢翼應爭食野鶴昂藏仍受饑吾聞
邊庭屢翻覆尉佗北下胡南牧居平慣亦覓穰苴此
去封侯如破竹詩就惜君還羨君英雄豈合長雌伏

酉陽山人編蓬集

雲間唐汝詢仲言父著
友人李玄象徵之父校

五言律

姑蘇舟中別許憲使周翰四首

山氓踈懶甚五載一來叅帆席霑梅雨旌旗帶石嵐
白袍容揖客黃馬發高談歸去鳴琴掩陰崖結草庵
二

陳蕃縣榻後岩穴久寥窳玄度今為郡沉淪漫見招

春生寒谷漏興入白雲遙誰覩西河士荷衣謁紫貂

春生寒谷徧興入白雲遙誰覩西河士荷衣謁紫貂

三

相送臨江水潸然淚滿襟扁舟千里別知己百年心
日觀秋雲隔吳門海霧深離居應有贈歸雁九峰陰

四

惜別語匆匆臨觴意不窮帆開江路迥人去海隅空
邇水餘清在嵩高作鎮雄知音難再遇歸卧有蒿蓬

附許公跋

此雲間一瞽君子唐汝詢見送詩也詢瞽時方五

歲聞其父兄書聲好之倩人口授遂博通載籍著

書甚富如唐詩解等書根據訓引皆李善六臣所

為總若干卷賦咏其一班也余嘗請君子一見謝

不肯來比余去郡乃送至姑蘇依依泣下不能去

因見贈此詩夫余在郡不能致唐既去又何能為

者而依依若是也此君子長者之行著述又其餘

也吾嘗擬師曠聰穎或謂無其人以仲言觀之不

啻有之耳雲間文獻藪澤多有不知君子者為老

公祖書之若其詩則余不能當也

喜李徵之見訪四首

徵之雅欲就余結社余適欲訪之先期而至

懷人經幾歲今始叩柴門乍聽愁中句

徵之以詩翻草示余

疑夢裡魂知因新更樂交若舊忘言瓢燼將浮水逢

君或幸存

時家刻被焚徵欲為余謀梓

二

夙昔期傾蓋相逢果醉心抱疴方避俗垂老得知音

跡傍牆東密情從域外深衡茅殊不隱朝夕任君尋

三

總為神交久春山欲共遊未過唐勒駕先發李膺舟

蓬室難容膝蘭卮許散愁飛花知客意點點下墻頭

四

客至衡門寂蕭然四壁空邀歡浮大白坐久落殘紅

童子倦已寐主人談未終只愁更漏起溝水又西東

折楊柳二首

揮手折垂楊乘春望遠方含烟迷驛道飛絮入蘭堂

葉共蛾眉老條隨別恨長藁砧不可見溪上落斜陽

二

折柳長隄上晴光滿渭川花明邊地雪翠鎖漢宮煙

嫩色侵眉黛
卑枝拂玉鈿
思君春復暮
何日是歸年

隴頭水

西登隴阪長隴水
色蒼蒼沙浸驕胡骨
隄迴戍客腸
洗兵搖夜月
飲馬踏秋霜
未掃樓蘭卒
臨流莫望鄉

阿嬌怨

柳鎖長門綠花侵別殿
紅春風知幾度
多入淚痕中
心逐雲鬟結
愁連錦帳空
笙歌何處起
遙在未央宮

卓文君怨

星使來南國
欣君入漢宮
長門方買賦
天子亦稱雄

草綠琴臺沒
花明溝水空
誰言孤妾恨
不與阿嬌同

班婕妤怨

長信看明月
昭陽聞艷歌
聲飛金殿迥
光入翠屏多
舞袖宮前斷
龍輿夢裡過
涼風吹碧樹
團扇奈秋何

瑤瑟怨

空堦明月白
抱瑟下青樓
調起悲風急
聲飄落鴈愁
關河千里隔
砧杵萬家秋
曲盡懽情斷
霜飛玉柱頭

從軍行

從軍千里道
驅馬向桑乾
大漠黃雲合
孤城白日寒

笳聲天外落海色霧中看虜騎何時掃空悲行路難
水亭閑坐寄黃孟郊

寐莫江亭上時時坐薜蘿心隨荒野濶情入亂雲多
待客虛尊酒思君阻笑歌空將兩行淚檻外寄流波
對新竹寄黃孟郊

昔期新竹下携酒坐氤氳新竹入空去還嗟不見君
含烟空積翠掩日自蔽雲清夜悲風起蕭蕭夢裡聞
螢

微形生腐草飛火耀良宵雜霧烟初起然林雨不消
光随明月度影逐亂星飄莫憶隋宮去蕪城久寂寥
春郊雜興

坦腹坐江亭荒郊春色晴簾開新柳入草長綠疇平
傍水知魚樂攀林識鳥情丹丘未可望隨處托餘生
秋莫詠蟬

風急辭高樹枝寒集古苔空懷飲露操難免履霜哀
抱葉身恐墮凌空翼已摧餘生能幾許黃雀莫疑猜
水亭莫景

暮倚江亭上蕭然對落暉傍簷楓葉下點岸荻花飛

野鳥尋枝宿漁人鼓枻歸興來無共語長嘯掩荆扉
對雨憶士雅兄

春日愁多雨蕭蕭滿竹林寒生東郭履聲斷伯牙琴
逶迤幽花淨侵堦萋草深連枝在天末對此獨傷心
感時

虜騎頻南牧王師倦北征烽煙連魏闕殺氣暗邊城
漢卒臨關盡胡笳入塞鳴終軍骨已朽誰復請長纓
望行人

一望陽關道淒然淚滿巾金河歸候鴈玉塞阻行人
秦柳愁中綠邊梅笛裡春征夫何日返四海尚風塵
獨不見

蕩子去後戎閨人恨不窮塵生金鵲暗香盡博山空
踐草驚新綠看花惜落紅誰憐獨不見掩泣對春風
有所思

垂楊已滿池孤妾上樓時萬里碧雲斷千山白日遲
燕歸尋舊室鶯轉擇新枝蕩子今何適臨風有所思
梅花落

塵亂隨風去飛揚渭水濱乍疑遼海雪來雜漢宮春

撲面驚殘粉沾鈿落片銀可憐盡飄蕩難寄隴頭人
傷春

檻外落紅滿春光已不留香殘蕙草歇聲亂野鶯愁
歲月看蓬髮生涯問海鷗草玄猶未就白日滂兩流
畫卧比窓

避暑尋幽室開軒取竹風烟霞千樹裏款乃一溪東
夢起心方寂詩成調易工誰言此中趣不與剡溪同

遺意

空山晝寂寥憑檻獨逍遙隱樹啼鶯巧衝簾語燕嬌

乾坤容咲傲風月老漁樵坐覺機心盡沙鷗定可招

秋夕

古木帶斜曛長空捲片雲風高鴉作陣山冥鴈呼群
圓月橫江出孤砧隔水聞悲秋心正切楓葉更紛紛

春日與顧繩甫對飲

春酒初含綠正逢梅發時携壺就林木揮手折花枝
鶯語竹間亂日華川上遲相看須盡醉莫使客心悲

清明日偶書

六龍去不息挿柳又纒身竹院空啼鳥山家不禁烟

苔青楊子宅草綠邵平田俯仰生涯薄狂歌一水邊
僧房春夜

風雨蕭蕭夜禪房燭影斜翻經看貝葉就枕落燈花
此夕空聞梵何年得聚沙塵心消不盡春夢復還家
夏日醉後遊宿化城寺

醉中乘興去直扣遠公扉山犬遙迎客蓮香乍入衣
雲深松色古夜久梵聲稀就枕渾忘寐晨鐘響翠微
聽琴

山館晝沉沉幽人理素琴松風生碧落玄鶴響空林
調轉孤雲斷聲淒萬木陰坐聽流水韻深得伯牙心
夏日憶小園因寄顧繩甫

林竹自蕭蕭知君久寂寥山空啼鳥亂地迥故人遙
別夢迷鄉樹歸心逐暮潮離群那可久日夕望蘭橈
題從祖孟熙幽居二首

扁舟浮極浦來訪地仙居境與囂塵隔人疑上古餘
松雲生几杖蘿月到琴書莫問飄零意忘筌已得魚
其二

幽居住來久修竹自成行翠結薔薇幄青分薜荔牆

林深花色滿人靜鳥聲長
杯酒聊相勸狂歌對夕陽
秋兩寄曹元達四首

寒雨暗江村空齋獨掩門
逢秋歌楚調舉酒憶王孫
葉改寒前色苔深石上痕
晚來虫響切愁坐益消魂

其二

別子是何時梅花正滿枝
春風徒悵望秋髮漸成絲
秣冥江雲黑山空夜雨悲
此中無限恨惟有故人知

其三

秋兩滴疎桐蕭蕭響不窮
離愁淹日月江水限西東

螢焰生空幕蟬聲咽晚風
何當數杯酒同醉菊花叢

其四

憶昔春園裏相邀醉酒壚
客來紅蕊亂人去白雲孤
空奏丹青引難窺画馬圖
寒風吹落葉奈此歲華徂

寄懷嗣宗兄二首

懷君江色冥小閣晚來幽
啼鴈驚離夢踈砧擣夜愁
山空楓葉下霜冷菊花秋
抱病難相訪非因桂樹留

其二

孤亭枕綠溪風日正淒淒
地濶秋聲壯江清鴈影迷

懷人天路隔舉酒夕陽低今夜南樓月新詩應共題

夜宿蕭寺

風色晚淒淒深林鳥欲棲聞鐘尋古刹捫葛入幽蹊
望遠家何在投荒路轉迷誰憐傲世骨乞食傍招提

扁舟曉行

辛苦投荒客扁舟獨早行一帆秋露滴兩岸草虫鳴
溪暗迷前路衣單見旅情西風何太迫颯颯動悲聲
雪夜旅宿聞鳥

枝上夜鳥吟偏驚旅客心孤飛逢雨雪何處覓深林

仄嘯愁無食依人空好音誰能憐逸響翻入伯牙琴

夜宿公路山齋

步履登臨晚深山雨未收衣沾空翠濕門鎖白雲幽
諭道聞三語探詩得四愁明朝思挂席叢桂復相留

山中早秋二首

空山秋氣早物象曉來清雨洗一峰淨風回萬籟鳴
藉芳多遠興耽隱愧虛名玄晏猶難遇徒嗟賦草成

又

獨坐孤峰下人閑地轉幽烟消遠樹出潭響細泉流

續通集卷之四
氣爽王猷卧天高宋玉愁歲華恐搖落因想故園秋
和公路秋日遊廬山燈下口占

試發清秋興扁舟晚共登看花尋菊徑携局對山僧
返棹聞歸鳥踈林出遠燈夜闌鄉思切寒月下蒼藤

芳樹

憶昔別君日庭前木葉秋春歸芳樹綠總是玉關愁
花遶蘭窓掩香侵蕙帳幽啼鶯何所樂覘睨卜枝頭

早春過曹元達

早春風日好杖策到君家岸州猶含凍江梅已着花

興因啼鳥發酒傍野人賒不向東臯醉何緣荅歲華
秋日泛舟鰲龍塘

鰲龍溪路曲秋日泛舟行野色含殘雨霞光送晚晴
叩舷寒葦入拂棹水禽驚欲訪先賢跡孤墳蔓艸平
仲秋陳逸彥投書問訊口占二律以寫近况

秋色滿長林空堦晝欲陰何來青玉案頓起白雲心
烟水琴尊隔莓苔歲月深陶家黃菊綻秋杪正堪尋

二

無限勞生嘆淒淒為爾歌聲懸蓬室小裘貫酒錢多

然桂猶開徑悲秋復卧疴草玄君莫問心事又蹉跎
卜築有感簡君公兄

築壤方成室編蓬未就扉秋生風雨夜寒逼芰荷衣
苔蘚侵堦暗親朋入座稀自憐生計拙欲採北山薇
次韻答真上人

遠公棲隱處山水自多奇風起吟松葉雲生壓竹枝
鳥聽清梵語龍卧白蓮池到此堪逃世升沉總不知
病中漫興四首

死灰然未盡造物苦相侵枕上生涯薄愁中歲月深
詞場難浪跡藥裹每關心春意今安在秋虫入戶吟

其二

春卧秋未起經年掩敝廬庭空荒草徧窓冷綠尊虛
失學從兒懶高眠任友踈此生随物化不必嘆枯魚

其三

靈籟生深竹黃蒿沒古園山蛸空亂響病客竟無言
槁木餘生在秋霜兩鬢繁蓬心如不死舊藺未休翻

其四

仲蔚劉龔識相如狗監知西河貧病地那復有心期

高枕聽秋雨垂簾任網絲獨憐江上鴈每歲到茅茨
雨夜有懷

孤客正無寐其如風雨何愁隨寒夜永心在故園多
簷溜同飄淚城烏亦自歌風塵空老大深覺負藤蘿
過朱繕部季則園亭四首

杖策來相訪滄洲昔有期扣門知舊雨就几讀新詩
山影浮書幌林香墮酒卮今宵如惜醉何以答心知

其二

偶爾辭丹紱悠然却世喧慣移山八座兼鑿水當軒

把酒憑花勸藏書待客翻自今來往熟常願領玄言

其三

梅花香正浮扶杖偶來遊庭綠新苔滑山青宿雨收
意閒仍御馬機息欲群鷗無藉枚生發文園病已瘳

其四

魏闕非無夢烟霞偶閉關興來花欲咲坐久鶴飛還
高咏踈塵事清談解病顏蒼生猶在望未穩卧東山

沈茂之喜余見訪口占答之

君夢故人夜余思舊雨年

茂之有昨夜夢君至朝時果叩門之句

春風

吹画楫一夕度長川叩戶驚吟斷啣盃吐論玄欲消
離索恨沉醉落梅邊

留別茂之

金蘭非不戀丘壑自難忘布穀催人別薜蘿入夢香
殺青千古共浮白一春狂且泛扁舟去秋來再整裝

乙巳除夕

歲暮寒鐙盡愁從故里生千門分夜色白道雜歌聲
稚子尊前舞高堂醉裏情樹盤難作頌孤鳥易悲鳴

元日

歲并來城邑逢春感歲華輕風開甕牖爆竹起隣家
倦迹孤蓬轉餘生暮景斜今朝慈母淚應以濕已花
哭常山令君公伯兄二首

傲吏辭丹闕修文入夜臺不隨鳧舄去空望玉棺來
過雨花枝泣馴亭鶴唳哀生平遊賞地書籍滿塵埃
二

一代凌雲手從今沒古丘總留封禪草那有茂陵水
薤露歌催淚山陽笛送愁臨觴一哭後松栢九原秋
清明日還舊居有感

浮生真夢幻孤跡逐風波
柳向他方插人尋舊里過
世情今日異春興往年多
荆樹依然在飄零恨若何
清明日過無上人山房

東郊禁烟節乞火問禪燈
訪舊隨同好論交獨老僧
春雲深古木山靄濕蒼藤
苦海方無際何年岸可登

初夏苦雨

首夏似深秋經旬雨未收
正當花盡處來與客同愁
壁立惟懸釜薪餘賴解裘
誰家方夜讌橫笛在高樓
病中徐比部叔開見訪賦謝

卧疴齊檁木墨市即滄洲
不意朱門貴來從白屋遊
應門惟鳥雀結社想應劉
倘許觀濤作何妨療客愁
夏日憶周希允園亭因有此寄

苦憶園亭好悠然水竹居
炎蒸三伏際蕭洒萬竿餘
花滿時藏鳥溪深慣隱魚
此中容避暑日日命籃輿
傍晚過周希允池亭

傍晚微風起愛君池館涼
遶簷蘿薜翠薰席芰荷香
興為花前發歌因酒後狂
追隨從此慣扶杖日相將

秋夜夢後作

一自經秋後無宵不夢親入門曾問寢起坐獨傷神
宛轉青陽促艱難白髮新鹿車須共挽明日度江津

寒夜寄懷張希周

寒風起窮巷倚戶憶君時髮白交初合天青夢到遲
幽棲同老病失路幾心知夜久空齋冷淒然但咏詩
夜坐詠雪

萬井陰雲合三更燭影斜枝頭梅未發何樹忽飛花
不夜驚山鳥無風起竹沙梁園空想望賦就一長嗟

冬日積雪陸希甫携酒至

積雪正填巷蓬門晝未開只應余獨卧不道爾能來
玉立華千樹春生酒一杯貧交幾人在握手重徘徊
寫意寄希甫

別子忽幾日新詩久不書共知身似鶴誰道釜生魚
壯髮愁中盡親知病裏踈寂寥倘相惜時復過空廬
贈揚太無

揚雲甘寂莫玄艸近如何心事惟毫素生涯一嘯歌
煙霞杯裏玩山水調中多相見無他問空林有薜蘿

酉陽山人編蓬集

雲間唐汝詢仲言父著
友人沈弘正公路父校

七言律

秋夜書懷四首

詠懷十三首

空林蕭瑟井梧秋野徑無人
溪水流砧逐淒風天外
斷蟬驚殘柳月中愁乾坤遺恨
雙龍劍江海餘生一
釣鈎搖落不堪悲宋玉
數行清淚對沙鷗

荒郊日暮起悲風
獨坐閑亭思不窮
秋遍江南催落

葉寒深海北下飛鴻情親桂樹空招隱恨入商飈嘆
轉蓬此夜斷腸人莫問月明偏照寂寥中
孤村寂莫故人稀日日移琴坐釣磯野曠漁人歌款
乃天高琪樹落芳菲凌霄鳴鶴衝烟去入夜飢鳥帶
月歸心憶蓬山雲尚遠秋風幾拂芰荷衣
森森竹外碧雲浮獨步荒庭夜正幽星落林間人不
寐鷗歸溪上水還流仙山路眇烟霞隔野院風悲草
樹秋却笑浮生無住著閉門空自賦登樓

冬日書懷

落木蕭蕭遍野村林端霧鎖薜蘿昏匡牀對酒愁消
渴玉柱無絃積淚痕鷓鴣未鳴凋楚草姓名非隱沒
吳門故人盡有長楊獻此日彈冠欲斷菟

久雨初晴有感

十年心事嘆蹉跎病起虛牕長薜蘿花色忽驚風外
落春光已在雨中過西飛白日傷蓬髮東去浮雲憶
大羅晝掩荆扉人莫問生涯惟有一悲歌

感秋

愁裏那知歲月侵坐來黃葉滿庭陰春光不入揚雲

網邊集 卷之五
宅秋色先歸宋玉林深苑露凝叢桂發空山日落草
蛩吟寒衣未就西風急江上猶聞響莫砧

寫懷

蒼茫烟雨迷空亭凭欄坐來愁不寧林下鳥啼晝寂
寂江邊風急雲冥冥天步艱難此生朽中心如醉何
時醒揚雄豈是閉關者自憐寂莫當傳經

病中書懷次友人韻

親知轉覺病中稀誰復濠梁逸興飛震電難消齊女
恨芙蓉空惜楚臣衣鄒枚有賦堪償璧夷叔無心但
採薇老去生涯何所問只應長掩白雲扉

雨後遣興

東臯四月新雨足舍傍小溪清不流林花岸花落欲
盡山鳥水鳥鳴相求翻書差可度白日抱病豈能畊
綠疇興到呼童使沽酒那有一錢懸杖頭

宿雨初霽坐齋頭有懷

山中昨暮烟雨昏朝來日高還閉門起看草蔓塞小
徑坐對花色愁空樽千金終難謝漂母一食誰復哀
王孫此身行當棄溝壑且須笑傲窺中郎

宿黃孟郊宅醉後示開美甥

落落江湖一歲星相逢杯酒問飄零
風塵無地容高步世路何人喜獨醒
涼夜放歌秋露白寒城吹角片雲青
為言弋子休猜忌早晚飛鴻入杳冥

雨中凭欄

凭欄不語意悠悠雨滴橫塘水亂流
倦濕孤鶯悲自轉劇波雙鷺沒還浮
啣杯不盡飄零意擊劍難期汗漫遊
老去江湖誰結伴白蘋紅蓼送漁舟

上郡侯許周翰三首

贈荅二十五首

使君聲滿漢承明卧治能令海甸清
保鄴東南天一柱陽和峰邛歲三平
裁詩白苧蒲鞭息行部青郊竹馬迎
宿草西河凋落盡春風何幸得餘生

九里河流潤帝都淮揚恩澤遍菰蒲
填階桃李三江集繞郡川源百道殊
飛雨隨車看秀麥行春露冕問還珠
只應縣榻邀徐孺豈意餘光到藥鑪

伏枕西河不計年瓢中浪有白雲篇
詩成空憶山濤獻賦就難期漢武憐
愚谷草深迷客路箕山秋冷絕人煙
若非公府收遺逸敢奏吳歌臥閣前

贈王亞尹直夫

著賦梁園已擅名，河陽花發更飛聲。
詞壇自信宗枚，并世路安知忌賈生。
夜雪謫居三泖署，春風歸夢五羊城。
蛟龍未是池中物，豈向西河浪結盟。

酬黃孟遠贈金剛經

緱山昨夜動笙歌，錦字丹經出大羅。
夢裡思君瓊樹，逸定中開卷白雲。
多天花來自僊臺，色寶筏能消苦海波。
玉洞何時同飲露，人間歲月奈蹉跎。

次韻荅顧彥容

風塵原不到荷衣，蹤跡後來與世違。
春草幾侵池客夢，松雲常覆野人扉。
西河予自迷花卧北極，君應羨鳥飛他日成名奏遺逸。
可能無意首陽薇。

贈王汝產

直夫弟

爾家靈運最驚筵，邂逅論文得惠連。
對客盛誇遵渚樂，探囊時出濟江篇。
情縣山水能同調，興洽風雲豈各天。
此後心期君莫問，百年肝膽酒杯前。

酬沈茂之見寄

離愁無奈烟波隔，華髮難禁歲月催。
歸客路經春草

別故人書
逐夏雲來千秋姓
字期青簡兩地衡茅閉
紫苔滄海涸鱗吾輩事
江南辭賦未須哀

贈顧期樂

十載無媒卧薜蘿
篋中書劍恨蹉跎
壯心尚憶明光草
俠氣仍驕易水波
何處風烟非客淚
幾家花鳥自陽和
嗟余亦是棲遲子
一曲巴人為爾歌

酬仲憲兄二首

昨夜吳天一鴈過
空山槁木盡陽和
聲傳白雪驚魚鳥
妙入芙蓉振綺羅
燕石豈能酬片玉
無鹽猶自學

雙蛾西河寥落還
同病回首秋風烟雨多

投竿每日傍江流
書到衡茅已暮秋
魯史弟含千古恨
荆山兄抱十年愁
籬邊叢菊侵苔石
沙上群鷗入釣舟
借問鄉園舊花月
幾時還許惠連遊

戲酬仲憲兄二首

野木陰陰落日斜
鴻書冥冥下江沙
誰矜白雪迷三楚
自有明珠照五車
謝客芙蓉新傲日
江淹彩筆舊生花
東山未有池塘夢
臨海詩成莫浪誇

雲卧空山二十春
曾彈流水傲時人
君持璚瑁能誇

楚我有荆璆未許秦翡翠自隨仙客隱蘭若寧與世
情親誰言幽谷多寥落蓬髮從來不染塵

贈朱朗安二首

君家樂府舊翩翩七葉焚藜耀紫烟自有鳳毛窺石
室豈無玉樹媚甘泉病餘暫擬觀濤作雲臥猶傳說
劍篇聞道子荆思白社應憐威輦對鷗眠
溪上投竿歲月多浪將彩筆揆星河岩扉不掩群麋
鹿灌木長吟待嘯歌抗疏朱雲終折檻閒居司馬自
沉疴鳴琴彈罷思公子江水潺潺起夕波

贈王少叅元翰二首

中原辭賦摠紛紜玉粲西園更不群奉詔畫收三楚
士著書歸卧九峰雲甘泉白鳳毫端出太乙青藜象
外焚自愧文昌長寂寞敢將小草傍蘭薰
馳馬翩翩事漢宮明光起草舊稱雄楚天雨化青槐
色澤國人傳白苧工黻黼自應探禹穴餐霞還復隱
崆峒袁宏浪有秋江曲牛渚魚因謁謝公

秋夜宿余阜贈蓮上人

上人能詩善
鼓琴工草書

一夕山齋遇遠公青燈相對興無窮未探杖屐飛泉

水忽覩毫端落淵虹良夜坐傾三昧酒鳴琴彈盡一
溪風篋中定有新詩否莫笑江淹擬未工

程飛卿來訪夜飲賦贈

嗟君踪跡尚飄蓬邂逅琴樽此夜同醉裏放歌驚落
木燈前說劍起悲風朱家俠骨千年在李白黃金一
夕空却喜上林詞賦就懷中彩筆氣成虹

贈林僊客

林君善草書遍遊海內余遭遇之因贈以詩

乾坤萬里一籃輿

林君跛足故云

到處侯門即曳裾浪跡名

標高士傳揮毫人識永和書樽前花月邀新調杖屨
雲山失舊居客裏相逢何所問臨池一掃北溟魚

寄贈馮咸甫

幾欲題詩問索居孤村天遠雁來踈馮唐未入含香
署方朔空成難客書風颯井梧秋色動月臨草閣晚
涼初近傳玄晏頻相憶敢望三都擬子虛

宿佘山僧舍寄贈袁非之

江左風流擬上都袁安高卧倚菰蒲懸河君吐雕龍
舌照乘予慚象罔珠心憶草玄期載酒調成流水藉

嘓枯遙知皇甫能相信曾發瓢中敝帚無

寄贈沈公路二首

仙郎文藻茂陵餘屏跡空山著子虛禪室地偏堪謝
客石函苔古舊藏書青春花遶江淹筆積雨蓬深仲
蔚居強欲從君問竒字終年伏枕重躊躇

竹林門巷半蒼苔花朵逢春亦自開中散百年多病
骨休文千古不群才依山卜築憑霄漢命駕尋盟托
酒杯聞道東園新句滿籃輿時想傍琴臺

贈唐仲宣

窮老移家覓友生欣岩倒屣即逢迎宗推桐葉非他
族交洽蘭薰若舊盟就竹欲開三益徑尋梅應遍五
茸城春來預憶譚詩處清夜携壺候月明

聞許憲副周翰之洛寄懷四首

寄懷四十八首

中原文物近如何憲府春還駐玉珂鄴下已霑新雨
露吳門猶沐舊陽和絨書萬里迷鴻鴈擬賦三秋阻
嘯歌飛夢欲尋風雅部嵩高天遠白雲多

單車西下問河源此去聲華滿大藩洛水定聞廉叔
詠夷門空憶信陵恩明時羊偃青油幕暇日詩成綠

酒樽輦轂久虛廊廟佐使星早晚近微垣

闔閭城下水滔滔憶共河梁對濁醪病客百年蒙顧

眄使君千里贈綈袍身齊朽木知音在心憶懸旌別

夢勞反魯定應刪述就倘容王逸註離騷

公有詩選嘗命作解

驪駒歌後不勝情歸到空山黯自驚已覺清芬遺滿

袖重煩白雪迥飛聲春風不盡黎元憶泝水長餘太

守清莫問三江近來事綠林豪客夜踰城

許公謝病不起重寄四首

秉鉞應分漢主憂翻然歸卧白雲秋非關金屋人生

妬摠是文園客倦遊寄傲乾坤雙醉眼逃名洙泗一

漁舟君王正憶淮陽守汲黯閒居詎久留

明時經畧冠岩廊豈合高吟桂樹傍龍性故難窺變

化鴻書詎敢問行藏傳經邑有揚雄宅析產囊無陸

賈裝介石聲華班史載青蠅蒼隼自忙忙

別去三經候雁飛山氓懷德幾沾衣河滋九里恩猶

在麥秀雙岐政已非人物歲更鳴鳳俗風塵秋逼釣

魚磯艱難轉覺餘生薄絕跡窮岩但採薇

知己千秋豈再逢西河人世絕行踪姓名終沒吳江

水魂夢長依日觀峰不信隋珠翻按劍由來蝨蚺故
嘲龍啣恩獨有遺氓在永托丹心石上松

寄世父大叅公

千家籬落散紅桃康樂東山句轉豪班管掃清滄海
月鳴琴飛出廣陵濤西關紫氣騰金鼎北極青雲屬
鳳毛倘憶阿咸投杖處春風日夜長蓬蒿

寄壽蓬萊錢明府

肇陽

百里絃歌土宇清賢侯為邑政初成頌聲定勒之罘
石春色先歸不夜城花裏鳧從天漢下杯前鶴遶訟
堂鳴風流寧獨調琴沿海上海上明珠日夕生

寄懷陸伯達六首

荒郊芳草正萋萋欲訪王孫遠路迷風煖江臯花自
發晴曛竹院鳥空啼披雲幾歲沈愚谷步雪何年到
剡溪相憶不堪春色暮滄浪一曲為君題

五載東山駐玉珂謝公逸興滿藤蘿銀鈎不減蘭亭
草綵筆能翻錦水波授簡君應思北闕編蓬予自老
西河幽情千里堪同調心逐浮雲費浩歌

清時風雅滿皇州賦就閑居罷遠游萬頃煙波堪載

筆三江花鳥定深愁城頭日落歌鐘發谷口春殘綠
樹稠伏枕無因陪笑詠夢魂常遠仲宣樓
辭賦平原舊不群春來白苧轉堪聞愁中短髮應憐
我海內詩名已屬君澗水漁竿娛倦日龍門煙樹隔
青芬何當共買新豐酒醉向江天卧白雲

荒臺無日不登臨心憶詞壇歎陸沉萬里晴光來大
海九峰春色到空林嘯歌聲逐流鶯新離索情隨萼
草深不似鍾期奏流水人間誰復有知音
永日垂綸坐釣臺薔薇厯亂遶江開花間只有孤琴

在竹下原無二仲來風引疎鐘天外落入隨棲鳥月
中回王猷不訪山陰雪今夕誰傾濁酒杯

寄懷士雅兄

簾捲東風白日遲曉鶯啼處不勝悲晴開野徑空春
草雨歇長堤變柳枝十載愁腸看玉劍千年踪跡在
瑤池碧桃洞口花應發鳴鶴歸飛定幾時

寄懷嗣宗兄

深鎖斜扉偃薜蘿閑庭蕭瑟燕來過春風不遣離愁
去海水還添別淚多出徑苔痕迷歲月荒郊草色自

陽和洛陽才子猶飄泊誰數江天有卧疴

黃孟遠讀書僧房詩以寄懷

聞君翻譯卧東林芳草萋萋古殿陰
迸水暗流雲路淨雨花飛去石潭深
庭前珠樹能娛目池上青蓮不染心
方寸遙知同玉鏡紅顏那管歲華侵

夜宿顧氏東園寄爾賓弟

客久風塵滿敝裘終宵不寢獨登樓
已知落葉催歸思無奈啼鴻引別愁
東閣霜清悲夜宿西堂草綠夢春遊
梅花早晚消殘雪欲傍山陰汎小舟

早秋寄曹元達

西風颯颯動長林久客能無遠別心
萬井白雲新雨後一溪黃葉故園深
相憐貧病愁中集不倦詩盟物外尋
秋以為期君憶否蟲聲先已到孤琴

寄懷顧玄子

辟疆雲樹幾經過倒屣煩君意氣多
把臂風塵雙傲骨論交天地一悲歌
鳴琴夜落吳江月擊筑秋生易水波
離別不堪常掩戶數聲春鳥奈人何

寄嗣宗兄

問君秋思竟何如，抱玉歸來掩舊廬。
荊棘不堪生戶牖，莓苔應是沒階除。
百年華萼雙蓬鬢，三載池塘一紙書。
莫以窮愁消骭髀，陶家叢菊正含舒。

秋杪過君公伯兄夜飲席上出嗣宗兄歸故園
二律讀之因有此寄

飄零幾處雁行疎，投杖相過問索居。
暫喜秋宵堪縱酒，何來春草更裁書。
空山豹隱寒煙積，故國珠還俠骨餘。
白眼縱橫君莫恨，臨邛不似滯相如。

寄懷黃孟郊

憶昔相逢落葉前，思君芳草已芊芊。
閑亭客去空尊酒，蒼竹春歸鎖綠烟。
夢入雲山迷別路，魂消江月聽啼鶉。
桃花開逐東風晚，何日飛杯醉野田。

寄懷黃孟威

平臺獨上思悠悠，野色蕭條暮雨收。
卧病復驚楓葉落，思君幾聽鴈聲愁。
寒蟬啼盡三江月，砧杵摧殘萬戶秋。
更有疎鐘知別恨，夜深還到碧溪頭。

寄黃孟遠

思君永日賦薰葭，葭溪上秋風暮景斜。
曠野雲飛情自

遠長川水急路猶賒人間白日欺蓬髮海外歸心寄
紫霞傳語王喬相問信故園琪樹定三花

寄懷顧處士爾卿

卧病經年掩敝廬故人能不寄雙魚空庭自發三孫
草窮巷難逢長者車檻外飛花春色莫琴中流水世
情疎知音惟有侯芭在肯信揚雄父著書

寄懷沈茂之

年來刪述竟何如偶託徐陵問索居時徐唐運見過地僻敢
期長者轍天長空憶故人書夢回極浦烟波迥賦然

清秋草木疎聞道剡中風景異扁舟欲發更躊躇

召公兄入覲還將涖太末欲邀余同往因辭以

詩

荷衣豈合對華簪千里相邀意自深鴻鵠搃能思舊
侶鷓鴣終是戀空林籬邊心繫陶潛菊海上神交子
賤琴但使河陽桃李遍猶當飛夢到花陰

寄張使君叔翹

客裡逢君隻眼青曾探敝帚問飄零單車乍擁神明
守空谷誰當處士星太末白雲生綵筆西河黃葉覆

寒汀微吟未足酬知己肯信乾坤有獨醒

寄顧汝微

衡門憶昔共棲遲十載離群戀所思黃葉又添今日
恨朱顏非復少年時風高桂子晴還落露冷蟬聲晚
更悲唯有東籬花未發幽芳應與故人期

秋日水亭閑坐寄懷陸伯達三首

渺渺長溪水自波相思無柰阻關河三都未足供清
覽七發猶能起病疴叢菊遶籬秋色莫孤亭倚樹夕
陽多那堪寂寞傷心處風捲灘聲入嘯歌

坐臨溪水心悠哉裂帛作簡飛鴻來三徑有花向我
咲一樽何日同君開窮愁鬱鬱搃黃髮虛室寥寥空
綠苔青楓葉赤秋又晚無由一訪相如臺

河畔草園柳盡凋日暮小亭長寂寂臨水懷人路渺
渺舉盃向月風蕭蕭不知籬花為誰發空聞旅雁鳴
相招詞壇近多秋興否一書何惜投漁樵

寄懷黃孟遠二首

聞君托迹海雲端欲贈音書路杳漫作賦未投王粲
宅觀梅已遍子陵灘人間白眼輕儒素物外清遊重

鶚冠短褐論交惟道在直將心事寄幽蘭
當年抵掌問逃禪窻下曾開貝葉編自信餘生同槁
木安知陸海是迷川嶺頭遠樹空相望水底沉灰豈
復然今日若論千古事篋中新著馬蹄篇

寄懷君公兄二首

相思千里白雲長越水吳山路渺茫潘令河陽花作
縣王生臯畔酒為鄉三衢峯北音書斷五色泉西落
日黃此夕故園如有夢應知春草遍池塘
寂寂長溪柳色間思君東望阻河山晝隨野鳥憑沙

卧暮拂林花帶月還鳧自應思闕下羊裘無復戀
人間年來轉覺浮生薄疎竹蕭蕭欲閉關

王少叅元翰為卓令修書浦縣誌詩以寄之

由拳千古是荒墟露冕今為卓茂居宦跡已成循吏
傳國風還伏史臣書名標班氏燕然筆地紀西門灌
漑渠聞道欲尋張仲蔚平原村北寄茅廬

秋日有懷寄曹元達

高秋八月江潭清千樹萬樹寒蟬鳴涼風颭水藕花
落返照入林山鳥驚抱書獨卧想往古擊劍高歌懷

友生題詩寄君且莫笑杯酒何如身後名

寄懷徐比部伯同二首

白雲溪上憶相過把酒臨流折芰荷別後青山勞夕
夢春來啼鳥動驢歌風塵吾輩唯松菊人物中原半
網羅誰道馬卿長病渴文園起草興還多

春雲低濕鎖江亭檻外垂楊帶雨青遼海烽烟傷魏
闕吳天花鳥共郊垆千秋心事瓢中草十載生涯水
上萍他日桓譚倘相信孤槎未敢泛滄溟

春雨集君公兄宅期嗣宗兄不至寄別二首

幾歲離居水竹間尋幽始得傍東山已知阮籍能埋
照却怪劉伶善閉關春色千家花際雨狂歌十日醉
中顏仙郎不入連枝社忍使王猷抱恨還

春山積雨興難乘咫尺龍門未可登白晝啼鶯藏密
樹青郊宿霧鎖蒼藤啣杯松徑依彭澤授簡梁園憶
茂陵歸去西河更窳落蕭蕭疎竹對殘燈

早春寄君公兄

冰雪初消聽鴈過西堂風景近如何晴催鶯語簷前
落香度梅花席上多玩世豈無燕市酒懷君空有越

人歌方期鄒衍能吹律一奏陽春起卧疴

士雅兄讀書山中聊有此寄

甘泉無地寄行踪負笈依然駐九峰憶別故園生蔓
草映編飛雪覆雲松烟霞幾日迷玄豹雷兩何年起
卧龍挂壁吳鉤頻自拂蒼苔不使上芙蓉

早春書懷寄張唯卿

故園梅柳為誰新
逦轉乾坤歎此身
客裏幾家堪寄食
病中何歲不傷春
千秋心事終成浪
一篋圖書半委塵
若使司空思舊約
餘光猶自逼星辰

寄題吳逸一籍隱齋

秦望山邊築室成
蠹編殘帙日縱橫
每于二酉藏時跡
肯以三都露姓名
夢裡花生應得句
窓前葉落不聞聲
但傳通邑朋知在
敢學中郎秘論衡
閱遍嵇康高士傳
千秋誰以籍為稱
當陽似癖非埋照
玄晏雖淫已被徵
萬卷總教連草屋
三餘肯覓藜燈
客來偶發看花興
門外青山始一登

酉陽山人編蒞集

雲間唐汝詢仲言父著
友人俞汝楫元濟父校

七言律

送張使君叔翹守姑蔑

送別十一首

剖竹東南露冕行
秋雲縹緲拂雙旌
三衢山水傾全越
五馬風流壓上京
自是君王憂重地
非關太守厭承明
訟庭此去應多暇
莫作新書難長卿

送徐比部升開報使還都

河梁柳色映宮袍題柱仙卽鳳一毛零兩夜思青瑣
闈使星春入白雲曹時清起草明光寐朝下談天碣
石高仲蔚蓬蒿樓正穩不煩雙鯉到江臯

送張魯叟還豫章

憶昨逢君錦水頭醉中詩思滿滄洲春來谷鳥方求
侶草長王孫忽倦遊卧病卜生三畝宅遺榮張翰一
扁舟莫言別後關河隔目極豐城紫氣浮

顧氏天朗閣與陸長倩話別

興酣携手一憑闌楓葉蕭條望裏殘予歆壺中消日
月君從物外結金蘭雲迷雁陣三江莫樓枕松濤草
井寒此去甘泉應有獻自憐無地可彈冠

送陸長倩歸廣陵二首

與君傾蓋卽論文名繼平原思不群浪跡青山塵外
賞驚筵白雪客中聞神棲湖海容吾輩身托乾坤有
片雲別後鴻書何處達廣陵回首大江分

君家桑梓九峰陰一去江河歲月深避地梁鴻能傲
俗登樓王粲有歸心明珠未合留他郡羈鳥還應返
故林總是廣陵濤可賦忍令風木夜悲吟

長倩故松人墳墓俱

在 歲暮別曹元達二首

憶自髫年約避秦，白頭始得結比隣。
寒梅再發連床夜，芳草重分兩地春。
酒罷白雲迷別路，歌殘落葉送離人。
江湖未必不同調，夢入天涯意轉親。

詩就驪駒欲解，携抽毫且復倩。
君題寒鴉啼雁催離酌，斜日西風送馬蹄。
思發南雲遊子戀，夢還空谷故人迷。
烟波不阻王猷興，步雪還須到剡溪。

秋杪再別陸長倩

江水經年別陸機，僧房相見語依依。
愁中歲月交情在，客裏風塵旅鬢稀。
野艇子還滄海卧，布帆君傍廣陵飛。
清尊未倒分袂去，覓紙題詩淚滿衣。

送顧中翰仲方還京二首

東郊征馬去駸駸，北指燕臺歲月深。
千里看雲遊子意，三年簪筆侍臣心。
望中柳色思宮樹，夢裡花枝滿上林。
回首帝城應記日，春光已遍玉樓陰。

春風嫋嫋奏驪駒，飲餞郵亭柳未舒。
行處鶯聲催別酒，到時花色滿皇居。
西河苔沒幽人宅，北極香侵使者車。
臺閣若論辭賦客，為言吳國有相如。

留別沈公路 留別三首

來時初月又纖纖何事能令客久淹
交在已宜貧上托地幽蕪稱老夫
潛風傳鶯語偏催酒雨洗花枝半
入簾暫別文園那用惜陽春新句更
須拈

留別沈茂之

生涯淪落與君同傲睨乾坤任轉蓬
但使一編追舊史何須斗酒醉新豐
滄洲別去人非遠祖道詩成調轉工
明日申江限南北相思遙在白雲中

留別朱繕部季則

久客懷歸春已遲垂楊轉眼換新枝
鄉心每逐申江水吟興難忘夜雨時
自信烟雲容傲骨還從花鳥問前期
扁舟明日風波隔一曲滄浪慰所思

秋夜憶士雅兄 懷思四首

故園秋色滿菰蒲山館無人鳥自呼
露白深林殘葉下天青曠野片雲過
兄持荆壁投荒草弟隱高陽濁酒徒
兩地相思正搖落豈堪斜月照庭蕪

聞士雅兄下第三首

殘葉飄飄徧遠林遙知旅客已沾襟
看雲應起庭闈

戀指日猶縣魏關心江渚鴻聲愁處落故園秋色夢
中深歸來暫醉茱萸酒不信吳鉤久陸沉
射策金門已黯然篋中空有白雲篇浮湘又是投沙
日去楚重經泣玉年行色蕭條雙劍古秋風搖落片
帆縣貂裘幾敝寒江上負郭仍無二頃田
長缺蕭然別帝都西風回首嘆窮途他鄉夜永聞邊
鴈故國秋深落井梧客路幾看芳草歇征帆仍逐片
雲孤茂陵辭賦終歸漢莫惜臨卣卧酒壚

秋日過王碧梧宅視病

尋訪十三首

抱病來尋陶隱居到門秋色滿藍輿空庭徧植桐君
藥高閣深藏玄晏書市裡懸壺堪玩世山頭種杏自
成廬煩君早發青囊錄伏枕相如已歲餘

訪雅上人次孫世聲韻

尋幽來訪遠公居殘葉蒼苔滿玉除池上烟霞充佛
供齋前薜藟當園蔬天花點席談玄罷貝葉題詩出
定初未必孫登能好道還容張籍暫停車

早春陳逸彥見訪不遇賦此寄懷

野王臺畔一逢君青眼論交隔世氛未有琴尊邀鹿

駕何煩杖屨入鷗群
班荆客自迷青竹
采藥人還滯
白雲明日更題凡鳥去
北山早晚定移文

重陽前一日訪顧玄子不遇明日發舟江次并
遇澹子留酌天朗閣

昨夜空齋嘆不逢
朝來何幸揖雙龍
門題凡鳥痕猶濕
酒泛茱萸興轉濃
繞砌蛩聲喧語笑
接天秋色老
芙蓉桓溫不倦登
高興帽落西風到
處從

冬至後一日喜孟郊見訪

魯臺昨日瞻雲罷
愚谷今朝喜客來
凍合前溪餘雪在
氣蒸南陌早梅開
胡床坐對青松古
杯酒行看落日催
人事蕭條君莫問
且教沉醉卧蒼苔

薔薇盛開如上人携酒相訪

薔薇初發遍江臺
飛錫尋幽載酒來
行踏煙霞三徑入
坐臨岩石一尊開
啣花鳥向簷前落
對水人疑鏡裏回
自是虎溪談笑久
不知林外夕陽催

孟冬顧公恬來訪酣飲而別因賦寄

藍輿相訪到江臺
入徑逶迤遍草萊
倚樹坐驚啼鳥散
看花行踏白雲迴
竹間泉響喧歌咲
石上琴清引

客杯日莫詩成人已遠一溪明月為誰來

春日喜曹元達來訪

長溪水綠淨無波遠客尋幽喜見過霞綵入簾開綺
綉禽聲遶戶雜絃歌樽前握手梅花落別後相思蔓
草多今夜西亭須盡醉白雲明日滿關河

初夏徐比部伯同見訪席上湯賦因邀贈篇

山家終歲掩荆扉何意扁舟訪翠微谷口垂蘿邀客
入簷端幽鳥傍人飛風生野竹供琴曲酒泛岩花駐
晚暉鄴下共傳徐幹筆陽春莫惜贈荷衣

洪邑博望治枉駕詩以謝之并求集序

絳帳聲華滿漢廷

洪有盛名綉衣楊公雅重之入荐

吳天槐色轉葱

青披雲合應郎官宿命駕偏尋處士星軒騎到門驚
蝶夢遙寤檢草得禽經敢將敝帚煩玄晏未忍芳蘭
混水萍

清明日徐唐運自海上過予燕語彌日時唐運

有武林之行

幽人門巷晝長閑徐孺何煩遠扣關我巳窮愁安白
社君今春興滿青山杖頭酤酒錢方盡陌上看花客

自還無限清明風日麗傷心楊柳若為攀

病中徐叔開見過

寒灰槁木重堪悲伏枕經年泣素絲未有文章干氣
色何煩杖屨過茅茨殘編苔沒燃藜後舊榻塵生謝
客時強欲就君要七發陽春肯許到枯枝

和張唯卿病起就周希允乞花

誰謂文園渴馬卿春風病起更多情香分蕙圃花仍
乞詩發蘭交調轉清周顛可無開徑待唐球肯許命
車迎尋芳速取山家醉不使空堦有落英

夜飲顧中翰仲方濯錦園

宴飲六首

扁舟來訪辟疆園雲樹森森隔世喧門鎖鏡河三百
頃書成天祿五千言燈前不淺南樓興雪後初開北
海樽不向此中淹日月人間何處覓桃源

秋夜雨中同曹元達集顧仲方宅得樓字

瀟瀟風雨共登樓擊筑狂歌夜正幽湖海知音青眼
在乾坤浪跡此生浮悲秋無奈聞啼雁貰酒何妨解
敝裘總是名園堪避世虞卿頭白未須愁

積雨初霽杜袁度携酌王林朗齋中得春字

經旬海國唯聞雨今日江城始見春
遂有杜陵能載酒更煩王粲遠邀賓
亭梅欲盡當杯落簷柳將開入座
新青眼相看並同調卜居從此結
比隣

重過潘文子齋中夜集

偶泛孤槎海上行詞場無客不尋盟
三春已半花將老百遍相過酒更清
風入夜窓終剪燭地連官署蚤聞
更臨分笑謝閑門令柱下千言著
已成

舟中覆酒

一葉扁舟載白雲携壺相約醉鷗群
未酤牀夜龍章日先污蕭娘血色
裙吏部持螯難盡興蘭亭拈筆不
成文鸕鷀豈惜花前解覓得黃公
日又曛

夜集濯錦園次顧玄子韻

十載江南賦已哀今宵懷抱為君
開琴彈伯子千年調歌奏梁王百
尺臺片月迥從江樹出白雲遙似
海天來明朝又是河梁別忍向花
前不舉杯

春日登臺

登覽四首

雨散深林曙影開平原寥廓一登
臺千家柳色雲中綠萬里潮聲海
上回蔓草應隨春恨長殘花偏逐
壯

心摧十年漫有江南賦此日誰憐庾信哀

春日過化城寺

扁舟獨傍虎溪行流水泠泠入化城到拂爐薰開古
殿坐依香剎聽流鶯十年踪跡人間世一徑煙花物
外情借問迷川堪渡否皈依我欲學無生

和顧彥登同無上人莫遊水香亭

孤亭高枕白雲開僊客同遊莫景催深巷寒砧乘晚
動長川秋水接天迴幽花傍月看疑咲遠樹含烟望
欲來詩就莫教授宋玉楓林搖落正堪哀

九日登佘山集公路席

九日籬邊菊未花因耽杯酒過陶家山脚返照孤雲
斷人上中峰一徑斜林壑百年容笑傲乾坤到處即
生涯茱萸欲插非吾事落帽參軍髮已華

郡侯許周翰有周粟之惠詩以謝之

餽遺四首

草木齊霑化雨春重煩發粟起枯鱗療飢綺皓芝空
採僵卧袁安火乍新飛夢可能參畫戟杖藜那敢拜
車塵漢庭多少分符客誰向桑陰覓餓人

秋仲謝許使君賜胙

三年化日滿郊原深谷遺氓得負暄秋奠兩楹傾桂
酒陽春一夕到蓬門臨風拜賜人非遠獻母調羹敬
尚存闕里衣冠多士在何緣師曠亦沾恩

寒夜顧于田餉酒

城樓鼓角夜欲動旅客冰霜寒不勝虛室寥寥解長
物愁吟鬱鬱惟孤燈白衣叩門者誰子綠酒餉我真
良朋窮途相憶古人事不見王弘今尚稱

春莫李徵之以酒肴見餉

花落君應醉錦茵割甘蕪憶阮家貧尊醪已許消春

恨海味還堪供老親就酌惠同王刺史傳餐心慰穎
封人試看擾擾風塵下誰念空山有涸鱗

題友人夢覺卷稱壽

題咏五首

栩栩歸來得此身生涯不復溷風塵試看宇宙誰非
幻能悟華胥即是真世事盡隨蕉鹿去丰姿長共碧
桃春一觴欲獻心先醉余固邯鄲未醒人

題從祖孟熙書齋

三年掩戶謝浮名山館陰陰野鳥聲花滿幽林春不
斷竹含新粉徑初成開簾自有滄洲趣對酒還多白

雪情梁苑著書千古事莫將寥落問虞卿

題嗣宗兄霞爽閣

危樓百尺鎖烟霞天際憑欄眺望賒日隱簷端三徑
竹晴開樹杪萬人家譚經太乙青藜下把酒胡床片
月斜聞道西堂多逸興句成春草為君誇

題君公兄桂笏齋

仙令風流思不群傍山一築洗塵氛時清柱笏看孤
石吏散垂簾鎖夕曛井夾雙桐應礙日門垂五柳總
藏雲從今莫憶陶元亮千古遺芬併在君

秋夜咏嫦娥

桂樹含香滿碧霄廣寒秋色易蕭條金波影共隻蛾
老玉杵聲隨五夜遙西望秦臺人逐鳳東看河漢鵲
成橋當年不飲長生藥未必今宵嘆寂寥

草堂新構邀曹元達諸君夜飲 居室二首

十載郊原想卜居誅茅今始得成廬宅邊欲插先生
柳牖下新開太史書風雨一尊佳客共烟霞滿徑俗
塵踈謾將糠覈譏陳孺門外仍多長者車

水亭

臨溪卜築傍垂楊笑傲溪頭白晝長日照空波開玉
鏡風鳴脩竹動笙簧紅塵不染簾櫳色碧樹能生枕
簟涼夢醒杳然心更遠臥看明月下滄浪

立春日雪霽偶書寄曹元達陳逸彥 象緯五首

袁安落魄棲窮村雨雪十日常閉門春風忽來透蓬
戶病骨暫起臨晴軒西園狂奴悵離索於陵逸士勞
心魂何當一杯邀二子枕流漱石孤松根

積雨有感寄陳逸彥

清溪積雨晝陰陰感事懷人萬里心蕩野煙波天地

台避秦踪跡水雲深鴻飛滄海遠羅網鹿走中原變
古今寄語灌園陳仲子荷衣端不羨朝簪

和徐元猷中秋夜同諸君登城步月次韻

樽前坐待金波出城上平臨玉漢橫秋半露凝千嶂
曉夜分雲淨一輪明淒清桂子空中落恍忽銀橋望
裏生此夕踏歌誰最勝懸知鄴下有群英

雪夜寄王汝產

江上黃雲凍不開朔風吹雪遶天來千門夜曉非閑
月萬樹花明摠是梅坐覺寒光侵燭影起看蓬徑作

銀臺王猷此夕懷人否對酒能無逸興催

齋中對雨寄曹元達

幾傍江樓敞竹扉愁霖無日不霏霏池篁盡灑湘娥淚
山氣長浮玉女衣綠水迷空津路隔蒼苔透屋故人
遠知君旅館應窳落鄉夢還隨暮雨飛

庚子除夜

時序五首

潘郎不獨二毛初四九紅顏歲復除貧病十年無長
物蕭條四壁有殘書簷前梅蕊迎春破盤裏梨花作
頌餘且喜裁斑堪獻酒隨他簫鼓動村墟

秋夜

落落疎林暝色清夜深溪上不勝情飛星自照吳鉤
白流水空隨寶瑟鳴病起秋風凋壯髮愁侵蒲柳共
餘生千年謝尚風流盡此夕誰傳詠史聲

九日寄黃孟郊

年年此日嘆飛蓬強欲登高恨不同萬戶秋聲催落
木三江寒色引歸鴻荒臺坐對黃雲沒塵爵時看綠
酒空今夕江邊休悵望白衣應不到花叢

端陽後一日與諸昆弟集從祖孟熙宅

昨日湘潭弔楚臣朝來東閣更邀賓
蒲花再入青尊綠艾葉重侵綺席新
且使放歌同李白無勞作賦訪靈均
試看宇宙風塵滿今日花前醉幾人

寒夜

江天風急雁聲哀無限離愁莫景催
旅館住來經兩雪故園歸去落殘梅
傷心到處唯彈劍失路何人問舉杯
火盡爐頭衣袖薄餘生轉覺似寒灰

宿細林山

山水四首

名山滿目倦登臨風引浮槎入細林
義士古碑紅蘚

合仙翁遺塚白雲深鐘聲晚動千岩寂
爐氣晴飛萬壑陰坐覺塵心消欲盡
起看明月照孤琴

機山懷古

村落為墟蔓草平空山尚有士衡名
曾披汗簡輝銅輦不料凄風折大旌
泉下玉魚隨戰馬人間春色自啼鶯
可憐千載華亭鶴猶為當年寫怨聲

和王亞尹直夫祀海

時邀余同舟

仙槎東拂海雲遙桂酒盈觴候早潮
宿霧全消越玉石殘虹猶駕祖龍橋
賦成王粲空千古詩就唐球愧

一瓢未許遠尋三島跡知君心繫紫宸朝

和顧仲方登小昆山西閣望泖

林壑招邀逸興生登樓無限古今情雲開三泖窓中
盡天削孤峰鏡裏成浴日鯨波吞楚夢馮虛雁塔控
吳城當年二陸成何事巖岫空傳出玉名

咏黃孟郊庭中臘梅

詠物十四首

衆芳搖落委秋塵庭際瓊枝晚獨新金鈿光飛爭咲
日玉盃香度漫留賓姿同籬菊偏凌雪巧借江梅不
待春聞道仙郎歌別調新聲應寄隴頭人

詠垂絲海棠

有引

楊穆叔齋頭有海棠一本花色特艷社中諸
友相與酬觴賦詩竟以唵興不至而罷予賦
此以嘲之

柔絲斜挂粉紅新海外何來別種春挹露下垂疑避
日含風醉舞欲迎人巧將翠縷牽飛燕不作殘粧擬
太真笑殺杜陵空對酒竟無一語贈花神

詠徐漢卿池中並蒂蓮

天淵雙發舊參差今日重開徐孺池幻質湘妃原二

妙比妝趙女故連枝聞香未辨能殊衆弄影方知欲
闢竒薄暮花神自相笑六郎攀處更堪疑

詠髻上人紙窻樹影

禪室沉沉落照懸當窻樹影正翩躚
虛空頓入無生境歷亂同歸不住天
始覺散花迷梵語俄驚翻貝雜
雲煙人間萬事誰非幻日沒庭昏坐惘然

落葉

本欲垂陰上苑中寧知搖落任西風
銀牀忽報秋光至金谷徐看樹影空
無復昭陽藏彩鳳唯餘籬下掩
秋虫御溝流水如相惜猶得題詩入漢宮

愁

百年唯爾最閑情朝夕催人白髮生
却喜酒杯能送去誰教夜雨又逢迎
淒其摠入湘纍賦婉轉長隨杜
宇聲傳語儒生休見忌著書方欲伴虞卿

和君公雪中看鶴舞作二首

雪滿群山衆鳥稀雙禽振翼巧相輝
七盤弄月原無影九轉迷花更染衣
玉洞夜寒悲自語霓裳舞罷倦
還飛冲霄早別瓊樓去不使王喬久翠微

魯舞蓬萊御榻前
今來銀屋更翩跹
欲尋緱嶺登仙路
先拂梁園作賦筵
飛燕振衣殘粉落
楊妃舉袂白雲連
數聲清啖江天迥
驚起袁安夜不眠

春草

連山霞野蔽閒門
綠豔新沾雨露恩
到處行遊留去馬
幾家離別憶王孫
琴臺巧作羅裙色
長信時侵珠履痕
最喜青青堪醉卧
還須對爾一開樽

携酒觀僧舍粉牡丹二首

僧苑名花自不群
遠携山酌傍斜曛
幽姿偶亦沾紅粉
冷艷終能傲白雲
豈向後庭矜國色
還從優鉢借氛氲
平章舊宅埋荒草
列坐無言酒半醺
沉香亭比湯爭妍
山寺芳菲更可憐
自占烟霞生寶地
不勞麋鹿供金仙
淨同色相看無染巧
共天花鬪欲然
莫問洛陽遊賞處
青春鞞鼓震三邊

隔船美人

一帆遲日大江濱
何處牙樯別有春
點浪步搖疑拾翠
凌波羅襪不生塵
聞絃未辨湘靈曲
望影先愁洛浦神
却恨狂風吹棹急
須臾難覓弄珠人

和朱繕部季則雨中調鶴

雨洗群峰入座青
踰躩雙鶴舞中庭
指麾應節宜入
意來徃如期識性靈
戲繞一溪牽溼亂
倦垂六翮傍
花停此時仙子情
何限觀罷霓裳檢
相經

旅夜雪中聞笛

萬里黃雲動旅愁
笛聲吹雪下齋頭
月明向子懷人
地粉散素蛾集鳳樓
梅蕊驟開花更落
柳枝折盡絮
還浮関山此夜生
歸思淚滿王恭鶴
氅裘

六卷終

酉陽山人編蓬集

雲間唐汝詢仲言父著

友人 曹洪道元達甫 仝校

陳明任仲伊甫

五言排律

秋日燕坐書懷

秋風吹落葉蕭瑟滿前林
蔓草凋還綠寒蟬咽更吟
露凝丹桂散雲起碧溪陰
覽物心猶醉悲秋思不任
烟消千古意蓬轉十年心
篋有揚雲草家無陸賈金

閑閑人事絕伏枕歲華侵卧久苔生席時清竹韻琴
龐公耽採藥陶令永投簪岩壑原堪樂無勞嘆陸沉

春郊即事

荒郊時雨後物象曉來新日照花添色晴催鳥弄春
韶光生野草泚氣轉江蘋戲渚鷗翻浪含風柳向人
蒼苔迷古道綠樹遶通津澗水堪垂釣荷衣不染塵
逍遙三徑裏吟卧一溪濱忽想春醪熟歸來取葛巾

郊園莫景

溪上斜陽落林間晚氣和風歸花影亂人去鳥聲多

草樹成茵幄雲霞散綺羅罷砧歸浣女返棹起漁歌
膝有孤琴伴門無二仲過長吟方自得山月下藤蘿

秋日書懷二十韻

是歲北虜入寇日本攻朝鮮中國發兵討之

林色晚蒼蒼荆扉對夕陽西風凋古樹落葉覆寒塘
黃菊初含露丹楓早得霜秋深悲宋玉琴罷想嵇康
魏寢浮雲沒荆臺蔓草荒廣陵音已絕搖落恨偏長
懷古情無已哀時意不忘薊門兵氣合漲海戰帆揚
烽火連東極戎旌蔽朔方何年來白雉幾歲虜名王
不復征沙漠無勞問越裳詞人空論戰武士請和羗

飛將沉丘壑，鯁生入廟廊。雲中愁魏尚，郎署老馮唐。
東國悲周道，西人醉玉觴。告緡充府藏，炊骨守金湯。
女對園葵泣，人看隰楚傷。自憐棲白社，無復夢長楊。
北闕衣冠異，西河草木黃。空懷杞人意，垂淚滿筐牀。
避暑蕭寺歸途遇雨

避暑覓招提，相携度虎溪。捫蘿聞梵語，尋徑踏丹梯。
嵐色龍宮外，人烟鹿苑西。翻經巢鶴下，挹溜水禽啼。
靈籟生深竹，青蓮冒古隄。空堦紅蘚合，高殿白雲迷。
久坐炎蒸盡，忘情物我齊。三車聽未了，歸路雨凄凄。

柬沈公路十六韻

時避暑余山

淪卧西河久，蓬蒿隔世情。徑開虛二仲，杯勸有孤鶯。
琴絕鍾期賞，歌傷甯越聲。以君青眼客，憐我白頭氓。
招飲期河朔，尋幽想石城。漾舟從謝尚，倒屣揖王生。
沈約詩偏勝，唐球稿亦成。探瓢傾散帚，得句擬山英。
谷靜樵歌發，潭空瀨水清。臨流思濯足，倚樹共班荆。
山翠晴猶濕，林蟬晚更鳴。片雲隨杖履，涼月挂簷楹。
坐語長河沒，行吟宿鳥驚。揮觴傾北斗，論賦眇西京。
竽瑟原同調，金蘭永結盟。肯令千古下，管鮑獨知名。

夏夜同諸君從山間納涼

日落晚涼生相携步野庭月臨池水白雲度石巖青
暑退天虛朗嵐昇樹杳冥傍人歸宿鳥點席坐流螢
夜靜歌偏放風清酒易醒入林聞梵語探穴想丹經
曲几露微露空階落曉星棲遲終老去誰紀北山銘
春莫遊濯錦園奉酬袁相國履善十六韻

名園饒勝事上客駐藍輿地僻投簪處江清濯錦餘
蒼山當戶出綠樹遶簷舒眈遠層臺迥通幽小徑紆
樓窺天界朗亭壓石潭虛入座崖懸鏡穿林溜決渠

松陰清鶴夢嵐氣襲人裾庵鎖曇花鉢僧翻貝葉書
鷺歌喧語笑苔色暗堦除三絕長康室千秋賀監居
輞川圖滿袖金谷句充閭袁粲尋幽境唐球託後車
入門雲路隱倚岫俗塵踈海岸機忘鳥濠梁樂悟魚
忘年陪杖屨屏跡混樵漁莫問謀生事簞瓢搃晏如

題袁山人白雪齋

袁安高卧處白雪自名廬寒逼樽中酒光生几上書
簷楹齊國舊文藻兔園餘姑射人同色山陰客獨居
連空來鳥雀地迥見樵漁拂檻春蘿密當軒夜月虛

烹茶幽興洽披覽俗塵疎歲月松間換烟花夢裡舒
尋盟思舉棹覓句欲騎驢卜室君依澗忘筌我得魚
白頭叨受簡當不愧相如

秋雨宿友人齋中懷舊居

道沾微雨滑因宿故人家吟就令沽酒更長問煮茶
蟲聲喧砌石螢影度窗紗市近聞砧急雲開見月斜
林泉勞夕夢漿博混生涯遙憶幽棲處深秋桂有花

憶沈茂之

別君還舊壑牢落轉銷魂徒念羊腸在誰憐馬骨存

無書空見鴈有淚若聞猿易得相思夢難忘知己言
放歌春雨細拂劍海天昏日暮高城掩淒然獨倚門

挽李少翁十四韵有引

翁名萬鍾其先上海名族高祖贅于黃氏而
居華亭云翁少倜儻有奇操喜賤人之難而
疾豪族之兼併者嘗曰士大夫蒙國恩宜尺
寸自効乃廣田宅以樹私吾儕給貢賦力漕
輓何負朝廷竟為此輩魚肉耶於是治產積
居克復先業巨室側目莫敢抗諸士之無依

者咸趨托焉無陶朱之富好行其德則過之
矣翁年尚壯忽歎曰人生幾何乃碌碌自苦
我將結一廛于西湖之上為菟裘計耳未幾
家有小童晨起見公乘樓船飄然而逝是夕
公暴卒年五十三其子玄象字徵之與予善
予哀公之志而挽以詩

族本玄元舊名因倜儻傳英風堪擬灌坐客未輸田
性自輕強禦心誰忍下泉役貧人退舍寄食士蒙憐
豪族傾三窟罷民得二天根盤方別利諾重永無捐

會許侯羸信非徒郭解權聲華元易著竹帛豈難宣
思卜西湖室將開北海筵菟裘虛悵望妖鵬已翩躚
未化千齡鶴空登百丈舩生多游俠骨死作大羅僊
隴墓悲黃鳥松楸鎖綠烟惟餘吳季子把劍獨潛然
倪懋父歆就余結社詩以寄之

投交非枉道結社為論文抱病幾無我憐才獨有君
陽春寧異調蘭茝復同芬未得兼金信先期鳴鶴群
苔深三徑沒地迥一溪分不值侯徵士令誰慰子雲
苦雨寄王亞尹直夫

五月梅俱落三旬雨不收雲根籠宇宙濤勢倒山立
石舞皆成燕林喧剝有鳩陸沉蛙出竈隴沒麥無秋
竟野寧遺稼流人半在舟望中江邈合棲處室廬浮
天漏憑誰補囊空祇自羞寄言王逸少何以慰窮愁

秋日吳湛瑩見過談心經

衡門正蕭索季重忽相尋未結林中約先披物外襟
玄言空五蘊妙解出雙林大道原無相如來僅有心
俗塵方散漫苦海互浮沉何日携君手空山理梵音

贈吳徵甫

穎川諸伯仲英妙有慈明文藻驚采苑風流擬晉京
揮君應五字病我是雙聲調洽途非隔神交韻已清
雲迷求侶雁谷偃候春鶯若問棲岩意瓢中草款成
張唯卿眉壽七袞值長孫信之擢採芹之冠詩
以賀之

浴社稱觴日片池射策年正開瑤水宴忽奏上林篇
玉杖弓旌右青衿白髮前離龍原步武吐鳳復驚筵
芝八歌偏勝花生筆更妍鶴棲娛晚節鵲起冠群賢
誼學嘉仍賈誼之孫玄名客獨傳謝玄之孫靈請

持榮啓樂來傍孝廉船

午日黃贊府翼亭枉駕既別友人金威彥邀夜

集令僕口占八韵以招之

積雨朝來歇城頭曉日懸遺氓方獨卧贊府忽相憐
乍枉山公駕因開習氏筵蒲樽方應節海味已烹鮮
角黍千家祝花綵五色傳語嬌非故燕葉軟是新蓮
掃砌除紅鮮憑欄候綵旃邀歡堪卜夜公案莫留連

贈吳商銘

聞君長掩戶應是厭煩囂調與時人異神柄上古遙

酒憑焦草送琴生用赤松調秋雨焚香夜

化捲幔朝

玄言三語悟愁思一編消何幸沉疴客

百慰寂寥

題潘惟完書齋

齋嘗拂拭踈檻絕纖埃日霽簾方捲風輕畫始開

焦桐金作引明鏡玉為臺庭植千年草燭啣百和灰

几新寧染墨簷古不生苔紅葉供茶竈

橙入酒杯

興來頻過訪情洽易遲回總有明朝別

歌且莫裁



國家圖書館, NATIONAL CENTRAL LIBRARY, TAIWAN, R.O.C.



匡陽山人編蓬集

雲間唐汝詢仲言父著

友人

唐東仲宣父

校

吳熈湛瑩甫

七言排律

送郡侯許周翰擢憲入洛三十韻

魚書忽下漢明光五馬承恩向洛陽此去聲華高鄴

下從來節操冠維揚臨民只飲吳中水

晉鄧攸為吳郡太守載米

來食惟飲吳解郡仍捐嶺外香時雨露槐三被化三公

生試諸春風吹麥五呈祥公在郡網羅桃李傾蓋戶疏

鑿川原潤帝鄉中諸河郡公疏鑿郡邈上晴雲邀翰墨堦前鳴

鶴引壺觴股肱天子東南重保鄣黎元海甸康揖讓

政行消獄訟關梁稅緩忤貂璫中貴人所嫉息加草

木文身俗海濱游兵有獲倭夷獻者男女五十餘人

為寇悉活風車樗蒲縱博場公禁賭博獻績岩廊輝日月

追踪循吏失龔黃清聲不待辭金著美政寧因集鳳

彰夾轂舊傳雙白鹿登車乍擁一神羊三江禾黍猶

含露二室炎蒸已避霜父老攀轅悲欲別童兒騎竹

繁成行觀風正喜周家舊訪古應憐魏寢荒緱嶺仙

音采几席西園明月度宮墻孝王臺迥埋荆棘史起

渠深長稻梁洒筆慣能傾兔苑灌田重擬鑿清漳抱

關有客應虛左扣角無媒亦振芳閱武中原成砥柱

遺思南國詠甘棠登壇不獨叅方岳秉軸還期到未

央渥澤已知周萬族餘波何幸及枯楊陳詩擊賞瓢

中草招隱還尋谷口莊郡吏叩門驚鳥雀山氓扶疾

起筐林粟頒范甌生塵浚春到羣鷹卧雪旁識曲鍾

期欣一遇離群卜夏敢終藏將造公府驪駒乘試拂

編卷集 卷之八

系遠集 卷之八
田家薜荔裳藜杖未經親
画戟扁舟早已肅行
榮情連極浦征帆遠
心逐雙旌別路長
伏枕無由隨節鉞
千秋遺恨在河梁

壽陸大宗伯平翁九袞十六韻

清時龍卧白雲深
出處繇來刳古今
十載蟠溪明主夢
三朝柱石老臣心
光輝契稷原同調
步武夔龍迥作林
戀闕未忘金掌露
棲巖還就玉山岑
年齊衛武方歌抑
樂勝榮期漫鼓琴
綠野正宜開綺燕
明光聞已布綸音
乘春鳳詔來天北
計日星槎度海潯
拜袞

祇憑新几杖呼嵩不改舊朝簪
鄭游昔曳尚書履
疏廣重頒內府金
魯國蒲輪休見召
謝庭玉樹已成陰
稱觴谷水斑龍集
度曲瑤臺彩鳳臨
朱草含烟香冉冉
碧桃遶席影森森
歲華搃向杯中換
仙境無煩物外尋
百轉流鶯嬌送酒
九峰晴日坐開襟
羣公並有霓裳獻
幽客能無下里吟
自是聖朝榮壽考
香山車馬正駸駸

壽伯父大叅公二十韻

碧山高臥幾經秋
宿昔曾分漢主憂
單父琴清名自

遠河陽花發政還留雙鳧入覲思王子三柳垂陰憶
李侯憲府乍驚驄馬入爐烟常逐雉車浮西臺隨輦
宜籌華東越觀兵復運籌征馬時能探禹穴簡書聞
已下江州再看潘縣千家樹重上滕王百尺樓彭蠡
無波疆場靜廬山移酒石潭幽衡陽烟樹空相望海
上星軺已倦遊籬菊自侵彭澤興秋風先入季鷹舟
嚴灘水靜看漁釣愚谷雲深對海鷗循吏每將廉訪
並長生欲共老聃儔岩前香滿金枝秀庭際光生玉
樹樞一 豈斷朱萼歟丹砂時化赤泉派香山之

澤 丘天孫圖以初 金女禱臨谷水
心益壯詩以衛武 阮超石笑非
送十雅 試之留都 似入棹千載正悠悠

漫携杯酒上河下河 冷六別路長萬里秋風催桂
子三江晴日秀蘭芳 荆京口烟波寐馬度長干橘
柚蒼耀海明珠初帶月倚天長 紉舊夢霜樽前紫氣
干珠斗鷁首青雲拍帝鄉假翼翻飛窺上苑揮毫咫

尺到明光甘泉賦奏搖天華平調詩成賜玉觴莫問
南都應擢桂懸知北極可含香星輅到處琴為侶書
錦歸時客滿堂惟有惠連長寐寔高歌一曲送行裝
挽從姊陳烈婦二十韻

一經簫管罷秦樓幾見孤飛海燕愁玉筋自能消粉
艷菱花無復照青眸坐看苔沒龍鬚席夢想香焚翠
窟洲詩就盤中君已去歌成黃鶴妾空留庭披萱草
腸猶斷琴絕鴛鴦恨豈收夜月尚懸金鵲鏡秋塵已
滿鵲裘臨江欲訪梁妻跡雍樹方懷趙客憂蘭玉

再看凋萸雨珮環今得到松楸寧將身化山巔石不
忍心同水上舟宋國青蛾焚翠羽漸臺紅粉逐江流
暗題陰字情難盡立覆齊城志莫儔遺淚盡斑湘野
竹悲音飛作洞庭秋沉波寶器終雙合透鏡青鸞不
隻遊已就庭枝捐秀色尚留餘響在箜篌禽為蝶影
辭華表雉應絃聲下古丘片石共題黃絹語行人不
奏採菱謳名縣白日垂千古節貫清霜播九州連理
樹深青鳥集摩笄山迥赤泉浮祖龍空表窮鄉婦魏
帝曾憐秦女休聞道明光方下詔青陵臺起九峰頭

挽沈華齋居士

歲星一夕去人間
颯颯悲風動海濱
玉馬可能留北
關真人無渡度西
閨琴高水綠魚空
躍費禱樓存鶴
自還泥灶浪傳炊
彩石丹砂原不駐
紅顏非閨卦夜
無仙骨總為梅生
厭市闌青鹿已知
歸碧落白雲依
舊滿吳山墓門日
落孤猿慟書闌春
深五柳閑此日
故人懸劍罷素車
千里淚痕斑

和君公兄龍門徙居

憶昨平津紫氣浮
龍門今始卜菟裘
澄潭皎鏡藏蛟
室高閣層霞接
蜃樓百尺脩
桐來白鳳數行
叢竹化青虬
舊傳啣燭寒門
北此擬垂髯谷
水頭毫散驪珠
星漢落庭飄墨雨
梵宮幽池中
雪物終飛去
海上浮槎豈倦遊
石室共傳司馬
筆洛川爭傍李
膺舟葛陂自怪
風雲晚一卧南
陽又幾秋

壽顧中翰仲方七袞

濯錦公園迤春萬木榮
長康浪跡以中情
自耽煙水棲幽壑
猶記聲華滿上京
獻納侍臣親御座
蘭臺令史冠群英
鳳凰池上隨雕輦
鵠宮前擁翠旌
袖裡

綵毫堪鳳舉鞘中長劍作龍鳴詩成白雪人稀和圖
就花驄國有名護蹕長楊應奏賦犒師遼海暫觀兵
公嘗奉勅出道經孤竹乘輅去騎列蕭閑負弩迎四
山海關犒軍海投交齊劇孟千秋垂籍寄虞卿陸沉金馬息輝重
念切鱸魚客思生江左歸驂辭省署薊門別酒會簪
纓曼容薄宦貂裘散元亮幽居菊徑成卜築菟裘迷
歲月楔神峰泖即遙瀛芳菲正值懸弧旦霓利新調
獻壽聲南極瞻星三島動東郊散綺百花明崇丘鳥
逐青牛下華岳人隨白鹿行洞裏烟霞情自遠庭中

蘭玉氣猶清羨君北極能披霧愧我西河浪結盟桃
筭三千應共茂霞觴七十更須傾自慚下里非高唱
清響猶堪雜鳳笙

重送士雅兄應試

幾年綵筆動星文九戰詞壇始冠軍玉為含輝寧晚
獻珠堪照乘豈無聞驚筵不作尋常調絕幕非徒尺
寸勛百鍊吳鉤終貫斗三遷谷鳥自凌雲下惟董相
才非滯射策蕭生氣不群蘭圃候秋爭吐秀桂枝承
露早揚芬雕龍不獨誇諸彦補袞還期佐聖君他日

漢庭談朝畧肯將羽獵奏南薰

壽袁相國履善八袞

一辭梁苑卧郊扉林壑逍遙性所依吏隱鄭欽原傲
俗陸沉方朔自忘機居朝色變貂璫乘在野香生薜
荔衣著論狂泉當路嫉逃名土室宦情微問竒宅在
誰携酒賣賦囊空欲采薇射獵雁池徒想望攀援桂
樹已芳菲商山秋蕪芝偏茂緱嶺天高鶴自歸栢葉
釀光鱸膾熟霓裳歌傍海雲飛漢廷羽翼心尤切周
室經綸志未違若使君王能問道非熊猶在釣璜磯

仲夏同君公兄吳江早行探韻得江字

昨夜停橈依古渡侵晨解纜越清江迎舡宿鷺飛還
偶拂棹閒鷗戲復雙帆底初陽明皜皜霧中遠樹影
幢幢榜人自喜歌桃葉酒客唯思倒玉缸引興千家
林色靜消愁一路水聲淙浮雲身世真成浪苦海詩
魔未肯降游倦馬卿耽舊壑幽棲張翰厭他邦扣舷
不奈炎蒸苦歸去科頭卧北窓

題空上人祇樹居

慧遠幽居歲月深逼檐祇樹迴垂陰成蹊綠蔭談禪

座結幄清迷入定心
滴露有時驚鶴夢
含風終夜作龍吟
葉飛几上疑翻貝
果落堦前欲布金
倚戶虬形容掛衲
彌空秋色坐調琴
虛中漏月移幢影
密處藏烏雜梵音
幹插吳天成一柱
名齊鸞嶺配雙林
山人無限班荆思
靜裡津梁好自尋

送王荊朗應趙無錫聘校唐詩類苑於慧山

卜子西河工校史
班生東觀擅讐書
陳詩自古稱天寶
問字何人辨魯魚
仙令栽花方滿縣
潛夫起草已盈廬
寄情宛委收群籍
聘士玄纁走傳車
笑別衡茅

懷錦後行經驛舍
毫初迎賓北海樽
中滿設座夷門席
左虛檢帙就山開
二酉然藜極夜惜
三餘樂堪忘食齊
元亮精不窺園擬
仲舒長夏流螢成
几案深冬飛雪到
庭除瓊泉洗硯還
烹茗玉笋裁冠且
具蔬月挂林梢幽
興逸濤生松際俗
情疎編從蠹處尋
科斗簡向塵中察
石渠一代風雲占
聚散千秋竹帛坐
躊躇龍蛇品定誰
高下物類群分摠
燦如趙勝得賢元
善相王充授簡肯
虛居他年紙價高
南洛文采延陵有
故墟



國家圖書館, NATIONAL CENTRAL LIBRARY, TAIWAN, R.O.C.

絲
道
集
卷
八

百陽山人編蓬集

雲間唐汝詢仲言父著

友人潘煥文文子父校

五言絕

閒居無題四十首

有序

余病卧江湖歲涉二紀每春夏之際屏跡郊
野門無二仲三徑蕭然披髮行歌聊以自遣
興到則攀垂柳或弄溪波折烟花以浸酒就
禽鳥為鼓吹悲則歛襟撫心自傷幽默性好



文史每令人諷詠一二篇未嘗不掩卷嘆也
稍有悲樂輒賦詩以見志辭無詮次染翰日
繁致之坐隅以供一笑耳

二紀看春色何年不黯然壯心猶自許蓬髮竟誰憐
其二

男兒搃飄泊生平膽氣雄但看龍劍在不必問飛蓬
其三

病起傷春晚悽然憶歲華東風苦相迫吹落檻前花
其四

草長覆階綠花明拂檻紅誰能憐槁木默默對春風
其五

無復少年意悲歌但晝眠可憐春色媚不敢步花前
其六

感物思名士機雲萬古情華亭清唳鶴猶作舊時聲
其七

溪水東流去冷冷永夜情愁腸今已斷虛作隴頭聲
其八

野徑門長掩深林客到稀幽禽久相識直向檻邊飛

其九

少年不可恃白日無留光
今春視雙鬢已覺去年長
其十

白日下空簷參差花入簾
愁無數斗酒不得似陶潛
其十一

嘯雜流鶯語行參沙鷺群
興來揮彩筆點落萬山雲
其十二

我慕青蓮子蕭然思不群
文章雄萬古留作敬亭雲
其十三

淵明採菊時心與浮雲同
雖無白衣酒未必怨秋風
其十四

江頭花亂開抱病強登臺
寂寂揚雄宅誰能載酒來
其十五

落魄自堪恨壯心猶足雄
仰天一長嘯千里動悲風
其十六

但使俠骨在勿復悲途窮
琴彈衆鳥下筆掃烟雲空
其十七

長夜獨沾襟空亭有素琴
清風吹土柱明月是知音

其十八

我思龐德公跡與世人遠
終身棲鹿門采藥竟不返
其十九

東風何縹緲吹我庭前花
可憐明媚色零落傍泥沙
其二十

海內知音絕相看獨野鷗
自將明月掩未肯向人投
其二十一

古木結翠幄落花鋪錦茵
武夷自可樂不是為逃秦
其二十二

夢裡思故園乃在武夷側
不知玉樹枝近長幾千尺
其二十三

雨飛萬木暗葉動風淒淒
我意正窳落饑鳥且莫啼
其二十四

寂寞郊園裏年來恨不窮
春光九十日多入雨聲中
其二十五

百歲若旦夕此生能幾何
况復百歲中樂少悲常多
其二十六

稱華動五岳倚劍持雙龍
流俗莫我識吾將尋赤松

其二十七

可嘆世情薄交游今若何
惟憐溪上水不改去年波

其二十八

病卧歲月久不知春又生
對花空有淚無復少年情

其二十九

天地為我廬日月為我牖
萬物皆虛無此生竟何有

其三十

蕙草生幽谷花枝覆綠泉
含香空自媚無復世人憐

其三十一

陌上無車馬時逢被草人
從來傲世骨原不染風塵

其三十二

窮通信有命勲名豈人謀
君看李飛將白首未封侯

其三十三

坐臥幽林久閑庭草自深
浮雲與馴鳥相對共無心

其三十四

無限傷春恨蕭蕭夜雨中
明朝須掩戶不忍見殘紅

其三十五

寥窳虛室內隱几獨悲歌
不醉杯中酒其如長夜何

其三十六

屈子惟思楚賈生悲渡湘才高終見逐莫咲接輿狂
其三十七

淵明撫素琴長嘯北窓下犬吠聞空林恐有送書者
其三十八

春色捨我去江花落漸多相看不相厭只有檻前波
其三十九

醉月林間卧迷花溪上遊方知滄海內別自有丹丘
其四十

獨遊松樹下枕石臥蒼苔四顧無相識悲風萬里來
春莫憶士雅兄十首

一與連枝別春風忽幾迴荆花倘有意且莫向人開
二

離別驚春晚登臨萬里思傷心堤上柳已換別時枝
三

鳥宿人未卧月明溪水空他鄉愁客夢應到百花中
四

寄語東風去殷勤問客居春光看已盡不見一行書

五

抱病登江臺江花拂岸開所思不可見春色為誰來

六

日沉江樹冥雲散碧天空松間一片月猶得與君同

七

夜來清夢長直入謝公館春草應有作但恐腸先斷

八

旅館今何處垂楊應亦新他鄉搃可樂難比故園春

九

陸氏本雙壁入洛同飛翻豈知今日恨不得逐平原

十

書寄溪上雲淚寄溪上波雲去不復還波深當奈何

元日對酒作

對酒傷飄泊逢春惜歲華坐中年少滿不敢問楸花

寄懷顧爾卿二首

獨坐幽篁下思君空復情愁如溪上草每歲逐春生

又

竹院啼鶯緩庭堦碧草齊登臨思遠道落日向人低

玉階怨四首

玉階秋氣涼坐久衣裳冷
彈斷琴上絃明河照人影
其二

明月照珠簾簾開夜如曉
秋風何處來吹我玉階草
其三

寒梅開復落風吹玉階暖
玉階不見人啼鶯聲自緩
其四

別殿笙歌起空宮落日斜
無情階上草不肯候羊車
夏夜林間率題二首

日落竹涼起蕭蕭鳴素風
火雲天外散不敢到林中

二

林中何所有白雲與明月
明月忽自沉白雲終不滅
古別離二首

二

相送臨長陌垂楊帶落暉
春風知妾苦吹淚上君衣
送君看落花花落春光晚
春去當復來君行幾時返

臨溪送客三首

相送臨清溪溪水流不息
明日思君情還在此溪側

二

林花飛送人行子不忍別須臾征帆去溪聲盡嗚咽

三

流水日千里孤帆自此征水流猶有極難比故人情

枕上聽秋虫語

臥聽寒螿語蕭蕭響夜分悲秋無限恨腸斷不堪聞

子夜四時歌

春歌十首

東風何飄飄吹我庭前梅梅花落欲盡即行幾時四

二

登樓念所思四顧春草綠謾彈秦女箏絃斷不成曲

三

見芳草艸色覆長道春歸郎未還雙蛾為誰掃

四

夢裡郎同遊覺來儂獨處風吹庭樹聲猶聞郎笑語

五

強欲登粧樓臨階不能上愁如楊柳枝春歸日日長

六

仰看雙紫燕交頸雕梁中禽鳥尚有匹郎豈長西東

七

朝登望夫山歸來見落照滿眼無情花含風向儂笑

八

朝看江水波莫看江水波江波流不盡慙是妾愁多

九

郎如楊柳花儂如楊柳枝柳花易飄蕩柳枝無斷時

十

念君行樂處應在宛與洛寄君同心花春風恐吹落

夏歌十首

思君迷歲月不知春已去開簾見落花離愁滿庭樹

二

一與藁砧別春光逝若飛殘紅非有意何事點人衣

三

春去啼鳥稀空街轉寂莫願為楊柳花飛向君前落

四

偶來溪水上揮手攀青蓮妾如荷中珠蕩漾何時

五

翩翩雙翠鳥來往自相逐終年無別離即傍荷花宿

六

念昔郎在時同遊復同枕芙蓉本雙花鴛央豈獨寢

七

自與郎別後衣帶日以緩愁來彈鳴琴未奏絃先斷

八

江頭思採蓮画舸錦為纜可憐郎未還儂將與誰泛

九

日沉火雲散揮汗登高臺薰風若有待吹儂羅袖開

十

逍遙江水傍江水何浩浩儂如江上荷常恐秋風早

秋歌十首

自月不可駐憂思不可忘春愁猶未盡一葉下銀床

二

藕花紅始凋梧葉綠未脫秋蟬鳴樹巔遊子在天末

三

簾櫳含夜月蕙帳生秋風安知遊子淚不洒月明中

四

絡繹響金井飛蛾拂銀燭誰能不相思獨抱孤衾宿
五

金風扇桂林玉露滴蘭薄儂貌如烟花今晨已非昨
六

團團合歡扇宛如卽在時弗使秋塵起卽還尚可持
七

月度玉窓白遙夜方悽然流螢不相識何事入燈前
八

清砧生白露九月授衣時擣畫闥中月良人應未知
九

共枕忘宵永孤眠知夜長無情秋月色偏歆照空床
十

儂如泉下石卽如石上泉泉出無還期白石長依然
冬歌十首

寒風起戶庭積雪滿林薄望歡不見來斜日凍歆落
二

黃葉方颼颼青松獨陰陰黃葉是儂貌青松是儂心
三

孤燈何耿耿遙夜何漫漫莫怪夢魂短其如枕簟寒
四

儂年十四五與歡結金蘭徘徊錦帳中何曾知夜寒
五

離別日已久啼痕日已多自將明鏡掩不敢照雙蛾
六

寶鏡無顏色雙鬟已颯然可憐寒夜月猶挂玉臺前
七

朔雪何飄飄清寒逼帷幕儂本不欲粧輕粉為誰落
八

登機織錦字新詩欲贈君誰知心曲亂終日不成文
九

渺渺行人遠遙遙別路長夢魂猶可到不識在何鄉
十

草木總零落明年當復新儂如深澗栢何日遇陽春
病起逾秋

可歎浮生薄愁中復病中那堪
意外樹颯颯起秋風
冬夜與黃孟郊諸君泛舟
因憶士雅兄

携杯清夜永歡笑滿花前忽想他鄉客孤燈應未眠

對竹偶題

開簾何所見幽竹滿荒臺時有枝頭鳥無心自往來

雪夜憶士雅兄二首

飛雪遍閩河終宵別恨多故園猶有淚遠客竟如何

二

夜久燭光微簷前雪正飛萬方同一色應照旅人衣

春日偶題二首

愁結亂如麻春深日更賒無心沽美酒空對木蘭花

二

日落江雲陰逍遙踏芳草深林無客來蒼苔不曾掃

自君之出矣六首

自君之出矣無復画雙蛾別恨如芳草遙春日漸多

二

自君之出矣花色動春愁羞見雙飛燕翩翩入翠樓

三

自君之出矣明月幾迴圓不信儂心絕但看琴上絃

四

自君之出矣長夜轉悽然月落霜闥冷郎今何處眠

五

自君之出矣正值條桑時因登望夫山忘却春蠶飢

六

自君之出矣思君君不知愁如日中影無處不相隨

旅夜咏斷腸草

寥落嘆餘生逢秋黯自驚如何堦上草亦有斷腸名

讀太白集

千古誰同調青蓮可結盟雖從金馬詔不改釣鰲情

澤畔吟

笑作江南調愁為澤畔吟漁人莫相誚共爾卧川陰

登臺偶書

一上平臺去春光萬里來長歌看寶劍不使壯心摧

題庭中款冬花三首

白亭舊豪華連甍十萬家我來誰與晤獨有款冬花

二

開戶寂無人幽花獨相待知我歲寒心不為風塵改

三

雜詩集 卷之九
草木原無情偶與我
竹洽雪際方含英風前不墮葉
歲杪寄內四首

出門便為客隨處即天涯
一隔清溪水經年不到家

二

已過授衣節客袍貧尚單
深閨霜露重念爾剪刀寒

三

空庭殘葉滿深巷朔風多
傳語機中婦寒衣今若何

四

貧居易永久慘戚歲將闌
夜永愁知旦床空不耐寒

兩夜憶幼子

家貧常絕粒風雨更安妻
遙憶痴兒子門東應夜啼

題吳萬空水竹山居二首

幽人高卧處水竹自為群
曲曲時圍舍蕭蕭日鎖雲

二

跡篁覆清流風韻本雙絕
時有羲皇人彈琴坐明月

三

寒玉團清陰飛泉激幽響
借問西山人何如山中爽

寄嗣宗兄二首

遶屋溪如練當階月似霜秋風吹客夢一夜到西堂
二

山居迷歲月木落始知秋若問淮南桂王孫幾獨遊
晝坐天朗閣聞鶯

高閣晝無人憑欄客思新傷心枝上鳥啼盡故園春
和杜東度自鋤園八咏

自鋤園

種瓜期五色種葵亦千叢那知荷鋤意不在瓜葵中
百花居

育卉羅庭除時時見春色縱令花未開我情亦自造
超覽樓

高樓日臨眺四顧見泉石自然離人群非為烟雲隔
觴咏齋

空齋鎖白雲一尊晝常滿醉來還自吟無煩奏絃管
宜暑亭

我心栖玉壺由來本無熱况乃幽亭間竹風飄不歇
獨笑軒

凭軒笑何事未易令人知窓中一片月應與斯心期

澹逸處

蒼苔坐來深悠然絕塵想時有山中雲無心自來往
片雲石

石本依雲刪雲亦就石宿雲去石自閑蒼然照人目
六言絕

幽居雜詠六首

藹藹垂楊遶岸蕭蕭踈竹當軒流水還同剡縣幽花
不減仙源

化朵遙春自吐人生對酒當歌明月簷前不少青山
夢裡還多

林下人隨鳥宿江頭柳送春來常咲揚雲投閣何如
張翰啣杯

飛閣半浮烟水寒梅盡遶江臺黃鳥時堪共語紅塵
不敢飛來

簾捲波光入戶風搖花影侵衣綠酒杯中自飲白鷗
溪上同歸

折柳時臨澗水携琴日傍烟蘿念此浮生不樂其如
白日蹉跎

寄題金氏郊居四首

幽館暗藏煙霧窟
寤獨枕青山
春來芳草爭秀日
莫孤禽自還

拂檻雲生袖裡開
簾月挂床頭
借問桃源何處雞聲
遙隔溪流

風響踈篁成韻春
催啼鳥喧歌
王子山中卧久辟疆
園裡誰過

喚起驚殘春夢催
歸啼盡東風
青山檻外長滿綠酒
樽中不空

秋日偶書四首

窓下十經螢火毫端百
戰龍沙視我舌尚在否
猶能面折田巴

三十年間何事五千言
外無他函谷不遙關
尹雍門誰識韓蛾

藜藿一餐不飽詩書十
乘有餘但使案頭飛雪
隨他釜底生魚

空林寂寂對兩小苑時
時掩扉落葉能驚鳥
夢蒼苔欲上人衣

途中偶題

已道瑤池會酒後聞金谷留賓我性自甘藜藿且當
歸卧松筠

夜泊黃浦

野艇一帆明月烟波萬古通津浦姓尚從黃歇行人
誰識春申

歸途遇雨三首

渺渺扁舟夜泊蕭蕭急雨晨飛吁嗟我僕痛矣征帆
七去何依

方期高閣縱酒忽憶空齋掩扉天邊遠樹相送雨外
孤帆獨歸

昨夜夢還花下朝來身滯江濱親友已教送客風波
偏欲留人

和公路山中春興

山迴白雲長在風微涿水無波求友鶯遷喬木看花
人宿烟蘿

雲點一峰如繡春催百鳥能言扁舟有客獨徃芳艸
無心自繁

青鳥忽來空谷孤槎驟入仙家窗下一壺春酒岩前
幾樹煙花

仙郎貪看山色一日攀躋幾峰老子興復不淺且須
持杖相送

題顧仲方濯錦園四首

百步迴廊面水十尋飛閣依山碧榭迥臨天外白雲
曾到人間

栽竹頓成三徑兩花日滿雙林樂此園中蕭散看他
世上浮沉

詩卷丹青闔巧名園勝地爭輝袖裡輞川山水毫端
金谷芳菲

斜靡落落晝掩虛館沉沉夏寒深谷那知漢姓長松
猶是秦官



國家圖書館, NATIONAL CENTRAL LIBRARY, TAIWAN, R.O.C.



商陽山人編蓬集

雲間唐汝詢仲言父著
友人沈昌國同休父校

七言絕

宮詞十首

寶月玲瓏隱鳳樓
迴風蕭颯洒衣秋
空將紅葉題清怨
夜靜溪寒水不流

清漏沉沉秋夜長
簾疎明月照流黃
夢魂欲向昭陽去
猶恐君王宿未央

北斗星迴紫殿低長河影落鳳樓西雲和彈盡梅花
調歌罷猶聞烏夜啼

紫陌陰陰柳絮飛宮門常掩燕來稀昭陽殿裏笙歌
迎聞道才人盡賜衣

上林風煖雪初殘謾縮新粧倚御欄復恐蛾眉不如
柳鏡中一日幾迴看

的的珠簾落日曛遙聞前殿動南薰宮牆柳暗長門
鎖日斷昭陽起暮雲

不見龍輿出紫微笙歌百道向空飛蛾眉自愧宮門
柳猶得青青拂御衣

空階幾處見苔痕桂殿陰陰白日昏二月簷前猶積
雪春光疑不到長門

風吹楊柳影毵毵百轉鶯聲逸御簷却恐宮花能笑
妾含情不敢上疎簾

落木蕭蕭紫陌頭砧聲搗散六宮秋君王自向長楊
去明月依依空滿樓

塞下曲十首

春光那得到長城何處梅花笛裏生三奏高樓斜月

落征人誰不動鄉情

回樂峰前白草肥故園花鳥已應稀
征人日夜思前國却怪雲鴻復北飛

木落燕支朔吹涼星臨古戍夜蒼蒼
更追驕虜陰山北獨枕雕弓卧曉霜

玉門西去更無春滿目黃沙不見人
惟有明君瑩上草年年猶為漢家新

一為征客戍遼陽十載秦城歸路長
夜半樓頭戈劍笳聲吹下玉關霜

胡兵昨夜度居延候火連雲入漢邊
何日班生投筆去直教青海斷風烟

霜明大漠駐旌干笳柝宵鳴寶劍寒
腸斷胡天秋色莫未知何日破樓蘭

西隨飛將破樓蘭東望鄉園路杳漫
莫怪征人頭易白天山霜雪夏猶寒

北逐單于出漢疆月明戎甲帶秋霜
遙憐今夕香闌夢欲渡陰山路轉長

一辭丹鳳十經春伊昔紅顏白髮新
總使閨人成塞

夢相逢寧識舊時人

明妃辭十首

多少蛾眉侍翠華誰憐孤妾向胡沙
明朝征馬千山外何日能看上苑花

漢宮回首淚如絲恨別秦關馬去邊
白草城邊明月色還疑內苑侍君時

平沙渺渺暗風烟路轉胡兒飲馬泉
此水倘能通漢國願將隻淚寄秦川

胡風颯颯走驚沙曠野無人白日斜
塞草莫迷歸漢路夢竟猶得到京華

陰山絲管夜紛紛羗女嬌歌落塞雲
非是漢家朱鷺曲夜深腸斷不堪聞

漢塞旌旗雲外看燕支山近朔風寒
胡天目極腸堪斷羗笛偏吹行路難

一別西宮萬里行夢魂幾度入秦京
穹廬夜半聞征馬疑是君王玉輦聲

大漠蕭條白草閒望中秋色徧群山
誰言故國三千里飛鴈猶能入漢關

一望胡天意轉迷，冰霜五月尚凄凄。
鏡中莫怪生秋髮，春色何曾度隴西。

蕙帶涼生大漠秋，還思漢女舊同遊。
今宵露冷披香殿，未必無人向月愁。

出塞行

朝鳴鼓角度河汾，斬得烏孫日未曛。
貂騎踏平沙際，草龍旗掃盡塞邊雲。

平番曲

半捲紅旗大漠清，烏孫面縛獻番城。
將軍破虜旋師

日天子親臨細柳營

少年行二首

章臺楊柳搖青絲，五陵年少醉酒時。
日暮臨分不忍去，白馬既行還遲遲。

丹楓葉落秋草空，少年馬上持雕弓。
射得平原一狡兔，金鞭飛入浮雲中。

漁父辭二首

八月江潭流水清，蘆花飛處釣船輕。
錦鱗換酒歸來晚，七里灘頭月正明。

長江淼淼去無涯一葉扁舟萬里家日暮停舡在何處遙看前路有蘆花

月夜有懷

月下空林人未寢悲風拂劍正淒淒蕭條無限傷心事何處饑鳥亦夜啼

寄懷顧爾卿二首

別君霜雪正淒淒別後思君楊柳齊野鳥不能甘寂寞百花深處向人啼

竹院陰陰燕子過思君日日動悲歌江天積雨迷春

色應是離人別淚多

閨怨二首

夫婿天山事鼓鼙長

幾見綠楊齊無情最是秦川

水日夜東流不向西

殘葉飄飄碧樹秋寒螿啼盡玉闌愁閨中望斷南來鴈不見音書到雍州

秋夜雨中懷士雅兄

獨倚空亭秋夜永離愁無限逐西風那知遠客思歸恨不在蕭蕭烟雨中

獨坐郊園聞諸君泛菊蕭寺漫賦一絕

流水潺潺落日低坐依叢菊憶招提幽人亦是叅禪
客不借輕杯一渡溪

久雨初晴見江梅發憶士雅兄

昨日離亭暮雨哀朝來晴日滿荒臺無情陌上江梅
色偏值愁人別後開

林花盛開邀曹三卿共賞口占一絕

春莫田家花滿郊花前携酒欲相邀君來速取林間
醉不許東風咲寂寥

米囊花發滿江臺花盡春光客未來傳語東風暫相
惜餘枝猶待待君開

春思四首

東山一卧不知年幾度春光意黯然彈斷鳴琴宵更
永悲風吹雨入燈前

日日汀洲採白蘋岸傍垂柳拂波新誰言春色能消
恨陌上烟花亦妬人

七里灘頭烟水春子陵白首釣江濱英雄自古沉荒
草溪上東風莫笑人

永日江頭理釣絲
笑攀叢竹坐題詩
詩成吟罷誰相和
鳥踏浮雲下碧池

莫秋寄黃孟郊五首

寂寂空林久索居
著書無復似相如
梁園詞賦君休問
落葉秋風滿敝廬

葉落深林樹影稀
江風蕭瑟雁初飛
思君獨步清秋月
踏遍荒郊露滿衣

吳鈞繡澀見苔痕
心事蕭然不可論
但使阮公能道我
猶堪一嘯動蘇門

病裏思君惜歲華
芙蓉花落滿江沙
惟憐黃菊能相待
枝拂清霜未吐花

題詩每日傍江波
江水泠泠別恨多
不是王猷能訪戴
剡溪秋草更誰過

春日閒居三首

偶尋芳草步荒臺
野徑春陰長綠苔
黃鳥自堪相對語
花枝應不厭人來

風搖山樹鳥聲喧
竹徑春深草自繁
倚杖空林春寂寂
幽花相對益忘言

二十餘年隱薜蘿空庭惟有燕來過不知舊日豪華
地幾處蒼苔沒綺羅

春日憶士雅兄

萋萋春草徧江頭一上平臺萬里愁試向東風聊借
問何年春色得同遊

寄懷嗣宗兄十首

東山携手是何年幾度相思意黯然
遠戶漸看秋草沒贈君惟有濟江篇

蓼花楓葉滿汀洲獨抱漁竿對海鷗
溪水自能知別

恨思君無日不東流

日日沙邊卧白雲鷓鴣鴻鴈共為群
秋風忽起西堂意採得蘋花即寄君

空林露冷菊花秋獨掩荆扉詠四愁
別夢不知江路遠夜深還入謝公樓

渺渺長天鴈影高相思每日對江濤
西河烟景君休問秋色催人欲二毛

水閣蕭條獨倚欄芙蓉飛盡菊花殘
荒郊日落西風急此夕誰憐范叔寒

剡溪流水浸蒼苔聞道王猷欲暫來秋色已闌君不見滿庭黃菊為誰開

江樹蕭蕭晚日曛寒蛩啼處不堪聞城中車馬應無限惟有鐘聲到白雲

空庭寂寂晚風寒獨抱鳴琴向月彈三奏梅花天欲曙數聲啼鴈下江干

江曲寥寥響莫砧坐來明月挂空林謝公今夕池塘夢應在西河渌水陰

寄黃孟郊三首

秋盡籬邊菊亂開相逢花下共啣盃那知今日思君恨多逐淒風暮雨來

淒淒飛雨灑林端夢起東窓獨倚欄客去空山秋色老滿籬黃菊為君殘

暮倚江亭水氣清寒郊迴首白雲平思君此夕愁無限蘆葦蕭蕭落雁聲

醉後與孟郊別率爾口占三絕

夜倒清尊月滿衣醉中不覺曙霜飛朝來又是河梁別殘葉蕭蕭獨掩扉

林鴉初散曉風清忍向尊前唱渭城日暮獨遊溪水
上浮雲猶是故人情

斜陽西去水東流昨日春光今日秋莫怪臨川頻悵
望百年能得幾同遊

春日閑坐憶從子伯安

坐來溪上日西斜手折垂楊惜歲華傳語阿咸相憶
否故園今已落殘花

孟郊遣使來訪折花贈之因題二絕

林下思君日正斜忽逢青鳥到山家貧交何物堪相

贈折盡江邊一樹花

憶昨歌聲動遠空朝來雲樹寂寨中呼童盡折花枝
去不使東風捲落紅

春宵聽雨

疎燈相對夢魂驚蘭室蕭條起別情寒雨不知人意
苦終宵猶作斷腸聲

水亭湯興二首

草長花飛已暮春題詩永日坐江濱煙波遶戶堪垂
釣水鳥無心欲近人

江上飛花點硯香
簷前流水即滄浪
人生隨處堪行樂
一曲狂歌送夕陽

春晴偶作

江上烟花歷亂飛
趨庭無日不依依
高堂春色應須惜
當解春衣換酒歸

田家竹枝詞二首

試來溪上覽春華
行遍平疇盡野花
田父相遙問何處
綠楊桃李是儂家

尋春獨步清溪曲
手折花枝倚脩竹
向風長嘯忘歸

來踏破不借芳草綠

顧繩甫折花贈內
余為戲題二絕

隔牆花影正參差
試向山家乞一枝
寄與閨人應挿鬢
遙知旅客重相思

虛窻日日見殘紅
小院穠花半已空
更喜春風吹不盡
一枝猶得寄閨中

代吞繩甫二首

錦字無因寄遠音
幸投花朵見同心
閨中自有佳期在
莫向臨邛弄玉琴

雲髻蕭疎落翠翹雙蛾猶欲待君描輕塵已滿盤龍
鏡空寄烟花伴寂寥

別郊園

懶將病骨混風塵一卧林間四十春別後鶯花相憶
否明年味汝是何人

過濯錦園有感

憶昔名園學避秦武陵堤畔九經春今來花竹非無
主不是當年買賦人

夜別陸長倩得青字

悵別高樓酒易醒坐聞落葉滿沙汀春來倘憶同遊
地無限垂楊夢裡青

秋杪寄懷陸伯達六首

九日黃花歷亂開蕭然扶杖獨登臺坐看宿鳥歸飛
盡不見王弘送酒來

颯颯西風起暮山深林坐久白雲還信陵賓客應無
數誰念侯嬴獨抱關

蟋蟀啾啾鳴草根臨觴不語思王孫愁來一奏小山
賦桂樹蕭條空斷魂

孤村日晚秋聲壯曠野天高海氣清
落葉題詩堪寄遠長風吹得到江城

蒼苔殘葉遍庭間草閣雲深盡日閑
千里懷人秋色暮忍聽溪上水潺潺

幽壑沉沉起夕煙空齋寂寂抱書眠
江淹正擬子原作昨日新成入洛篇

旅夜集句

空山獨夜旅魂驚萬里歸心對月明
白玉牕中聞落葉何人不起故園情

雪夜旅宿

空庭坐久燭花殘雪覆茅簷夜正寒
遙憶高堂杯酒後應憐游子布衣單

折楊柳二首

垂楊低拂綠波新攀折輕枝憶遠人
此地風光何限恨玉門關外况無春

昔攀垂柳唱陽關柳復垂絲君未還
惟有揚花易飄蕩隨風吹得到陰山

春暮與曹山人夜飲得花字二首

水遶孤亭草徑斜
薜蘿深處入山家
吳天借得連宵月
醉殺江頭萬樹花

溪上東風吹暮花
客來携酒坐平沙
飛杯直使江鷗醉
遮莫林間落月斜

病中寄友二首

蒼蒼山木帶秋雲
竹籬溪頭日已曛
莫怪少陵腸易斷
暮蟬征雁不堪聞

寒烟衰草遍空山
竹徑蕭條晝掩關
黃菊遶籬空自媚
更無人到白雲間

林間收坐

長天雲開淨如掃
坐來月出山光曉
夜久無人歌轉狂
數聲鶯散秋林鳥

春晴有感

森森碧樹響黃鸝
風動疎簾日正遲
誰道寒巖春不到
枯蘭今亦發新枝

寄陸伯達二首

荒郊落木夜紛紛
靜聽鴻聲正憶君
浪跡西河猶抱病
秋風能不惜離群

南北經過一水長
臨風相憶興飛揚
江邊雲影迷寒
竹市裏砧聲搗夕陽

集句寄友人

蕭蕭落葉送殘秋
嶽色江聲暗結愁
君在江南相憶
否片雲孤鶴兩難留

月夜集句

歸心一倍長
離憂去國長為不繫舟
此夜斷腸人莫
見依依殘月下簾鉤

歲杪滯舟金滙塘

冰雪淒其起客愁
汀沙三日滯輕舟
含情恨殺寒溪
水不與歸心日夜流

旅宿

冰塞長河雪正飛
行人日夕念將歸
隣雞最是無情
極半夜催人起振衣

寒夜荅嗣宗兄

孤館沉沉燭影殘
淒風蕭瑟客衣單
若非華萼憐貧
病沽酒無錢夜更寒

為顧玄子錦帳詞四首

天淨銀河帶晚霞鵲橋乍起度龍車彩雲散作羅裙
色朔雪飄為錦帳花

錦江車馬夜紛紛絳蠟高然照海雲聞道秦臺歸弄
玉簫聲吹下鳳凰群

春風忽到綺樓前香暖金爐暗吐烟只恐劉郎迷採
藥碧桃花下不知年

環珮珊珊雜鳳簫秦樓鏡裡玉顏嬌向來張敞凌雲
華今日雙蛾仔細描

留別徐唐運

喚起啼殘江上春
蓄微將破客愁新
無因更取高陽
醉芳草青青別故人

寄懷顧仲修

慣向沙邊理釣舟
投竿不復亂江鷗
平原公子如相
問失意虞卿已白頭

春暮寄懷陳逸彥

憶昔堤邊柳半黃
飛書相許過柴桑
春光不為仙郎
住落盡江梅又海棠

戲為牡丹解嘲二首

有引

顧舜甫齋頭牡丹絕艷乃魏紫也連年盛開
而無題咏之者友人曹元達作詩嘲焉余為

解嘲

曾向唐宮闈綺羅寧知流落此山阿西園公子休相
笑自古紅顏薄命多

自矜國色占春風奈與明妃出處同若問年來寥落
意野王臺畔即深宮

舟中別許憲副十首

衣繡神羊易左魚薰風十里動驪駒留錢笑別山陰

老太守囊中但有書

烟水蒼蒼萬里分千家梅雨濕江雲吳中無物堪為

贈一棹清風別使君

縹緲雙旌拂紫烟閭閻相顧各凄然傷心更在驪歌
後月到雲間異往年

扁舟一葉下江湄案有鳴琴篋有詩未敢尊前奏歌
頌使君清復畏人知

海天何物不陽春別有息波起酒鱗今日河梁揮手
去夷門誰識抱關人

河洛三川漢舊京嵯峨中岳倚雲平到官正值呼嵩
節驚起山靈互有聲

聞道漳河水至清烟波先得使君情他年筆掃銅臺
月肯使曹劉獨擅名

陽關歌罷黯消魂雲壑歸來更掩門白苧城中三萬
戶何人獨憶信陵息

青翰舟中霜氣浮橫塘五月似清秋闔閭城下潺湲
水併作離人一夜愁

閉關十載著玄經世路無知鬢欲星不是桓譚重相
許千秒編簡為誰青

挽顧中翰仲方十首

淡雲疎雪夜冥冥此夕人間失歲星天子若求封禪
草閣中藜火舊會青

長康三絕動神州洒筆瞿塘水倒流今日人琴俱寂
莫吳天風口為君愁

憶昔臨溪發浩歌今來人去水空波不須更奏山陽
笛坐聽淒風淚已多

簪筆明光侍從年堂中珠履客三千只今寂莫江河

上誰鼓瑤琴哭彥先

颯颯西風晚更悲一庭落葉哭君時
可憐金谷滿園樹明歲花開知為誰

紅顏染翰金門裡皓首刪詩錦水濱
白雪遺編應滿篋千秋玄晏定何人

碎疆樓閣倚雲開日夕烟霞入座來
人逝臺空山寂寂只今誰抱雍門哀

扁舟憶昨訪詞壇把酒論詩蠟炬殘
今夜月明君不見一溪寒水浸雕闌

寒梅花下幾經行約共春來泛落英
誰料淒淒冰雪際漾舟南浦送銘旌

君本微星摘世間精靈今擬入仙班
只愁我輩先朝霧不見遼城化鶴還

挽顧光祿仲修五首

勒石千秋意已深淒風一夕到人琴
東吳黎庶懷恩否白日應知報國心

一代英雄掩夜臺春林啼鳥盡堪哀
天心不惜東人困保障垂成玉樹摧

三散千金氣自豪坐令恩澤徧
蓬蒿不知笛奏山陽後賦就
誰人淚滿袍

紛紛萋菲謗誰明徒使吾曹恨
不平借問漢廷當路客何人
高卧濟蒼生

西苑新開似漢年東南民力重
堪憐弘羊用事陶朱死誰為
吳人解倒懸

編蓬集十卷終

蓬後集序

雲間唐仲言生五歲而瞽瞍而解讀
書著書有編蓬集行世諸名人爲作
序頃且行其後集而問序不佞不佞
于仲言之先後集及諸名人之序仲
言序仲言集者旣卒業廻環而謂其



序仲言集也無不仲言集也者其序
仲言也似未足仲言也夫仲言之集
從仲言之寸竅而出而此寸竅所出
之集從仲言之雙耳而入仲言之雙
耳所入與吾輩之雙眸所入也何以
異仲言之寸竅所出與吾輩之寸竅

所出也益無以異所出所入既等之
乎無異而奚以拘拘然謂吾輩之雙
眸是常仲言之雙耳則異乎予所異
者獨異此區區之寸竅既無形埒自
無局塍何以槩此世人盡被雙眸管
定何以獨一仲言能逸出雙眸塍埒

而爲六根互用者留此一楞樣則造物之用仲言寔異而非仲言之用六根果異也古人有言目者身鏡視多則鏡昏耳者身牖聽衆則牖閉人之精神以嗇用而全也審矣然而奪明于視者往往偏聰于聽而窒竅于耳者又未必併靈于目則首楞嚴所云眼止八百功德耳具千二百功德此亦分數較然之一驗矣仲言之廢目任耳與尋常無目者豈有異哉惟是記問可襲也而慧孔其胡可假易卽雜務可營也而騷壇之闖入何以得

之不識字人乎以此警世人之耳目
以此震耳目之聾瞶較之卜氏左氏
既讀書識字而始受天刑者尚未堪
與仲言爭竒惟唐世有靈知禪師生
無雙目號羅睺和尚經論文字自然
明了庶幾天眼畧同謂造物者非大

用仲言不可雖然如余不慧雙眸炯
炯而寸竅塵封以視仲言寔覩顏面
輒敢僂然搦管妄判仲言爲造物用
而未敢謂仲言能用造物也則以仲
言氏駸駸有六根互用之竒而五十
年來尚小用之騷壇耳蓋嘗挾筴讀

書謬謂神游千古或臆決門外事亦
偶得一二如目見然此浮塵眼根以
六尺墻障之而障以一尺布障之而
障乃至一片糠粃障之而亦障卽諸
障盡屏而不假日月燈光雖復空曠
千里了歸黑暗耳錫玄每對此景轉

一靜念輒自悚然慙汗我此昂然人
相于四生中最稱難得我此炯炯眼
光于四大中又獨稱神物柰何以人
相而受物相之顛倒又柰何以神物
而受頑物之禁持縱得如阿那律陀
無目而視尚虞五通不得漏盡何況

勝義六根便乃爲浮塵隔越丈夫兒
誰任其此然則余輩之有眼而無眼
視仲言之無眼而有眼誠不啻愧之
而余所望仲言更須自顧此雙耳所
入寸竅所出與余輩之雙眸所入而
出等之爲瞪發勞相一睫以清明眼

看破黏湛識非一終六非六終一當
知是根非一非六庶乎塵色旣盡旋
見循元咄咄仲言尚有進乎編蓬兩
集者

萬曆戊午臘月旣望長洲劉錫玄書
于白門之寄根居



編蓬後集小引

唐仲言編蓬集既懸國門行四
 遠矣其卜居金陵三年渡携家
 還五茸友人以所為詩若文授
 之梓是為後編蓬之義我取諸卜
 子夏子友居聖門文學科而於

國家圖書館, NATIONAL CENTRAL LIBRARY, TAIWAN, R.O.C.

詩尤有深詣經傳所載以爲以繪
事通禮後若因詩而聞不至三無
子起若論樂與音相近而不同
廣大精微至於詩序鼓吹三
百篇垂教萬世矣子夏喪明在
矣子之後仲言則五歲病盲說


詩爲詩博洽千古羽翼三唐殆
子夏所謂詩之事昭乎若
日月燦乎如星辰長者豈不自
不見終華可悅之事以爲
中而日知其心每月無忘其所
能以爲是耶孔子語子夏志

八口至待上至焉正明日而視
之不可得而見也神下領之
授吾軍九目安能窺瞰之清
閩因題數語于後以足命名
編蓬之家

大泌山人李維楨本寧父



白下吳天祥刻



仲言弟編蓬集後序

昔人謂詩窮則工詩非能窮人以詩必窮者而後工也余弟仲言不幸以盲廢幸而以盲故得工於詩藉令少時而有錢以濟醫藥當或不盲即盲或不至兩目眩然庶幾得不廢然仲言窮不極盲不甚計必且云而嗟咀矻窮經操寸管以期中有司

尺度而人之才不兩有設機緣稍礙難於
逢年直皓首青衿老矣平生精力半已耗于
支離影響之語又何暇沉酣六籍漁畋百
氏賈餘勇於風騷間以成今所謂詩也仲
言自齟年失明無論目不辨魯魚幾於生
不淺天日家君間咏杜律俾朝夕自娛初
不問其能解一日忽出片紙令季弟書之

以視余則彼所自為詩矣余驚叩其所咏
少陵諸什雖不盡解要目欣然會心於是
廣以風騷參以陶謝旁按開元大曆諸家
徐為口授遂終日據梧呶嚶不輟恍若棲
神千古而自忘其盲久之即寢食都忘覺
魂交夢想之中無非詩也者而後騷之出
陶之澹謝之英青蓮之豪逸少陵之雄深

始皆扶扁而窺見其奧然則仲言固歿其
強弩之末不得一試而反得養其鋒穎以
樹旗鼓於詩壇天以奪其明於此者未必
不張其目於彼丈夫三不朽之謂何而泯
之竟不得標豎所就孰與仲多而仲言果得
以文采表見垂千秋名又何取雙眸炯炯
而僅博一青衿以老也且古以盲廢而工

于詩者豈必張文昌籍卽卜子夏投老西
河之上而築壞室編蓬戶彈琴其中以歌
先王之風時蓋亦為夫子受詩云倘詩成
而揚於風雅六義無缺縱傳名山死且不
朽後世子言求之不難而仲言雖不自
信謂士不遊大人以成名而老死巖穴極摘
滌若春華六煙消漸滅耳復哀集唐人詩

廣于鱗之選而重加編註句釋字證非先
秦兩京六代之語不列於篇其苦心有足
多者夫仲言恐不能自為詩以傳而又期
託古之詩以傳亦可悲矣余友沈君公路
博雅好古為捐貲首倡謀以其詩穴木而
余為叙梗繫於末簡因題曰編蓬集使知
隋書譚道詠歌先王聊足自樂而或乞孺

玄晏不至覆瓿則當世必有知仲言者余
蓋不多仲言之能詩而憐其自少業已盲
廢盲而至不識一丁而直思擴撫千古不
甘老死巖穴為文昌諸君羞亦一奇也嗟
乎仲言毋以窮愁自苦吾子非窮愁安能
有所發憤以自見於世云

音

萬曆戊申如月中澣兄唐汝諤士雅父撰

友弟唐道亨書

編蓬後集目錄

卷之一

賦八首

三言詩二首

四言詩三首

卷之二

五言古詩九十三首

卷之三

七言古詩五十八首

卷之四

五言絕六十二首

六言絕十四首

卷之五

七言絕一百七十四首

卷之六

五言律一百首

卷之七

五言律八十首

卷之八

七言律一百二十一首

卷之九

七言律九十九首

卷之十

五言排律二十七首

卷之十一

七言排律十三首

三五七言五首

四六八言二首

九言一首

一字至十字一首

回文四首

八音一首

十二屬一首

五行一首

數名一首

卷之十二

序五首

傳二首

記二首

志銘一首

銘一首

疏二首

檄一首

贊七首

卷之十三

書十首

卷之十四

啓十五首

卷之十五

誄三首

祭文五首

雅社約十四條

編蓬後集目錄終

編蓬後集卷之一

華亭唐汝詢仲言父著
舊許孫織錦伯闇父校

賦

愁賦有引

予少抱窮愁思構是賦以王元美有作
輟筆者累年至是家益貧愁益甚乃嘆
曰人各抒其情耳鷓鴣豈以鴻鵠而去
其翼哉遂作賦曰

上聖樂天至人寡累苟非其倫疇不爾會緣情
而育觸物而萃縈臆如絲煎心若沸奪我榮華
予我憔悴滌之彌膠排之莫離徑萬里而相從
逃虛空而偕逝故爲愁則一爲緒則千上千袞
黻波及林泉旣糾纏於獨夜亦散漫於四筵或
幻根於花鳥或附響於管絃或感別而充斥或
晤對而嬋媛若乃長樂桑榆華清板蕩戚姬關
情太真遽喪風韻筑而空歌雨淋鈴而增悵慮
鴻翼之旣成顧馬嵬而未葬臨百子今難爲歡

隔三山兮永相望至若陳后長門班姬長信鴛
錦委塵蟬翼罷髮怨金屋之花殘履玉階而苔
印漏值夏而偏遙扇逢秋而莫進舉浮蟻今憂
難消拂盤龍兮淚空盡又如商箕佯狂楚屈被
逐牧有夷羊室盈菴菴激清商於絲桐陳離騷
之反覆痛狡童之不悟悼靈脩之已辱徒發嘆
於麥秀卒葬身於魚腹及夫子卿受制燕丹見
留瀚海雁斷咸陽草秋牴不孔子烏未白頭魂
望鄉而迷返淚臨水而爭流又如洛陽少年龍

門太史坐謫謫居無辜下理撫鵬臆而賦成俾
蠶室而心死雖簡編之不磨奈迤邐之無已沒
邸第其可憐終闕茸而蒙恥他若去相之賈削
侯之農矐目之傑臏足之雄南冠桎梏客裘蒙
戎牛衣病困狐白計窮獻書梁獄抱璞楚宮浚
稽敗而飲血疏勒圍而煮弓悲說難之不免慙
揣摩之未工鋼百鍊而繞指侯數奇而不封行
栖栖以泣路坐咄咄而書空或宣心於竹帛或
飲恨於襟胸莫不酸吟夜雨永慨晨鐘復有詞

人在野貧士索居負病埋照抱影空廬傲左丘
之翼聖效虞卿之著書呼長鏡而慘愴循四壁
以躊躇羨雁鳧之一飽哀瓶粟之常虛下及寡
妻棄妾戍客征人閨花振綺塞草鋪茵感春風
而興思望秋月而沾巾至於景逝春徂鳥啼花
落公子停歌王孫罷酌趙女抱瑟以登車秦娥
操箏而下閣此時雖有石腸之夫木心之客靡
不掩面攢眉驚魂奪魄嗟乎江海有涯乾坤有
終風雲可握鬼神可通亘古今而不廢合貴賤

而皆同無城郭之可禦無矢石之可攻倏去倏來莫測其蹤河間藉爾以名世少陵得之而稱雄歡樂皆有極獨此愁之無窮

期誅茆賦

余以五齡喪明十歲始誦書史十五而能詩每與家伯氏士雅相卧起伯氏方治經生業輒爲余言得沾薄祿養親并卜菟裘爲娛老計左圖右史與汝汗青其間便足了一生鐘鼎非所慕也已而

伯氏困於場屋僕又曳裾侯門曩昔之約百不一酬因爲賦以志慨其辭曰

惟洪鈞之陶萬兮羌塊北而紛如混愚智於茫昧兮剖靜躁於性初雖內美之足恃兮奈外物之見驅慨世路之多岐兮何行藏之在予或片言而裂土兮或三世而不遇蚡貌寢而鼎鉉兮馮公偉而郎署湟吏顯而稱孤兮文星困而負茅悼漫漫之未旦兮悔搢搢之徒勞曜靈征而舍我兮蓬髮霰其二毛厭濁世而鴻舉兮期相

率以誅茆犁子真之新疇兮剪仲蔚之舊蒿就
林木而結宇兮版土壤而成築設泌上之衡門
兮臨許由之壑谷滋荃蘭於庭祀兮索杜蘅以
葺屋觀百卉之向榮兮欣宿莽之舒綠施盤木
之曲几兮陳外史之實錄斷荻蘆以爲槩兮燔
荆薪以代燭閱圖史而未竣兮喜黃梁之已熟
烹露葵與春韭兮兼新釀之醴醪於是弟勸兄
酬吟花嘯竹酣不及沈韻不至角咀陶謝之清
芬辨揚馬之異曲念至樂而無假兮又安用夫

干祿恐黔羸之不我亮兮猶未罷乎驅逐公孫
耆而就徵兮伯起暮而逢鱸倘左紙之終貴兮
豈韓灰之不然瞻江湖之浩蕩兮友松桂其何
年庶真想之在襟兮終不愧夫林泉

鬪畫眉賦

茂樹之陰重岩之曲土鬱雄風仙禽是育眉擬
畫而稱奇氣極豪而善角絕巧婦之毀芳鄙嘉
賓之穿屋音雜鸚而催花鬪齊雞而成木若乃
陽和起魚蝦肥青林如綉綠野揚菲舌已調而

續遺後集 卷一
五
巧哢翮始健而驕飛歷昆明以求啄憩鄭圃而
振衣於是虞人獵客張羅設機貪餌偶下觸絲
安歸低眉就桎斂翅損威處鏤金之笈檻懸結
綺之軒屏遐心莫轉拘怒詎息嘯儔侶而思闕
隔牖戶而矯翼羽數刷而上指距將逞而下激
象魚貫以布陣訪蛇形而抗敵兵一鳴而驟交
戰九接而未克進若搴旗退惟敗績乘利長驅
追奔逐北却旣再而更前鎩已甚而猶飭縱兩
雄之莫並庶一志之不易嗟爾微禽綠衣翩翩

畜之孔馴依之可憐何快心於一勝遂見玩於
囚筵雖人情之好異亦物性之固然恐翰音之
擅技續陳思以成篇

龍潭競渡賦

攝提之歲五日昧日剽雨輕飛積陰乍散雲吐
睨而猶蒙花含濡而增燦川谷爭波溝瀆江漢
柳夾道而擁煙蘆成陰而覆岸郡之西郊潛龍
舊湫差池闐闐漭沆清流瘞舍利而建刹抱明
珠而起樓地有抱珠樓今毀因地之勝以壯斯遊於是

畫舸漾雲帆張橈奔激勢若翔天矯焱忽徑復
低昂類羣龍之奮躍象逸驥之騰驤馳騁未半
歌吹四起舫若屯雲人如集蟻迎小小於西泠
徵靡靡於北里燎綠艾以盈爐斷青蒲而設醴
賚醪有蕩漿之舟侍坐有司花之史於是賓從
絡繹喧喧闐闐傾壺倒榼如鯨吸川樂芳晨之
綺麗觀水戲之騰騫雜款乃於絲竹弔湘纍以
詩篇乃歌曰水潺潺兮風蕭蕭沉角黍兮魂難
招想汨羅兮煙波遙懷先生兮心徒勞痛飲酒
博向北郭而迴舟不知白日之將落

雙媛賦

有引

雙媛者瞻侯戴君之姬也曰雲濤月液
瞻侯楚人入吳聞雲濤艷而納之雲濤
里中有月液亦風韻絕世少相雁行因
雲濤之歸戴媵焉夷光鮮雙羅敷能二
清江一葉左台右須彤管千言吟春韻
雪海內風流無過是矣因爲之賦

荆臺之雋吳國之娃士以孤標女以雙誇趙挈
妹而靡妬楊形娣而更華信天貺之所集非人
世之能家方其振彩江都擧芳梓里春卉謝妍
朝霞讓綺壁聯輝而掩映珠爭媚而旖旎解佩
纒以綢繆盟金蘭兮終始思擬跡於皇英期同
侍乎君子戴侯卓犖夙冠楚材筆掃二儀文揆
九垓賦靈妃於洛水想佚女於瑤臺於是浮青
翰張錦綃倚棹迷樓流覽河橋踐金波於花巷
聞繡戶之瓊簫簪叩扉而請覲手釋管而含嬌

腰初柳兮猶弱眉遠山兮未描露皓腕兮心熱
轉清盼兮魂消下鏡臺以雕玉迎天孫以星軺
熏百和之薌澤施七寶之步搖車將登兮更下
綏已受而猶失顧羅幙以徘徊戀同聲之月液
而乃幔絲重牽雲輶再巾雙鳳逐鳳三星幻人
鎖二喬於銅雀獲兩珮於漢津於是風舉雲翔
迷花醉石窮山水之清幽極方輿之轍跡發江
都而焉泊經莫愁之舊湖想羅裙於芳草餘鬢
色於青蒲詩旣成而賡和酒將盡而重酤明鴛

續通雅集 卷一
棹於秦淮憇桃葉之古渡奇娣妹之根連踵香
風於旦暮目漾水而爭波手攀花而振素舍輕
舟而登陸遵白門以試衣尋藏烏之楊柳訪壓
酒之吳姬花相窺而爭媚燕欲舞而交飛覽帝
里其未周忽馳情於桂苑登踞虎之佳丘怪遊
人之長滿携小玉以鳴箏抱雙成而調管春旣
徂而增悵思銷夏之勝灣瞻五湖之浩蕩躍青
雀于波間慨西子之莫覩空如眉之二山聞越
中之綺麗遂縱目乎蘇堤悲碧桃之已謝欣紅

蓮之始齊面與花兮難辨月留人兮易低乃歌
曰擁雙娥兮追勝槩水爲鏡兮山爲黛吳與越
兮足遊何仙人兮方外歌竟命酒酌以大斗藉
溫柔以爲鄉任萬物兮芻狗

苦吟先生賦

有引

先生姓黃氏字叔居干將山妻死勿娶
家貧勿戚日以苦吟爲事諸公贈詩盈
篋先輩范叔子有傳余因賦之

干將之山天地大冶勢拔羣峰竦如天馬泉碧

沙黃草青石赭樹蒼鬱以干雲竹檀欒而覆野
幻雙鈎于洪鑪陶二俊之風雅歷萬古之靈秀
乃復鍾于靜者爰有苦吟先生誕於此山之下
方其垂髫學誦結髮操觚神栖千禩氣吞兩都
薄蜩鳩之小知踐鷓鴣之壯圖已而家難作天
步屯喪車屢駕饑饉薦臻聆風木之颯颯鼓莊
缶之殷殷枯魚發嘆於仲路比目興悼於安仁
念處世之若過悔此生之徒勤貧雖逐而不夫
隱無招而自親於是帖括燔羅帷撤仕塞其實

歡不再結白雲希伯王之遊梅鶴羨林逋之潔
少人事之纏牽肆苦吟於風月等身世於蜉蝣
玩造化於毫末若乃空山秋冥岩戶氣清銀河
振素金波在庭睇熠燿之明滅惕蜻蛚之宵征
鷓鴣啁晰於枯木哀鴻嘹唳於沙汀感孤遊而
韻結撫羣動而句成先生之吟幾於怨矣麥秋
初至禾橐旣登籜龍比玉甕蟻如澗就黃鸝爲
鼓吹泛籬菊乎兕觥樂弟妹之醅勸吐擊壤之
歌聲先生之吟幾于適矣南陌花明東郊艸軟

嘯侶鳴儔酒杯茗盃咏拾翠之嬋娟聽暎雲之
絲管搜雜綺於繁林舉衆芳於茂苑先生之吟
幾於華矣揚帆五湖艤舟三泖蘆荻新秋河山
乍曉日月出沒於波心乾坤浮沉於象表伊唔
醒魚龍之夢芬馥藉汀洲之草玄虛角勝而含
毫景純避妍於摘藻先生之吟幾於豪矣夫詩
窮則工吟苦則化借鴻鈞以陶甄窮卉木之開
謝忘世路之羊腸超風塵而獨駕亂日皓齒青
蛾無常主兮華堂砥室均逆旅兮東陵之侯鋤

瓜老兮陶白之胤藜藿不飽兮先生涉世了無
有兮苦吟終身不輟日兮古人所重三不朽兮
柴桑相狎堪尚友兮奚囊所得名山藏兮宣之
竹帛日月齊光兮

竹安齋賦 有序

竹安齋者吾友張聖清下帷處也聖清
風格秀朗雅好澹泊葺是齋也垣不赭
聖甍鮮雕鏤惟明窓淨几木榻蒲團及
古法書名畫蕭然無長物庭植修竹故

以竹安爲名用贊皇公事也余歸自白
門每憇於此喜其質而有致遂作賦云
有美斯齋超俗而構屏繪廢鏤似簡非陋開樸
之門鑿儉之竇楹不丹而上聳椽無藻而下覆
塗家山之常土踐瓴甃之淺甃於是闢洞戶敞
軒扉陳木榻施薜帷擁鄴侯之牙籤隱謝几之
烏皮披臥遊之雲岫奏激楚之金徽携怪石以
入室倚巉巖而爲闌匪創制之有異嘉磊砢之
在觀循中庭以遐思紛衆芳其奚屬慕王猷之

清真獨寄趣于修竹移免苑之餘枝分渭川之
新綠空翠落而當軒遠條拔而出屋韻輕飈之
颼颼滴湛露之濃郁若乃青陽向暮白藏半徂
簷響播穀庭流望舒呼麴生而佐歡徵籟龍以
克厨拉牧之于野渡出張薦于林居雅談善謔
越吟吳歛陶性靈于閒逸非世俗之游娛又如
屏翳秋號愁霖晝晦墜葉繽紛冥鴻嘹唳枝搖
少女之風砌滴湘泚之淚然蘇合而烟裊煮槍
旗而鼎沸地幽偏以遠心神肅爽而忘寐夫齋

以竹秀竹以齋安非羨春榮實期歲寒雖城市
以偃仰儼空山以考槃客乃歌曰竹峭蒨兮齋
絕塵庭草生兮秋復春雞肋未可棄鷗群寧遂
親母若稽生傲母從阮公淪庶幾山巨源之出
處而終不媿夫此君主人載歌曰竹數竿兮瀟
瀟掩虛窓兮寥寥暫斯齋兮逆旅終息景兮山
椒束余書兮卷余帙行誅茆兮築壤室客又歌
曰百年馳兮苦易滿志士奮兮愁日短烏司晨
兮未旦鳴君淹留兮將焉成空谷篔簹兮請爲

他日盟主人聞歌惘然若失枕六籍以沈酣扇
齋扉而不出

爲喬仲垣悼亡賦 有引

太學喬仲垣令人陸氏物化有年矣仲
垣每飯必思每祭必泣徒以簪遺可憫
存弗忘亡劍合寡諧新不逮故非淑方
德曜莊埒太任曷至是乎况雜佩亟解
橋門樹聲掌珠含輝照乘伊始徵文盲
史率爾成賦

維有生之茫忽兮孰受形之非幻賦脩短其自
天兮始雖合而終散嗟淑儷之窈窕兮締燕婉
而稱粲秉幽蘭之芳心兮兼朱華之照爛懷夕
惕之憂勤兮偕鳴雞而司旦託好合於琴瑟兮
指暉黃以爲期疑霜下而淒厲兮悼芳草之先
腓而乃羅幕晨空錦衾宵捲七寶無光雙璜罷
縮絕鏘鳳之好音兮添孤鸞之淚眼覓踰佚而
莫追兮佩珊珊其來晚夜耿耿而不寐兮懷殷
憂之輾轉月朧朧以照梁兮似佳人之乍返起

眇眇而無覩兮心搖搖其若旌精氣汨而銷亡
兮孰巫咸之可憑惟羲和之不我駐兮四運紛
其推斥感春物之駘蕩兮夏雲起而乍赤秋露
皓其始濡兮川冰峩峩而層積悲暮月之易週
兮撤靈衣而不忍進椒漿而不舉兮涕淫淫其
徒隕入故房而想所歷兮餘芬飶其未消塵掩
少君之中幘兮網生羸女之瓊簫思蹇產而不
解兮神恍恍其外飄撫弱息以自慰兮音容儼
其在茲循母誨而弗怠兮昭令名於孝思竊聞

先民之遺訓今惟禮可以譬哀杖安仁之新淚
今披仲舒之舊帷矢砥礪夫一經今庶無負乎
斷絲之良規亂曰六龍蜿蜿馳日車些百歲鼎
鼎生有涯些有美瓊樹埋塵沙些蒐今焉往閻
風巔些精靈化鶴歸何年些中庭有草日以蔭
些魯敬楚樊名聲日延些

三言詩

題吳逸一籍隱齋

赤松溪秦皇阜傍有宅僅三畝草之廬大於斗

萬卷書一盃酒醒行藥醉拊缶孺仲兒老萊婦
藝禾黍種榆柳蒿没人花侵牖栖者誰無懷叟
題者誰歲寒友

金閭述感

古金閭今陸海時數易地無改先勲闔後夫差
霸圖盡麋鹿來胡之季據張氏天洗兵開佳麗
稱甸服控八區舟蠅集輿蟻趨萬貨鍾千閭列
珠翠光耀日月欵乃唱吳趨行水心發溷濁并
吾曹來泊城下厭鼓吹思靜者吳宮苑寧復遺

梁鴻墓人猶知

四言詩

章侯口碑九章

酌酌五茸勾吳舊宇昔也菰蘆今則禾黍漕輓
紛紜東南天府杼空大東野歌萇楚思得賢侯
慰我連伍其一惟帝求瘼東人職勞爰命章侯
以幕以膏侯來自西敷政優優如暝獲燎如寒
獲裘社城之孽星奔霧消其二穆穆我侯神明天
啓目若懸珠心惟止水化澆爲淳矯枉作矢黠

者神怖痿者色起嘉肺旣清與民更始其三侯勤

民隱載詢載度奚脩而淳奚輯而若去泰去奢

含藜茹藿手調五絃庭舞雙鶴愠解南薰輿歌

斯作其四司農錢穀藉茲東吳亟則民瘵緩則國

虛侯之惠政匪疾匪徐轉輸以時伍伯絕呼庀

足生甃四野晏如其五思樂泮水蒿蘭雜陳陶鑄

匪人薰蕕罔分我侯戾止含垢揚芬作彼群彥

凌淵轢雲執經操管爛其盈門其六古稱廉吏載

石歛泉我侯載見單車蕭然魚猶在縣香則投

旃清匪求知厥植自天籍甚風謠口碑成編其七

侯之爲邑海沂已康侯之驅車攀轅不遑 帝

詔我侯暫留茲土比及三年當復召女以引以

翼作我霖雨其八滾滾之露膏彼蕭蓬豈弟之政

罔遺盲聾載抽載揚白骨而肉廼慰廼止復我

邦族明良賡歌以爲侯祝其九

題吳興吳使君香雨樓有引

使君楚人嘗築樓于卑濕爲潦水所淹
因撤去累土爲臺而樓焉公時守吳興

出所著記命郡人咏之

邗邗甘雨沾樓而香匪雨之香文園之芳隱隱
巍樓四望則壯匪地之壯襟臆之曠彼樓之初
非爽非塏馮夷颺之荒度大改補地之下就天
之寬板築旣殫俄成偉觀居不加廣境超而豁
如樓之翔如宅之拔木遜其喬山自入牖古剝
連雲拱立若走視快而適心虛而閒竹書貝葉
錯落其間禪未可逃儒不懷寶五馬東駐三吳
之表雨香在襟樓勢在目染翰操紙神飛空谷



國家圖書館, NATIONAL CENTRAL LIBRARY, TAIWAN, R.O.C.

桃源之秘異想難求投詩藝林以期夢遊

編蓬後集卷之二

華亭唐汝詢仲言父著

舊許孫織錦伯闇父校

五言古

訓張長輿

蝦蛆戲涪蹄不識江河廣敢同橫海鯨超越彌
天網嗟予生數奇喪明棲草莽聞鳥知春還扣
盤疑日響幸此蓬心存探古期獨往耳際辨三
墳暗中分萬象上交左丘氏黃池且爭長下轢

張文昌未肯齊車鞅志遠名實卑蓬蒿消骭髀
徒拂伯牙絃難獲鍾期賞彼美張平子詞名並
天壤賦就掩班生珠還隨象罔月旦評今古龍
蛇辨諸掌愧茲瓦缶音謬蒙金石獎瑤華時見
投令人豁精爽古人締金蘭道合非由強編蓬
濫成帙覆瓿常在想庶幾藉玄晏千秋名共朗

題沈公路湛華亭

孤亭水木間軒楹特閒敞清華堪娛人臨之滌
塵想彷彿鏡中遊淹留花際賞時雨洗高林溪
流發幽響何當謝人羣坐使青苔長

寄張長輿

千古期同聲經年一握手張公老著書命我忘
年友申江扇狂瀾海霧隔珠斗牽袵無由從寸
心殊未剖交情縣松筠離恨生梅柳憂來無與
言默默空搔首

投慰沈公路

沈郎氣矯矯俠烈世所聞吐諾倒滄海振筆千
秋雲擬成扶搖翰超邁越紫氛奈何殺函戰方

續通雅集 卷二
舟徒自焚塵埋黑貂色霜掩青萍文豈難黃鵠
舉羞與鷄鶩羣何當獵旗鼓將須霍冠軍

將赴姑茂發故園三首

饑寒驅遊子促促將遠征踟躕戀庭闈悽惻難
爲情老親雙白首負疴送我行淚零不忍揮掩
面終無聲顧謝室中婦滫瀡善自營

憶我垂髫時伯氏相卧起清談每夜分所樂在
文史私願永無垂携手東山趾寧知迫世情倏
忽辭桑梓夜聞孤雁鳴涕淚從此始

自嗟少貧病生計常蕭然雖有三男兒褐衣咸
不全艱難復何依所恃惟簡編汝年已志學與
文擬成篇仲舒帷早下母令歲空遷

留別陸希甫

西河老病夫手不解操管題詩每倩人與子締
衷歎縹囊日盈溢靡不出君腕念茲當離分悲
歌正悽惋携手入閭巷舉觴不辭滿別易怨會
難意長悲夜短皎皎歲寒心庶幾無近遠

夜泊神仙巷

移舟不百里去家已五日舉觴眷舊知觸物思
堂室出宿泊西郊停橈景將畢行色旣慘澹驚
颼更蕭瑟棲遲感夙心飄蕩愧薄質道聞漁者
歌爽然令自失

晚次嘉禾

曉傍吳江行暝尋越城入問俗豈異鄉聞言識
他邑月明鳥孤飛夜久砧雙急憂來莫與晤登
艫空佇立

遣興

嘗聞韓國盧搏兔如霆激一朝使捕鼠桎足始
能獲大塊渺悠悠巧拙各自適曷見西郊麟俯
身就羈勒去去安所之空山有蓬藿

季夏三日張叔翹生朝謾賦四首

山城積雨後四郊天地清農人鮮漑灌田舍亦
已寧禾黍覆阡陌棠梨蔭簷楹幽禽意亦閑就
我山齋鳴至哉神明守卧治且三齡一觴聊勸
汝聽此絃歌聲

姑蔑舊蕭索蒼然萬山滿石田不易耕民俗恒

苦旱自君分符來甘雨無時斷黍稷既紛鬱况
此催科緩予本中林士慕義來斯館樂酒在今
晨西山聞鳳管

自經西苑開九寓昏氛作何鄉勿虎歛無津不
魚鑰北海久蕭條疇復新其閣霜肅露喬松鷄
蕃貴鳴鶴不見柯峰陰羣黎互畊鑿試採輿人
歌佐此瑤池酌

娟娟娥眉月忽向南樓生使君每清夜絲竹羅
前庭九苞覽德下雙鹿含芝鳴時邑令雲歌出
時邑令 鹿 獻二鹿

瑤水霞觴泛宜城飛揚煙霄意宛轉閭閻情試
看樂公社丹青已圖形時衢民有以使君
小像獻者因及之

山樓幽興

井以甘而竭李以苦而繁伊予支離質所在有
餘閑時暑方埃鬱脫巾常晝眠牀頭多散帙檻
外羅羣山長風颯然來微雨沾櫺軒新涼滿座
生轉覺山樓偏洗杯酌苦茗撫軫揮繁絃沉吟
曲未終暮鳥時飛還客遊何所樂所樂非林泉
君看今姑蔑何如漢潁川

柯峰四詠

有序

余長夏卧疴客有道柯峰之勝者描寫
宛然令人有夢遊意因訪前輩得四詠
就其題爲五言古聊以寄情方外無俾
山靈獻嘲也

最高頂

柯峰本清幽絕頂更寥泐登臨出世間下顧見
城闕天地轉微茫煙霞互生滅披襟俯松濤掉
臂捫蘿月樵客有還踪飈車無返轍余將謝人

羣蓬茅聊可結

石梁

石梁宛神構縹緲虛中縣下有千尋木中開一
線天影隨長虹駕勢與飛雲連蒼苔旣剝落青
莎亦芊芊但容興公步不受秦王鞭何當卧其
下荷衣生紫煙

青霞洞

古洞鎖青霞空濛幾千載人間市朝易洞中石
無改中宵響天籟白晝散煙靄嘗聞古仙人於

茲駐光彩丹爐跡已非棋局痕猶在褰裳欲從
之巖間復誰待

仙人棋

在昔二仙子對奕幽崖中樵豎何爲者執柯偶
相從一局看未了柯爛家亦空有生信大夢世
事隨飄蓬羽人竟何許古洞煙濛濛空餘五枝
木千載常青葱

夜坐與邢心赤話舊

憶昔邂逅子乃在長桑家子言倦塵網就爾俱
桑麻是時一分析桑麻誰復植余從賣漿遊君
爲爛柯客蓬飛無定踪天涯復相從客居易永
久簷下聞秋蛩君心何悄悄丘隴闢懷抱自經
趨遠方蕪穢不復掃已矣君無悲幽栖豈無時
余歸採蕭藿待子青溪湄

夜發姑蔑

傳呼公門辟吏人聚如蟻使君餞觴罷歸客就
車始但聞徒御喧莫辨征塵起行行遂出郭燎
火羅江汜登舟倦欲寐鼓吹括人耳生平烟霞

志所樂寧在是蓬轉偶隨風鴻飛還集泚矯矯
荆山璆在泥終不滓

贈沈茂之二首

一別忽三載握手情依然問子今何營掩戶猶
當年思耕力尚怯欲販囊無錢南州角空立東
郭履宜穿慷慨恒抱憤操觚每成篇風格徒白
古詞華竟誰憐我聞東方生龍蛇運其權金門
足避世何必蒿蕙間
齷齪斗筲器在所常饑然峩峩五石瓠誰當實

其間凡物在適用所貴非虛言子固寥廓士抱
道甘林泉薇藿苦難支褐衣恒不全襟懷頗疎
豁高慕羲皇年幽蘭秀空谷衆草蔽其妍不爲
王者香將與束薪纏子其附青雲竹帛宜蚤宣
羊裘苟無託千載將誰傳

同張叔翹至松陵逢須君美邀入舟中漫
賦十五韻

日月經中天弦望乃其素何意無心雲亦復值
良遇予故巖阿人弱齡罹畸數寢瘵衡茅間幽

懷誰與語獸困思平岡禽孤想高樹因辭愚谷

陰得傍吳江路峩峩烏臺下冠蓋鬱相聚

時叔翹君

美同謁周中丞

仙侶誇同舟病客欣披霧坐談廊廟謨

兼賞滄洲趣烈烈神飈聲浩浩長河注帆疾鳴
榔頻歌緩流雲駐香浮博山鼎茗啜金莖露彈
棋互忘疲但愁白日暮舟中酒如澗良宵豈虛
度

重泊婁江懷王元美敬美二先生

婁江控吳邦歸海流漫漫此中饒英竒鬱若春

花爛二俊先民豪兩美今代冠探書宛委傾洒
筆烟雲亂濟南得鴻翼吳徐乃魚貫文物既師
周詞賦並追漢至我休明朝西京相炳煥斯人
今不存寂寥空海畔予生嗟後時塊馬徒秉翰
凄其抱璞悲慷慨懷人嘆音容永消亡詞壇誰
與玩所以再維舟不復一登岸

夏日至張叔翹別業作

扁舟遡長浦經宿行未休初日出暘谷火雲縱
橫浮俄尋回溪入始覺山居幽投策憇古木脫

巾挂枝頭主人北窓卧披襟起綢繆坐客層楹
下涼爽疑深秋蟬聲亂清嘯樹影橫蒼虬高談
不覺暝綠蟻還相酬飛蛾拂燭度疎螢傍人流
沉吟羲皇意思與麋鹿遊瑤臺委蔓草金谷隨
荒丘且盡一宵樂焉知萬古愁

贈張居士伯恒

古稱無心子千載難其儔君抱野鶴性斯堪與
之遊下不傲蓬竇上不驕王侯二儀若茵幄萬
俗皆鳧鷖塵氛不爲累山水不厭幽飄如出岫

雲泛如不繫舟揮金類瓦礫生涯無復謀有美
連枝樹姓字登金甌河流潤九里而我將何求
見花但吟賞得酒卽獻酬豈無倉公感知命固
弗憂逍遙快志意不知雙鬢秋

鍾陵途中述感

結髮卧林壑荷衣淨無塵因疴遂成懶棲遲三
十春何意值晚節長裾逐朱輪昔爲姑蔑遊今
趨彭蠡濱酌酒別先几牽衣戀慈親臨路慘無
言涕淚沾衣巾風帆從此逝江河浩無垠紛紛

新相知誰爲意中人晝隨行旅食暮將啼鴈隣
朱顏坐自消白髮日夜新賴有徑寸翰悲懷聊
自陳

宿玉山官舍

白日山下沒驅車入古城城中何蕭條道上無
人行衙宇枕枯木落葉行空庭明燭耀寒房悲
風激窓櫺徒御力已罷偃卧何縱橫伊予獨不
寐茫然憶柴荆自昔平居時頗懷達世情一爲
時所羈心跡不復併譬之堦前鶴低頭向人鳴
豈無凌霄資鍛翮不能征

以詩代書寄沈茂之

憶昔籬花黃與子共浮白將乖不忍分送我申
江側情隨流水逝思與汀沙積要問來何時許
以春蕪碧豈謂愆斯期飄然從遠客水涉疲洄
沿山行倦登陟西閱嚴陵灘東過徐孺宅栖遑
山署間坐見冬春易思家萱欲樹懷友蘭應摘
卓哉皇甫公高標非世識邈逸離人羣掩戶讎
六籍每忘汗簡勞疇問資生策甌中粟屢罄門

外行絕跡結衣身自安恒饑婦非戚伊子夙同
 調接景栖巖石如何成遠遊邈若參商隔山人
 瓢尚存王孫桂無色沉吟北海文跼促孔璋檄
 蟲雕寧足貴曼辭徒自飾羨爾日高眠浩然空
 嘆息

題鍾陵官舍壁

一齋大於斗局促僅容榻塵容壁際流樹影窻
 間插栖遲且經年不復知廣狹心虛體自寬道
 在施不乏逝將舍此去江河永踈豁試探方寸

中誰為增毫末

曉發鍾陵

松風鳴颺颺絡緯聲悽惻客久初言歸不寐且
 三夕振衣待漏盡始覩署門闢登車從此去江
 湖杳無極臨岐歌路難慨然空嘆息

寄懷何振之時振之客燕都

憶昔亞尹席邂逅獲披霧雄談杯酒間遂慊生
 平慕試詠官梅篇齊梁推獨步陰生迥非儔沈
 郎宛其庶余固支離士編蓬夙淪卧餘生付槁

木遐志寄毫素乍合契芳蘭久渴歡瓊樹尊盡
忽分飛爾我不知處客從海上來道君遠流寓
倉皇書記林躑躅帝京路春草徒萋萋王孫迷
去住沉吟緘尺書草率理新句滄洲倘有期歲
晚幸相顧

題馮耳臣宜山草堂

馮子草堂靜何以宜山名繞屋盡流水梧柳交
加青朝夕閑雲來傍我簷端停秋高萬木落春
入百鳥鳴種種並塵外恨少幽巖并安得五丁

士爲爾移蓬瀛

九哀詩

有序

嘗聞羊曇懷德西州興哀子期感交山
陽隕涕詢固天刑之餘身與世喪密親
知友寥寥幾人而乃數年之間物化殆
盡熒然孤跡庚癸誰呼歲饑薦臻未免
溝壑之戚恐溘焉朝露而悲前修見眷
之雅委之無聞亦身後之累也於是想
其爲人屬諸歌詠未足揄揚巨美聊以

陳情譬哀藉令數公有知亦當鼓掌泉
下耳昔少陵廣陳思之哀而八之余之
所紀數適值九遂以九哀名篇

顧中翰仲方

舍人金閨彥三絕侔長康雖無五丁力筆勢驅
衡湘愛士輒推食陳詩日盈箱人琴今已矣感
我涕沾裳

顧光祿仲修

光祿天下奇義聲邁千古傾家全邑人秉心良

亦苦奈何當塗士逼迫施威武惜哉勛未成飲
恨歸黃土

鍾封公汝思

封公鷄羣鶴氣度亦宏放經將雛共妍跡與樵
俱浪尋山窺洞冥賦海傳高唱斯人今不存臨
風獨惆悵

錢文學長源

長源越中士邂逅曾握手傾瓢讀余詩憐才因
結友鷄黍遠相招十日平原酒俄然掩夜臺青

天獨搔首

伯父大參公世承

參政國耆舊豈伊大吾宗乘驄肅三臺披豸清
五戎拂衣早歸卧睦族敦古風所以阿咸輩懷
德滋無窮

伯兄常山令君公

君公性傲睨處世若不容一仕卽鍛翮歸來剪
蒿蓬惟茲雕蟲好每與沉冥同牙絃一絕後疇
復論絲桐

顧居士義卿

義卿淳古風寸銖不踰度舌耕欣自營終年絕
外慕流俗莫子知目之爲大瓠自經君返真山
齋無與晤

小友陸希甫

希甫生最少忘年交偶結余浪多篇章假腕書
不輟變生井廩間身殞嗣亦絕申生孝誰知千
秋恨難歇

否極子沈明卿

皎皎否極子偃蹇氣極豪捐身毋兄仇百折不
可撓我來收汝骨揮淚落江濤天道信茫昧成
仁無乃勞

舟中讀曾文學通翼有感

舟中淡無事開卷探禪寂人我辨旣明因果論
復悉開流浩浩茫茫苦海彌難測布金成祇園累
劫爲火宅何者名真詮何者名妄跡長天雲霧
消流水映空碧此中清淨心應不煩通翼

酬沈公路話舊作

伊予構家難寢苦經五秋昨營一坏土洒淚辭
荒丘鳴琴詎能調桐枝聊自投移舟來此邦將
從諸子遊沈郎夏卧疴涼爽疾始瘳憐予契濶
深命酒相綢繆篝燈入夜闌清談不知休因思
少壯時握手山之幽我詩倩君書君作令我酬
歡娛復幾許尋各爲身謀一經風雨乖萬事隨
東流不遇感顏駟長貧惜黔婁微霜點青鬢西
風凋鹿裘嘗聞古人言良苗恒晚收我儕骯髒
士豈合終窮愁

續通雅集 卷二
九日杜袁度携登南城其姪載酒至孫亦
在座俱垂髫醉後賦贈

客思攢蕭晨扃戶獨搔首何來白衣人告予值
重九倒衣趣往從良會信非偶曳杖相提携登
陴俯郊阜瞽夫希借目歷歷問所有甲巷圍閭
閻層樓逼星斗淡日籠疎雲黃榆間衰柳飜飜
歸鳥飛役役市人走悽惻感徂秋慰存賴佳友
去折茱萸枝歸傾菊花酒盤多吏部螯殺雜安
仁菲接禮忘形骸呼盧分勝負婉孌來雙童頭

角俱豐厚文若箸膝邊仲容居客右揖客揚清
眉揮觴出纖手舉座咸稱佳嘆嗟不絕口伊予
支離士草間淪卧久謬邀供奉盼濫廁賓階後
託好在鉛槧定交非杵臼一身任轉蓬萬物盡
芻狗乘醉草長歌寸心聊自剖

九懷詩

懷張長輿

長輿魯靈光黃池推共主炳燭猶著書
長輿有炳燭叢
談用心良以苦時俗薄清高終年長閉戶操筆

代巖耕翻書當花塢庶幾殺青意爾我期千古
懷朱爾實

爾實騷人胤水部乃哲昆徘徊東山隅春草相
討論爾實有春草篇清疑隨州借韻似襄陽存一爲周
楚遊歸來還閉門但植桐君藥不羨桃源村

懷顧君法

君法抱隱心樓居每稀出或從農圃歡吉貝時
滿室立俗不喜華賦詩恒尚質別來秋向暮客
居轉蕭瑟豈無山陰思郊遠不可卽

懷朱幼裳

幼裳佳公子父書少能讀藻翰無輕題落紙必
荆玉舊業何所遺名園饒水竹曾披池上雲共
竭瓢中醪欲乘清秋興就君聽落木

懷沈茂之

茂之素孤介往往離羣居有文不肯賣釜中且
生魚向人不言貧意氣每有餘余愧櫻世網羨
君守空廬不知蓋棺後論者爲何如

懷沈公路

公路有異資爲文每超俗一卧偶經時枕中出
珠玉公路有枕中草憶昨飲君家開編倩人讀曠然遺
死生寂爾順幽獨爲語社中人對之應括目

懷徐唐運

唐運工五言書畫亦清妙輞川摹作圖蘭亭朗
相照時時希遠遊臨流難舉棹非無徐孺賞慮
爲碧玉誚恐此非良圖歸來囊熠燿

懷唐元常

元常後來秀龍變詎可量帖括猶晤伊騷壇推

宿將譬若穰苴師步伍皆揖讓别子未旬時離
思鬱難狀秋風吹雁聲令我歌益放

懷張聖清

聖清少風雅蘊藉非凡調譬之九畹蘭幽乃識
其妙揮袂忽徂秋申江隔清嘯嘹唳聞啼鴻淒
其踐落照何當杯酒俱從奏倚蘭操

冬日思歸阻雨獨坐述懷

蒼茫仲冬交十日風雨晦空館掩扉坐愴然闕
偶對客久思旋歸故園尚雲外滿市泥成膠極

浦浪如葢咫尺皆畏途煙波豈縈帶因憶衡茅
下童孺色應菜空囊久羞澁斗粟向誰貸昨得
故友書喁喁徵逋債惜哉支離質與此饑饉會
溝壑填有時長歌且慷慨

春夜同張茂卿話別四首

赤驥超崑崙所向稱絕景九折如履平一蹶知
所警臨流惜障泥徬徨欲誰請振足苟有神豈
無伯樂整努力慎羊腸天衢任君騁

鵝雛出東海食竹栖梧枝毛羽既殊衆因起虞
人疑張羅不可得匿跡南山陲靈物難久潛覽
德將下之行矣善自愛藏輝固其宜

倚余老布衣棲棲蒯緱客羈旅偶逢君片言相
莫逆據梧日高吟歡焉忘旦夕君爲京國遊雲
山暫時隔心知別非遙離思終難釋

萬里念將別一杯詎能長舊時河陽花植根更
何鄉春風扇庭梅飄香入君堂芳菲能幾何遲
日無留光勗哉崇令德比跡於龔黃

壽王允明六十

舉俗尚桃李華然路傍觀君抱幽獨性所交皆
歲寒植梅且千樹植竹餘萬竿梅以表孤芳清
氣積簷端竹以垂茂陰舉目皆琅玕擁書等百
城頻年此盤桓千秋夙有志寸祿寧復干縹緲
日已積倉困日已殫不愁揮金盡但恨求書難
中郎每思秘匡鼎日借看潤惟庭外玉馥惟膝
邊蘭鳳毛固自佳門楣亦足歡輝輝汗青業弱
冠卽操翰三湘及洞庭相注成波瀾酌我沆漑
漿獻我朝霞餐年年一開宴梅竹常栢欒况乃

大椿陰鬱然覆岡巒

時君尊人少
叅尚無恙

五月四日同慧珠偶坐苦雨朱安仲張聖

清過訪留酌

梅天漏不息淋瀝極昏旦聞聲愁不眠起坐共
興嘆主人慘無歡客思凝不散麥秋誰復論庭
草浸欲爛惠好念寥寂筍輿遠相看入門茗初
澆就几帙可玩命酌烹鮓魚羽爵飲無筭度曲
無宮商鄰翁相與按雨滴石榴鳴每與歌聲亂
興盡各自歸歡餘因染翰明日弔靈均龍舟期

結伴

九日客居燕坐懷杜袁度

九日天氣佳客居正蕭索四壁鳴寒蛩懷人慘
不樂往秋海上遊杜陵開草閣摘彼籬下花茲
宵曾命酌舉觴來阿咸傍膝坐文若雖無太史
奏星聚應如昨斯遊不可再江湖嘆綿邈倚杖
空躊躇青天楓葉落

叔翹移植諸果命余賦詩紀之

密勿趨明光清幽理丘壑東郊園久疎諸果陰
盡薄橘柚苦蒙戎桃李紛參錯董仙杏未鬱水
部梅猶弱柿墮聊供書柳稀詎堪幕竭來休沐
暇命駕徵郭橐改植抽根株刪繁勞斧斫樹如
行伍布墉將槿條擴秋實期離離春榮將沃沃
夾戶垂椿陰拂雲羅棣萼弄孫柑可分誨子桂
能擢明年倘來遊嘗果留杯酌

春仲訪陳仲醇山中留宿

二月春尚淺峭寒北風厲鼓柅尋幽人結構在
巖際水涸舟去遲日夕行始至逐響知松林聞

香辨梅氣把臂坐磐石真率多古意茗煮澗底
泉蔬嚼山中味相對酒微醺陶然一天地

携李客舍嘉兒爨食偶書

兒嬌年十五勞苦夙未親羈栖此窮巷行汲還
負薪灶火然復滅一爨五乞隣亭午炊黃梁梁
熟日已夕問君誰使然爲無資身策極知井臼
難三歎不能食

京口候風

昨夜宿毘陵今晨發楊子雨霽天無風山翠落

江水長年絕行意穩卧晝不起同舟四五人天
涯偶相倚不復問姓名但相酌浮蟻客中鮮杯
盤六斗周復始聊取一餉歡風來任行止

旅舍苦熱儀部黃貞父招飲

散髮卧廡下炎威慘炮烙何來折簡邀相將避
暑酌入門乍涼爽薰風敞齋閣肴珍出郇厨酒
旨乃桑落歌兒兩三侍發聲下玄鶴聽者咸忘
疲飲如波灌壑淹留遂忘晚高城聞擊柝

自留都往滁陽道中卽事

續遠後集 卷二
升輿聞雞鳴拂曙出儀鳳及渡天始明風輕一
帆送伊啞盪漿聲沉浮故鄉夢滁陽尚天外登
厓鮮僕從自嗟山阿人亦爲造化弄試覽征途
間黃塵沒飛控

適滁道未半輿人倦東走詭言前月中暴水堤
潰久舍輿理輕舸俗衆非吾友佶屈殊方言腥
羶野牛口掩鼻不能寐終宵想林叟獨鶴本昂
藏羣雞乃其偶逝將歸空山高眠開北牖

上李本寧先生

風雅淪喪久北地開草昧濟南振長策制作忽
大備近者準開天遠者超漢魏巖巖世穆朝
人文滿天地竭來斐然子蟲雕詆先輩珍俚成
憲章投雅禦魑魅剝極碩果存公高上京視歸
然魯靈光足挽頽波勢萋萋或妄加寧爲日月
累詩與三唐埒文令七子畏握塵主黃池士輕
千里至伊予抱疴者肩鍵迷年歲吟固非今人
談多迂流議炫玉旣無心投瓢乃其志何幸青
蓮君擊節特稱異遂廣三都傳不爲覆瓿器古

續遠復集 卷二
人貴道合豈獨蠅附驥信陵舍監門未必名冠
世報恩身後期敢將肌骨誓握中徑寸錐堪解
邯鄲騎

登秦望山因過吳山人幽居

來尋秦皇迹因過秦人家枕山結茅宇屋裡屯
雲霞芙蓉被堤岸燦若桃始華叢菊染衣馥竹
栢夾道斜木奴青黃離剖嘗裂人牙主人邀客
坐汲泉令煮茶結歡在泉石抵掌談桑麻踐景
不忍別躊躇滯歸槎他時覓洞口蒼蒼但蒹葭

寒夜聽張聖清彈琴

夜寒慘無樂欲寢愁不寐聽君理朱絲冷冷有
深致緩如踈泉滴疾若風雨至落木響空簷孤
鶴號雲際况余羈旅人疇堪此淒厲問君何以
悲得無商陵思曲罷悄無言潛然共沾袂

寄陳仲孺

迅商擊遙空火穹易金昊啁晰蝸騰聲明滅螢
流照遭物惻孤踪索居慕同好瀛壖有伊人丘
園道高妙下鍵耦書蠹棲巖學霧豹無疑一國

非獨擅千秋調曾刺山陰舟遂洽蘇門嘯海錯
羅未窮榜人理歸棹別唯春草催思以秋榮耀
靈槎來何時期落龍山帽

歲暮還家晏起即事

天寒歲向暮遊子途已窮蹭蹬歸蓬廬蕭索四
壁空債主聞吾至鴈行立庭中室無一物在口
塞詔不通傍昏暫散去明當復來攻蒙被不敢
起睡到窓日紅老妻患我饑進糜意仍恭任春
不自養三嘆愧梁鴻

赴海上途中作

徵逋急于火歲盡不得安復為滬瀆遊求賑故
所歡中途逢石尤舟子進棹難資糧苦易盡竟
日纔一餐嘗聞古志士僵卧無所干我行何栖
栖累歲愁饑寒安得棄妻子名山永游盤

投宿龍華伽藍

朝出茸北門暮至龍川曲招提夜鼓動行子始
投宿禪房扣不起舍門尚明燭路窮將奈何就
卧伽藍足古屋悄無人羣鼠嚙梁木不聞清梵

音但聽山鬼哭我驚如死灰兒睡齶如雷

至海上值雨宿徐唐運齋

天方阨羈人無往非屯蹇涉江風蕩舟登陸雨
沾棧衣濕身無歸泥滑道復遠所圖未一遂僮
僕已思返徐子生平歡執手相勸勉燎衣以荆
薪舉酒用大碗飲罷就牀卧寒與愁俱遣瀟瀟
窓外聲聞之若絃管

社友集長輿丈潛玉齋分咏明月照積雪
余聞嗣賦

明月照積雪匝地寒光起六合何所如明珠玉
壺裏照耀肌骨清冷淡天地死此時賞者誰同
社我諸子鑿冰出鮮鱗謀婦得芳旨移几就前
除簾櫳恍臨水當筵不煩燭凝華頗相似得句
銀筆書可方招隱士嗟余卧衡茅清景豈不爾
金錯囊已空獨立歌鬢恥

節婦吟爲陳治功婦朱氏作

臣忠以亂昭女節值窮顯嗟嗟治功嬾蚤歲離
屯蹇束髮辭嚴親病夫結燕婉七尺苦支離雙

蛾虛婉變竟無射雉笑徒有聞雞勉夢虺祥始
徵覩鵬妖遂踐墮堞哀旣深化石念不淺雍樹
衣綈初滌裙畏日晚舅沒堂忽空女殲胤幾剪
徒勤滌瀆思重添夜啼眼捐生事極易遺命情
未展撫叔作已子宗食庶不殄三寡共一息窮
年相繼綵功不廢絳緘跡不出戶限魯寡人共
欽巴清世誰犯咄彼二齡叔及長乃縱誕不念
三母劬俄傾千金產盛衰係冥數未足爲母唁
昔負桃李年今甘藜藿飯吁嗟貞母節地卑名
澤幽微爲君聞

晝卧許稚則齋中

暑退新涼生筋骨軟如醉白晝衙齋中魔逼忽
成睡倦腰就榻伸馴狎將枕饋須臾蝴蝶飛遂
棲巖下桂適情忘異鄉驚還有呼吏起對嘉賓
言失却童兒戲笑謝賢主人汚裊可無戾

初秋言懷二首

散髮板橋上日落新涼生寒蟬在疎柳蕭瑟舍
風鳴坐深白露下竹間起秋聲自我來秦淮三
見燧火更新知聚復散飄若雲間星故鄉有親
友時晏空含情

浮生總大夢天地作客過客中復爲客頭緒從
此多昔居申浦陽今臥鍾山阿栖遲不覺久秋
風生庭柯生涯視霜鬢身世惟悲歌先人有丘
壠歸計將如何

上符卿蘇弘家

吾明南北都先朝關洛匹關爲名利場洛爲文
章窟今時蘇長公來居舊京室卿月尚璽名國
風大手筆夙昔典度支明光草盈帙尋分鄴下
符文繼陳思出黔中攬賢書江右明經術珉玉
剖無誤龍蛇辨尤密坐令二邦士彬彬盛文質
帝思舊里虛特遣詞臣實公時偶潛霧豹文煥
朝日旣從蒲輪徵益收帳中物詠史袁宏驚奏
賦子虛失伊予夔下姿秦淮偶栖逸謬蒙蔡中
郎許堪製琴瑟揚聲玉堂中俾將綠綺一旣荷

顧盼恩敢不諧音律賦詩謝知己欣願自此畢
次答章國博惠伯題可賦亭二首

結茅想棲遲非以山水趣心寂自無喧地偏偶
多樹幽鳥當軒鳴市人隔溪聚雖爲投竿所實
乃讀書處亭間簡縱橫亭外雲來去聊復鷓依
枝敢言豹棲霧縱有幽人吟何如大夫賦

昔居崑山陰今來秦淮滸就林以爲巢就水以
爲籩賣文聊自給敢與世人左有時衣冠來雜
坐亦無序支離巖間身放曠塵外語升沈信有

命通塞不在予得意但賦詩開門候同侶

同前次答蘇尚寶弘家

結就已公亭因拈杜陵句荒徑聊剪蒿日涉自
成趣囂塵固無染山水亦偶遇已得高人題此
外復何慕

初夏宿徐唐運齋得日字

寥落貧交知清和好風日把臂晝攀林張燈夜
入室人坐纔滿三杯行不限七期耕種瓜田莫
問生花筆

續通雅集 卷二
次答張大理

題可賦亭二首

五官運惟權無目卽使耳于理所必然何獨亢
倉子予少罹天刑蓬心卽灰死靜極生真明談
詩得其旨偶爾來秦淮結亭水之涘著書聊終
年所願不逾此

一亭足容膝一溪堪洗心棲此亦自得不復囂
塵侵客來或抵掌客去仍孤吟佳遯豈獨古無
懷良在今摛詞每患淺涉世常苦深投詩幸存
慰牽率酬所欽

贈別章國博惠伯入閩余亦有雲間之行

文與世高下世衰文亦漓楚風尚新巧周雅成
糠粃越中沈冥叟立言獨不朽然藜傾縹緲下
筆燦星斗舉世惟好竽操瑟靡所如白頭屈掌
故草就龍門書伊予偶羈旅得君爲地主來往
烟波間振塵遺寒暑時來有新綸整裝將入閩
處刀脫以贈符應期古人沉吟戀同調且有雲
間棹臨岐何所言揮手發清嘯

次答沈比部相如題可賦亭

予少罹天形逃虛遠時哲徒存子野聰敢掉張
儀舌林棲鳥相依雲臥人幾絕瓢鮮賢人醪巷
稀長者轍禽困恒覆車士窮寧改節讀史辨魯
魚談詩悟遺子男多奚免饑室宜詎加謫始爲
金陵遊從人寄食啜卜宅聊移家結亭堪擬雪
沈侯誇善賦妙巧天機泄淒清八詠章豪邁千
人傑亭空寒風來浩歌聲未闕

編蓬後集卷之二終

編蓬後集卷之二

華亭唐汝詢仲言父著
會稽沈存德相如父校

七言古

雙松歌

沈公路遠祖揚州守墓前有雙松宋時所植

雙松陰鬱五百載宋家古木今猶在龍鱗剝落
高下出歷盡冰霜顏不改斜柯拳曲虬龍形脩
條直上千雲青垂陰布葉迷郊垆秦王遇雨輦
可停峩然對立兩天柱雲霧白晝長冥冥鷓鴣



野鶴競栖宿聚散倏忽如流星古來喬木盡尋
斧此物無乃通神靈當年結根奚所擇得居沈
公高塚側世家簪笏恩波長使爾永無憔悴色
憶昔宋爲蒙古逼天子厓山海中溺玉魚金枕
剽掠盡華屋到處生荆棘高宗陵前白日斜蕭
條但見冬青花沈君塚木亦何幸此時獨不蒙
胡沙吾聞武侯祠堂蔭古栢每爲詞人所歎息
君家雙松堪與林得非先生恩澤深援筆爲爾
書長吟

古劍篇簡比部張叔翹

若耶溪水楚宮柱產得良金供冶鑄精靈輻輳
紅爐間俄成一劍芙蓉斑蛟龍盤錯刃端見白
玉作珥黃金環發矚閃爍冰霜色含景吐商神
莫測堪隨赤帝剪長蛇堪佐祖龍傾六國風胡
已歿薛燭死嗟不遇時困泥滓淪埋獄底無起
時縱有鋒銛人不知生平氣色銷未盡斗間夜
夜光淋漓晉室司空善博物登樓一覩連稱竒
塵埃十丈任君發毋令永向泥中沒嗚呼毋令

續通復集 卷二
永向泥中沒

贈沈茂之

吾聞海中大鳥來東國鐘鼓饗之愁不食丈夫
生世各有志疇能俯首就羈勒沈生俠骨天下
竒少小不受洪鈞羈手中一編長不離富貴入
自浮雲移生平落筆驚風雨射策不收便高舉
著書惟想一遊梁抱璞那能三獻楚竭來落鬼
從吾遊悲歌直使春林秋與君脫裘且沽酒世
事飄飄波上舟

錢塘客舍

錢塘客舍客如堵博賽呼盧競歌舞西河遊子
心獨傷坐對殘燈悲自語老親抱疴幾絕粒每
一念之淚如雨平明孤棹發江干征衣獵獵西
風寒半生頓跡衡茅下今日方知行路難

客居姑蔑寄王山人汝產

爛柯峯頭芳樹春爛柯峯下客愁新登樓操牘
無與語此時正憶王山人山人本自羅浮客繡
虎詞場稱莫敵去歲至吳從我遊把臂入林成

莫逆袖中各有長楊辭爭盟誰肯下黃池百戰
虜庭寧解甲三圍鉅鹿未旋師枕戈待旦方未
已分離忽隔錢塘水懷人千里心空勞裂帛作
書聊寄爾扁舟欲發秋爲期此時黃菊盈東籬
請君磨洗魚腸劍猶當一戰決雄雌

寄懷張彥伯

昔年十五氣自豪學吟倩客令揮毫毫端偶落
半寸璧誤爲君家玄晏識余少有詠臘梅詩出
爲王屋先生所賞咄
嗟呼作連城珍坐令枯槁生顏色斯人一去三

十年復得吾子相周旋論文共吐雕龍舌探古
同傾羣玉編擔簦從子楊溪側把臂狂歌人莫
測浪迹慚余一釣舟凌霄羨爾雙飛翼自經栖
集柯峯雲幾度登樓空憶君春風漸煖梅花落
春月將圓蕙草薰羲和鞭日正西去宛轉流光
那可駐江干早晚槐欲黃知君且獻長楊賦匣
中長劍宜頻看毋令空老江南路

九憶歌

有序

姑茂山居多暑而署中尤甚久客倦遊

懷歸靡亟每念故林松竹便神魂欲飛
於是因雅宜山人有五憶而廣之爲九
章按節而歌覺涼生几席間也

我所憶兮三神山金銀宮闕非人間蟠桃含碧
亘千古泥竈流丹成九還韜精藏魄玉壺裡安
有溽暑侵朱顏歌始動兮五情熱大海茫茫安
可越

我所憶兮峩眉巔長夏積雪無人烟山頭怪石
狀如走巖下活活飛鳴泉已知薇蕨暫可採况

有麋鹿相周旋歌再奏兮路艱阻三峽奔濤方

震怒

我所憶兮武林溪青山四面桃花迷桃花不開
不
落雲中往往聞鳴鷄此中散髮任偃臥豈
復襤襪相提携歌三發兮往難必漁人歸來津
已失

我所憶兮鳳凰谷隋唐宮苑羅其曲山溜飛聲
雜珮環松風入座流絲竹城闕爲墟人代非縱
有池臺走麋鹿歌四作兮空整車側身懷古心

煩紆

我所憶兮金谷園涼臺百尺飛櫺軒珊瑚作林
霞采落流泉繞砌龍鱗翻安仁詞賦綠珠笛就
之可以消寒暄歌五噫兮止中道玉戶雕欄非
所好

我所憶兮河朔遊袁曹之輩相追求乾坤龍鬪
豈無意泉石羽觴聊共酬拔劍擊雲霜氣肅揚
眉向月天風秋歌賡六兮漫悲壯欲往從之精
已喪

我所憶兮銷夏灣吳工臺殿烟波間珠簾捲雪
月夜白玉砌生霞花晝殷蒸暑不侵西子帳歌
聲常滿洞庭山七歌成兮嗟嘆久勾踐旣來麋
鹿走

我所憶兮柴桑里此中有客稱高士南山朝看
佳氣來北窓晝卧涼風起襟懷自許齊羲皇踪
跡疇能混泥滓歌八變兮心紛紜世路何人識
此君

我所憶兮申浦邊穆穆五柳當門前已有茅茨

避風雨况多竹樹藏雲烟蒸藜炊黍但一飽終
歲無客嘗高眠歌九轉今魂九逝涼颺待君君
莫滯

涉江吟

仲秋蕙落餘七葉土人盡言江可涉是時水落
天無風我舟依沙聊住楫朱門公子來吳中憐
予久別欣相接登舟杯酒因共持笑謂狂客徒
能詩枚生文藻左丘目縱有奔濤君詎知公子
雄談未絕口海門忽覺蛟龍吼驚波震怒如山

來千里直下奔成雷江中舟楫互顛倒飄若狂
風捲秋草吾曹四五舟中居白浪撲面人爲魚
初疑沙淺蘆可折水旣滿舟纜復絕江心錯愕
靡所之自憐轉眼從鷗夷餘生一線幸未盡凌
波淵客來相引登岸升車氣始疎還問瓢中草
在無同來諸子並無恙共笑卜夏真狂夫真狂
大君莫測生涯落魄每自甘天步艱難竟誰惜
市隱池魚已破殃子城居遭回祿江行書蠹重遭厄九
折魂消寧輟吟千秋文就終埋壁東籬黃菊應

未花破塚歸來正堪摘

東海吟寄秦長卿

長卿以詩草示張聖清余讀而善之因有此寄

我聞東海滄波走雷電氣昏月黑魚龍戰浮沈
島嶼天地翻綵筆何人盡其變秦生卓犖海上
豪尊前氣吐秋雲高筆端往往奔洪濤冷然白
雪調自超萬象恍惚生纖毫入朝堪奪江令袍
在野響振風林號白鵠聽之忘其曹竭來新詩
滿人耳一編遙贈張公子清夜開緘向月歌長
空慘澹藏星河須臾曼聲三四奏棲鳥墮枝林

鹿闕初疑驚颺捲滄溟俄若千軍競馳驟老夫
善病久輟吟聞歌忽起雕蟲心中原七子久淪
沒何幸復有開元音君不見吳下阿蒙善輕薄
巧婦學啼笑鳴鶴華巔之士深掩門連城未許
秦人諾君詩摹古調自殊風骨不與時人俱當
年曾夢弘農筆指日應探象罔珠愧余潦倒非
玄晏千秋誰爲序三都

贈蘇爾宣卜居虎丘歌

十三學文復學劍浮雲堪決天堪挾托乘纜經

事硯池要盟且欲登壇坫投軀借客思報讐囊
中出入齊王頭梅花一曲秦淮月桑落千杯函
谷秋避讐浩蕩辭鄉國煙水茫茫任所適戰場
躍馬徒穿楊文苑操戈空射策生平俠氣總紛
紜功名一夕委秋雲覽古剪桐成鳥跡冥搜刻
石出龍文軋坤莽莽皆逆旅獨憶虎丘堪作主
隔水茅堂新卜居連山花徑俄成塢邂逅逢君
意自親擔簦躡屨願爲鄰清尊倒罷分手去余
亦東西南北人

壇石歌寄張長輿

時客鍾陵

壇石之山坦而平中立官舍傍爲城縣邑相傳
自唐置石上尉遲親勒字伶俜古屋三四間藤
蔓草根交覆地舍邊古木空扶疎羣鷗夜號烏
晝呼舍中何來一盲史自言與昔丘明似報不
書就倩人題檄操草成邀客起頭顱半百身無
成著書未舍千秋名賦罷祈招嘲左史辨窮堅
白屈鄒生故國迢迢二千里此時獨憶張平子
三泖烟波杯酒中萬家花鳥詩囊裡作客無因

續通雅集 卷二
共酒壚扁舟秋至定還吳若使三都非覆瓿還
須玄晏一嗟枯

鍾陵七歌 有序

辛亥歲余春秋四十有七季春廿四日
乃生朝也作客彌年骨肉星散追亡念
存涕泗橫集少喜子美七歌固嘗擬之
矣至是復憶獻吉之作而倣其音雖滄
海涔蹄難可同量而陽春下里均一布
情聊命故人書之以紀哀恨云耳

憶昔襁褓明未喪嬉遊不作羣兒狀晝喜塗鴉
輒忘食暮識之無始歸帳阿爺愛兒掌中珠提
抱何曾離膝上一經爲訓徒自勤莪旣爲蒿復
何望生時莫辨親顏衰沒後空期魂魄傍嗚呼
一歌兮歌已傷坐聽風木增悲涼

余生五齡愁骨立阿母抱兒終夜泣呻吟不復
就床眠輾轉懷中方茹粒病蘇幸免啼招魂未
幾兩目茫然昏眉髮雖存總弃物空餘涕淚酬
深恩曳裾鍾陵忽已久母望兒歸搔白首嗚呼

二歌兮歌聲沈饑烏夜半號空林

我兄十五擅風雅坐傾二酉空作者楚山和氏
不易逢良璞頻年投草野汗青往往窺古人那
知書劍老風塵白首談經黑貂敝同遊年少多
朱輪別來音塵滅如掃相思應夢池塘草嗚呼
三歌兮歌始豪老驥伏櫪心空勞

有弟有弟信愚魯方寸寂然真太古緯蕭誰復
肯探珠抱甕自矜能灌圃家貧餽粥常不充累
日一食不言苦我今作客恒獨居愁中新句無

人書開編檢冊每思汝向來疎懶今何如嗚呼
四歌兮歌更久碌碌翻能娛阿母

小時提抱有諸姊推梨讓棗時相倚女蘿分蔓
各一天兩人已入窮泉裏兩姊雖存生不辰良
人早沒孀居貧自經作客更星散回首故園隔
霄漢沉吟骨肉空迴腸坐聽啼鶯但興歎嗚呼
五歌兮歌稍停壯士豈合常飄零

吾家奕葉稱好古喬木去天纔尺五世守清白
無餘貲蠹編殘簡填蓬戶自憐飄泊來天涯夙

昔青緇奔如土兒曹舞象年已及厭薄父書不
復習遠遊非計懊恨深半夜不眠起佇立嗚呼
六歌兮歌勢適春雨夜滴空山秋
丈夫落魄便應死疇能跼蹐風塵裏彩毫自信
煙雲翻傲骨豈堪牛馬使黔羸驅迫不自由彈
劍飄然去桑梓山中三畝令誰耘身後一編還
自紀書淫已著人共嗤左癖猶存心獨喜嗚呼
七歌兮歌思平淹留未必終無成

閒居歌贈杜袁度中翰

至人行藏古難測龍蠖隨時意亦適毛生捧檄
爲誰喜高堂有親祿不擇憶昔君趨供奉班思
要紫誥歡慈顏天祿然藜太乙下詞名遂滿公
卿間板輿不盡南雲慕慨然因奏閑居賦歸來
浣花春正濃萬年觴舉舒溫容調羹赤鯉水間
出銜果青鸞月下逢五山靈藥晨昏膳三載斑
衣少長從自經營塔被霜霰合悽竟絕金門戀
會心轉覺攤書樂傲世翻嫌通籍賤龍門自古
無雜賓何意揖我蓬蒿人開尊談詭失晝夜彩

續通雅集 卷三
筆掃盡江城春清流堪枕石可漱自謂千秋盟
已就爲君草却閑居歌一任人間蠻觸鬪

袁度席贈髮僧湯叟

湯生八十氣猶壯酒後耳熱歌愈放自言二十
探短兵長驅直入東夷營斬得倭頭掛秋月戰
袍濕盡腥羶血數竒不合饗茅土飄然去受曇
摩鉢屠伯不乏菩提心酒人解吐青蓮舌五嶽
名山縣杖頭垂老忽復思舊丘脫巾露頂供奉
側談經說鬼如川流余墮迷津不知去羨君曾

宿祇園樹試看本來明鏡中丈六金身在何處

燕社歌送林若撫遊武林

有客吳門來海邑結社主盟如燕集彩毫直使
天河翻秀句坐令山鬼泣海天旗鼓隨風靡強
項左生偏獨立心知此敵不易攻揚兵列陣何
憊憊龍蛇鶴鷺足相對百戰未肯分雌雄古來
兩賢不相厄解甲投戈成莫逆書縣秦市同殺
青月落吳江共浮白鴻將遵渚傳遠書燕忽辭
巢催去客邑少平原誰固留申江明日棹扁舟

飄零桂子千家雨蕭瑟蘆花萬里秋客裝每苦
詩囊重贈行誰解鷓鴣裘落魄貧交惜分手草
得長歌當杯酒問君此行何所之君言夙與西
湖期西湖柳絲千萬樹到日正值重陽時雨中
黃葉盡成錦當壚歌舞留君飲綠堤晝騁珊瑚
鞭青樓夜臥鴛鴦枕吾聞此地多賢豪千金一
諾輕鴻毛問竒買賦日填巷聲價更與秋天高
地主車迎盡恭敬應笑海邦賤無令燕社論心
未可忘駕雖千里猶堪命春社春風燕復還此

時定憶泖邊山餘光東壁能分否寂寞揚雲正
掩關

節孝歌爲顧孝廉寅美先太夫人劉氏作
古來節烈良有聞剪髮劃面何紛紛慈作嚴君
婦爲子節孝兩全自劉始夙昔鴻光燕婉俱志
操卽與常人殊詩篇每爲聞鷄發言笑寧將射
雉娛家室稱宜方燕喜豈知吉與凶相倚多竒
文舉纔有知寢疾茂陵將不起以身代請祈北
辰居然桑戶忽遘真鶴別鸞分願同死牽衣稚

子令誰親況乃高堂髣如雪未亡之軀安可絕
孤燈紡織不憚勞熊丸滫瀡心俱切定省溫顏
多所宜桑榆忘却亡兒悲姑舅既終父母卒兩
家窶窶誰撐持顧有冢婦劉有女黽勉幃中作
喪主青烏登壠馬鬣成十載經營出機杼彼蒼
旌善何太遲萱凋不待桂抽枝倚閭莫慰生前
望請詔還存死後期節孝名成堪不朽況乃芳
聲滿人口詞場風雅縱橫飛長歌乃出盲人手
吾聞漢家陳婦以孝稱淮陽抗疏名飛騰今我

聖朝素褒德 主上能不加哀矜嗟嗟令子更
努力庶使勲名宣竹帛天書五色輝泉臺不負
孟家機上織

述夢歌

五言

昔先人性樂幽居植竹半畝結廬其間
鑿小池環之齋前羅羣卉又壘土爲臺
高丈許立亭其上臺傍作水檻爲垂釣
處前俯綠疇每時卉吐芳輒刈蔬貫酒
招所知相宴樂余以襁褓喪明年十五

卽居竹間室臥起未嘗出戶限據梧諷
誦或通夜不寐每風雨夕竹聲蕭蕭似
與哀吟相答響居是室十二年始有家
室累稍涉風塵又十八年而先人下世
此地成菜圃矣然每夢必至其處屋室
宛然竟不知桑田之變於是因夢興慨
而爲歌

旅夜沉沉更漏起夢魂忽度申江水池亭無異
栖息時竹聲猶在虛窓裡塔前百卉競芳菲垂

條布葉拂行衣水濱小閣無人住澹宕東風時
動扉獨上高臺還佇立因憶向來曾宴集蒼茫
孤石青苔多舊時覆酒痕猶濕沉吟入戶就床
眠文史縱橫亂枕邊誦書小史今何處黃鸝空
自啼窓前須臾似聞風雨作庭鳥不鳴花盡落
蕭蕭竹樹來悲聲響答清吟宛如昨覺來枕席
仍他鄉風木興思空斷腸人間更變亦如夢此
地寧知菜圃荒

慧鴨行

有引

元夕杜袁度厨將宰鴨鴨忽逸出庖人
追不能及歷扉數重而至主人前舉首
奮翼若有所訴主人異之命養蕭寺以
全其生余因作慧鴨行以紀其事

仁人好生恒遏劉商王解網齊易牛何來慧鴨
善乞命脫身刀俎奔相投君家庖厨非不遠洞
戶重扉經數轉低頭近前如有陳舉翼向空但
求免主人夙抱慈悲心便令置之摩尼林吾聞
佛氏有因果安知報德非此禽君不見楊家雀
環綿世澤白龜善解烟波厄吁嗟爾鴨果有知
爲雀爲龜惟所擇

遊燕行二首送沈茂之北上

沈郎十五工古文肝膈不與時人羣書史雖耽
絕仕進每以執戟輕揚雲蓬蒿没人雨飄屋經
年不廢一日讀秋爽惟知案有詩午炊誰問瓶
無粟邇來山人盡趨勢真隱惟君在空谷襄陽
四十辭鹿門意君不合終草根金華貴人夙傾
慕束帛加璧來相存恨無杯酒留君住感知因

草遊燕句吾聞燕都山人聚若蜂筆鋒殺兔言
雕龍升壇授簡請新作一半化作羊公鶴君今
落筆驚鬼神一鳴此去應驚人右丞床下或可
匿失意新詩莫浪陳

嗟余耽詩每忘死詞苑惟君堪對壘爾今忽作
燕臺遊令我獨立悲清秋中原七子骨已土楚
中新體真亂古藝壇唧唧鳴秋蟲疇復建安仍
繡虎此意由來爾我知念君遠遊當語誰衆中
論文宜結舌且莫盡吐胸中奇余著一書老方

就破琴且欲隨君後香山須待微之來莫與時
人混馳驟

張叔翹坐聽鄭叔彭彈三絃

秦箏且弛柱趙瑟休爭前坐客並傾耳聆君彈
三絃三絃起非古出自元樂府取聲天地人其
調促爲主邇來彈者雖如雲得心應手無及君
初疑流泉石上咽尋覺飛瀑空中聞七絃按微
方度曲惟有此音無斷續指間歷歷如貫珠走
丸坂上未爲速曲半緩彈相倚歌朱絃與肉聲

相和四筵停盃寂無語但有朔吹鳴庭柯乘槎
使君偶抱疴聞之或可祛其魔絀絃改調邀金
波長空慘慘陰雲多伊余久客抱歸思愁結如
麻詩總廢今夕聞君宵眇音自謂琵琶行可繼
詩成倩客將染翰銀甲離披忽罷彈江湖淪落
無窮意爾我俱將兩鬢看

葛將軍歌

一夫貪姑蘇殘一夫義姑蘇安貂璫用事稅置
官苛虎吮人骨髓乾民不堪命變忽起主者遁

逃從者死義火悉燎貪人廬丁氏之宅俄爲墟
萬衆易合不易散官司束手莫可按葛將軍挺
身出上謁太守陳得失勇聲烈烈風雲愁口口
但索孫隆頭紳纓之倫面俱土片語不敢來相
酬指揮市人令散去安輯大衆身請囚關門聞
風商不留累月不敢深誅求吳人至今仰令猷
丹青畫像縣綵旒胥靡已釋從我遊酒酣因說
曩時事令我竦然毛骨秋葛將軍功可傳世人
偷生或不免君出一死身名全葛將軍真魯連

分綠歌

平康里中有水檻名分綠偶納涼于此

溽暑逼人隨所去尋幽只到分綠處綠楊圍繞
水檻清屋角樹樹秋蟬鳴解衣脫巾就榻卧鍾
山遙遣雲相迎四五同遊意俱適山色溪光交
送碧湯沸爐頭試小團酒到風前浮大白輕颺
自能驅祝融殘暑不敢留林中簟設水文涼寂
寂香消寶篆烟濛濛酒半朱欄相徙倚清梵微
微隔雲起客裏閑傾河朔杯醉邊渴飲秦淮水
坐中有客興特濃遍訪美人圖其容羅敷髻成

垂倭墮文君臉對落芙蓉不獨暫時此分綠比
隣是處皆金屋行行笑謂諸少年馬啼思向誰
家宿

癡和尚歌

癡和尚來自荆風流為骨僧為名師傳衣鉢置
何許負琴握槩操棊枰問之楞嚴了不悟飲酒
放歌乃其素自言諸技靡不精但于蹴鞠稱獨
步朝來小試白門前四方觀者屯如煙吾聞浮
屠善玩世此君無乃真大顛四大六根供浪謔

身與浮雲共無着蓮出淤泥色不染安知動處
非恬漠嵩丘春者傳袈裟悟禪不在窮三車癡
和尚且弗誇亦知妄身非自有宇內何物非空
花米叶可啖市可家浮踪何必棲烟霞蹴躡撥
盡恒河沙

莘郊吟贈許居士叔衡

紫蘭抱幽性不發當門枝麋鹿志豐草肯受金
鑣羈卿家甲第舊輝赫垣有青梧臺有栢君操
不爲紈袴移謝去紛華守玄默家藏文史高玉

峯日作蠹魚潛其中題詩不羨栢梁燕著傳獨
喜商山翁酒杯泛盡花間月藜杖吟殘松下風
目中貴人多落落獨向潛夫乞新作真隱君推
管氏龍虛名予愧羊公鶴君家阿咸知僕深借
筆乃草莘郊吟郊外白雲倘相待他日還期命
駕尋

贈痿者吳居士

爾良于目不良于足終歲不出如斗之茅屋吾
良于足不良于目每苦倩人之腕以汗竹君看

阡陌蚩蚩氓有目可視足可行爾我何憎于造物
籃輿竹杖窮其生嘗聞莊生言支離不爲病
書成五千文身後亦足競借吾足扶爾輿借爾
目讀吾書空山結茅可終老舉世營營任所如
惜花吟和王玄超

陽春三月花滿山風吹點地紅斑斑王郎對此
奚所惜其意不在開落間沈香亭前木芍藥親
得君王醉杯酌連昌宮中千葉桃艷色不上君
王袍始知萬物各有遇花失所兮欲誰語幽蘭

疇使植當門穠李翻令隱深嶼王郎王郎爾勿
悲妍媸倒置君宜知明妃曾侍單于幕無鹽偏
入齊王帷西郊有酒且痛飲花朵徒煩攬爾思
縛虎歌

古人恃德不恃力勢如猛虎終何益君不見南
山白額恣咆哮吼驚山岳皆動搖巖間百獸不
足啖耽耽人肉當路要牛哀厥昆旣不免數里
之內無漁樵一朝失勢投陷穽縛束不異羊豕
命操戈奚必飛將軍尋常獵客俱能勝吁嗟爾

虎寧足憐噉人人噬理固然拔山之雄體爲五
育噉身向庸夫捐人中有虎咸見縛何獨當年
呂奉先

甘露亭歌贈慧解上人兼柬陳仲醇

鍾賈山傍江路直行人來去無時息夏愁暘作
冬苦寒誰其餉之甘露餐慧解師慈悲主斷臂
期消衆生苦臨河遂卜甘露亭紫薑綠茗充環
堵鼎中不住波濤聲日爲行人滌寒暑吾觀乞
緣僧衆恒沙多不趨五臺卽普陀勝因所鍾豈

在遠吾師此舉真禪那子固江湖浪遊客索飲
亦沾甘露澤停撓借筆草長歌秋風蕭蕭桂花
白歌竟移舟赴白門歸來桂花仍復存寄語灌
園老居士羨爾一榻松雲屯何當結茅此山麓
甘露不求欣自足

墨竹歌贈孫子遠

王猷愛竹不去日文生以墨圖其真孫郎養疴
亦好此經年始得二子神臨池挽筆一揮灑俄
然寒玉枝嶙峋渭川千畝未足富湘水數竿裝

點勻檀欒峭倩極衆態皇英對之雙蛾顰白下
遇君喜同調客裏飛觴開口笑酒半一枝出扇
頭暗中摸索知神妙孫郎孫郎情頗濃逢人到
處披心胸何年共爾謝時去篳篥深處藏行踪
元常入楚取道都門訪余圯上賦贈予以
孟秋來留都會過海上話別

孟秋滬瀆城與子話別各遠征子以戀闈逐飛
鳥子將寄食依友生鄂渚金陵二千里別思蒼
茫隔江水驪歌欲草情不舒扇頭五字慙堪死

白門相憶秋將闌離心已掛楚雲端平晝客居
正寂寞筍輿忽似天邊落稚子應門驚且欣此
地何緣來懿親石頭城中百萬戶物色訪余亦
云苦促解征衣換酒來拍手狂歌在環堵一壺
纔盡分手去去將遠涉潯陽路單父琴偕膝下
調河陽詩答寧馨句老夫一枝新借棲別後頻
將尺素題緘語行人何處覓秦淮今作浣花溪
可賦亭成黃貞父先生長歌見投賦答

余家五茸黃浦上門外蓬蒿高一丈偶携書笈

來白門正值君家披絳帳
握衣請列弟子員
謬許荊州跡堪傍
從遊思卜廡下居
避喧未敢依甲巷
何來一椽湯湯曲
板橋竹扉頗清曠
溪傍有地堪結茅
諸公木石爭相餉
俄然一亭插水濱
六角臨風得新祿
探竒時有高軒過
佇立更煩行客望
可賦名亭賦者誰
地主長歌極豪放
鑑賞慙無著
述名蕭條曲盡羈
遊狀寒風怒號
木葉積手擊唾壺
吟獨壯亟呼山泉
煮苦茗期君一來
相謔浪君詠余歌
神更王

同前答許比部穉則

淮隙一區生竹樹
舊爲玄度隨
園處板橋跨水
圯上名竹籬
不碍雲來去
三椽茅屋大于斗
容膝恰宜巖客住
卜居帝里夙有心
欣謂此中跡堪寓
妻孥機杼安一枝
留賓無地賦新詩
經營旣煩一籌運
版築更分三徑費
西江竹木鍾山草
匠出淮南稱一了
淮南人善爲茅屋號一了匠云衆工皆出其手也
儼然六出臘月花
不日亭亭插林杪
天寒水落秦淮枯
垂竿未釣松江鱸
時時掩戶誦文史
諸

曹吏至臨溪呼有推祿米繼塵甑或饋桑落供
酒徒春到曲堤梅柳映藉草攜壺堪選勝揮毫
更擬隋珠投寧獨白雲可分贈

同前答黃國博明立

古稱佳麗金陵郭 聖祖開基城更擴鍾阜青
堪奪華嵩長江勢欲吞河洛城內飛甍各鱗次
八衢九陌相包絡背郭大湖曰玄武吞吐秦淮
成橐籥東南天迥羅諸宮西北地空與太學學
前左爲演武場場傍一區是林薄流水湯湯繞

其隈可賦一亭臨水作簾櫳疎豁來烟雲竹樹
紛披類村落西南有橋名珍珠橋下市人趾相
錯放牛差比桃林多驅馬翻嫌沙苑弱一衣帶
水橫亭前隔斷紅塵不相着乘興時吟子美詩
校書不羨揚雲閣閩中先生舊相識旅踪同向
鳥衣托借我亭中半日閒草得新詩氣寥廓吟
來忽躍溪中魚飛去堪驚雲際鶴嘗聞井蛙趨
大海浩蕩一身靡所泊予寄此亭秦淮濱何煩
大匠加營度猶幸此中瀕洞虛地可爲裊天可

幙王畿廣狹吾不知讀罷殘編刈葵藿

癡先生歌贈汪杲叔

癡先生癡先生汝今短髮已種種當年意氣何
時平憶昔全盛金滿籬結客不惜河海傾堂中
往往羅羣英雕盤綺食縱橫饋桑落之酒日滿
錨床頭金盡面無色翻學雕蟲工篆刻向人猶
復吟新詩內顧何曾儲斗石皇穹無知翻厄君
孤鴛感別啼秋雲室中淒其苦難狀子未克家
妻未葬黃口嗷嗷旅櫬傍白屋無烟起窮巷他

人睹此咸銷魂先生癡興猶然存報仇已斷宗
人舌索賦還過盲史門盲史蓬間久淪落疇能
寫爾胸中寃君不見漢家七貴至輝赫甲第連
雲陳鼎食一朝身滅名亦磨古墓蒼蒼但荆棘
君不見朱家俠烈衣不完至今名掛青雲端人
生豈得常稱意志士自古多饑寒癡先生幸自
愛吾子非癡名不成且須高蹈風塵外

送許比部稚則歸鹽官

白門柳色映空碧茹嘆臨流送遷客扁舟惟載

千葉榴土重堪當鬱林石問君此行誰使然舉
手不語但指天君心不必彼蒼鑑只錦已徧途
人憐君始依槐後棲棘苜蓿盈盤白雲積李陵
賂遺龍門公皎然寃狀無庸白嗟嗟世路良足
悲如鈎得意如弦疑蠅螟嘲龍亦何恨青蠅點
壁終難溜空山鶯花春滿目輕杯聊向花間覆
淵明既無三徑資方朔寧拋一囊粟猗予踪跡
隨孤雲殷勤把袂愁難分乾坤青眼幾人在仲
宣樓頭日望君

送吳儀部伯玉歸雲間

敬通被詆顏不忤自言歸將臥丘壑高堂菽水
易爲歡照乘明珠初在握城隅小閣沉松枝掩
戶著書堪自怡蠹傾架上廿一史猿報山中十
二時余容秦淮鮮儔侶千里將雛行踽踽君同
桑梓獨見憐戀戀綈袍稱地主世途險窄那可
論驂騑足蹶駑馬奔賈生遷謫非上意不久
還沾雨露恩

廬山茅屋歌贈俞混初山人

山人年八十
餘精易理結

廬五老峰將歸隱
馬余喜而作歌

廬山老人八十餘結茅五老峰頭居星斗似從
屋底掛雲霞每傍牕中舒君今出山多歲月春
風幾度芳菲歇玉樹縣崖定改柯菖蒲出石應
添節露滴松梢殊可研峯頭點易憶當年歸來
草就叅同契犬吠鷄鳴何處邊

憶昔篇寄鄒彥吉先生

憶昔梁溪舟偶駐來訪文園著書處十年向往
心徒勞一朝喜得披雲霧生平敝帚傾瓢獻謬

許西河相旦暮生涯淪落知音稀自謂十秋此
一遇抵掌時聞曠世談坐來華屋渾忘去泠泠
絲竹發後房設醴張燈聽曲度淵明素不解音
律聞聲亦覺精爽驚信宿已極平原歡贈行且
復投長句揚帆遂作金陵遊期以重過秋向素
轉蓬行地本無定移家忽就烏衣住春草凋殘
復夏雲迢迢江水迷歸路夢魂猶識龍門居離
思常縣愚谷樹士安一序題未來京洛誰傳左
丘賦

新道後集 卷三
斑衣行爲劉水部玉受賦

白華南陔風漸微人間稀覲老萊衣八珍五鼎
空自列庭闈未必心相依吾友吳中劉水部不
逐今人惟慕古親年周甲稱壽初特製斑衣作
兒舞湘山裁來幾片雲二十四綵錯成文初疑
苑花諸種合尋覺威鳳竒毛分着以連翩舞堂
下堂上老親願欲解泛菊先尋連理枝獻桃偏
得雙垂者娛親不獨自今辰鼓吹年年振洛濱
舞罷斑衣向何處佛前稽首期千春

竒蜂歌贈關大夫孟若木

有引

公初爲樂安令三載奏績錫命下迎
詔之日有蜂聚馬頭收而畜之公人覲
蜂不知所在及還蜂來如初公遷南署
蜂歸其家時公司權越關予往謁以竒
蜂記見示因作歌

魯恭邑蝗不入孟侯境蜂來集蝗爲孽蜂爲禎
孽去固云異禎至寧無稱憶昔明光紫泥下蜂
來迎詔攢其馬侯方入覲辭花封花封閭寂蜂

無踪侯還自都琴再撫蜂復從侯尋舊塢侯舍
鷄舌來京華蜂無所依歸侯家異哉造物何所
感遠近戀主令人嗟吾聞爾蜂極微細秉性慣
守君臣義孟侯 天子良股肱天遣爾來獻其
瑞卽今關門真氣浮萬方商旅興歌謳爾蜂釀
花定無稅應下南北高峰頭

鬼應門

丁巳孟冬次舟梁谿訪鄒
彥吉門者不爲通因賦

闐闐關虎豹守謁者見之但驚走侯家第鬼應
門謁者從旦立至昏初言主人臥未起客姑少

留吾將啓須臾覓鬼不可見欲行不行滯人死
殷懃問鬼何所欲總爲客貧錢不足襴衡懷刺
漫滅盡魏勃掃門徒局促吾輩巖下蓬高人取
去此鬼莫與親

次訓吳逸一可賦亭歌

茅亭三壁盡科斗前有八牕對鍾阜諸公高詠
泣鬼神魑魅不敢當軒走君來筆底生虹蜺骨
力堪與高岑齊短章每爲看花得長句還能向
月題亭中雖無廿一史未少百家及諸子豈伊

張籍歌可賡且有相如賦堪擬君稱籍隱休自
誇且須咀我亭前花晴薰深院鳥聲動風拂長
堤柳線斜人生忽忽草頭露爾我俱愁年歲暮
此亭可賦非余心終期偕隱南山霧

沈比部相如盆梅歌

有引

比部喜梅而工詩畫口所吟唔筆所點
綴無非梅也家有寒玉館列梅環之觴
詠成帙及含香白雲手植梅于盆九月
五日爲比部生朝盆梅忽開數花諸名

公俱有詠余亦嗣賦比部豪飲客至未
嘗不投轄獨未及予故落句有公榮之
語

沈郎愛梅世無匹家居列館梅爲客今來官舍
無地栽因借曇摩鉢中植自言何可一日無此
君口吟筆寫揚其芬吟極精工寫必肖案頭珠
玉時紛紛花神感君石交密特于覽揆顯靈質
菊英未泛萸未房一枝素景尊前出嶺頭最早
十月開此在重陽前四日賓客見者咸稱奇韻

與羅浮一般逸吾聞草木通精誠孟氏之筍田
家荆爾梅結根每千歲孰云此花非壽徵沈郎
妙年纔向立休文詩句傳通邑淮水一花今日
明香山九老他年集伊予狂態老更多五合醇
醪卽醉歌歌成恐被梅花笑不飲公榮將若何

編蓬後集卷之三終

編蓬後集卷之四

華亭唐汝詢仲言父著

天雄孟楠若木父校

五言絕

訪沈公路不遇四首

白社會相招挂帆來海上
雙扉鎖夕陽獨立還
惆悵

王猷多野興沈約有郊居
扣戶聞啼鳥無因一
駐車

續通雅集 卷四
問奇人不逢返棹日復夕空餘海上雲含情送
歸客

秋風期解纜暮雨送歸舟借問西窓竹何年說
舊遊

春日集古句無題

嬾婉及良時天邊又相送日高花影重甘與子
同夢

忽見寒梅樹一條有佳花嗟予怨行役樂子之
無家

夜坐聞雨

室空悄無人夜長怨獨語如何孤客愁飛作千
家雨

雨夜登樓

山色非吾土親交不共遊誰憐風雨夜獨自上
高樓

樓居九首

仙人好樓居今吾亦自適未能凌虛翔聊與囂
塵隔

居非詹尹卜樓擬仲宣登莫怪鄉心切雕欄每
獨凭

掩軒但愁臥誰復識林苑試聽啼鳥聲青山知
不遠

積翠新迷徑殘紅乍點衣登樓思故國簾外有
催歸

愁雨晝不歇高樓悄無人故園櫻桃樹落盡江
南春

樓頭孤客臥城外萬山羅時有松聲至冷冷雜

嘯歌

吾生苦無樂每逐飛蓬轉頓比山樓中吟興亦
不淺

西日慘將暮南雲不寄言臨風何限思愁絕但
凭軒

茶竈何須設書籤不復齊君看巢幙燕更得幾
回栖

聞漏聲有感

玉漏催銀箭迢迢午夜分如何百年內半向客

中聞

自錢塘至姑蔑江行二十四首

朝發錢塘岸黃昏及富春青衫添淚迹爲別故鄉人

日昃未炊爐頭酒頻酌沉醉君莫辭江寒客衣薄

碧水深還淺青山斷復連聊憑故人目描寫入新篇

前舟去已杳後船來更遲烟火不相接誰憐行

旅饑

灘聲愁獨聽山色倩人看誰謂無情思烟霞滿筆端

曉及嚴陵瀨淒然憶舊遊風塵方自愧不敢暫停舟

詩篇還卓犖身世久飄零巖客休相笑雲間老客星

潺潺石塘洪水流石空響欵乃聲無停灘高不能上

孤棹宿沙汀天寒夢易醒鄉愁何處起灘上水
泠泠

桐江五十灘移棹如登梯不知鄉路遠但覺青
天低

天借寒波綠山涵落照紅桐江千古勝翻入一
瓢中

扁舟泊蘭陵征客盡登岸隱几不自聊哀歌入
雲漢

聞道蘭陵酒消愁舊有名促沽來取醉已賦客

中行

已作經年別難禁永夜情孤鴻來自北偏帶故
園聲

笑語日紛紛歌聲半入雲晚來停棹處驚散白
鷗羣

漱水三投宿侯門兩曳裾那知麋鹿性偏自憶
郊居

朝入東陽境時聞鷄犬聲靜聽舟子語此地土
微平

昔有休文宅高樓八詠傳含情問江叟遺迹在
誰邊

娛日琴三弄衝寒酒一卮江魚何處覓前艇有
鷓鴣

江路愁中遠鄉園夢裡還分明慈母淚親酒客
衣班

冀長又三葉殘冬復幾晨今宵閨裡月應共翠
蛾顰

太末經年住何人解姓名惟應官舍鳥能識詠

歌聲

余常寓張叔翹郡齋

無心訪爛柯弭棹此城阿心憶漁陽守時聞麥

秀歌

張叔翹作郡于此

姑蔑城西路滄江至此窮明朝拂衣去匹馬向

西風

舟中聽雨

急雨洒征蓬羈人聽不窮百年傷感事俱集此
宵中

初冬送衣至

客裡貲方匱閨中信益稀那能不相怨猶是寄
寒衣

杼柚久已空此物何來作極知針線難雖寒不
忍著

夜

倦枕夢魂驚淒涼旅思生夜鳥啼不住只爲近
高城

客有餽杜袁度畫眉鳥者不鳴主謂之戲
爲詩代答二首

世人好我音非以蛾眉質不言惱主人開籠或
有日

藩中非吾宜長鳴實野性詎若桀下鷄主人呼
必應

雨中暮歸燈下卽事口占六首

客路年年異柴門日日關誰堪風雨夜獨自泛
舟還

雨久敗茅屋薪空冷夜厨童兒還問母沽酒有
錢無

續道後集 卷四
檻外沉沉雨燈前欸欸言客居意殊適聊復慰
寒暄

欲糴空囊索思炊乏屢屢山妻心慰客猶說未
嘗饑

來朝景將至歸欲薦染明貧窶無他物鳧雛僅
可烹

到家便欲死總爲徵逋急白晝但愁眠清宵翻
佇立

獨樹湖

湖將獨樹名樹今在何處四面皆荒堤風帆自
來去

鑊底潭

潭底深不測狀如鑊盛水風起波沸騰煎熬幾
時已

秋日憶故園六首

移家住來穩無復有歸心却怪秋宵夢時時在
故林

昔家黃浦上欸乃落秋雲一作秦淮客經年不

復聞

遙憶舊柴荆，離披草蔓生。
隣翁幸相惜，木石口銜成。

舊居饒美竹，時許客來看。
別後供隣舍，家家有釣竿。

香櫟齋後樹，霜落每浮香。
今日兒童輩，誅求不待黃。

舍後一溪曲，西家慣養魚。
阿瞞今不擾，肥瘦近

何如

余第三子頑甚
人呼爲阿瞞

六言絕

元夕二首

巧似越姬簾，織光疑丞相。
帷開不知琪樹安，在但見天花下來。

火樹光將月，掩燈花彩似。
春敷西河心，亦稱賞北海樽當再沽。

題陳仲醇山居六首

窓下帙橫未整，巖間花發宜攀。
松軒欲掩不得，有客時時扣關。

石髮日深難掃木奴陰薄宜栽余阜梅英未落
洞庭橘種新來

麈尾雄談滾滾齋頭竒士紛紛魯國編年盲史

吳門靖難將軍

座有葛將軍乃
吳門除稅官者

世網久羈傲骨空山偶寄閒身松頂聞烏覺曙
籬根踐草知春

霜柑此日同剖叢桂何年共攀仲子灌園雖好
巢父無錢買山

摩肩擊轂盈路藉草看花幾人余亦風塵外客

垂老終須卜隣

姚氏丙舍卽事二首

曲曲清溪遶戶亭亭古木干雲鳥語伴人不厭
櫓聲入夜猶聞

春日耕桑處處清明祭掃家家何來女伴喧笑
攀去墻頭幾花

可賦亭雜述

新卜一亭容膝舊栽羣木干霄隔水似離塵境
通人猶有橫橋

傍簷有木名穀繞屋開花是薇入夏綠侵几案
開秋紅映軒扉

艱難室似懸磬飄泊身如片雲曲水自堪終老
北山不用移文

甕牖冬來盡塞蓬窓春至俱開本無竒字可問
那有醇醪載來

編蓬後集卷之四終

編蓬後集卷之五

華亭唐汝詢仲言父著

會稽沈存德相如父校


七言絕

寄懷沈公路

久將身世托雲烟
萬事無心但晝眠
獨有離愁消不盡
春風吹到百花前

留別公路

斗酒相看十日遊
西風無奈送歸舟
明朝客去



黃花冷烟雨知君獨倚樓

雨中喜公路至

伏枕經年凋綠鬢故人何夕共清尊那知面壁
相思處風雨蕭蕭獨叩門
病中誰與破愁顏一月煩君兩叩關濁酒媿無
裘可換滿城風雨送君還

秋杪訪徐唐運索稿答之

春暮逢君秋又闌偶移孤棹訪詞壇壯心自信
凋零盡莫借瓢中敝帚看

秋杪將發海上留別沈寧侯

時寧侯歸江東先余發棹

何夕臨觴不共君挂帆河海乍離羣明朝歸臥
茅齋冷無限秋聲入夢聞

同採黃花想舊藜君今先已度江東總令小阮

能留客

寧侯公
路之叔

坐少劉伶酒不空

寧侯
善飲

客裡逢秋鬢早凋扁舟歸思轉蕭條故人不作
飄零意獨爲山人理舊瓢

宿錢塘三首

風色淒其欲暮天月明估客共停船誰知夜半

霜華冷詠史袁宏獨不眠

鱗次帆檣混未分舟中語笑各紛紛夜闌莫怪
歌聲放孤鶴由來不亂羣

作客經旬月欲圓故園回首已茫然高堂想亦
嗟予子風冷霜清何處眠

歲暮憶沈茂之二首

歲暮懷人獨倚樓坐聽寒雨不勝愁長裾曳後
無顏面未敢題詩問許由

殘葉闌堦已自悲梅花復起故園思何如掩尸

讐書客落盡年華總不知

代內集句見寄二首

萬轉雲山道路賒憐君何事到天涯行人却羨
南歸雁獨是狂夫不憶家

舊苑荒臺楊柳新徵君晚節傍風塵閨中只自
空相憶水遠山長愁殺人

集句答內二首

並蒂芙蓉本自雙十年辛苦伴滄浪鱸魚正美
不歸去自笑狂夫老更狂

天涯涕淚一身遙
桂葉雙蛾久不描
落日臨川問音信
青山隱隱水迢迢

春夜聞笛集句

北書不至雁無情
千里歸心對月明
腸斷關山不解說
誰家玉笛暗飛聲

春夜作

殘葉蕭蕭別故鄉
俄驚官舍落紅芳
不知今夜閨中雨
滴向孤燈淚幾行

雨夜寄家兄士雅

城曲分襟千里行
幾回風雨動離情
欲知孤客傷心處
半夜空齋聽雨聲

重寄家兄

經年爲客歎飄蓬
兩地相思羈旅同
若憶舊時分手處
黃鸝啼盡落花風

寄君寔弟

自嘆東吳一病夫
何緣千里去菰蒲
始知身被虛名誤
碌碌趨庭愧阿奴

挽錢稚宣四首

憶昔秋風客裡生人傳君已入燕京寧知漢苑
凌雲賦飛作卬山碓露聲

十五聲華冠楚才長揚未獻掩泉臺從今莫惜
長沙傅猶得明光草詔回

傷心玉樹已埋塵又見天涯蔓草春懷舊自堪
雙淚落非關長笛奏鄰人

蒿里賢愚混不分誰云泉下可修文總令身作
遼城鶴江海茫茫孰識君

贈張崑石

千金一擲舊豪雄老去生涯類轉蓬官舍逢君
秋色暮半牕烟雨坐書空

將歸吳別署中山樓二首

山樓愁臥忽經年明日西風送客船從此雕欄
應寂寞何人題破白雲天

樓頭別思爲誰生愛爾松風入座清雲際無人
知去住傍簷啼鳥獨含情

舟中與崑石夜話

客裡宜城幾獻酬故園歸去復同舟秋江雲冷

蘆花白夜半燈前說壯遊

留別沈茂之四首

春風移棹此經過不盡論心奈別何頭白相期
千古事肯因離索動悲歌

總是當年俠骨存誰能離別不銷魂申江日暮
孤舟遠窮巷蕭然獨掩門

青眼貧交已自稀况堪詩思逼人飛欲知他日
相期處一葉漁舟兩布衣

風雅翩翩自不羣榮華入目總浮雲江湖此去

無知己早晚移家欲就君

贈吳太樸家歌童二首

宛轉清歌入杳冥朱唇啓處想瞳青吳江百里
潺湲水驚得東流不少停

筵前莫辨龍陽色酒後微聞子夜聲不是新歌
能縹緲老夫詩思傍誰生

夏日歸林口占十絕

投跡風塵歲月多故林新竹轉婆娑薰風似解
歸人意遙送蟬聲入嘯歌

一經市隱失郊園五載空山草自繁今日歸來
須掩戶莫教鷄犬出桃源

一亭斜傍綠楊開雨久無人積紫苔笑語山童
休浪掃清虛猶勝道傍埃

火雲四野盡竒峰惟有幽亭爽氣濃坐覺斜陽
向西去科頭還復倚孤松

向來三徑不生塵嫩草蒼苔軟似茵枕石臥來
林寂寂喜無竹外送書人

晚涼移几傍清池還復呼兒讀楚辭吟罷入門
菰米熟山妻却恨酒賒遲

作客經年別故林蠹生羣籍網生琴含情更覓
瓢中草留得當時雪夜吟

長鋏頻彈不記年歸心日夕到林泉誰言元禮
龍門接能勝陶家牕下眠

西河原欲臥蒿蓬誰使身羈世網中日啖侯鯖
仍不樂只緣林下有清風

負郭難期二頃田蒯緱每憶故人憐何常常滿
瓶中粟一枕松林獨晝眠

夜雨不寐

時客鍾陵

作客天涯歲欲除
經時不得故園書
數聲哀柝三更雨
鄉夢何由到敝廬

元夕代內作

一樹庭梅忽盡殘
閨中風煖月初團
平時漫說傾千卷
不借江淹別賦看

別蔣君贊二首

鄉園雲樹夢中迷
客裡頻經送馬蹄
明日小齋增寂寞
故人詩句倩誰題

驪歌一唱一銷魂
君涉長江我閉門
四五同遊歸欲盡
試看衫袖有啼痕

代內六首

冰雪淒其此送行
坐驚簾外百花明
舊時燕子還尋室
不信君無戀土情

作婦君家幾歲年
詞場多說士龍賢
經時不寄閨中信
徒有新詩代彥先

聞道鍾陵彭蠡濱
夢中彷彿見通津
客居應在山城裡
一片煙波不見人

小院春殘蕙草芬
機中錦字不成文
朝來簷外頻聞鵲
欲種胡麻且待君

日日思君獨倚闌
木蘭花盡海棠殘
龍沙谷水三千里
縫就春衫寄尚難

豈爲春風恨索居
每愁孤客嘆無魚
安知今夜蕭蕭雨
不對殘燈憶敝廬

秋宵起步

鄉夢驚殘曉漏稀
不眠屣履出重扉
那堪檻外蕭蕭樹
偏引西風入客衣

蘭陵阻風

清地河山已倦遊
石尤風急駐扁舟
青溪似解歸人意
永夜潺潺向北流

旅夜聽雨

蕭蕭急雨洒庭枝
孤客三更夢醒時
咫尺敝廬歸未得
不堪穉子夜啼饑

與杜袁度夜話二首

良夜傳杯不記巡
城頭擊柝坐來頻
共言海國饒詞客
秉燭論文僅幾人

續遺集 卷三
昨宵吟對又今宵知已真能破寂寥別後莫愁
雙鯉斷申江日夜有歸潮

詠過墻梅花

圃淺垣卑不掩春一枝分得與東隣西廂倘有
崔家女應指名花是玉人

旅宿有感

黃昏獨坐到更殘童穉牽愁欲寢難况是客衣
新典盡江城五月夜偏寒

聞沈茂之病起東寄二首

車轍門前固是稀况經三月臥牛衣吟成七字
題相問緘罷郵筒淚自飛
春林別後忽生秋泛梗無心任去留我既食貧
君復病不堪兩地暮蟬愁

聞雁

昔期與爾共冥冥偶墮風塵鬢便星今夜一聲
千點淚十年不向故園聽

西湖採蓮曲四首

玉爲流水錦爲堤荷葉芙蓉萬頃迷借問越中

續通後集 卷五
諸女伴只今誰數若耶溪

蓮中歌吹柳中帘畫舸何人不少淹莫怪越姬
脂粉重爲從花色鬪穠纖

蘇家堤岸白家湖錢氏封疆趙氏都多少英雄
磨滅盡荷花菱葉不曾無

昨歲曾趨湖上期騷人相值共題詩菱歌記得
還堪唱若問烟花總不知

雨夜同唐元常話舊二首

急雨淒風夜滿樓一壺相對破窮愁傷心四十

年來事然盡蘭膏話未休

小閣淒清烟雨多故人同被意如何百年身世
君休問一半生涯夢裡過

冬仲渡浦訪錢復古青林會納妾九峯傍

却寄

海上因尋舊雨來不知君已入天台仙人石上
無寒暑含笑桃花定擬開

朔風吹棹渡江難雨凍長空欲作團此夜劉郎
應得意龍鬚席上不知寒

芙蓉寶幄結同心鄭國蘭馨夢裡尋碧玉破瓜
何限樂隨他閨閣白頭吟
洞房花燭映鮫綃七寶新粧插步搖京兆狂奴
多舊態入時眉黛莫輕描

旅宿值清明日偶成

泉壤關心望漏終客窓愁雨聽無窮夢魂不待
孤舟發已到荒烟蔓草中

阻雨徐唐運齋中

經過不厭爲俱貧炊黍烹葵意自真屏翳亦知

君愛我連朝沾洒欲留人

海邦爲客幾經秋鄭宅朱家總舊遊今日蕭條
烟雨裡一杯相對獨南州

送楊侍御修齡十首

豸冠何幸禮披裘欲挽行驄不少留巖壑百年
知己淚因風飛入使君舟

自憐閒寂守空廬豈料音生爨下餘一拜前旌
千里別空山誰復覓逃虛

書成已謬賞丘明廬敞重煩使者旌良會千秋

今始遇臨分淒絕棹歌聲

草就驪駒未忍歌攀轅黎庶意如何吳江秋水

新添尺袁浦塲中涕淚多

袁浦塲賦最重公均之編民泣送者載道

柱史風流一代無行經五岳賦三都高標宇內

誰堪似應與天台絕頂俱

憶昨追隨柱後行荷衣歸帶令君香預知他夕

思恩渥明月清風幾斷腸

遠績高風已不羣詞華兼復邁揚雲干將峯下

扁舟月永夜清光爲使君

朝逐雙旌出五茸離愁薄暮正重重石尤且少

留征棹猶得揮觴醉九峯

行艫夜發及由拳感別何人不黯然巖穴信陵

難再值若爲離思聽鳴蟬

鐵甕城依江水孤霜臺旌旆尚留吳臨流莫唱

陽關盡秋暮還期買舳艫

訪林若撫不遇值雨二首

昨歲燕來曾結社今秋鴻至始尋盟北山逋客

今安適菜圃蕭蕭細雨生

道沾微雨不生塵爲覓幽居向四鄰一刺欲投
愁漫滅應門知我是何人

吳中迎神竹枝詞十首

有引

吳中薦臻者三載矣斗米不下百錢甲
寅秋歲稍豐由拳妖巫詭言神降迎者
穀倍收劉氏舊宅有二井向湮沒巫因
浚之投藥水中作紅白色云能治疾於
是窮鄉愚民更相煽惑聚至數千人舢
艦輿馬相踵于道乃官司卒無禁之者

聊爲竹枝詞以紀時變

連歲汗邪不滿車路傍來食敢辭嗟年豐纔可
供飭粥金鼓迎神已萬家

劉家小鬼舊迷人木偶何須處處新吉貝滿田
禾滿野家家迎得耗錢神

四郊禾黍已紛敷礮米還憑猛將扶未見一丘
添一石先將早稻謝師巫

魍魎當年有舊居千人相聚換門閭餘杭青竹
還增價總爲劉家用筍輿

爐烟起處卽仙都紅白雙開井不枯此水只今
能療疾一瓶須用百錢沽

鳴鑼疊鼓振通津黃蓋紅旗隊隊新馳騁中流
休得意前秋俱是啖糠人

村村巷巷鼓鼙鼙尺鯉黃鷄買欲空猛將向來
唯素食今朝兼迂顧先鋒

連年薪貴僅供炊衡宇無毛壁盡歌今日欲迎
劉老太香秔先刈屋堪茨

蕭鼓喧喧夜不休陸行乘馬水乘舟妖人去入

黃茅屋羞殺當時利濟侯

總爲巫咸一握椒佇看祠廟起峇峴由拳恨少
西門豹此際誰除鄴下妖

沈茂之入都過余五茸信宿而別余至京
口邂逅舟中臂始交而散去因寄二絕

五茸城外已離羣北固山邊又遇君握手至今
疑是夢一吟新句便重分

邂逅逢君喜不勝離魂如散復如凝未傾方寸
卽天末細雨孤舟各自登

酬沈茂之長安見寄十首

歲暮初傳薊北書
梅花開後感離居
君邊有此芳菲否
應是羌人笛裡舒

鐵甕城邊別意長
歸來詞苑倍淒涼
海天詎少抽毫客
得句何人似沈郎

隔浦分襟尚黯然
那知一別路三千
縱令月色京華勝
難比連床共醉年

京國垂楊樹樹新
此時應憶故園春
不須更寄愁中句
予亦經年作客人

平居每自憶皇州
纔到皇州已倦遊
澤雉棲樊非本性
相期終在北山頭

詞客由來任轉蓬
幾人星散逐西風
夢魂不厭江湖遠
每到長安客舍中

三都草就別鷗羣
玄晏揮毫大國聞
却恐洛塵能染素
躊躇未敢卽從君

帝里經行訪古頻
黃金臺畔覓遺塵
昭王市駿君休問
吾輩原非伏櫪人

當年相約共誅茅
白石蒼松久定交
半百頭顱

猶作客蹉跎應受北山嘲
棲棲總爲釜生魚爾我侯門各曳裾但使陸生
裝可賣便應同卜輞川居

寄懷唐元常二首

失意知君掩戶居然藜應發篋中書縱然文與
相如似芸閣何人重子虛
春暮山家景物濃茗芽如雀籜成龍囊無僱值
愁三老不是王猷興轉慵

武林客舍苦雨漫書六絕

小樓愁坐雨聲多車轍難期長者過却恨平康
粧閣近亂人鄉思有笙歌

素衣一半雨中緇客久懷歸但賦詩自笑寂寥
書肆裏三都空就竟誰知

荆扉落落雨沉沉拄杖錢空客思深買得胡琴
無處破誰言都邑有知音

西湖烟水自澄鮮冒雨何心泛畫船况是越中
居不易和糠斗粟百餘錢

紅粒如瓊桂擬薪三都未售客居貧謾將寂寞

綉逵後集 卷五
譏楊子門外還多載酒人

千家絲竹萬家歌詞客無如賈客多獨鶴失羣
思舊壑一牕風雨夢藤蘿

寄懷房山張茂卿明府三絕

五茸花下敞離筵此日攀花憶往年最喜使君
能吏隱鳴琴高臥小西天

房山地名

仙令風流故不羣縮符猶自出塵氛留侯舊有
棲真地曾掃峯頭幾片雲

詩盟何幸托知音遠道飛書復見尋千里相思

終命駕河山應不負同心

金閫訪林若撫二首

金閫鼓吹日喧喧窮巷惟君獨閉門淪落主人
淪落客相逢聊共倒殘尊

別君二載各蓬飛何幸茲宵款竹扉方寸未傾
分手去西風吹斷薜蘿衣

憇金閫市書不售因題

偶雜扁舟萬舫間行囊如洗客無顏世稀玄晏
難論賦梓就三都滿載還

哭君實弟

歲莫饑寒趨道途三荆忽報一荆枯
蒼茫烟雨申江裡淚落西風野艇孤

自是生前每患饑蓋棺方免首陽薇
夜臺若使無貧餒拋却妻孥共爾歸

我爲妻孥未忍捐頻年饑走乞人憐
爾今獨向泉臺去總角綦巾若個邊

慘慘哀魂未有歸九京何處覓庭闈
瞻依倘似生平日寧惜人間雁背飛

爾寔無懷太古民栖遲應保百年身
鬢毛未化隨朝露天道何曾與善人

無慮無思渾沌全何憎造物奪君年
安知不厭人間苦一反蓬壺竟杳然

當年六藉每仇予借爾雙眸作蠹魚
舊草一翻腸一斷居平得句半君書

寄懷社中諸友十首

懷長輿

新詩老去轉驚人龍性難馴慣隱鱗
却怪世途

非舊日山中巢許盡風塵

懷逸一

籍隱先生籍爲酒釀熟甕頭待余剖秦山三月
花氣薰日欲就君傾一斗

懷上民

如君天道更誰論明喪重銷哭子魂自古達人
寧有累延陵季子韻猶存

懷茂之

君性由來七不堪囂塵何意老能甘看花兩滯

長安陌虛說隨陽翥必南

懷元里

歲暮逢君興不孤春來投我夜珠無時人莫識
開元句浪說眉山有大蘇

懷唐運

累歲聞君好遠遊行囊依舊少錢留途窮我亦
羞彈鋏期向滄江買釣舟

懷元應

詩名都出杜家郎難弟如君似季方別後定多

續通雅集 卷五
春草句可無餘絢寄滄浪

懷元常

春暮南郊草作茵一瓢同醉恨無因
聞君種竹初成徑貧病何年可卜隣

懷聖清

風流誰似張公子江左于今第一人
斲往姑蘇便忘返扁舟載盡五湖春

懷玄超

約向橋門蔭市槐經年猶未到秦淮
春風無限

臨江思只少扁舟共爾偕

送吳司理被召五首

官况由來一鶴知纖塵應不到襟期
莫將流水方司理須道滄浪有濁時

喧喧疊鼓發中流雲擬行裝葉擬舟
試問橐中何所有山陰父老一錢留

遺珉腐草是生涯何幸逢春借日華
浪售三都皇甫力敢忘黃雀謝餐花

使君門不納陽鱈抱病文昌獨見招
白屋青雲

從此隔衡茅歸去轉蕭條

一接清談似飲醇歸來寒谷盡生春他年杖鉞
臨南國莫忘逃虛鬻僑人

至日送朱幼馨還滬瀆兼柬幼裳三首

君家池草舊生春別後西堂夢更頻我亦故園
思斷雁不堪愁絕送歸人

異鄉雲物雨中占酒盡孤亭不少淹海內故人
如問訊客居端稱老夫潛

颯颯西風送雁羣滿城烟雨不堪分自憐作客

無倚侶春到梅花卽望君

雨雪王體咸王薌叔二丈先後相賑賦謝

雪洒衡門晝悄然雲封曲突靜無煙何來剝啄
驚童豎知是王弘送酒錢

袁安正苦雪中貧絡繹煩君饋餉頻白下宦游
囊已罄豈堪微祿更分人

冬至日憶士雅兄

年年此日客中過今歲移家意若何白首連枝
在天末酒酣淒斷鵲鴿歌

附書元常偶題

作客秦淮柳半青社中親友散如星緘成尺素
燈花落愁絕孤吟一草亭

送吳逸一歸雲間四首

一身爲客有誰哀千里相思獨爾來別後更無
人問信鍾山空作望鄉臺

十賦驪駒九輟題臨岐未忍送輪蹄東皇亦解
分離苦不作風顛便雨迷

千里移家逐轉蓬故鄉朋舊各西東那堪又送

歸人去腸斷蕭蕭烟雨中

雲臥崑陰五十春白頭京洛混風塵故園門巷
埋荒草愧爾空山籍隱人

送王體咸歸省二首

驪歌纔唱便銷魂送盡心知日杜門不信年來
離別苦試看江柳幾枝存

裘馬翩翩學晝遊到家深慰倚門愁問予別後
相思意應與秦淮日夜流

寄懷許稚則二首

繞屋葵榴歷亂開茅簷何處不蒼苔自經玄度
分襟後兩月無人載酒來
四月秦淮井底乾日來喜得借江湍垂楊翠栢
俱無恙叢竹纔添一兩竿

仲冬訪許稚則三首

經年不醉許由瓢千里寧辭命駕遙亭午叩門
人不見爲營茅屋在山椒
青山四面許家村每爲看山不閉門元亮罷官
多樂事手栽松竹遍雲根

宦遊十載暫投閒俸有餘資只買山他日重來
更難覓松雲深處掩柴關

關門訪孟若木不宿而別

千里揚帆覓舊遊升堂一揖卽登舟慚無道德
經堪著不爲關門令尹留

發北新關卧夜航中纏襪爲人所竊

襪不凌波總在舟朝來航際杳難求世無廷尉
何人結應是偷兒得意秋

留別張次璧

多君雙眼爲予青猶憶當年口授經別後董家
帷早下無令塵土蝕青萍

張秉之齋中夜集

斗酒留歡此夜中明晨將別話匆匆士行自擬
分陰惜陶母于今髮欲空

沈比部相如以新什見投且爲余梓編蓬
集口占三絕致謝

白屋寒多晝掩門讀君佳句覺生溫千秋自許
青雲附身世淒涼詎敢論

天涯淪落老王孫抱病支離舌僅存身後不無
青眼在爲余梓就一家言

卿家祖德畫麒麟鳴鞘吳鈞屬後陳

公祖忠愍
公有鳴劍

集君子獨爲蘧玉耻立言不朽亦分人

編蓬後集卷五

終

編蓬後集卷之六

華亭唐汝詢仲言父著

夏口董暹長馭父校

五言律

酬朱繕部季則見贈之作

乘輶滄水使休沐
海雲端未穩隨龍臥
先期禮鶻冠
黃花催興逸白雪逼人寒
媿我非玄草
桓譚恐浪看

西河淪臥久投草
日盈瓢居僻秋蓬沒
愁多俠

續遠行集 卷六
骨銷句中天地老雲表夢魂遙何幸金門客飛
書獨見招

重過沈公路宅五首

乘興重來此棲遲不記年晝翻羣玉籍夜草白
雲篇愛客容狂態迷花每醉眠生平苦喧濁斯
館獨幽偏

小閣臨踈竹幽亭枕碧流栽桃紅欲亂插柳翠
將浮地僻人稀集杯寬客願留就君堪老去無
用覓菟裘

一榻留賓舊羣芳引興初尊開桑落酒盤出鱸
殘魚生計狂歌在飄零俠思餘疇能更羈絆隨
處卽吾廬

四海論交地追隨獨有君再賒溪上月重臥竹
邊雲春酒生新綠蒼苔長舊紋向來吟嘯處花
落更紛紛

吟嘯不覺久簷前春已闌故園花欲盡長鋏客
應彈浮蟻還留醉遺編復借看他時河朔會重
擬度江干

與朱朗安話舊

五秋驚落葉何歲不思君昔別山中月今過海
上雲鬢毛應改色名姓總無聞後會那堪問孤
鴻易失羣

沈公路席贈雲姬

蒼梧纔出岫汶水乍含秋不入襄王夢來從伯
玉遊趁粧偏落鏡聞曲半依樓欲贈蕭娘去湘
山剪作裘

暮春同諸君夜集公路齋中醉後口占答

茂之話別四首

豹隱迷雲久鶯遷出谷遙青春驚欲盡白社日
相邀雜鳥聽歌亂因花得句嬌臨池聊一醉無
復問歸橈

握手未經旬懷歸惜暮春今宵投轄客明日渡
江人對柳還忘折傳盃不厭頻挂帆從此去蓬
室更無隣

歌鼓亂飛聲風光夜轉清月來溪上白人在鏡
中行坐久庭花落吟餘宿鳥驚今宵歡賞地不

減習家名

月皎花偏媚更殘酒未醒煙雲雙倦鳥天地兩
浮萍吟臥披雲地踟躕送客亭明晨嘆離別歌
管莫教停

夜宿蕭寺寄公路

沈郎饒逸興洒筆落虹霓何意三秋別終無一
字題海長多過雁寺隱斷鳴鷄握手知何日行
看岸柳齊

春雨江行夜集公路宅

長川方怒濤理楫不辭勞海氣風前白江城浪
裏高愁隨新雨歇興倚故人豪斗酒曾呼否春
寒滿客袍

送梅和沈公路作

春色難久住送君歸太虛撲衣疑戀主點硯懶
題書酒泛殘香細琴傳別調餘他時殘臘盡重
發故人廬

春夜讌集留別茂之公路

歲久交逾密情深別轉難天隨孤棹迴地阻大

江寒柳葉催人發梅花帶月殘乾坤無二子誰
與勸加餐

二月八日同徐唐運夜發海上舟行有作
江上風初定帆前月正弦何來鄴下士同泛剡
中船雲冷尊難盡天青客未眠論詩興無限竹
纜莫休牽

春半歸郊園示社中諸友三首

歲月侵人易生涯行路難春光能幾日一半客
中看出谷梅初白歸山杏欲丹親知相憶否轉

眼百花殘

東風吹綠蘋四十五回春作客驚時換還家命
酒頻啼鶯毫底亂芳草句中新不語求羊輩相
知更幾人

萸萸分春色江湖老客星堤楊攀半綠徑草踏
全青鳥自親歌席人誰到野亭一觴還獨進身
世兩浮萍

九日同顧君法蓮上人沈茂之夜集公路
齋得臺字

勝因千古集詞客四方來北海尊初滿東籬菊
未開風迴燈影亂天朗曲聲哀借問今宵會何
如戲馬臺

月夜同張銓之昆季集公路池亭得圖字
命酒空庭晚中天片月孤興移頻促席賓醉失
呼盧引水通花徑邀雲到井梧無令王給事獨
擅輞川圖

九日至海上和公路病起之作與顧君法
蓮上人茂之同賦

蓬飛俱浪跡星聚值登高問道三生悟論文數
子豪病餘聊試酒興發爲持螯詩就還驚詫何
人不二毛

立秋後一日遇雨宿潘文子齋醉後有贈
尋盟來此地英妙得安仁覽賦西征就論交東
郭貧疎桐歌際落涼雨醉中新他日相期處河
陽一縣春

殘月如新月

東海新垂釣西窓舊畫眉還從將盡處憶得始

生時鏡破光全滅，弓存影更疑。古今衰盛跡，堪向此中知。

酬曹元達贈別時適姑蔑

親知滿鄉邑，獨爾奏驪歌。白首惟交在，青山奈別何。千秋餘姓氏，一劍老關河。明日辭君去，天邊指爛柯。

夜集吳叔純齋中

尋盟興不極，枉道入山家。揖客開三徑，論文破五車。交情傾竹葉，離思結梅花。明發人應別，巖

潯路正賒

曉發璜溪留別吳湛瑩

煩君頻枉駕，嗟我暫停舟。瓊樹元消渴，征蓬記可留。酒醒江月落，吟就曉風愁。笑乞陳遵轄，今晨未擬投。

泊舟六和塔作

羈人自不寐，夜景復淒然。寒雨飄鄉淚，驚風蕩客船。失羣悲雁鷺，惜別想林泉。擊柝誰家子，終宵亦不眠。

嚴陵釣臺

昔尋高士傳今過子陵灘
臺插青天古巖縣碧溜寒
一竿辭鳳詔七里任虬蟠
試問經過客何人早掛冠

巳酉除夕寫懷

一身來此地一歲盡今宵
愁自春先發顏從客後凋
笙歌千戶滿枕簟五更遙
徒有椒花酒終難慰寂寥

正月五日集句憶家兄士雅

開歲倏五日離家已二年
城隅一分手天畔獨潄然
流水赴大壑池魚思故淵
羈心何處盡春草欲芊芊

早春齋中燕坐書懷

東風搖碧樹旅館覺春還
帶為思親緩門因抱病
關倩人看客鬢聽鳥破愁顏
遙憶空林下梅花盡日閑

元宵前二日同張聖清步月有懷

月下空簷白相携踏地歌
光非他郡少樂是故

鄉多君尚懷桑梓予應夢薜蘿更愁三五夜仍
向客中過

春日偶題

街前草又芳夢裏度青陽畏老哀時促懷歸厭
日長花枝春歷亂山路晚蒼茫莫誦招魂賦從
他人故鄉

春晴做梁簡文體

青陽可憐節况復可憐朝雲破日華媚風香雨
點消微羞花露態輕轉鳥含嬌爲語秦樓婦雙

蛾趁柳描

春詞二首做玉臺體

雲擁七香車青郊覽歲華步斜因惜草眼醉爲
迷花遊女身輕燕當壚鬢比鴉少年行倦處歸
騎入誰家

何處尋春色長安大道傍日遲如有戀風細本
無狂柳作折腰舞花凝半睡粧壚頭聞酒氣醉
殺冶遊郎

清明姑蔑署中卽事

越中風俗異今日有錫無庭草猶堪踏村膠不
易沽禁嚴魚鑰閉春冷竹樓孤不識東郊騎惟
聞候吏呼

清明後一日贈別錢長源二首

此地無相識逢君卽故人坐探瓢裏句凄斷客
中身吟席沾今雨幽蘭惜暮春明朝揮手後曲
几又生塵

詞場曾識姓旅館乍論文同調嗟難遇清尊惜
易分君歸三竺二月余夢五茸雲吳越相過近誰

云雁失羣

重別聖清三首

懷鄉情共切羨爾獨先還別酒添新淚歸心滿
舊山濃花千里發芳草一庭閒誰爲彈流水愁
來但掩關

試結雕龍舌兼韜吐鳳毫親交悲乍隔吟興爲
誰豪九點芙蓉色三秋郭索螯歸期殊不遠相
待古城濠

已別重牽袂將分更吐吟斯遊寧獨羨此地少

知音江路風波遠山樓烟雨深臨岐兩行淚他
夕更沾襟

苦雨三首

愁雨灑無極麥秋將若何故園申浦上白晝水
雲多古徑深苔蘚孤亭鎖薜蘿屢屢炊擬盡誰
信不悲歌
風景偏愁客生涯但有歌經春花信少入夏雨
聲多滴溜疑穿石迷山欲爛柯萬方昏墊滿其
奈故園何

玉女衣仍濕銀河水欲傾乾坤應板蕩風雨日
縱橫漢室惟朋黨周餘互死生敢憐羈旅客愁
臥此孤城

午日吳中寄衣至

三吳分袂易千里寄衣難正有青蒲泛纔開白
苧看縫於新處密帶比舊時寬暫解披裘苦還
嗟路杳漫

詠庭中雉

庭雉若含悽還應憶舊谿無心登鼎鼐豈樂在

潘栖雙翼觸隅盡孤遊顧影啼早知文彩累斷
尾混羣鷄

秋夜登樓

思家愁不寐夜半起登樓月落星猶在蟲鳴地
轉幽一瓢身後夢雙鬢客中秋舊壑多松桂王
孫豈浪遊

秋仲望前一日逢章吉甫

夙昔期同調相逢忽異鄉莫將行客句來攪旅
人腸對月秋將半論心夜未央酒闌歸思切叢

桂已含香

重柬吉甫

北海尊未空飛觴復爾同署幽凄唳鶴砌冷吊
鳴蟲風雅知偏勝巴歛亦自雄無須泣岐路仲
蔚舊蒿蓬

月中早行

昨夜逃魚腹時有渡江沈船之厄今晨命鹿車生還珠有
淚行處桂猶花寄世身從幻棲閑興轉賒君看
龐處士白首在烟霞

贈別洪邑博望治令宣平

數載忽分襟因調子賤琴不堪愁遠別端爲失
知音吳越風烟隔蓬蒿日夜深他時花滿縣肯
許一追尋

送王二尹直夫令潯江二首

贊府三年職君王忽賜環新符隨鳥至故國喜
珠還衰柳臨江折寒梅度嶺攀雙松餘舊跡千
古在雲間

製錦將趨粵揚帆忽去吳齋糧携鶴共入境起

鱗枯書著高風舊琴調片月孤論文思昔侶盲
史在菰蘆

寄懷王汝產二首

五嶺限南北相思其若何歲時歡際少天地客
中多抱病裾猶曳懷歸劍自歌寧如王處士散
髮臥烟蘿

憶昔論文日高歌杯酒前秋江一葦別雲樹兩

茫然君返遊吳棹余浮適越船

余嘗有姑
蔑之行

夢魂

那可接庾嶺入青天

錢王明府夜泊水雲亭兼呈次公汝產
離筵酒易醒弭棹水雲亭話別銷銀燭悲歌落
曉星烏看仙令赤眼憶故人青瓊樹連枝媚能
忘舊渚萍

題張叔翹山齋二首

平子研京地高齋隔世紛窓含桑柘雨亭鎖薜
蘿雲棗自安期植梅從水部分最憐朝市遠幽
鳥夢中聞

丘壑非藏拙衡茅暫養真室虛惟蠹簡樹古盡

龍鱗枕石偏宜夏移花不待春只愁飛詔下未
許謝時人

將赴鍾陵留別家兄士雅二首時兄亦有
海上之行

勞生非一事雙雁忽分飛江路時移棹寒林日
掩扉海天歸夢近廬嶽故人稀今夕思親淚同
沾旅客衣

傷心向水湄轉眼各天涯愁與身俱老貧知路
有岐風帆分此地杯酒會何時總就東山約終

續遠後集 卷六
悲鬢共絲

空山夜行四首

宓子自調琴誰令君遠尋登車晨度嶺叱馭夜
穿林霜氣侵人骨溪聲亂客吟寒砧何處起千
里故園心

上倚巉巖石下臨百尺溪僕夫罷欲臥山路暝
還迷有月俄已落無村得暫栖臨風正惆悵羸
馬向人嘶

乘輿三渡水弭節總依山長路人方倦荒林鳥

自還戴星追伴侶對月憶鄉關今夕香閨夢應
過疊嶂間

月落露淒清空山欲二更消魂經虎窟滴淚感
猿聲路暗行相引村荒望轉驚征夫謾愁思前
路有孤城

立春日柬錢復古下帷齋中

羨爾然藜處空齋不染塵掩扉疑傲俗點筆已
生春辨氣知梅發聞聲覺鳥新風雲應自許龍
性固難馴

人日喜晴

壇石經春後山雲暗不開
雨聲愁客久日色爲
人來遣興親啼鳥尋芳
趁落梅長歌聊自得鄉
思莫相催

春朝卽事

山城鳥亂鳴春日擬新晴
作客愁仍在還鄉夢
欲驚風來檐隙細雲點
竹梢輕試問荒亭下青
苔幾處生

和吳中卿送春有感

客裏逢春色春歸客未還
樹深悲異域花落想
家山歲月添新思風塵
失舊顏不堪芳草歇相
對說鄉關

秋雨期蔣君贊不至

別君春未暮秋雨忽霏霏
非是相思苦其如同
侶稀水淹行客棹雲冷
故人衣舊日閑房鎖何
當復啓扉

七夕懷家兄士雅

七襄相遇夕三載不同尊
瓜菓他鄉異藤蘿舊

業存聽詩期夢寐扇席感涼溫歸日看羅袂依
稀幾淚痕

早秋憶沈茂之

涼風生樹杪別子又經年爲客誰同病論心爾
獨憐海雲應悵望蟠水亦茫然促理歸吳棹相
期野菊邊

去鍾陵陸行次東鄉縣客舍失足墮樓迷
臥者久之

纔脫籠中繫還逢閣上災卧應忘死所蘇復願

生回座失朋知色爐將藥酒醅愧無竒可問空
抱古人哀

病中旅泊

孤遊千里外愁臥一舟中帆重秋沾露柳鳴夜
颺風傾囊纔贍藥得句但書空猶喜鄉關近無
煩泣路窮

草萍山店

地勢最高處東西江浙分行人思就爨山店淨
無氛甘瓠時修供香醪不暇聞試看門外路車

新道後集卷六
馬正紛紛

阻風泖上人有煮茗餉者因贈

驚風曉不息野艇滯江湄
行客忍饑卧居人煮茗遺
餉來知有我飲罷問爲誰
漂母非難遇無煩悲路岐

苕溪訪臧博士晉叔不遇夜泊值雨有感
自笑謀生拙棲棲獨遠行
汗青身後夢眼白世中情
知未逢玄晏途先泣步兵
更堪羈旅夜寒雨作江聲

夏日歸家寄張長輿

久倦紅塵陌歸尋綠槿籬
幽禽迎舊主穉竹結新知
易粟頻愁婦攤書且課兒
惟餘故人憶永日費題詩

夜集唐元常齋中

上書君未遂負郭我無歸
結想遺人境相逢只布衣
舉杯更寂寂話別語依依
明發臨長路雙鳧復背飛

相對卽悲歌相看奈老何
澆愁嫌酒少知己恨

新道後集 卷六
有多醉臥匡牀穩
哀深夜雁過勗君英妙質
母久滯藤蘿

同俞完叔旅宿言懷

銜杯不覺久就枕
月將斜話舊渾忘寐
論心黯共嗟窮愁
余有骨浪迹爾無家
塵網何年出桃源路正賒

對雨言懷

急溜下簷端瀟瀟入戶寒
滋梅空長綠酒杏不成丹
水鶴穿雲慣山鶯出谷難
恒饑思穉子愁

絕正凭闌

春雨期唐元常不至

故人期不至烟雨正淒淒
石髮高低長雲根遠近迷
思君愁倚柱訪我怯衝泥
杯酒應難共明晨棹欲西

三月晦日苦雨

愁雨晝漫漫霑花想盡殘
不隨春色盡翻使夏雲寒
累月桑田濕何時麥隴乾
故園南浦上咫尺路應難

舟行喜晴柬張明府茂卿

愁霖喜暫收綠野漾扁舟水接長天近山將遠
樹浮臨濠魚共樂出谷鳥相求知己瓢堪托烟
波敢浪投

七夕前一日夜過杜袁度齋頭納涼得俱
字

新月挂城隅尋涼興不孤入門朋似雨點葉露
成珠話舊歡非淺吟秋調更殊明宵牛女渡瓜
果定誰俱

送王杲叔遊婁練

五陵舊任俠零落事雕蟲作客吟偏苦逢人氣
尚雄婁江楓葉赤練水蓼花紅此地饒知己鑄
題擬更工

聞歌

艷曲舊曾聽新聲出洞冥梅飄知面白柳折想
眉青宛轉風偏入淒清雨欲停無能解音律歌
罷酒微醒

贈歸文休

執手漫匆匆探竒更不窮大巫吾已畏小道爾
還工點筆皆成竹題章類剪桐只愁君自好難
與左丘同

題茂卿館壁

主人能愛客葺館待余來几舊書餘墨庭新石
未苔紙窓籠淺日竹榻絕纖埃坐卧從今穩詩
篇取次裁

雨夜思家

秋宵苦難旦况是雨聲中家室今何似簞瓢久

已空短垣纔蔽日敝綵豈禁風更笑狂夫性惟
思得句工

初寒從唐運假袍

孤客正衣單西風早送寒綈袍誰可借青眼爾
相看挾纊時堪慰縫衣想更難因思諸穉子曝
日就闌干

寒夜同杜袁度述感

積雨開晴色嚴風送夜寒言歸添別思感事值
更闌饑饉鶉衣苦縱橫虎政殘大夫猶告病奈

編蓬後集卷六
此腐儒餐

與秦長卿話舊二首

昔年南郭外握手重流連雲雨一飄散江湖遂
邈然君多攀栢淚長卿失父余少種瓜田杯酒論心
夜燈花落未眠

輕舸浮百里背海是君家入戶時聞鵲銜杯夜
鵬蝦叙愁相伯仲淪跡共泥沙世網疇能脫無
令損筆花

憇水雲亭憶王少府直夫別處

昔別哦松尹躊躇憇此亭一傾知己淚千里白
雲停鶴性難馴翫鴻飛竟杳冥風塵空老大雙
眼更誰青


虱

幻形惟一氣生卵卽千羣慣與鶉衣密偏憎龍
腦薰爬難供吏部捫可對將軍逐臭原長性同
袍懼爾分

編蓬後集卷之六終



國家圖書館, NATIONAL CENTRAL LIBRARY, TAIWAN, R.O.C.



編蓬後集卷之七

華亭唐汝詢仲言父著

祥符蘇進瞻叔父校

五言律

雨夜憶張聖清二首

相離當穀日相憶近花朝
夢到人非遠書稀路似遙
浩歌春寂寂憑檻雨蕭蕭
驛使終難值江梅已盡凋

乾坤皮相滿古調幾人知
唯子河間裔傳余鄴



下詞一經攀柳別又值落梅時坐對連宵雨緘
情寄所思

同沈茂之夜集唐運齋

藝苑交來久相期每嘯歌盤蔬留客慣童穉喜
人過風際春鳴鷄城頭夜警鑼不無兒女意明
夕奈愁何

穀雨後一日喜雨同袁度作

江城穀雨後霖霖果沾花林潤聲偏細風輕點
不斜閑庭滋薜荔平野長桑麻偶坐心無累焚

香但煮茶

春晝臥起作

自笑迂踈性居平事事偏爲耽宵裏句因喜晝
分眠傲豈同中散慵真學孝先更憐蝴蝶夢日
繞故園邊

送杜袁度往菰城覓醫予嘗遊此

此地昔停橈登臨景素饒雲連天目壯川接其
區遙訪古詩稱沈披圖地是苕安期應有術山
麓坐相招

聽王玄超彈秋鴻

小閣正寥寂幽人撫七絃初聞啼思切尋覺羽
聲連雲慘晴無日風淒暮斂烟曲終問何操鴻
雁在秋天

倪懋父邀余結社還自海上夜集

久遊嗟吾困孤棹爲君還星起常名客雲終喜
入山槍旗浮綠艷醞醱染朱顏微雨沾花夜清
談意更閒

出郭訪沈孺休倪兼之

携筇尋二妙出郭喜逢迎南楚新歸棹西隣舊
結盟餅嘗芒穀軟茗煮惠泉清試覽洪都作知
高處士名

夏夜同沈孺休孫世聲張聖清莫君彩朱
安仲集倪懋父齋頭

山齋羅綺席清夜聚文星公等名驚座余惟草
結亭雲過墀半赤蒲入酒新青女史饒歌詠梁

州曲可聽

坐有
歌妓

懋父齋頭遇何司理士抑投贈

續通後集 卷一
生平徒仰斗邂逅忽披雲水鏡迎人朗秋蘭滿
座芬連嗟張籍廢謬賞左丘文不惜縣河論扶
筇欲就君

龍潭競渡罷艤舟蘆荻間漫賦

龍舟競渡罷移棹就蘆陰馳逐原無味清幽覺
會心蛙聲真鼓吹檣影任浮沈舉酒邀明月因
爲弔屈吟

次和周希允六十自壽

林居違俗遠雲路與人通淡影烟迷竹清聲露
滴桐幽情千古上真樂一瓢中誰使紳裾後偏
存處士風

附舟至海上遇沈茂之同酌唐運齋中茂
之投詩三章依韻和答

舟楫因人發襟懷待爾開正欽塵外論重接客
中杯河朔期無爽江南賦豈哀題成誰警策終
愧沈郎才

世外交難得人間諾易侵篇章俱嗜古取舍不
從今粟藉機中素鋤揮菜底金縱無同調酒情

話亦招尋

吟苦神方王交深態始真君貧將作客我老不
如人共抱孤高性俱無自在身冥鴻非有繫終
擬出風塵

張叔翹還自粵將祝釐闕下奉東三首

樊侯方領岳博望復乘槎度嶺霑梅雨還家及
藕花署應留白犢車不載丹砂四牡愁難駐燕
臺路正賒

南中三改曆北極兩呼嵩憑軾曾冠豸還車已

畫熊盈升供作頌蔽芾足觀風黑齒皆沾化無
煩柱表銅

左語乘輶識遙山載筆書

公有遊山記

臥遊他日事

選勝暫時居橐爲詩箋重裝惟藥草餘誰當奏
天子椎髻變紳裾

夏日訪超然上人乞書

冒暑叩蘭若爲邀懷素書梵音空際落塵想坐
來踈投塵談玄罷抽毫出定初墨池水方溢期
化北溟魚

次和倪懋父留唐元常小集

何事客頻至愛君簷下涼
攄情期共隱露態欲分狂
蛩響知秋早荷翻覺暑香
種松雖有蔭疇肯候秦皇

訪臧博士晉叔值卧未起歸投以詩

蘇堤一別後踪跡兩茫然
徒切王猷訪偏逢吏部眠
筍輿停僻巷花塢亂鳴蟬
牙曲無由聽投詩當拂絃

吳逸一絲蘿之戚過訪投贈四首

幾年思會面一夕喜班荆
已稱蘋蘩托重邀竹素盟
君從潛豹卧余逐汎鷗生
庶使千秋下無慙二仲名

盟以姻親結交惟古道尋一聽
山水韻旋得薜蘿心薄命饑驅苦
高賢籍隱深公好讀書故稱籍隱世無

嘉遜者誰與共清吟

援桂真堪隱披蘭乍有香
不期金馬貴能使玉山藏
歲月行歌裏烟霞卧榻傍
讀君傳世語無減孟襄陽

論文方入夏剖袂已驚秋秦望連雲隔

公居張溪有秦

望山張溪入浦流烹葵時挹露貫酒不煩裘堤柳餘陰在相期客繫舟

泊金閨懷林若撫

風輕帆不疾暮始及閨門幽客居安在長濠日已昏琴書孤艇寂歌吹幾船喧未遇同懷者令誰與晤言

秋日訪唐元常於吳淞村舍

嗟君懷璞卧移棹一來過同調愁應少清吟病

轉多卜隣雖有約招隱未須歌挂壁吳鉤在那堪老薜蘿

重過張叔翹山齋有贈

山館憶曾過朱闌舊倚歌石巖無改色庭樹已添柯羈宦遊非倦還鄉樂更多十年簪笏意應不去藤蘿

過吳商銘舊居

此地曾留宿今來倍愴然故人成異物舊館積荒烟莫爲任孤恤空餘向子憐不須聞暮笛雙

續道後集 卷十
眼已潺湲

寒夜與吳湛瑩話舊

故人離索久相見轉情親
金石交惟舊星霜鬢已新
燭殘還命剪杯到敢辭頻
此去江湖遠經過又幾春

冬夜集徐唐運齋

冒寒乘小艇暮及故人家
客自催沽酒童因罷煮茶
論心燈再剪覓句鼓三過
爾我俱貧病相看髻有華

同唐元常集唐運齋中得春字

相離經改歲相聚卽生春
谷鳥呼羣早庭梅索笑頻
有杯堪卜夜無術可謀身
明日分飛去江湖倍愴神

秦淮客舍

帝畿開晉代客舍枕秦淮
樹影波心亂蟬聲笛裏諧
居新無酒債性潔每心齋
一任輕肥輩紛紛十二街

滁陽過罔卿陳子有衙齋信宿留別二首

谷水經年別滁陽百里過龍媒垆外少鳥語署
中多課子勞鉛槧懷園寄咏歌

公時有日涉園諸咏

因知

謝太傅心不忘藤蘿

山水多奇處藍輿偶一經爲邀司馬傳非覓醉
翁亭日影翻堦白松梢入戶青明朝揮手去踪
跡任浮萍

留別黃貞父四首

爲郎淹不調掩戶日雙書文藻眉山借風流典
午餘墨花頻灑壁帶草欲盈除負笈南來客何

人不駐車

百年半窮卧偶一到京華鑿回何門輟先尋叔
度家論文如舊雨卜夜有流霞玄晏徒抽筆三
都賦未嘉

匡鼎談詩罷詞壇久失真令誰工小序還屬喪
明人暗室俱生白迷途盡得津賴君青眼顧瓢
不棄河濱

風雨朝來急衣單正憶家牕聞驚客葉籬有待
人花來值雙星夕歸逢八月槎更期携手處梅

藥破春華

留別許稚則四首

因君寬禮數欣締入林期借筆題新草燒燈檢
舊詩多慙師野廢空受鮑公知別後惟明月何
緣寄所思

金馬猶稱隱况爲槐市遊賓來嫌束帶吏在亦
科頭官淡仍安拙神清不待秋明宵有涼月誰
與共登樓

澤國論知己如君世亦稀官貧猶損俸寒至卽
推衣茗粥隨時設觥船入夜飛願同梁上燕春
到復來歸
解纜行將別臨觴詎忍分不徒供祿米兼喜附
青雲江迥舟偏小秋高雁欲聞携家原有約敢
戀舊鷗羣

夜發奔牛堰至毘陵城卽事二首

歸心如水疾獨夜不遑眠舟子解予意三更起
放船蟲鳴兩岸草鷗宿一溪烟行盡毘陵郭雲
開欲曙天

犬吠忽如沸去城應不遙鷺鷥猶肅肅雞唱始
嚶嚶鼓吹官家舫吳歌野客橈東西成底事短
髮日蕭騷

重陽前一日同友人登秦望山暮集吳逸
一齋中

秋山風景麗八日卽登高茗苦嘗僧供楓丹點
客袍詩期戲馬勝興續祖龍豪地主張鐙待歸
來共把螯

艤舟金閶訪范東生留酌時東生輯全唐

詩

吳中無地主一宿別金閶偶造幽人宅因探宛
委藏樂崩嗟二漢詩備喜三唐復酌松醪去冥
搜意不忘

冬夜叩陳仲孺齋留宿

越浦復尋溪黃昏畏路迷到門茶止齋檢賦墨
新題涉世塵顏苦譚玄物論齊擁衾因不寐塵
市遠聞鷄

人日訪吳逸一

扁舟向曉移冰雪未消時日爲人開霽風從客
便吹造門林正午舉酒地宜詩觸物皆清曠梅
花况滿枝

舟行遇雪宿秦淡遊齋

漾舟衝雨雪著屐叩柴荆搗練東鄰急尋梅小
徑清蟻嘗經歲味葑剪早春莖客醉還多興呼
盧雜雷聲

訪陳仲孺中道遇錢明府元冲同泊海上
空山尋隱豹中道遇仙鳧川上春偏媚舟中興
不孤岸青將掛柳渚綠漸生蒲未返山陰棹明
晨遍海隅

訪吳伯張留酌

東風吹雨歇北郭倚筇過余以窮愁老君還俠
思多杯香開竹葉茶味識松蘿醉別陳遵去何
年復晤歌

村居雜述

羈客凋雙鬢投閒老一村晴雲團屋角芳草沒
籬根坐井蛙司鼓巡簷雀應門不能謀自食飢

續通雅集 卷七
餒任乾坤

款乃村村起衡茅事事幽柳分青入戶蘋壅綠
沉洲夢醒無非鹿機忘不藉鷗試看歌舞地一

火卽荒丘

時郡有董氏之變

荆扉不設棐開掩任江風節物時時異犁鋤處
處同著書慙我輩收麥羨隣翁狗監終難遇徒
誇作賦工

環堵門仍破繩床足不全經年無客至終日枕
肱眠富以書爲穴貧惟藓有錢古來肥遯者寧

必世人憐

窮巷不容轍難期長者過没人三徑草繞舍四
隣禾屋冷燕巢少簷空蛛網多妻孥報粟盡還
欲乞監河

江行二首

清晨發京口挂席趁東風家遠身如鳥濤驚楫
在空水雲天不斷蘆葦岸無窮日暮思投宿方
山杳靄中

停橈依鐵甕移棹歷金焦潮滿天疑近舟扁路

尚遙蓼紅秋漸老山碧霧初消明日秦淮上何
人折柬招

秋江夜泊

繫舟江北岸微月掛帆前客卧秋聞杵漁歸夜
叩舷白鷗尋渚宿紅葉借燈然槎泛吾將老何
心犯斗邊

往年遊白下歸棹正深秋逗渚逢新月臨江想
舊遊艱難雙鬢短飄泊一身愁又向烏衣去誰
家托蒯緱

許稚則同趙德卿訪余圯上潘文子携酌
得言字

泛梗偶來此衡茅足避喧新知能枉駕舊好特
攜尊入夜蛩聲急當溪兔影翻催詩徒擊鉢得
醉已忘言

秋日許稚則邀集興善寺

玄度喜探禪相邀入梵筵風淒秋更爽心寂地
逾偏分供菰生米烹茶杖出泉詩成倩誰筆坐
上有張顛

續通雅集 卷七
冬日過王薊叔衙齋留酌

雲陰停不解跨蹇獨尋盟就煖依爐火消愁問
酒鑰菓嘗青土味食薊叔家園菓歌奏白門聲最喜翻
書處窓前雪欲明

薊叔齋頭霰集而雨留宿口占

微霰朝來集愁霖夜不禁竟無剡溪興徒作巴
山吟酒上輕寒透燈前旅思深故園俱有夢將
奈溜聲侵

雨夜同薊叔言懷

把酒客愁新俱爲萬里人樹頭寒色慘檻外雨
聲頻謀拙余應病官閑爾亦貧醉吟淒絕處無
語獨沾巾

冬至後三日同賀斗虛王駿求八人集王
咸虛衙齋得前字

斗酒晝相延餘杯夜復傳晷長添線後燭短奕
碁邊月色寒偏皎鴻聲斷更連飲中誰第一賀
監擬居前

答李本寧先生過訪

風清路絕塵踏月訪幽人入樹驚孤鳥徵歌動
四隣亭空苔作席水涸葉填津不厭編蓬僻何
妨策杖頻

移家淮水上偶結一亭居待客遲烹茗逢人倩
檢書鷓枝栖正穩蜂困食常餘何幸文園駕頻
過處士廬

隔溪車馬度茅屋不聞喧沽酒兒趨市徵文吏
到門截蒲供草便掃葉燎衣溫卽此堪終老升
沉詎敢論

龍門開白下躡屩遠從遊燕石勤三獻隋珠亦
再投敢要身後譽聊破客中愁但使青雲附萍
踪任所留

喜吳逸一見訪二首

親交意更深千里獨相尋不但風波險兼忘雨
雪侵叩門途已暝舉酒漏將沈抵掌茅簷下懽
歌不自禁

新知非不樂舊好自堪親乍把林間臂還疑夢
裏人傍簷梅索笑繞屋柳含春誰謂門如市依

然故隱淪

七月六日立秋集孫伯闇齋二首

高齋閒敞甚暇日偶從遊雲色猶含暑蟬聲已
帶秋清談容傲骨懶性喜科頭明夕陳瓜果還
期大白浮

多君能下士愛我爲論文徵候看桐葉開筵避
火雲駕橋簷鵲去人夜草蟲聞遙想銀河女應
先整珮裙

次酬王薌叔秋日過可賦亭作

茅亭枕水垠秋氣曉來新愧我逃虛拙欣君枉
駕頻踈花斜點戶幽身喜窺人莫復馴龍性明
時舊隱鱗

雨中何天玉招飲

愁雨正漫漫相邀卜夜歡觴飛多暎菊客至總
如蘭論每傾千古盤非飽一餐燎紅人欲散聽
樂更盤桓

留別張聖清二首

歸國幾無里依君卽是家寒侵裘爲解興劇酒

頻賒問室縣仍磬論心結似麻風帆明日掛轉
眼又天涯

君言別余後肝膽莫爲宜失意就琴訴懷人托
月傳談深燈再剪離苦袂重牽明歲烏衣曲櫂
花待舉鞭

編蓬後集卷之七終

編蓬後集卷之八

華亭唐汝詢仲言公著

瑯琊王若之薌叔父校

七言律

孟冬至海上集沈公路宅東諸君

江城寒色晚蒼蒼
百里相呼集草堂
尊酒欲傾河漢水
清歌驚落海天霜
委身丘壑唯高枕
到處烟霞卽醉鄉
千載知音諸子在
燈前莫笑阮公狂

永歲空山採紫芝偶因斗酒締心知臨觴盡吐
青霞氣贈客爭飛白雪詞說劍霜凝簾外早聽
詩雲墮竹梢遲明朝且汎滄浪去花發還來倒
接羅

公路席上酬張長輿

每讀黃花想季鷹相逢高館夜張燈傳經我久
淪蓬戶著賦君今老茂陵對酒氣清滄海色逃
名心冷玉壺冰四愁擬似東京否何幸仙舟許
共登

醉後東唐堯卿兼呈張長輿

一瓢著草與君同把臂何煩問轉蓬伏枕江湖
銷俠氣尋盟海國盛文雄燒殘銀燭宵將半彈
斷秦箏酒不空未敢輕題春草句東隣平子賦
還工

五月一日公路有紗扇白苧之贈詩以謝
之

班姬明月裁初就吳女輕雲織始成五月披裘
誰感激十年知己念生平緘開不盡微風發服

續通雅集 卷八
後能令溽暑清未必古人交獨厚綈袍空有歲
寒名

賦得雪中梅片次公路韻

江梅偏向雪中凋六出孤芳歷亂飄雜凍壽陽
粧豈就助鹽商帝鼎堪調飛來映卷香還度掃
去煎茶玉不消謝女謾將風絮擬羌人笛裡正
蕭條

賦得雨中桃花次公路韻

露井雲迷白晝昏小紅纔吐濕香魂正隨崔子

窺人面不意劉郎積淚痕風觸胭脂飛點袖樹
翻錦浪灑當門爲誰惹却相思恨泣盡春芳無
片言

東朱幼裳兼索先世遺稿

憶昔相逢雪滿庭今來春色又凋零風流東海
佳公子寂寞西河老客星浪跡烟霞餘傲骨寓
形宇宙此浮萍名家七葉遺編在聊復從君一
殺青

賦得悔教夫壻覓封侯

欲踐征西燕領蹤竟令夫壻出盧龍徒知茅土
酬金甲不料離愁減玉容塞外寒聲催苜蓿閨
中秋色老芙蓉半生淚盡相思枕李廣仍無尺
寸封

松濤

落落天台萬木森含風巧作廣陵音響侵石室
長波蕩勢逼寒巖頓陸沉弘景聽來驚海上枚
生觀處失江濶何當爲爾班荆坐永日盤桓一
洗心

梅雪

梅花如雪照胡牀薊北荆南總一鄉何遜杯前
方欲凍孫康几上忽飛香凌春猶自凝寒色積
素偏能傲太陽小婦不知殘臘盡空驚冷艷憶
沙場

柳烟

陶令門前灞水邊非緣嵐靄自成烟陽關歌罷
迷征騎羌笛吹來暗遠天漢將結營烽乍起隋
堤寒食火疑然赤松謾向虛中覓未必章臺不

續通雅集 卷八
可憐

竹粉

解籜初篁葉未開紛紛何物點蒼苔非關何晏
眉間落應是湘娥淚裡來無力豈堪塗漢署不
粧空自散梁臺王猷正喜看新綠飛雪還驚墮
酒杯

詠紅梅

艷質凌霜自不羣曾於露井借氛氲壽陽粧罷
臙脂染水部杯濃琥珀薰已覺暗香浮夜月更

然紅蠟暖春雲弄珠素女休爭如元是羅浮一
種分

士雅兄久滯海上此寄

故園春色雨中闌無限花枝客裡香離索弟猶
添白髮風塵兄豈戀南冠千秋司馬一空就何
歲馮驩缺罷彈荆璞不應終草澤窮愁努力暫
加餐

苦熱寄張長輿

石渠金馬是何人仲蔚蓬蒿竟隱淪青玉句曾

千日月白雲心豈傍風塵莓苔欲上燕書閣身
世長縣漉酒巾幾欲問竒揚子宅山陰道暘正
迷津

立秋日寄訊顧君法病

花時分手向西河避暑扁舟偶一過詞社暗投
明月少故交愁卧白雲多風生玉管秋陰合葉
下銀牀晚氣和聞道酒中蛇已辨無因七發奈
人何

留別茂之

故園春草夢參差遊客將歸黯自思浪跡江湖
惟爾共論交天地幾心知到來海國更新月住
久江梅落故枝相約殺青身後事豈因離索廢
探竒

憇公路齋中數日將旋棹固留因而有作
岐路知君久倦遊相逢一笑破春愁烟霞俠骨
風塵老萍梗生涯日夜浮坐對落梅迷去住醉
餘秉燭易淹留經旬未忍王猷別且住山陰雪
夜舟

春晴偶書簡茂之公路

梅花香撲杯酒紅海天樹樹含春風淑氣薰林
百鳥動晴光敵霧千山空放歌狂客醉欲別投
轄主人歡未終不向君前寫懷抱飛揚跋扈爲
誰雄

美人換劍

總抱千秋俠骨香嬋娟不惜換魚腸腰縣虹影
空金屋袖吐霜華冷玉牀未信龍文能割愛由
來馬革爲勤王莫將長鋏彈秋月應悔鳴琴絕

鳳凰

次韻答曹元達

故人天外嘆離居詩就清風總穆如俠骨貧來
偏自傲交情老去豈應踈城隅落日聞秋雁江
上烟波起夜漁兩處傷心共彈鋏故園吾亦閉
空廬

閏月九日

高會龍山不易逢寧知一歲兩尋踪西皇似惜
三秋促晷度偏令九日重塵滿萸囊彈復插樽

餘菊酒泛還濃寄言前月清狂客今夕何妨落
帽從

秋柳六首

春意方闌暑又徂由來弱質易凋枯祇堪掃葉
供茶竈寧復垂條蔭酒壚紫陌自憐曾繫馬白
門誰信可藏烏不須含露迎人泣漢苑秦陵半
有無

一經流火送薰風枝葉交橫萬樹同枝拂秋雲
消景色葉隨溝水任西東勞勞亭畔難留客小

小墳前忍駐驄蕩子不歸霜露冷蒼茫愁思滿
園中

裊裊商飈起朔方邊庭一夜幾株黃娉婷已怯
三秋露潦倒難禁九日霜散葉應沾思婦淚斷
枝空繫旅人腸望鄉何處無攀折不獨文昌客
舍傍

斜日寒烟慘澹中數株寂寞對西風秋容易染
黃偏早春色無餘綠已空條脆韓郎攀自懶黛
殘張尹畫難工暫時搖落君休恨不久垂陰滿

漢宮

不羨芳菲掩畫樓偏於憔悴惜風流柔條散盡
千門雪冷露沾殘九陌秋亭畔翠踈春鳥別沙
邊陰薄暮蟬愁青娥紅粉皆黃土寧獨傷心灞
水頭

花飛隋苑舊無人此日凋傷轉愴神消盡隴烟
空掃月奏殘羌笛不成春踈枝剩有栖鴉處落
絮曾隨走馬塵冉冉歲華看又晚幾回腸斷古
江津

朱繕部季則近草見貽賦謝

十載聲華郎署長千秋風雅大夫才談文碣石
星河落洒筆荆山風雨來入郢陽春工自奏歸
吳秋興喜新裁唐球潦倒那能和何幸投珠到
草萊

與顧夷仲話舊

山寺論文十載餘詩成猶憶倩君書開尊幾醉
藤蘿月踏雪重過滬瀆居別後風塵凋壯髮病
中書劍老空廬相逢莫問飛騰事五柳先生本

晏如

將赴姑蔑留別金威彥

彈劍辭親萬里遊因君杯酒暫淹留
向來門巷無車轍此去江湖有蒯緱
斜日片雲迷遠道淒風落葉送孤舟
三冬文史看應遍莫學虞卿老更愁

重別陸希甫

歌罷河梁袂已分扁舟欲解更逢君
縣知劍在難爲別始信鴻飛復有羣
旅館暮歸愁落日片

帆晨去入寒雲春來故國多芳草
無限幽蘭夢裡芬

武林弔古

數歲看殘越絕書經行今日訪遺墟
孝宗陵沒皇圖盡勾踐城高霸業餘
載道笙歌新甲第接天樓閣舊宸居
登臨無限興亡思微雨瀟瀟滿客車

小至日次蘭陵

去年吹葭金雁浦今日沽酒蘭陵鄉
此生一月

幾歡笑佳節兩冬趨道傍客中雲物不復紀醉
裡狂歌徒自傷深閨倘憶遠遊子明日愁添一
線長

至日金華道中值雨憶家兄士雅

荆樹連枝不易分每逢時序感離羣一帆白浪
重經雨兩岸青山莫辨雲梅柳故園春欲動雁
鴻荒野暮空聞何時得就郊居約坐理羣編隔
世紛

初至姑蔑柬張使君叔翹

山閣陰陰野鳥聲輿人歌發滿山城地經清獻
琴猶在政擬漁陽犬不驚天際一亭堪寓目署
中千卷最關情三衢何限新知樂獨向西河覓
舊盟

送張待之還吳

官舍蕭條歲欲闌扁舟相送朔風寒到來太末
雲生屐歸去申江雪作瀾芳草漫從閨裡玩春
花應向客中看竹林小阮遥相待莫惜嚴灘道
路難

寄懷沈公路

三衢梅蕊乍生春
旅館難禁物候新
青眼舊矜同調客
白頭今作異鄉人
愁中山水空歌嘯
夢裡琴尊豈比隣
留得舊時書劍在
含情未忍拂秋塵

登樓有感

四十餘年申浦濱
誰令晚作獨遊身
鏡中雙鬢時添雪
檻外羣峰日笑人
萬樹葉飛寒浙浙
三衢雲起暮粼粼
臨風忽下思親淚
倚柱無言淚

滿巾

郡齋獨坐寄懷李徵之

山郭砧聲晚更悲
親知此夕各天涯
越中地煖梅開蚤
海曲雲深雁到遲
遠客懷歸雙袖淚
故人相憶一緘詩
郊園若問飛觴約
應在三江花落時

送邢心赤還吳

渺渺關河霜雪清
衙齋杯酒送君行
歸人自愜含飴樂
滯客難忘陟岵情
天外白雲連故國
帆

前斜日去孤城傷心最自分襟後百舌枝頭候
曉鳴

除夜東張叔翹

三衢何地不歌聲燎火薰天四境清椒滿雕盤
嘉頌入春還黃署早梅迎燈前預拂朝元服酒
後惟懷化俗情詩就客心兼自慰應無鄉夢到
茸城

寄懷朱幼裳

三經春色動離歌醉裡梅花夢裡過裂帛書傳

如茂少論文人卧海邦多籠中豈合栖鵬鸚巖
下行當製芟荷寄語朱雲休悵望秋風相待北
山阿

寄懷王少府直夫

十月衙齋倒濁醪乍寒新服使君袍傷心春草
三衢發入夢烟花九岫高滿案白雲真吏隱一
溪修竹愧吾曹只愁宣室徵賢急不及河梁獻
寶刀

張聖清索惜花之作效白傅體答之

新選後集 卷八
官舍無花不識春，傍牆偶幸一枝新。只緣雨久開偏晚，無奈風多落更頻。心惜殘紅寧忍踏，目驚嫩綠轉傷神。莫嫌司馬含毫久，百結愁腸寫未真。

二月晦日晏起作

六十春光去杳然，幾番花信雨聲邊。流鶯繞樹渾無語，倦客思家只晏眠。擊柝鳴鑼悲此地，踏青浮白想當年。明朝又是清明候，腸斷東溪隴上烟。

送聖清還吳

千里從君漱水湄，客中傾蓋卽心知。珠還故國應多媚，裘敝他鄉轉自悲。折柳郡齋鶯語亂，看花山路馬行遲。巖間叢桂如相見，莫謂王孫負所期。

三月晦日

年年此夕愁春盡，况復今春在異鄉。處館無花空惜別，故園有酒倩誰嘗。幾家績婦思樵葛，是處倉庾報採桑。隔歲絺衣曾浣否，吳山越水更

茫茫

六月十五夜登樓憶聖清

與君此地幾凭闌君去三驚海月團枕上衾聲
愁獨聽樓中山色共誰看經年作客難禁別千
里懷人勉自餐流水欲彈還待汝扁舟莫惜渡
巖灘

次韻和張叔翹題吾兼亭

孤亭縹緲出林端退食尋幽眺望寬嵐靄萬山
連睥睨風雲千里護旌干檻當花塢回春早簷

捲松濤入夏寒爲政風流有佳句巴人猶恐和
歌難

送黃使君長卿守東牟

滬瀆春晴百鳥啼使君五馬欲徂齊竹經漢主
臨軒剖碑憶秦皇就日題水鏡照城堪不夜江
蒲爲策倦鞭黎此行莫道承明遠早晚天書降
紫泥

宿沈公路齋長輿以燈夕諸作見示且言
謝客狀因口占答之

高齋雲霧夜濛濛榻下休文夢長公墜馬病餘
屏暫掩雕龍舌在句還工幾家火樹毫端發到
處梅花笛裡雄奚假放生營七發關頭真氣已
葱葱

同張次甫朱爾定顧君法沈茂之顧彥初
王吉甫夜集袁度齋得春字二首

鳳舉鴻冥總絕塵因聯詞社此邀賓居堪避俗
餘三畝飲亦稱仙僅八人老去身名惟竹素聚
來歌笑逼星辰酒闌詩就陽和滿未信寒巖宿

草春

綠酒雕盤滿座春筵開寧爲學陳遵論文似薄
金閨彥命酌偏携石戶人白雪題來梅借巧青
陽探盡柳含顰杜陵舊業雲孫在王翰于今願
卜隣

張使君叔翹覲還擢蒼梧觀察齋中夜集
賦以志喜

五馬翩翩下薊門豸衣俄已易朱幡只今窮髮
皆王土此去蒼梧亦主恩耀武欲瞻新節鉞論

文無改舊琴尊千秋銅柱功非薄豈戀東郊三
畝園

中秋後一日集張季韜齋中完上人在坐
昨夜壚頭酒未醒相邀今復叩雲肩一輪不減
花間白雙眼還逢世外青鳥語暮喧驚坐客桂
香秋爽到空庭銜杯無限新知樂歸路何妨落
曉星

秋雨同茂之公路夜集得歌字

春草分襟秋又過相逢杯酒話蹉跎踈狂似阮

窮車轍踪跡依劉愧薜蘿載筆復尋青眼社盍
簪日須藉美人歌坐有歌妓更闌莫問清尊倒簾外蕭
蕭夜雨多

九月三日同莆田黃朝質集公路暘閣時
朝質從留都還

高堂無夕不銜盃况復新知建業回遠客興因
青眼發佳人歌帶白雲來征鴻應節偏流響籬
菊悲秋獨早開迢遞鄉心君莫問茱萸九日更
須陪

新遠集卷八
送張觀察叔翹之蒼梧余時有鍾陵之遊
漫賦二律

蒼梧西入海天長
檠戟寒生夜有霜
萬里嶺雲看叱馭
三年魏闕夢含香
葛洪丹在行方就
吳隱泉清過欲嘗
鞭策百蠻應草檄
承恩歸擬奏明光

寒煙疎柳正離離
慘澹黃雲是別時
顧盼自應懷舊德
分飛豈爲樂新知
心期捧日還轅早
性喜看山度嶺遲
東下鍾陵多驛使
梅花或許寄

相思

寒夜集張聖清齋中詩以留別

誰謂陳琳草檄才
依人翻欲去蒿萊
辭家餘淚猶沾袂
別友新愁在舉杯
客裡霜清衫袖薄
樓頭雲冷角聲哀
那堪牢落風塵面
重過嚴陵舊釣臺

發錢塘東錢明府貞超

錢塘西去路迢迢
風急江寒不上潮
野曠波涵千嶂出
天長雲帶一帆飄
舟中樂爲新知集
盃

裡愁因故國遙此際客心何以慰朱絃玉軫藉
右調

宿常山官舍悼君公兄昔嘗爲邑於此

羽騎紛紛入古城酒闌官舍已三更征鴻忽送

今宵淚棣萼空懷往日情小閣雲生誰拄笏兄

今時嘗有壯笏閣 竒樟春至自啼鶯縣有樟木甚 不須

更惜栽花地故國出陽有笛聲

庚戌除夜

書劍飄零別舊廬年華兩度客中除淒其旅食

空椒酒迢迢鄉心在板輿燈滅小齋人散後寒
生孤枕夢醒初追尋往事無窮恨風木蕭蕭涕
淚餘

辛亥元日試筆示錢復古

客中心怯年華變天上人傳斗柄回椒葉不能
將恨去梅花何意送愁來懷鄉歲滴南雲淚命
酒春生北海杯強欲爲君歡此日尊前無奈鬢
毛摧

齋中對雨

鍾陵傳舍狹如斗白晝坐聽寒雨聲樹頭落梅
日千片屋角野鳥時一鳴重門深鎖酒難覓小
鼎沸煎茶漫清二三同調並懷土擁爐促膝空
含情

寄懷沈公路兼東海上諸相知

陶家秋色念同遊醉後黃花插滿頭入夢壺觴
諸子共去鄉天地一身浮匡廬雲雨連官舍壇
石風塵敝客裘他日持螯倘相憶五茸城下有
歸舟

寄懷張聖清

姑蔑西來路更長并州猶自憶柯陽曾於守歲
憐同調忽謾經春滯異鄉庭積莓苔孤坐冷風
生草樹一城荒思家有淚君知否日傍南雲洒
數行

異鄉身世不堪聽一日鍾陵鬢便星旅食進餐
徒有赤春盤傳菜更無青愁中念我書應著酒
後思君涕自零早晚拂衣歸亦易空山千里樹
冥冥

寄懷張彥伯

踪跡天涯滯未還，新詩猶憶寄君刪。傳來姑蔑

編應就

彥伯爲余刪刻姑蔑草

別去鍾陵鬢欲斑。冀北千

金終市駿籠中，雙翮尚羈鵬。汗青淪落休相訝，
司馬藏書有舊山。

觀物亭夜集別蔣君贊

孤亭春冷客來稀，此日登臨且送歸。林際鳥聲
催別酒，坐中花片點征衣。浣裙君自趨桑梓，陟
屺予還滯翠微。日莫典闌明月上，不堪分手重

依依

詠署中芭蕉

翻風滴露滿庭除，嫩綠無心聒夜舒。夢入野田
堪覆鹿，草成墨霧舊飛魚。當歌扇影空中落，感
別秋聲枕上餘。遙憶故園窓下色，幾年寂寞伴
空廬。

留別靜菴錢封公

看君白雪滿揮毫，坐聽絃歌調自高。未向匡廬
探石鏡，曾經彭蠡借波濤。山翁巖下芝三秀，仙

令人間鳳一毛歸客河梁新有贈可無瓊玖報
投桃

留別錢明府貞超

壇石花枝日夜芬東吳歸客念將分秋雲薄自
隨遊子湖水清堪擬使君強欲桑間親雉乳難
禁溪上想鷗羣金尊不盡誰催別檻外西風木
葉聞

歸自鍾陵道逢蔣君贊言有阻風被盜之
厄

中道倉皇遇所思巨卿端不負初期獨嗟破塚
帆多恙况復青氈夜見疑余返故園籬菊綻君
過旅館草蟲悲相逢一笑還相泣莽莽乾坤總
路岐

舟中述感憶沈茂之

生涯天外一征蓬飄泊重經午夜風去國自憐
秋髩改到家應笑客囊空百年身世悲歌裡一
路雲山伏枕中留得西河餘傲在詞壇歸覓舊
冥鴻

江行寄贈陳仲孺

塵外真人不易逢
閒居三載慕高踪
林間白苧驚啼鳥
海上青山隱卧龍
雲冷孤舟凋薜荔
秋深三徑點芙蓉
濠梁果有觀魚興
早晚何妨杖屨從

過茗溪張山人欣閣題贈二首

夢憶茗溪偶一經
蕭然孤棹倚沙汀
未過沈約開尊地
先覓楊雄問字亭
書著定追高士傳
閣成應接少微星
竹林未敢期同調
何幸新知眼

獨青

平子研京歲月長
憑虛卜築此徜徉
菰城樹長時侵几
天目雲生日滿床
百尺卧來披竹素
五行草就借藜光
欣欣吾亦思刪述
潦倒風塵豈頽頽

唐元常欲就余結社
神交者數載余因訪之而贈以詩

寒巖腐草竟誰知
何幸神交十載思
把臂入林非異姓
探囊讀賦喜同時
詞場汗漫期千古
書

圃栖遲共一枝若使君山果心許玄經敢謂髻
空絲

寄懷秦長卿

一傾行蓋卽分飛別後天長夢亦稀方笑征蓬
空自轉馬知良璞尚無依懷人三聽秋鴻至作
客重經塞草腓若使投瓢歸有主便從江海覓
漁磯

客舍雨中言懷

十月三日雨如注從昏至旦聲不稀田家稻枯

刈未得行子衫薄寒無依浦上風波難掛席村
間間巷空掩扉縱然還舍對兒女那免涕淚沾
牛衣

酬潘上民見贈上民亦瞽者

海天詞客縱如雲同病相憐獨有君把臂共支
師曠策論心期割左丘文瓢傾敝帚余成帙琴
寫高山爾逸羣莫問人間步兵眼從他青白白
紛紛

王玄超齋頭紅梅九月盛開因賦

秋林何事覩春華
瓊樹長芳逸少家
五嶺舊傳飛絳雪
一枝今復鬪黃花
東皇西帝時難辨
水部柴桑酒共賒
沉醉不知宵欲半
羅浮山月到紅霞

王玄超席遇王達甫有作

城頭霜落晚風銛
邂逅論文酒半酣
近浦園林寒度雁
枕山樓閣夜生嵐
能歌媿我非齊右
善賦知君是漢南
白首一書方就草
欲將身後託桓譚

贈陳罔卿子有四首

一辭丹陛向蒼烟
雙屐翩翩思欲仙
聖主每思黃髮從
老臣耽向白雲眠
釣璜已入非熊卜
徵詔先飛杖國年
鐘鼎勲名千古事
洛中棠蔭舊芊芊

風昔聲華動 帝都歸來春興滿
菰蒲經傳東

洛圖書府丹就西山太乙爐
空谷著書傾竹素

公有竹素堂稿名園壘石擬蓬壺
明光溫旨休相促
晝

錦還宜到鳳雛

聞道東南紫氣舒，鬱葱長遶太丘廬。占星闕有真人奏，散帙時傳外史書。玉樹垂陰當日下，瑤池命酒屬春初。西河欲獻霓裳曲，未信侯門好曳裾。

燥髮論文契遠踪，白頭猶未謁元龍。移舟每滯三衢道，杖策重過五老峰。予嘗客于姑茂豫章間遊倦客衣凋薜荔，愁深孤劍老芙蓉。欲將敝帚煩玄晏，一挺那能扣九鐘。

送郡大夫朱公還越

咫尺龍門未易登，寧知白璧點青蠅。吳天柳色春偏早，燕地霜華晝欲凝。知己媿無戈反日，酬恩空有淚沾膺。何人爲白雲中守，漢主還應下

詔徵

元宵前一日集沈公路齋二首

三年不醉海天春，此夜相携勸酒頻。燒蠟難娛支策士，歌梅堪慰旅遊人。九微七彩談方識，倩史抽毫興亦新。共道金波猶未滿，還期明夕更邀賓。

華燈簇簇散芙蓉深坐聽歌興轉濃火樹無聲
徒想像梅花得句且從容十年把臂交非淺三
載分飛節偶逢見說郊原居更卜明春今夕定
誰從時公路將
遷歸練川

王百谷僕所向住客從吳門來傳其物化
疑而有作

高山懷想十年心誰謂明珠一夕沉琴在尚期
中散奏書存莫使所忠尋歲星辭世人非沒玉
樹埋塵恨自深鍾子於今倘無恙乾坤猶未失

知音

雨中過張觀察叔翹村居叔翹將有蒼梧
之行

拂雨輕舟渡綠溪到門躡屐尚衝泥江雲露日
添花色陌柳籠烟自鳥啼盡日園林無俗轍隔
年苔蘚見幽栖暫時把酒休辭醉五嶺春風候
馬蹄

花朝前一日喜晴訪幼白甥留酌同張元
俊伯兄士雅探韻得封字

江城晴色晚來濃乘興因尋日下踪
雨宿桃林紅已合地幽苔徑綠還封
巴山話久傾春釀郢雪歌殘起夜鐘
四子論文並同調明朝選勝莫辭從

和王玄超無題二首

春愁黯黯憶花眠爲雨爲雲已各天
夙昔望如空際月於今消作草頭烟
鎖窓有意曾偷眼錦瑟無由暫拂絃
想像容光渾似夢不堪離恨更年年

所思灼灼在雲霄一帶烟波路自遙
遶鏡聞鸞頻洒淚臨河呼鵲不成橋
人間難覓忘憂草臺上空鳴惹恨簫
緘得雙魚無處寄潯陽自古不通潮

仲春日與朱爾實過朱幼裳園亭集沈茂
之朱太白君長君深幼馨幼瑞分韻得回
字

烟花間說滿池臺杖策携朋偶共來
節數永和三日近詩追長慶九人裁
勞生塵際年將莫開

口尊前笑幾回潦倒今宵拚一醉扶歸童子漫
相催

題范叔子一寒齋用從祖孟熙韻

百年身世一愁吟蓬戶寒齋總不禁入暑未聞
更短褐經霜誰爲拂清砧千秋著史裁蒲簡四
海論交指竹林余亦吳中貧病客衡茅應許結
同心

送黃觀察長卿之濟上觀察以登守擢今
官

朱幡曾拂海天雲露冕俄驚獬豸文召對股肱
東表入寵加旄鉞外臺分花驄乍擁新觀察竹
馬還迎舊使君河上卜生淪臥久敢煩書信到

鷗羣

同若撫避暑茂卿西園唐元常以詩見投

依韻和答

花竹紛紛莫辨形獨於河朔醉無醒問竒擬乞
玄關草候氣兼知處士星散髮一丘秋共臥尋
詩雙屐夜頻經詞場得爾方成社不數劉家白

新選後集 卷八
芋亭

秋後寄內用若撫閨思韻

百里申江水氣涼故園遙憶水中央
屢屢幾歲歌蓬室紙價何年貴
洛陽感別定應悲柳陌療
饑空自想芝房欲知爾我千秋意
常在黔婁古墓傍

代內次答用少陵句發端

恒饑稚子色淒涼長夜深閨織未央
竈冷已驚魚出釜客行偏學雁隨陽
去時桃杏紅飄雨別

後藤蘿翠作房採藥入山君有約何年移向鹿門傍

七夕後一日同若撫集沈公路齋值雨候張長輿不至時公路病起

客自孤山問索居文園方起病相如風因海國
清秋發雨似天孫別淚餘几有斷髯吟就後香
焚小閣酒醒初不知平子研京臥空望門前長
者車

重集公路齋次若撫韻

郇厨重命興非闌歌似秦青笛似桓採得蘭英
供野酌炊將菰米進盤餐餘生老去惟憑杖懶
性由來不着冠隱几詩成還獨笑滿庭秋色任
君看

詠絡緯次林若撫韻

客居衣敝感秋蟲札札機聲草樹中絲斷移時
能自續杼鳴徹夜不知空文章織就惟憑月頭
緒飄殘總爲風人世虛名多少事七襄與爾定
誰工

次答若撫燕社作

經過總爲舊巢頻秋半難畱入幕賓振羽送行
偏值社捲簾迎客更期春銜泥暫息非無地食
肉能飛豈傍人萬里封侯終一去莫將雙翮老
風塵

送張聖清遊留都太學三首

挾策橋門正妙年乘秋裘馬更翩翩筆花引夢
都庭下桃葉傳情古渡邊建業有陵瞻王氣臺
城無柳積寒烟二京草就宜時獻莫負君家尺

五天

入浴琴書本壯遊豈將錦瑟競風流石間銘勒
雄三蜀客裡詩成擬四愁袍拂青槐堪借色人
如白璧莫輕投甘泉奏賦君家事寧羨平康十
二樓

叢桂深秋正吐香誰堪此日上河梁余因遠別
難爲醉君惜貧交更損裝瓜步江清娛賞遍石
頭城迥夢魂長風霜早晚催游子欲候歸舟白
亭傍

訪沈茂之病起投贈賦答

移筇問疾到城南起坐欣君食始甘別久情深
應命酒病餘氣短不勝談臥來鬪蟻猶疑聽吟
就潛驪已復探若使甕頭醅尚綠何妨早晚一
沉酣

王玄超席送林若撫歸吳門得廉字

清尊相對夜厭厭客欲還吳別思添賦擬上林
原是貴地非梁苑定難淹飄殘桂子風生座然
盡蘭膏月到簷裝薄不須譏邑令由來孝叔自

清廉

楊侍御自邇社駕矢迂往訪亦不值卻寄
當年花下一逢君別後雙鳧入五雲卻喜信陵
能下士寧知卜夏尚離羣飄零自笑蓬方轉湯
滅何須刺更聞總爲少時詞賦在欲從德祖細
論文

贈劉次舒新拜冠軍

篋中蠹簡昔曾看卷袞翻然戴鐵冠九塞好尋
駟壘五溪應上伏波壇風傳鐃吹臨戎遠雪

覆旌旗度漠寒晝繡湯教誇帶礪布衣還共酒
盃寬

贈趙邑傅彥中

滄瀆城邊帶草生鱸堂何幸值康成座間設虎
夕似繡匣底羈龍吼欲驚門暫樹桃終化杏壁
真名趙豈留荆客居况是東溟近變極鯤鵬指
日征

歎息婁江不乏雄詞華堪繼弁州公橋門莫厭
青氈冷海國爭傳白苧工天上有池還屬鳳雲

新選後集卷八
三
聞得渚暫栖鴻病夫自笑迷方久敢借嗟枯屬
孔融

癸丑除夕

椒杯入手思茫然窮送無由且送年舊事多非
今始覺新春作客竟誰憐三荆戀本還同樹九
壤傷心失所天猶幸往時圖史在名山未敢負
家傳

奉和王學憲元翰除夕韻

柱史由來善養年著書航向白雲眠持椒飲在

申公後拜闕行居綺皓前抗跡神龍曾作雨全
身玄豹慣藏烟外臺刪述君家事國史三朝更
擬編

和杜袁度除夕韻二首

嬌歌急管薦盤辛盃滿椒漿未是貧送歲竹聲
宵易盡占年雲色且將新然藜起草仍中秘望
闕朝元豈外臣窮巷一觴吾亦適不妨下里和
陽春

盃中聞漏不知遙迎送年華在此宵世少知音

甘隱豹醉餘拈句若承蜩杜陵老去詩逾勝劇
孟貧來俠未消不是香山能結社千秋姓氏向
誰驕

編蓬後集卷之八終

編蓬後集卷之九

華亭唐汝詢仲言父著
會稽沈存德相如父校

七言律

甲寅元旦試筆

戶戶椒盤歲序催春光先破節前梅村多爆竹
從兒競樽滿屠蘇幸婦醅愚拙敢言知命始飄
零祇自惜顏摧封丘五十詩名就老去蓬心未
忍灰

人日舟中獨酌有感

離家偏自值初春舊圃寒梅想亦新世閱客身
重作客觴臨人日更懷人溪流曲曲牽愁遠谷
鳥嚶嚶送語頻况是尚平多累始擔簦五嶽正
迷津

初春九日過吳淞里訪唐元常留宿

隔年曾約訪幽居問水尋谿百里餘地似渭川
皆植竹人齊玄晏只藏書千秋交爲安貧合九
日晴當發歲初况是梅花能索笑相將惟恐綠

尊虛

初至袁度宅述感

飲罷屠蘇卽泛槎逢春何歲不天涯痴兒遠父
翻呼客老子依人似到家汗簡五千名未立流
年半百日將斜丈夫踪跡原無定肯伴牛永久
嘆嗟

送張明府茂卿榮補北上

五雲邑社已圖形又乞銅符入漢廷得馬懸知
騶更紫避蠅須記壁曾青循良在昔推高第世

新道行集 卷十
路於今厭獨醒如矢如鈎君自擇終期卓令鼎
書銘

次和袁度過從叔衡臯園亭作

竹林兼近浣溪莊咫尺煙雲亦渺茫桃古姓應
迷漢代松深封不受秦皇席邊芳草鋪茵軟屐
底飛花膩齒香若使名園容偃卧經過從此數
寒裳

過袁度別業夜集諸昆季漫賦

故里扁舟海上還開尊華萼夜追攀族如星聚

堪名斗

時伯仲凡七人

客擬雲過偶出山興到急觴呼

五白攜來小妓舞雙鬟且須沉醉酬春色莫問
流年鬢有斑

春仲逢秦景明道張聖清下帷如昨因有
此寄

聞君春半戶仍扃不復尋花向野亭二月柳條
墻外綠三更蒸火閣中青尊罍久已踈今雨書
札寧忘問客星欲就長桑裁片紙愁將下里亂
談經

聞許周翰以山西憲副擢拜符卿寄贈

天書忽召外臺臣卿月承恩入紫宸
征旆去逢三晉雪鳴珂歸值九重春
居廷正色朝無黨曳履聞聲帝有隣
不獨赤心能許國文章兼可佐經綸

送陸光祿伯達改秩還朝

東風陌上送星軺堤柳初青未作條
天子歲饑方減膳月卿綬改正趨朝
吳天歸雁兼雲度漢苑啼鶯擇木嬌
春署寅清遺澤在臨岐豈惜

馬蹄遙

壽家兄士雅六十

相期弱冠卽雄飛淪落寧知尚布衣
兄擬公孫淹對策弟隣伯玉亦知非
且須觴酌當春勁肯信行藏與世違
頭白子雲終侍漢誰云良璞永無依

新柳

遠接隋宮近灞陵長堤十里曉烟凝
眉纖小婦描難似條弱新鶯立不勝
輕颺暖風金欲輒略

續遺集 卷九
沾微雨翠頻增當年張緒何多幸千古風流得
並稱

春日過唐元常齋頭喜沈茂之至談移時
王玄超招飲茂之不與中道口占以別

故人星散忽經時邂逅論心喜可知已得沈郎

愁雨賦

茂之出苦
雨詩相示

重探唐子撚瓢詩

元常亦示
感懷詩

行吟共惜春將老怕別翻嫌路有岐竹里王猷
開徑待一尊猶恨不同持

吳伯張任俠風聞兼嗜詞賦雅善陳子有

先生因示唐詩解併投以詩

幾年延頸慕朱家此日琴書滯海涯乍喜太丘
門有客敢辭唐勒筆無花雄期說劍通三畧雅
憶論文破五車若使藝林盟可結一探玄草定
興嗟

陳子有先生擢拜冏卿詩以稱賀因趣其
行

三年輦下懶通書宸眷臣隣肯暫踈詔趣卧龍
還建業寵將數馬侍鑾輿世風似濁偏宜振花

新遠集 卷九
五
圃雖清未擬居若使東山仍不出廟廊黃髮更
誰嗟

謝吳伯張贈墨

病夫手不解揮毫投贈松烟意自豪起鳳正宜
分友伴塗鴉深喜慰兒曹磨來歛石光堪鑑寫
就蘭亭價轉高能使淵雲妙疇昔感知端擬勝
錢刀

五十生朝途中述感十首

生涯何事不堪憐默默昏昏度歲年處世五齡

曾見日幻形六合似無天虞書周雅神能遇物
態人容夢弗傳時已知非增永慕深恩莫報但
潛然

從親無路厭餘生絲淚應難到九京半世劬勞
聲可想六年哀疚服將更恨無米粟求佳傳賴
有縹緇保令名今日洗兒珠在掌寧知五十逐
蓬征

鬢年一病類丘明舉足俵俵歎此生泉壤未歸
同大暮簡編雖就亦空名結交似鮑貧方合生

子如孫長不耕欲散客愁惟一醉途窮誰與勸
宜城

百年已半夢爲鄉生世何聊樂久長春去春還
惟聽鳥花開花謝只聞香親知對面皆胡越尺
地遺筇卽太行自怪雄心消不盡殺青猶欲擅
詞場

支離七尺強稱人命未能知且歎貧愁苦困如
千日酒梗萍浮似百年身驚筵文吐揚雲鳳作
客衣縣卜夏鶉萬感來并是今夕不堪重逐路

傍塵

身惟盲瞽跡惟僧越岫荆岑到處登九憶追王
栖太末王雅宜有五憶余
廣爲九詩見本集七歌擬杜卧鍾陵逢
時吐氣攀威鳳失路無顏類凍蠅紈袴小兒休
浪謔千秋爾我定誰稱

薄田九世白沙居又向南郊別結廬壘土巢成
纔似燕烹葵釜冷遂生魚徵逋割產三年盡倚
杖行吟四壁餘溝壑欲填哀德耀齊眉無改入
山初

飄零江海一狂生支策詞場誤有聲書癖日深
求友療硯田歲廣倩人耕饑來敢却胡奴米老
去難忘李白鎬但使妻孥能自活便從金粟問
前程

故園南浦水雲居庭有荆花想正舒卻恨元方
仍抱璞寧論仲智不知書娛生酒熟期相勸挂
杖錢空會總虛匍匐道途非吾事爲憐黃口食
無餘

海上夷遊處處踪逢人誰不笑龍鍾文都借筆
稱心草行每依童號活筇東道杜陵能作主南
州徐孺慣相從香山詩就俱星散歸去壺觴伴
古松

次和沈茂之坐雨書懷二首

江天無日不昏昏車轍誰過處士門催雨林鳩
爭逐婦拂雲石燕欲生孫壯心殆與花俱落愁
坐惟知虱可捫廿載論交相信久行藏豈復問
乾坤

柳眉桃口雨邊濃近舍園林翠欲重浦上雲深

恒掩戶城頭風壯不聞鐘
依人舉世皆飛鳥削
跡何山有臥龍但使三都縣
日月一丘與爾共
耕農

次韻寄陳仲醇

灌園幽興近何如
攜杖無緣慰索居
作客已經三載別
倩人新勒八行書
明時君擬藏輝鳳
宿世吾真老蠹魚
草就一編累玄晏
開緘且莫笑
迂疎

詠月下白蓮

亭亭孤月映池塘
何處佳人試淡粧
鏡裏凝脂難辨色
風前施粉更飛香
露珠似解江妃珮
波練遙侵王女裳
應是採蓮歌吹發
淒清驚落廣寒霜

秋暮訪吳逸一幽居

茅堂來訪路逶迤
繞戶晴雲壓樹枝
家遠市朝遺出處
地隣山海稱栖遲
綠尊乍喜同餐菊
皓首還期共採芝
但使尚平婚嫁畢
從君隨處結蓬茨

十載神飛處士居扁舟今始叩君廬繞籬未覓
陶家菊入室先翻鄴架書在野性堪羣鳥雀栖
林心不混樵漁案頭章就東臯傳寧減相如賦
子虛

吳司理榮拜錫典奉賀

三年勲載御屏深明允兼持介石心 帝命自
天庭耀璽臣門如水暮無金頒來宮錦看龍繞
草就輿歌倩鶴吟雲閣徵黃應不遠掖垣梧竹
待披襟

天書五色下丹墀泉壤光輝感孝思竹帛寵宣
明主意劬勞褒稱史臣詞九重頒鳳人爭羨三
載縣魚世所知鐘鼎勒勲今日始山珉懷德願
陳詩

歲暮夜集王玄超齋中

寒夜江城風怒號朋知相聚倒松醪文通老去
才應盡逸少年來句更豪飛雪點侵紅燭凍啼
鴻聲帶碧雲高興酣欲問梅花信幾日清香到
客袍

謝唐元常遺雙縑

貧病由來爾我同雙縑何意出閨中織當永夜
機絲冷投向深山杼軸空掩脛有餘堪履雪披
身常煖易衝風白頭爲客心知在掉首乾坤任
轉蓬

甲寅除夜

萬方燈燭競茲宵隨俗辛盤破寂寥貧與士宜
無用逐隱從身慣不須招童兒習戲聲惟竹麩
米迎春味似椒馬齒百年今已半暗中添歲又

明朝

乙卯元日試筆

歲占雲色曉來晴士女歡娛九寓清 聖主當
陽工廟算遺珉隨處樂巖耕身如老馬還添齒
技擅雕蟲浪有聲風雅敢言吾輩事中原若個
主詞盟

同嗣宗兄自佘山泛舟入郡

攀罷梅花卽放船船中杯酒重流連分離久缺
墳簾奏臨泛寧輸李郭仙興逼九峯雲縹緲歌

續道後集卷九
侵一路水潺湲生涯淪落君休問匡鼎談詩已
浪傳時子唐詩解成

次酬吳逸一夜話

經年魚鳥各飛沉偶一停橈卽共吟毫帶落梅
驚散玉聲侵垂柳正舒金心知此夕傾高論耳
食何人重雅音潦倒風塵非我事幽期終擬在
空林

咏繡毬花

不須人力卽天成非繡非毬浪得名開似白蓮

浮水出團如皓月隔簾明攀來總是陽春色拋
去原無蹴踘聲只恐二郎沉醉後倒拖花向玉
階行

季夏三日爲張叅知叔翹生朝時避暑虎
丘却寄

夏雲踈點月纖纖選勝扁舟到處淹泉石爲家
從所好行藏自我不須占三珠擬樹烟霄近百
辟維藩吏隱兼左氏書成賴玄晏香山社裡韻
重拈

續通雅集 卷九
將朱紱當烟霞恩輝奕葉椿陰迥柱史彭篋總
一家

荆吳天倚洞庭分欲報相思遣白雲幸以知深
隨驥尾翻因名累失鷗羣懷人隔歲頭顱改作
客經秋木葉聞邂逅上京逢德祖八行那足展
慇懃

送楊文弱還楚并要獻歲之期

逢君把臂卽依依幾共殘尊送落暉詩怪約躄
常苦瘦道推商勝故應肥鶯方附響聊相和鳧

各思巢忽背飛庭館爲裁新首帶楚帆須及早
春歸

楚澤吳門路漸遙感知惜別黯魂銷舍經鱸集
官非冷文盡龍驤調故超雲拂歸人秋縹緲風
驚羈客夜蕭條愛君便欲移家就莫忘三雍署
裏招

和李本寧七月一日登俯玉閣

秦淮環玉映丹樓千古梁園此一遊南服諸侯
初請朔西郊太史未迎秋生花彩筆須供奉采

芟新歌倚莫愁燕石自慚非世寶匣中藏久欲
輕投

中秋後一日同陸伯生林若撫集黃明立
齋中得時字

申浦追隨憶往時白門杯酒叙相思青鸞舞月
光初滅叢桂垂花信更遲淮水卜居尋廡下香
山主社有心期看君魏闕情猶切未敢輕投招
隱詩

金吾王元泰欲邀余結社叩閣不值却寄

吏隱聞君慕薜蘿籃輿暇日偶相過題門敢以
凡疑鳳叩署因知雀可羅興盡王猷嫌路遠官
閒司馬著書多當杯莫恨論文晚春到烏衣好
醉歌

秋日同沈孺休顧仲英張聖清集臨淮李
汝藩瑤華堂得西字

風吹微雨過城西挈伴來遊信馬蹄秋色滿庭
珠履集歌聲出戶彩雲低酒沽白下尊難倒坐
擁紅粧客易迷敢向李侯誇善賦卿家小史盡

能題

爲茅止生輓陶姬

金屋香殘捲繡茵東風吹盡海棠春
夢蘭正擬珠承掌歌殢那堪玉委塵
斜谷有鈴徒灑泪臨邛無客解迎神
傷心莫傍芙蓉水寶曆如花更幾人

秋仲鄒汝弢孟若木王元泰陳仲獻萬性
餘過許稚則衙齋相訪

空山臥久少知音仙侶何煩枉駕尋
談道固推

玄度勝稱詩偏就卜商吟盤飧菱芡秋將半
庭鬪擣蒲日易沉舊壑暫歸終理棹春風相約更
攜琴

別余集生

羨君樓榭日登臨簪笏難忘物外心
自註南華刪衆解不從西笑罷清吟
閒庭氣爽泉鳴座虛室涼生月到琴
折簡告歸休悵別卜隣方擬就園林

送張大參叔翹之潯江

蕭蕭帆席掛秋風西指潯江路不窮夙夜主恩
三度嶺驅馳臣節兩呼嵩藩叅維翰封疆舊霜
有餘威瘴癘空莫道異鄉風景惡荔枝還擬待
君紅

次韻送姚宇春往粵西

逢君羈旅暫登堂分手躊躇惜景光宴偶同人
交尚淺身俱爲客醉何妨山多藥草聊供餌心
戀藤蘿已製裳余亦飄蓬任風轉關河踪跡兩
茫茫

九月八日訪吳逸一因登秦望山夜集次

韻

幽人門巷晝長關籬下黃花任客攀莊似輞川
多鹿柴地連秦望卽龍山登臨不待明朝會酣
暢應開十日顏自是陶家饒泛蟻扁舟到此每
忘還

寒雨憇聖清齋中王玄超來自海上小集

次玄超韻

有杯銜處卽爲家王戴相將酒不賒意外得歡

從傲放醉中起舞任歌斜鱸腮擬玉初成膾蜂
室稱梅已着花歲暮况經多雨後甕收新霑足
烹茶

次和王玄超冬日閒居二首

索笑梅花滿步檐不風香自透疎簾戶無塵涉
從苔積壁有詩題倩客添白石青松情所好酒
杯琴曲韻能兼由來龍性馴非易出處何煩鄭
尹占

博山烟起自成嵐佞佛翛然坐一龕隨意小齋

頻命酌何心內殿問傳柑避寒每畏窓臨北負
日偏宜室面南書擁百城供玩世任他蠻觸戰
將酣

季冬廿二日同潘上民張元里元應王玄
超夜集唐元常齋頭約與張長輿沈茂之
吳逸一徐唐運張聖清并兒孟莊爲社分
韻得燈字

經年不到此張燈薄暮招邀興可乘雨後泥深
沉馬足歲前春動斷蛟冰詩推社長吟俱細酒

值心知量亦增千古汗青須努力名家十二向
來稱

聞朱幼馨潘文子與穆上人倡和投此博
贈

秋半秦淮悵索居尋盟海上歲將除詩酬白足
探珠後淚點青衫泣玉餘阻雨歸人空艤棹閉
門詞客倦裁書西家亦是聯新社莫惜篇章一
起予

張元里讀余詩有感用韻答之

遠道驅馳屬歲闌感君吟句爲余酸漫言作客
裘將敝縱使還家竈亦寒簡殺千秋懸日易蓬
征七尺傍人難消愁賴有同心在一石宜城且
自寬

乙卯除夜

愁未能除歲又除艱難天地半生餘撫循有缺
兒曹慢稱貸無償骨肉踈苦集眉端寧問酒名
期身後幸成書梅花不解蕭條思猶自傳春到
敝廬

丙辰元日試筆

雪雨經旬曉獨晴縣知天意惜蒼生吳儂共卜
秋成好萊嬾因期米價輕乞得梅花聊自插借
來椒酒亦須傾兒童未肯甘寥寂猶羨隣家鼓
吹聲

女墻帆影

枕浦孤城帶夕曛亂帆飛處影紛紛浮空每逐
千重浪度隙翻疑一片雲烏忽逗檣栖不定鷁
能生翼望難分須臾日落蒼江黑幻跡無痕櫓

尚聞

泊舟練川夜雨懷社中諸友

傷心客路若爲過同調天涯阻嘯歌貧里歲藏
春色少孤舟宵載雨聲多還家有夢親童豎開
篋無衣想薜蘿擊筑酒人非所好他鄉不醉奈
愁何

同錢明府貞超夜集海曲友人齋

海近濤聲吼似雷高堂入夜綺筵開行春客擬
披雲下托乘人還載筆來風引吟龍驚語笑霧

兼嗟唇結樓臺半生淪落知音在白眼乾坤一酒杯

夜集李使君順卿山齋出詩草見示漫賦

金貂不換白綸巾高臥淮陽尚乞身劍鳥漸踈

天上侶壺觴偏狎草間人怡雲卜築諸峯勝

將山下有怡雲堂

入夜聽詩百卉春投刺自憐相見晚

干公

行囊久矣困風塵

夏日臥几有感

孟夏度日若度歲倦骨在几如在床身閑不獨

樂晝寢世濁正宜歸睡鄉郿塢縱火萬人意縲
繼戴盆一士殃安得鄒生一大慟吳天五月飛
秋霜

寄懷張大叅叔翹二首

西南半入犬羊天維翰雙旌萬里懸應敵雅歌
銷燧火當城畫角淨蠻烟勒勛銅柱標雲外款
塞雕題拜馬前野老不知經濟事浪期平子賦
歸田

書附衡陽鴈不飛路難魂夢亦應稀庭階舞羽

三苗格文武兼權百粵依新植棠梨沾湛露舊
栽荷芰憶初衣沙邊鷗鷺遙相待遊倦相如擬
息機

初至白門許比部稚則餉米賦謝

客子行踪似片雲白門地主幸逢君一枝蓬艾
栖初定五斗柴桑祿乍分試命伴頭晨滌甌將
呼友伴夜論文白衣更有東籬望預料王弘不
獨醺

初至圯上王薈叔同王體咸攜酌見訪

荆扉秋日鎖蒼苔載酒遙煩二妙來路入板橋
驚鳥鵲吏移書案拂塵埃徑深有竹能留客木
落無花可侑杯若使高軒頻過此窮居聊爲剪
蒿萊

送王元泰戶部因內艱歸秦

蕭蕭風木乍生悲黃葉填塔正別時母聖寄來
魚不食吏廉歸去路無貨敝貂和淚沾難售羸
馬衝寒步轉遲剩有故人淮水上瓶中餘粟尚

堪炊

元泰曾
周予粟

答張元里

大涯忽接故人書千里招予返舊廬口腹恐貽
安邑累衡茅已卜浣花居波臣得水聊淹歲地
主多文好曳裾茹栢餐茶吾自慣敢彈長鈇嘆
無魚

可賦亭對雨言懷

衡茅風雨晝淒淒隱几蕭條思轉迷無着漸同
冬日燕不炊愁聽午時雞老妻汲溜煎茶供穉
子當門索飯啼沁水樂饑吾輩事苦霖新句更

教題

丙辰除夜

浮生隨處託行踪硯石頻耕歲始逢酒至不煩
開府乞祿餘都爲少陵供杜詩故人
供祿米嬾栽花勝
迎春色兒飽盤餐作好容我憶雁行離索久燈
前愁思更千重

丁巳元日對雪卽事

今朝雲色若爲占茅屋寒多雪滿簷柳發不禁
春日凍梅開偏畏朔風銛勞生玄草頭俱白卜

新道後集 卷九
築烏衣突未黔但使歲豐鴻雁集矜人隨處跡
堪淹

雨中訪黃貞父先生不遇時將督學江右
先舉還越之棹

積雨經旬濘滿途高軒不值嘆空徂文星入越
躔將改容舍臨淮迹漸孤吟句自言堪度日憐
才誰復爲嗟枯何當暫駐西江棹重醉黃公舊
酒壚

正月二十六夕同許比部稚則集鮑士睿

齋觀燈元功元馨侍席

雲起鍾山路欲迷興豪應不怯衝泥感時已覺
梅花落入屋翻驚火樹低階際尋蕘餘四葉尊
前倚玉得雙珪相過况自衡茅近何惜探竒手
暫携

送陳比部出守鎮遠

翩翩五馬入黔中路近荆門故里同驪奏一麾
分竹日帷褰千里落梅風麥聞張至岐將兩劍
爲龔來賣欲空別後陳琳徒染翰寂寥章表向

誰雄

送孟戶部若木權稅北新關

歌就驪駒欲送君長干梅柳正紛紛臨關使者
心如水入越商人舫似雲山色雙高天際插潮
聲萬叠署中聞公餘倘憶棲遲子白下東來有
雁羣

酬吳逸一寄題可賦亭

故園池館草青青羈旅秦淮偶結亭敢向乾坤
誇善賦祇緣山水稱沈冥綵毫老去花將落玄

草成來鬢已星千里投詩知己在天涯鴻雁不
堪聽

送黃儀部貞父擢學憲之豫章二首

文章江左獨登壇詔許傳經屬禮官西土開明
龍有燭外臺握憲豸爲冠花生彭蠡烟波舊雨
借爐峯瀑布寒南浦銷魂知己去悔彈馮鈇滯
長干

感君相見卽開顏瓢裏新詩每爲刪征駕未離
桃葉渡文星已映豫章山談經有鼎願爭解避

續通雅身 卷九
地無劉客欲還京洛故人分手盡臨江不忍唱
陽關

題甘寅東市塵別業

不識秦人洞裏村一椽自喜近橋門山能入戶
心偏遠市已無槐蹟尚存謾以雕蟲娛歲月肯
同巢燕擇涼溫羈棲我亦從君臥茅屋臨流總
避喧

寄苦吟先生黃叔

柳暗孤亭日正賒感交因復惜春華苦吟君自

依天馬卜築余還近雨花梗泛異鄉猶有室蓬
生故里已無家竹間聊爲穿三徑白首相將檢
五車

送吏部錢從卓北上

留都銓署亦仙班 聖主恩深特召還南極一
星趨北極天曹幾日近天顏蒲傾暑酌長干別
桂吐秋叢上苑攀欲附雙魚饒驛使莫忘羈客
卧蓬間

次答徐儀部可賦亭作

孤亭繚繞樹重圍
枉駕來遊正夕暉
苔色上衣人
卧久藤枝穿戶
客行稀
舊題塵滿青蒲簡
新賦光生白板扉
近市清酤賒可得
輕杯無計共君揮

九日憶家兄士雅

棲遲帝里又登高
獨坐孤亭首自搔
心繫鄉園雙鯉斷
門臨烟渚一鴻號
秋霄有酒愁偏劇
春草無詩夢亦勞
早晚欲攜黃浦棹
不堪間巷久蓬蒿

九日寄懷吳逸一

登高秦望是何年
一客烏衣歲兩遷
幽徑黃花誰共泛
異鄉佳節但愁眠
何人搗練清溪外
穉子傳盃落木前
莫問陸生裝幾許
居平仍乏杖頭錢

贈沈比部相如并謝梓集之貺

比部以參幕陞今官

風流真與隱侯俱
紆組陪京韻自殊
健筆參軍原似鮑
不寃比部更同于
五圖飛出山山玉
八詠傳來字字珠
念我一瓢將弃水
感君收取布

東都

沈相如以推蓬草見貽且以言別余時亦有故鄉之行投此以訂明春之期

布市新編調已工憐君此去又推蓬江光慘澹
徂秋後樹影蕭疎積雨中出署雲裝行處白放
春梅藥到家紅羈人亦有還鄉棹期醉秦淮擘
柳風

寒夜與叔翹話別

寒夜篝燈話別離殷勤酬勸不停卮故人尚有

纓袍戀遊子寧無梓里思飄泊幾年隨燕幙棲
遲何地定鷓枝小山若使能招隱肯許秦淮桂
樹羈

留別陳仲孺

千里尋盟海路長一尊傾罷卽河梁亦知舊雨
勝今雨無奈他鄉作故鄉衰柳共攀當落日片
帆獨去帶寒霜大江東下饒雙鯉紫笋遙應寄
我嘗

丁巳除夜

系
帝城椒葉兩回傳家室怡怡任化遷守歲茹蔬
聊佞佛未春積雪異逢年燈前得句兒能和客
裏謀生婦故賢惆悵只緣先壠隔首丘歸計正
茫然

編蓬後集卷九終

編蓬後集卷之十

華亭唐汝詢仲言父著

延陵李奕茂爾承父校

五言排律

送人之普陀飯僧

物外浮舟迥波心插寺孤候風纔挂席揆日始
知途海氣諸天合人烟衆島殊聞雷魚鼓浪見
月蚌含珠梵宇凌霄漢袈裟出帝都香臺靈蜃
結古洞老龍趨粟散千僧悅燈然萬劫甦乘槎

系選後集 卷十
留姓氏千古在蓬壺

同張聖清守歲作

客裏逢除夕，淒其思不禁。
藉非青眼顧，誰慰遠人心。
朋雨何須舊，并州豈在深。
傾椒聊競俗，列炬且開襟。
懷土梅無信，邀春竹有音。
氣蒸寒谷改，天朗歲星臨。
罷酒還登閣，論文更擁衾。
亡羊譏謝客，倚馬失陳琳。
書就連牀句，應忘擊劍吟。
安知孤鶴意，終自憶松林。

七夕立秋夜坐有懷

大火初流夜，天孫鬪巧時。
人間嗟久客，天上集佳期。
玉漢雙龍合，銀牀一葉悲。
興闌杯酒後，腸斷竹溪湄。
絡緯空勤織，蛸蠹自吐絲。
傷心人莫問，歸夢月應知。
宵短河傾促，雲長鵲下遲。
坐聞鍾出寺，寒覺露盈枝。
髮變因羈旅，愁深爲別離。
明年牛女夕，莫作異鄉詞。

庚戌元夕後三日同茂之集杜袁度齋因

投贈三十韻

昔晤因探竹，今邀過浣花。
陳詩知別意，推甲惜

年華余淚枯攀栢

余時有外艱

君顏損覓瓜

袁度離喪母

懷那可道賦藻正宜誇擲處聞金石鈔看厲莫

邪小巫甘退舍太史本名家閣火青猶照關雲

紫欲遮且呼歡伯至莫遣病夫嗟臘盡梅應馥

春寒柳未芽尊開千日醞燈剩九枝斜近海杯

盤錯棲巖棟宇賒含毫頻洒雪守鼎待餐霞樓

寄陳生傲庭推謝氏嘉忘機羣鳥雀招隱詠兼

葭客坐方揮塵僧來更結跏念交存洗耳

座有許翁

袁度之父

俗倦磨牙顯晦如椽筆浮沉上漢槎

羊亡臧豎策蠹閱惠施車武庫書多癖文昌壁

已瑕韻成憂沈病性率喜嵇爬欲共咨竒字還

陪飲絳紗物齊天是馬疑辨酒無蛇窓下吟初

就城頭鼓已撾橫空歸旅雁喧樹聚昏鴉旣醉

休然燭將分復煮茶波瀾隨世路篇籍是生涯

具體元追漢哀歌總類巴先投欣得玉後報怯

揚沙弩在機猶壯瓢縣草漸加只愁分手去無

地寄疏麻

暮春訪臧博士晉叔因陪諸君同泛西湖

口占

臨湖春向暮邂逅值羣英問景知山色聽歌識
鳥聲揚舫清吹發倚棹綠堤平柳借佳人黛蓮
分力士鏞息陰依樹泊登岸踏花行水淺嫌舟
重風薰想葛輕焚香嘗茗粥賭酒命棋枰淪卧
西河久來尋北海盟檢囊傾舊草揮塵喜新評
掩卷還相謝三都豈易成

題王玄超小酉山房得臺字十二韻

結樓臨曲澗聚礎擁平臺巖勢空中出雲光洞

裏開透迤穿石竇登陟踐莓苔琴奏高山底書
藏小酉隈翠深屏上栢紅破臘前梅紅梅九月盛開地
稱元龍傲人推繡虎才論文乘邂逅聯社喜遊
陪謬賞編蓬句因傾泛菊杯吟餘寒雁續酒半
夜烏催沈韻呼兒探濤箋倩客裁千秋慚左曠
七發重鄒枚別後如相憶扁舟涉雪來

壽陳子有先生二十韻

北闕推元老東溟頌大椿九天深雨露一壑卷
經綸未淺蒼生望惟將白社親傍簷巒積翠泛

宅水成淪第有然藜閣門多問字賓著書兩司
馬相士九方歎鵬息搏颺翼龍潛作雨鱗菟裘
存晚計花鳥寄閑身乘興頻看竹當秋或煮蓴
流風江左變稱壽海隅春洞口桃偏早溪頭柳
乍新十洲來氣色百里聚星辰名重山中相年
齊柱下人渥漦駒躩蹠琬琰樹嶙峋晝繡還雙
美斑衣正此晨霞觴傾玉液郢曲動梁塵懶共
鵝鸞列常令鳥雀馴滄桑遺歲月巖穴借丰神
丹石堪調鼎青蒲且薦輪君王如卜獵黃髮涓

陽濱

贈澹圃杜居士十八韻

高人物外情學圃澹爲名結宇茨非剪攀林幄
自成丘樊惟插槿澗戶只編荆雜菜參差植羣
芳取次明邵家瓜五色蔣徑竹千莖種藥希時
雨鋤雲趁晚晴有蕉堪覆鹿無柳不藏鶯李好
仍留核蓴秋倩作羹孤琴乘月奏雙屐破春行
買果人頻入看花客暫迎玄言飛塵尾逸興託
棊枰掃石塵無染臨流思轉清茹齋烹綠筍服

食餌黃精已是甘肥遯何須羨耦畊烟霞閒處
合歲月醉中更玉立昂霄樹蘭芬挹露英試將
松比壽常與菊爲盟便欲携筇去從君問養生
張聖清席與王玄平言懷投贈十韻玄平
昔嘗同遊顧中翰濯錦園至是十五載矣
說劍三千士論文十五年余生終泛梗君氣轉
凌烟暫起登樓草重歌入洛篇性多塵外賞豪
是飲中仙巖樂書非晚班揚筆總傳撫今曾惜
別握手正茫然言笑還如昔沉淪黯共憐邀歡

公子席感舊辟疆筵興盡春花後愁生夜雨前
羈懷無處寫骯髒倚門邊

王玄超舟中夜集得文字

有客詩曾詠同人易繫爻方舟依苧郭夜宴集
同交少女來東越清歌起北郊雕盤傳旅食綺
饌滿行庖鳧嫩偏宜臠魚鮮不去膠地偏人倚
棹日暮鳥還巢野水微風颭船窓細雨敲羽觴
爭泛蟻椽筆盡騰蛟浮白交相罰談玄每共嘲
坐深雲霧解片月到林梢

夏日持唐詩解謁陳觀察子有先生乞序
留酌園亭

挾策從玄晏因過水竹居度橋聞谷鳥舉網得
鱸魚酒是宜城釀桃分阿母餘雲生喬木細風
入綺窓虛三伏庭無暑千秋穴有書此中巖壑
意寧減謝公廬

次林若撫萊園卽事鹽字四十韻

萊家栽綵處池館間閭閻喬木紛羅戶高城近
枕簷栽花潘令手剪草鮑生鎌縱有籃輿訪無

嫌酒舍帘膳親菰米飯待客水晶鹽避暑松枝
密凌寒竹筍尖但容玄豹隱未許赤虬潛旣紫
于公第微蒼角里髯四男俱孝謹萬石固尊嚴
祿奉容方婉林棲養更恬顯幽筵必共朝野性
能兼問字恒過習携竿每學詹乞詩從水部作
記請山謙躡屐春遊慣投壺夜飲厭尋閑雖遠
俗亮采恐詢僉瑞日今誰照甘霖漸爾霑未能
來詔命且共展書籤白社時方結青箱歲每添
極知毛穎利豈畏莫邪銛試閱三千卷曾辭五

百縑松喬攜共臥鷗鷺聚無嫌拂練林俱白揮
毫葉盡黔洗心魚共樂清耳鳥來砭室靜原無
雜書多不害廉斧柯歌已就茂卿新娶湯餅句初拈
茂卿側室生椿鬱陰成幄蘭生色映簾地偏堪避暑
秋爽更銷炎翡翠馴階集蜻蜓觸網黏樵音來
几席彈戲出裝奩調鶴形彌健烹鱸膾獨摻正
貪風細細又喜月纖纖瓜剖東陵液桃分曼倩
甜類成寧假錫夢吉不須占勝事良堪賦羈遊
此暫淹謾愁鄉路遠方快俗塵燼結友從儀鳳

全身學老蟾徑深居爽塏池曲水濂濺寄食嘗
寒炙因人借熟鬻韻苛詩莫鍊瘡愈語非譎爲
語紳纓者微垣正擬瞻

挽張次甫十韻

邂逅一浮卮經年戀所思如何投句日正值蓋
棺時結社成虛約論心但些詞檢囊猶剩簡挂
壁尚存詩鄧氏家堪保相如草付誰人情多尚
薄天道竟無知畜犬成梟獍次甫爲逆奴幽蘭
變蒺藜百憂經沒齒孤忿更遺悲難洗吞鯨恨

徒懷化鶴期
笛聲兼蕊露
聽罷益凄其

金升甫讀書蕭寺
寺有蘊上人入定三載

并贈十二韻

梅屋陶家舊
祇林勝國餘
騷人懷璞臥
衲子閉關居
好道遺塵俗
觀空共室閭
閒中歌九奏
定裏歲三除
問信唯簷鵲
聞聲有木魚
在龕忘去住
窺井辨居諸
迸水心無染
浮雲性本虛
經題蕉葉遍
法度雨華初
獻佛令求石
留賓命剪蔬
再分香積供
重檢貝多書
酒禁開元亮
園窺出

仲舒津梁如可借
寧惜駐籃輿

季冬二日中翰杜袁度齋逢孝廉杜彥恭

夜飲得織字

彥恭袁度弟
余之從甥也

作客依供奉
停船揖孝廉
開筵珠自照
探韻筆俱拈
夜永更籌緩
天寒朔吹鈿
狂來歌浩浩
談劇飲厭厭
君得詩非夢
余成論總潛
網繆情始達
賓從恨難淹
酒盡還教貫
香消更擬添
明宵如倚棹
應覩月纖纖

遊王允明香雪林口占十韻

春晴逸興催結伴入林來逐響惟知竹聞香始
識梅遶溪千樹古爲圃百年栽鳥啄愁將落蜂
喧覺盛開弄珠人彷彿倚玉客徘徊莫遣飛成
雪須含笑引杯譜成何遜筆允明著
梅花譜琴弄馬卿
臺借隱能違俗俱清不染埃歲寒交可結日晚
賦新裁明且思移棹牽情未擬回

元夕集杜比部宅

邀賓厥夕扉滿月颺清輝命爵傾三雅張燈燦
九微煙中花歷亂火際樹芳菲宛若魚龍戲紛

然翡翠幃坐深低玉漢歡甚洽荷衣竹下還多
興明宵更擬飛

奉壽楊封公七十百韻有序

侍御之按鹺吳越也太公春秋蓋六十
有九云明年將捧稀齡之觴而徵文於
陳山人仲醇徵詩於不肖詢以爲壽因
陳太公風韻之爽朗庭闈之雍熙父子
祖孫德星之巧聚若天使然蓋文弱之
登第也太公從遊侍御以豸繡徵省覲

輦下及巡兩浙則文弱爲是邦掌故迎
養太公太史奏真人東行矣侍御使事
且竣文弱紆組南雍太公方偃臥桃花
之源以埃子若孫之休沐而舞斑衣於
膝前人世歡娛殆罕其匹遂歌南山百
韻以紀其事

條遠林彌鬱源清派自長蘭芬將七葉椿壽擬
千霜紀地饒靈異韜精入混鍔披襟趨玉笋濯
足向滄浪獵者攀梯處先民避世鄉洞連新甲

第津亦舊漁郎遺犬升雲吠餘英出澗香探書
尋小酉著賦準長楊思奮生花筆還羈采茆場
解紛魯連子賑急孟襄陽俠不侵然諾交能重
慨慷揣摩頻掩戶綿蕞肯隨行逢掖高皇甫閭
閻德彥方居平恣柔愛遇事輒溫良坐膝文相
難炊糜語不忘試承棲棘詔聊就集鱣堂桃與
帷俱絳槐將綬共黃帶生人擬鄭願解士歸匡
收璞珪竒富登樓藻翰揚三遊須白記一柱任
虔狂石壁看龍虎金堤騁肅驕臺存追馬帳編

在想車囊吏隱名偏樹儒林性豈藏官清原鵠
舉子令忽龍驤杏擢燕都色符分上洛疆桑枝
春鮮附麥穗夏呈祥在野安耕鑿爲邦順雨暘
論勲加大邑徒鎬憶先王苔沒周宗社苗生漢
未央覽輝來鸞鷲褒德詠羔羊北極雖垂眷南
咳每繫腸來從 天子覲歸捧太公觴遺厥非
凡族扶搖獨早翔登朝纔弱冠鳴珮亦趨蹌此
際神明宰初封侍從章乘驄清甸輔冠豸觸豪
強迎養真如賈留賓更似莊追隨三世顯導引

五禽康日下星方聚莖間露可嘗二疏齊寵渥
萬石並恩光未滿先知戒無驕且預防使車行
蒞浙掌故正除杭帆帶關氛紫船迎海霧蒼纔
經辭魏闕又喜會錢塘暑路飛霜雪芹池整縹
緗熬波著桓論玄草屬虞庠鬻販夫歌舞衣裾
客堵墻野聞均役訟戶沐湛恩汪文物雄江左
歡呼動海傍滄溟安震蕩袁浦返流亡執法搜
姦宄持衡肅紀綱旌縣徵逸士鏡朗燭遐荒總
造高堂社兼期後胤臧終童旣英妙商皓轉倘

泮寰宇遊將遍烟霞負擬償菊叢如有待蕙圃
日相將濠上邀莊叟壺中揖費房種田恒得玉
垂釣卽逢璜截竹簫名趙吹梅笛是羗琴心流
水慣巾角拂碁忙泛渚神飛越尋山興激昂荷
風薰綺席蘿月照胡牀樽榼常盈案圖書復滿
箱禦寒須麩米銷夏以簣管棗是安期餉藤惟
夏禹糧思聯洛川社并卜午橋庄構室應臨谷
開軒定枕岡烟生纏薜荔颺至韻松篁柑爲曾
孫割屏因侍史張庭蛙成鼓吹林鳥當笙簧不

獨超時輩真能友上皇稱稀齡漸及獻祝念靡
遑栢府方操節瓜期預整裝候春裁綵服計日
理輕航報命歸持斧寧親想滌裳本無誇里意
殊慰倚閭望取樂調絲管承歡解鷓鷯綢繆供
御膳拜舞響鳴璫圖繪彭錢像杯浮沆瀣漿趨
庭皆組笏觸目盡琳琅颯沓來賓從玄黃實篚
筐無荒謳蟋蟀遐福詠鴛鴦笑撫雙枝桂欣收
九節菖繩繩多俊又曄曄總鸞凰竒士蒙嗟植
潛夫亦簸揚銜恩因仰嶽懷惠已培棠未謁先

生几曾攀直指韉捫胸徒戀戀舉足奈俵俵欲
賦才仍陋營褒識更涼稱觥隔彭蠡奏頌及河
梁畢萬宗應大于公德始彰皇華謀已密抑戒
慮偏詳保艾全三樂來仍足五常熊田將協卜
虹劍轉光芒王謝今輝赫金張此頡頏謀謨具
舟楫純潔比珪璋起變慙知遇趨途畏渺茫夢
隨雲到楚情與浪奔湘祝鯁高巖壑陳忠佐廟
廊懸知封錫典歲歲下銀潢

泛舟洞涇有客就余談各不知名姓詢之

乃文學李永侯也叙誼爲外兄弟因邀余

到家設酒作食飲更餘而別口占六韻

交知天地滿誰復念窮途邂逅同舟楫殷勤問
里閭方年慙我長論族擬兄呼弭棹旋登閣張
燈且命醑生涯惟放浪天步任崎嶇飲罷揚帆
去西風起路隅

和李本寧先生七月一日登俯玉閣六韻

危樓堪眺望詞客盛陪遊月令宜流火風期未
報秋將穿想針線待落感梧楸盟藉青蓮主詩

邀碧玉酬偶然來帝里未便訪仙舟試問騷壇
士能容張籍不

次和陳罔卿苦熱憇珍珠泉二十韻

叱馭炎蒸苦探竒洞壑偏山空多鳥道徑僻罕
人塵稅駕纔依石聞聲已識泉聚潭如鏡皎出
穴似珠圓漾月珪全合砢崖玉細懸虹霓光不
射江漢脉應連灑落晴飄雨澄瑩夜斂煙奔騰
中有物靈異下通天清擬千人軟旁滋百卉妍
肯令漁溷濁時向客涸漩品水遺鴻漸烹茶慰

玉川洗心任潛逸照異悅嬋娟上沸仍無間東
流竟杳然歎生寧有極優渥故無邊遠俗苔宜
積含風荇自牽勤王鄉國渺懷土夢魂纏伊呂
將方駕巢由詎比肩偶從青草藉未許白鷗憐
勛倚巖廊著情于竹素便東山銘鼎後日涉有

潺湲

公有竹素堂日涉園

唐詩解成晏黃門懷泉榜示書肆禁無翻
刻感而有贈

聖祖龍興地明時貂珥臣拜闈郎主夕糾禮署

名春蒲憶丹青迥梧看白下新無荒猶補袞有
疏卽批鱗玉座資馮翼金吾藉拊循公以禮科兼領京營
文詞推卓犖勛蹟見經綸管鑰超南服謀謨衛
北辰行陪今上輦已悅舊都人逸壁魚常掛
迎車雉欲馴招賢開秘閣延客設華茵推轂多
髦俊餘波及隱淪縣書徧塵市斷劔出埃塵青
瑣容藜杖朱門傲角巾頓增駑馬價深愧爨桐
珍御李歡初洽依劉跡可遵帝城聊卜築盡
室渡江津

中浦舟行次酬張性生八韻

歲除歸棹迫冒雨出東郊浦浪風時作蓬窓雪
夜敲家無南畝稅身任北山嘲愁積膚全減眉
攢額漸凹論心清似水得句苦于匏涉世從無
着餘生欲自拋陸居常在舫樹飲輒爲巢飢走
非吾事書情藉故交

悼破硯十韻和聖清

良工剛就日估客售來時竒以金爲宿溫將玉
擬姿揚輝毫點綴吐潤墨淋漓未入中書省先

雁瓦解竒換鴛鴦逸少繡虎輟陳思志甚鴻門
斗哀深薦福碑更難龍尾贈空負雀臺知慈母
寧煩燎佳孫失所貽物完恒見毀器滿故宜歌
九鼎猶淪沒君今欲恨誰

次酬苦吟先生黃叔讀編蓬見贈作來韻
九廣一字爲十韻

吟苦憐同病棲幽嘆各天余嬰灰後劫君得靜
中便不室全孤介如僧了萬緣獨遊惟弔影長
嘯若懷賢墮齒因工句添樓擬贈箋昔經諸士

賞今值老夫傳澹蕩陽春調淒清雪夜篇韻成
風益勁刊就日俱縣做島應叅乘希郊早着鞭
尚平愧多累執筆意茫然

和林若撫題可賦亭

抽毫元舊好可賦此新過欲發囊中草先邀醉
裏歌亭方已公小韻比杜陵多地僻溪光繞時
清暑氣和息陰趨密樹解帶掛垂蘿呼鳥餐盤
粒看兒浴澗波未離人境外已卧玉山阿茅結
吾將老蓬飛奈爾何

賦得春草秋更綠

王孫遊未返草亦後時凋已怯三秋爽猶含二月嬌
風淒應損黛雨潤或生苗色異偏憎蝶姿同僅友蕉
正宜詞客藉寧許野人樵倘入臨川夢池塘句轉超

編蓬後集卷十終

編蓬後集卷之十一

華亭唐汝詢仲言父著

南樂魏廣衡元平父校

七言排律

壽李本寧先生七十十韻

聖祖垂衣十二傳文章偏盛 世宗年亦知吾
道今衰矣獨喜靈光正歸然祝哽籍中新杖國
生花筆底舊談天爭雄司馬寧空壘方駕瑯琊
已着鞭牛耳詞盟聯白下鳳臺高詠嗣青蓮千

秋業就周南史四海人趨洛社筵觴自中山醜
酒獻壽從東壁借星懸風邀鶴唳調歌吹雲擁
龍門競綵箋金粟如來原幻世玉清老子定俱
仙巴人未敢傾長句留頌非熊渭水邊

贈沈公路移居

休文性本慕郊居卜築東城與市踈爽塏再遷
非樂土柴荆三徙迺吾廬樓真靜夜然藜處池
是先賢洗硯餘夾水未栽三徑竹當軒先聚五
車書花移大庾英偏疊庭有玉石出嵩陵玉不

如但使一亭親水木肯將雙眼溷樵漁桐柯堪
據行吟後蘭葉將抽人夢初桑落釀成傾墨客
草玄文就想公車毫端花吐天應挾鞘裏龍鳴
氣欲舒離索總難隨杖屨斯干歌罷重躊躇
仲春八日積雨少霽庭際露微月子長樂
之則以削牘請因相與握手行歌至丙夜
不寐凄然有故園之思遂得十韻時在姑

茂郡齋

西南天漏古來聞此地陰晴信不分射牖朝陽

纔杲杲洒簾暮雨又紛紛鶯常畏濕聲偏咽花
爲多寒氣不薰春及仲時頻集霰月經弦處偶
開雲空庭欲步苔新掃孤石堪依酒半醺絲竹
調成驚鶴唳烟霞身不溷鷄羣嵐生轉覺山多
翠衣濕方知露有文官舍殘更傷寂寞故園芳
樹想氤氳透迤漈水牽愁遠彷彿崑峯入夢慙
預憶歸期秋正好扁舟猶恐未同君

送張使君叔翹入覲

漁陽宦轍久荒榛今日循良勝古人車動輒飛

三伏雨帷開常占百城春威加回祿邦初靜

衢俗

舊有火災公化擬康衢俗自淳鏡出秦樓宜照

訟替還周主已稱神蘋蘩幾絕名家裔

趙清獻之裔孫

貧不能娶公捐俸爲之納婦

桃李無遺韋帶倫奏績虞庭寧

假鳳揚清越谷總縣鱗已知麥隧聞丹闕會及
瓜期向紫宸飲餞青霞停皂蓋留行白鹿擁朱
輪九重久欲徵長孺萬戶猶思借寇恂臨水人
懷慈母戀綠山雲合大車塵棠餘密蔭歌方作
蘭有窮交夢更頻他日漢宮調鼎暇鴻書莫惜

問沉淪

送周中丞還江右四十韻

侯甸東南 帝舊京九重霄旰每關情中丞節
屬三吳境開府人當萬里城關土文襄今再覩
作藩申伯古齊名栢臺暫試爲霖績桂苑因施
細柳營平秩西郊頻省歛旬宣東海復觀兵春
堤草借青囊色涼野霜侵白簡明無假威稜疆
場靜不煩民力太倉盈龍沙計日輸漕輓狐塞
呼庚藉秉衡積粟如丘邊詎乏齋金成穴稅還

輕揚灰族變楸梧鬱縱博場空杼軸鳴開閣論
文皆國彥登壇耀武悉豪英盆窺肺石秋擒鷁
囊括滄溟夜走鯨山路何人憂嘯聚島夷無地
可橫行澤周紫禁宜高枕令肅青油共偃旌列
宿正期徵說動洪波偏爲警堯生雲迷八極同
昏墊浪湧千谿驟合并閭井陸沉蛙出竈村墟
民徙鶴巢薨夷齊寧獨甘窮餓沮溺終難樂耦
耕隴麥旣登紅蚤粒田禾纔插腐織莖翳桑到
處皆靈轍請粟于時有晏嬰 聖主懷襄方減

膳老臣跼蹐已沾纓回天一疏殫衷悃匝地羣
黎泣志誠乍喜周餘蒙賑賙重聞漢法立長平
監河頓覺枯鱗起寒谷能令槁木榮集澤鴻儀
欣有託勤王魴尾豈無頰康屯稷契勲誰並拯
溺伊周業亦成白下黍苗初翼翼黃河水勢尚
洶洶五晨就道咸推鄭萬戶封侯盡憶荆覽德
徒思威鳳下倦遊方主狎鷗盟淇園竹在何當
伐宛委書藏肯暫傾懶向桃華沉璧馬好隨松
子訪蓬瀛乞身止足同疏傳稱病閑居類馬卿

騎竹羣兒懽拜袞攀轅多士忍揮觥二邦空切
乘輶慕雙闕猶聽曳履聲蛾吐江沙元萋斐牂
排山嶽轉崢嶸漫令芝草抽深谷應想宮槐拂
太清且傍仙巖工煉石徐看御鼎待和羹經傳
虎阜宣光別氣逼函關令尹迎祖道酒闌悲父
老驪駒歌就感遺氓臨風聊獻廿棠頌日望班
彪賦北征

壽張長興七袞十二韻

滄瀆東南總地靈祥雲長護少微星緣知真氣

能含紫益信高風屬汗青擬易五千初就草刪
詩七十始成經徜徉宇宙齊三樂傲睨塵寰每
獨醒平子研京堪伯仲長公避世豈沉冥門傾
海內登龍望日永山中練鶴形寄興茶烟揚陸
羽韜精酒德頌劉伶黃池推長盟方定洛社稱
英壽且寧春暖碧桃侵几席天晴綠柳媚郊坰
裁斑鳳舞餐霞室獻祝人趨問字亭繼踵詞場
饒玉樹延年大藥有松苓他時倘入非熊卜別
想聲華在鼎銘

萊園卽事贈茂卿明府三十韻

有引

上洋城之西隅有水竹焉茂卿之別墅
也在昔嘗家于此至是增葺以爲封公
遊宴之所故以萊名於是盛集詞人更
相唱和紀事則種玉探珠庭闈兩美寫
景則栽花調鶴心跡雙清雖戢翼蛟龍
棲遲非久而同心蘭茝結社良稀非巴
人之足貴念孝思之宜述漫賦長律一
章以爲諸公倡

仙吏娛親綵服裁爲園燕喜故名萊傍城卜宅
元稱塢登式占星正指魁四望間閭饒氣色一
臨睥睨覩崔嵬近田禾黍參差見深砌蘭荃次
第培繞舍鑿池容鵲鏡隨山移石聚龍堆平蕪
就刈磯方露踈竹分行徑始開門外舊傳垂五
柳庭中今復植雙槐穿林特構圖書府起草徐
攻翰墨臺坐擁縹緗南面等家藏綸綍北遊回
尋盟會結連枝社就養先銜獻壽杯芝紫恍疑
經地肺霞紅端擬入天台當軒調鶴形逾鍊憑

檻聞蟬興轉催如意舞衣飄類電鼻聲歌管沸
成雷主壇林類名呼鼻邁跡超宗賦似枚潦倒
唐求遺世士風流張緒出羣才且教拈韻供鉛
槧不用呼盧賭醞醕爐際氤氳凝未散毫端琬
琰互相脛論文采璞雕成壁定字逢敲卽去推
力戰每思凌大眼退師疇肯學于鬣已知得句
輝丹壑聊共尋涼坐紫苔蕉葉覆谿題作簡蓉
花在沼倩爲媒騷人已許同傾蓋逸客無煩更
鑿坏身世未超朱紱外襟懷儼寄白雲隈禽魚

海上寧須玩桃李河陽憶遍栽春色獨看深洞
戶神光忽報發珠胎玉添謝氏階前秀麟自徐
家日下來莫向閑庭耽水月還應魏闕佐鹽梅
驥羈心更馳千里鵬息情終在九垓臺閣時清
多喜起康莊秋爽淨氛埃謝公他日銘鐘鼎携
妓東山更擬陪

題杜袁度用拙堂

杜曲卿家舊結廬堂成名拙意何居非關避世
無金馬自喜潛身學蠹魚花鳥爭邀雙屐健煙

霞閑伴一牕虛信心基局容人對引興琴尊與
俗踈治圃向來甘抱甕乘風終不羨飛車柴桑
所願惟容膝聚族知君永晏如

贈吳司理元秉考績三十韻

濱海三城地極偏訟庭旁午檄書填宵衣在昔
勞明主秋署于今得大賢稟氣獨鍾靈谷秀
開芳遍閱西山傳長楊首占風雲色司李躬操
造化權冀北纔經莖露賜江東早覩法星懸謳
歌來暮車方下發摘如神政肅然張瑟善調真

鳳柱拂鐘立斷固龍泉野無鷹隼虞羅靜門遠
陽鱗釣道全寃剖鵠亭除泣夜旱蘇孝塚幸逢
年魏王壁辨誰高下周主簪還孰後先挂壁有
魚冰擬操行階惟鶴蘚成錢仕優肯廢晴窓帙
官逸頻題郢雪篇府翼朱幡令坐嘯邑虛墨綬
借烹鮮虞城柳線遙侵几潘縣花枝待舉鞭未
信嚴霜能化雨俄看麥秀已盈田帷褰烏共飛
鳧集轡輟人隨乳雉眠決讞已知心似鏡論才
應籍筆如椽亦趨亦步傾畿內爲玉爲珉定日

前搜索荆岑寧棄璞抽揚明月出重淵治平成
許吳公最文藻爭推賈傅妍素喜光華同舜日
會將勲績奏堯天察廉聲價高寰宇淑問經綸
載簡編瓜及建章宜侍從棠森澤國重流連鴈
鸞豈久棲微棘舟楫終期濟巨川借寇黎元成
保障攀嵇逸士夢旌旃蘭枯敢望懷中佩桐朽
親蒙爨下憐倘附青雲輝藝苑從教白屋沒荒
烟塵埃識彌須文舉詞賦依劉愧仲宣七字感
知詩特獻千秋酬德骨堪鑄他時輦轂工調鼎

欲頌明良進 御筵

題徐吏部觀我葵圃二十韻

至人出處任龍蛇廊廟山林總一家輦下經綸
關國步圃間葵藿亦生涯傾心在昔攄丹久衛
足於今積翠賒詎以清高嗤肉食因甘幽僻謝
紛華靈湖形勝原天造太末經營就地奢朱趙
舊谿蘭擬馥求羊新徑竹從遮絕塵期與蓬壺
競布錦寧將梓澤誇樓閣嗟峨干碧落川岑靈
秀借青霞地名青霞洞天涼臺忘暑緣多木燠館長春

爲植花庭合六清堪遠俗書藏二酉不須車

六清

二酉俱圃中齋名

娛親鳳吹隨斑服課子螢囊趣絳紗

興到臨池頻命酒客來掃葉慣烹茶拙希抱甕
畦堪灌樂甚酬觴鼓或撾中論已知雄鄴下維
摩兼喜結楞伽每羣麋鹿行空谷屢狎鷗鳧憇
淺沙調鼎應窺温室樹爲園豈戀故侯瓜惠懷
向日仍無間跡暫棲雲且自嘉南洛師臣居似
鄭西河盲士曲惟巴開編徒慕遊仙境抱病難
乘上漢槎謝傅莫言高卧穩明光早晚下黃麻

上巖臺楊侍御兼呈張大叅叔翹五十韻
玉洞遙隣二酉天地饒靈貺誕名賢道真舟返
桃源隔伯起環存闕閱綿蠹簡冥搜傾石穴兔
毫輕酒倒巖泉山阿桂樹垂陰迥庭際蘭芬挹
露妍羔雁羣維三楚甲天人策傍九霄縣寧臺
擊筑堪流徵單父鳴琴候拂絃虞柳鬱時鳧雜
鳳潘花深處鶴銜鱸關西頌作稱夫子署裏功
餘草太玄暴雨幾齡無犯陝郎星一夕召還燕
風生列栢威稜肅日映青蒲奏對便未許野烏

啼柱後但看瑞雉滿車前經營輦轂恩初湛宵
旰東南慮獨偏爰授從臣持斧詔俾清緣海漉
沙烟運籌徵管誰爭列著論須桓肯讓先詎取
滄溟藏內府將令渥澤到窮邊鹵中草木猶生
色徼外誅求盡息肩亡命聞聲歸井竈負鹽相
賀賣釵鈿法期鎮靜稀新令政不紛更輯舊編
會有雙旌遍吳越因乘四載歷山川少文丘壑
心俱化太傅烟霞性所纏始向白堤尋古蹟俄
探禹穴讀殘鐫莓苔石滑思孫尉栢栢峯竒想

葛仙蘿頂振衣青
靄襲松間舉袖白
雲連停輿
夜蠟臨川展覽鏡
春浮賀監船守衛
魚龍相隱

見忘機鷗鷺共盤
旋吊娥詩就齊黃
絹臺有吊娥詩

遣力書題極彩箋臺有寄兒書舟艤錢塘江
浩浩帆

開震澤水濺濺避
驄頓滅胥濤怒進
鶴還憑海

若牽行部屬城凡
百八采風得士且
三千紀遊

總入西征賦戀主
頻歌北上篇單騎
及秋將報

命五茸值暑暫高
眠齋頭果熟方沉
李鉢底香

生已放蓮鱸有四
腮供鱸細蓴稱千
里作羹鮮

勤王久握飛霜節
懷德仍追立雪年
大耋王符

蒙祝擢至則執弟子禮甚恭山人陳仲醇亦為臺所禮瑯琊史備明時料司

馬文臺刻弁州史濟勝自能交謝客

乘時叔翹齋表入都蘇門似接鸞鳳嘯

河朔因開玳瑁筵
旅宦音塵踈候雁
索居情緒

聽啼鵲邀歡拈塵
談應劇乘興班荆
坐屢遷著

述共期輝竹帛抽
揚何幸及述邇才
非卜夏育

偏早調擬文昌志
不宜誦溢萬言唇
亦腐坐唯

一榻膝皆穿陶家敝屋還經火王舍偷兒更取
氈馮煖蒯緱猶有劍杜陵囊磬尚留錢蒿蓬漸
長聊爲壁禾黍雖豐敢厭饘在澗自甘埋病骨
刪詩妄謂得真詮枯將就燹千人棄腐偶生光
二妙憐扶杖勢難參軒冕獻書神已逐旌旃一
瓢倘不隨波沒積劫寒灰定可然

送陳罔卿赴滁陽二十韻

率土雍熙 聖鑒明廷多黃髮運權衡品高南
國元龍卧詔下東山太傅行出谷未忘泉石戀

登車已滿廟廊聲豹方起隱文彌蔚虬正離潛
蟄乍驚暫沐恩波驟御乘旋看霖雨慰蒼生羅
材昔擢千人傑市馬今題八駿名駕鼓定應寬
枉策負鹽端擬脫長纓文星渡浦隨帆席卿月
臨滁引旆旌瞻仰五賢如旦暮抽楊三隱費經
營澗邊幽草催詩切峯底飛流釀酒清自構池
亭談六藝肯將沉醉傲羣情朝端經緯推當局
海內文章藉主盟平格有徵椿比壽庭闈濟美
桂含英棲巖何歲無傳幣祖道誰人不獻觥歌

奏驪駒傾大邑知稱特達感遺珉榮加盼睐桐
辭爨力賜湔磨劍發硎敝帚浪邀玄晏筆窮途
謬得子將評未能躡屨從西笑聊爲抽毫賦北
征悵別貧難烹一兔相思愁擬聽孤鶯寂寥詎
敢忘明德更俟清朝喜起賡

壽徐比部伯同七十

身紆朱組志青山朝入雲司暮請還跡類隱淪
聊避俗論精儒理不開關榻前明月頻窺影杯
裏流霞好駐顏道合二疏重畫繡名高萬石謝

朝班瑤池並蒂桃齡永緱嶺雙鳴鶴駕閒江水
得魚堪自膳宮衣有豸當裁斑遙開雪後梅猶
紫景值春深杏欲殷杖國稱觴殊未艾廣成丹
鼎在人間

三五七言

秋夜姑蔑署中作

寒露微寒星稀山署正擊柝誰家復搗衣羈人
此夕愁難寐何物驚禽亦夜飛

可賦亭四時詠

春草生春鳩鳴小徑非舊色疏林饒新聲捉絮
童兒繞膝戲尋花女伴緣溪行

南陸移南風時開軒柳陰入臥石苔痕滋柴桑
處士去已久羲皇上人知者誰

金飈號金天高蟬寒抱以葉鴻宿求其曹花間
正酣刺史酒門外還來吏部螯

葉闖扇雪覆亭撥爐烹綠醕呼凍鴛玄經無綠
谷水藏漁艇一任秦淮滯客星

四六八言

夏雨卽事

風爲趙趙雨名濯枝片片雲籠碧樹淙淙水漲
清池可賦亭冷落門晝掩長千里喧闐笛夜吹

自述

錐立無地舌留有田白苧謀生廿載烏衣作客
三年不從痾瘦丈人比技惟聽造化小兒運權
九言

客中遣興

大人先生以天地爲家余又烏知乎故國天涯

楊柳叢中寄數椽
茆屋藤蘿深處享
半枕烟霞一任皮
相人呼牛呼馬隨
他利名路爲龍爲
蛇惟憐星星霜髮
江湖老恨無壯士
爲我翻日車一字
至十字

正月八日詠雪

霏霏臘盡春歸集
微霰揚素輝凍雨
成質因風入闈王
子宵乘艇袁安晝
掩扉光映孫康書
案冷侵蘇武征衣
梅方破蕊花先落
柳未抽萌絮乍飛
歸鶴驚山山珠作
樹漁人喜處處玉
爲磯

自憐囊中沽酒錢
久乏轉覺驢上吟
詩興已非朝來見
千村萬落如寒食
第不知請粟何人
人紫微

回文

閨怨二首

紗窻映月夜深愁
冷露沾花惜暮秋
鴉作鬢垂新黛翠
華年幾度泣高樓

春芳感妾怨情多
淚雨還來濕綺羅
頻憶寄書傳過雁
塵沙暗處阻關河

宮怨

填堦玉樹春淚灑問誰人鈿合舊藏篋鏡臺空
委塵年添覺鬢變日往惜蛾顰絃斷兼腸斷前
庭度曲新

無題

稀星對影獨長吟亂髮橫簪玉鏡臨衣舞度風
香冉冉扇歌留月夜沉沉微身妾却消紅臉媚
骨君因繫赤心飛雁附箋雲路遠幃空柰守暮
愁深

八音

秋夜卽事

金天月露夜霏微石戶涼生百卉腓絲掛空簷
珠倦織竹搖殘葉鵲驚飛匏尊處處新成釀土
俗家家未授衣革偃乾坤方息戰木奴秋熟不
愁饑

十二屬

傲睨篇

鼠思因作客牛耳操登壇炳文類虎變振筆干

兔園隱鱗龍與螫騰遠蛇俱翻老馬智可用羝
羊寧觸藩俯視沐猴輩擾擾皆衣冠羣鷄食且
競邑犬吠何喧公孫牧猪兒疇知廣川賢

五行

慨世歌

金多季子親戚懼木強周昌勛業樹水潛漁父
知者稀火滅張陳交道微土室袁閔與世違

數名

可賦亭晏坐言懷

一病老不差不知天日廣二酉倩人讀靈臺日
虛朗三都賦已就頗爲玄晏賞四海並傾蓋衡
門駐輪鞅五色莫能辨竒文落諸掌六角構茆
亭臨溪特幽敞七言抗少陵力薄遜尺壤八極
屬夢遊得珠從象罔九族相擯棄寸箋絕來往
十地苟可登終期出塵網

編蓬後集卷十一 終



新道行集
卷一
一
九

編蓬後集卷之十二

華亭唐汝詢仲言父著
廣平王受人體咸父校

序

李徵之楓庵詩集序

余嘗讀定遠傳想其拂鬱傭書局促轅下藐焉
一胥人耳至投筆數語激昂奮迅身羈樊籠心
越龍沙之表彼其志果先定耶抑落莫無聊而
自誑也然驥足稍展樹勲若券士之發憤於文

詞者獨不可觀其抱負哉吾友李君徵之少習
博士業樹赤幟旗鼓中原而不爲當路者所知
退而寫其牢騷不平之氣於詩歌且浪跡名山
傲然自得迷花醉月臥不輟吟其詩俊逸宏放
正猶李將軍之行師不擊刁斗不設部曲慨然
有橫行沙漠意余讀其詩而異之以爲吾曹調
音聲循軌轍媚柳吟花歌風挹露而已今徵之
獨超越藩籬栖神域外此豈無激而然是乃徵
之投筆語也始將捲裘而奉盧弓與未幾徵之

果去公車習騎射作邊塞客將行乃以所著詩
卷屬余序余廢人無能爲徵之重而所交於徵
之者乃無如不佞深因受簡語之曰子以子之
詩爲干將莫邪乎抑以爲楚宮之良鍔也倘風
胡之爐百煉不息斷犀切玉固自有時吾子其
勉矣異日勒銘燕然橫槊之暇雅歌成篇當不
假掌故之草僕老矣無能驥附青雲書此以當
寶刀之贈徵之所居有楓連抱常結茆其下而
高詠焉故以楓庵名篇云

沈丹卿詠雪詩序

古之歷落軼軻之士必藉詠歌以摅其憤思而觸機興慨逐物布情又必各就其性所近若屈之牽蘭宋之悲秋義烏之詠蟬工部之歎馬不獨求肖其形容抑且搜竭其精爽彼蘭之幽秋之凜蟬之高潔馬之驍騰既已券于我之情性矣而遭時不偶則又若同病相憐者宜其發聲之淒厲也乙卯仲夏余以剗劂之役憇武林書肆間丹卿沈君無半面之識以嗜痂之好而就

余談語極玄遠不設俗之町畦不受世之羈縻襟懷坦如也尋又出詠雪一編屬余序余讀其詩凡四十二篇篇各命題究雪之變態或摹形或紀地或書時隨所遇以標勝浪浪灑灑有謝參軍梁園遺聲余賞其音而復難之曰緝貂裘者必于嚴冬市絺綌者必于盛暑今青蒲在尊葵榴媚眼非有山陰懷人之興何取原疇之積素耶丹卿曰否否吾聞麋鹿不喜金鑣而思豐草爰居不饗鐘鼓而樂空山性之所近也予之

冰心栖玉壺久矣彼埃塵盈前喧囂括耳此身
如在火宅中求其冷澹清虛可以寄我襟懷者
獨幽巖之積雪耳所以盛夏而有是作也子母
以世之炎熱苦我予曰唯唯昔蒙莊薄楚相而
曳尾塗中子仲辭三公而灌園于鄙吾子抱軼
羣之資而處綺繡紈袴間進可脫穎承明退且
膏梁華屋譬桃李之向榮朝陽之舒景照灼伊
始而乃冰雪其心超然塵垢之表非灌園曳尾
之儔與雖然袁邵公以僵臥而調漢鼎安知栖
巖之雪不爲濟旱之霖乎幸吾子之無久于僵
臥也若乃白雪之聲則郢客能辨無庸僕之齒
牙爲矣

五月四日友人冒雨訪妓序

標梅霖積采葛情飛望白滴之涉波良難着屐
想翠眉之掩鏡不倦衝泥景值天中郊郭柳陰
方密思當日晏博爐蘭篆將銷于是鳴良儔嘯
佳友出苧城而命棹遵花巷以停橈龍潭之龍
舸輕浮長綃盡濕五日之五絲堪採深戶半開

系道集卷十一
曲似迎郎簷溜與肉音間響歌稱有美溪聲將
琴韻俱調未謀薦寢行雲聊快捧觴舊雨觀如
萬楚博一笑其何辭遇類陳思贅千言而徒結
迴棠舟而蓄思暫負今宵舉蒲酒而含嬌更期
明日

張元里落花詩序

東皇施巧燦五采之仙葩上苑聚芳耀千門之
麗色方其弄晴萼含朝榮足逞豪華之公子已
而飄酣紅墮殘粉堪嗟流落之騷人葢花之開

落隨時何關人事而我之悲歡因物莫甚春華
湘纍托興于幽蘭開府寄情于枯木良有以也
吾友張文學元里弱齡夢鳥結髮攀鱗候五兩
以思飛抱連城而未售偶見凌于二豎忽浮度
乎九春曲几晝凭觀流英之入幕湘簾夕捲驚
餘瓣之沾茵抽江筆而香生繽紛眩目撲陶巾
而色膩點綴有情於是構商隱之新聲翻休文
之舊譜句拈七字韵歷一週感落地而咨嗟似
吊馬嵬瘞魄悵隨風之翔舞如招金谷香魂調

叶陽和樹頂倉庚答響吟淒金石花間蛺蝶生
愁紅雨爲之不飛彩雲低而欲結信清商之雅
調玉臺之遺聲也是題創自先賢盛于近代戶
稱拔幟人擅探驪而元里又能睥睨諸家獨當
一隊斯亦竒矣不佞蟲嘶草際愧無玄晏高名
鳳嘯濠間欣獲太冲佳什未敢輕陪後乘書此
以當前茆云爾

怨歌行序

歌附

竊聞明妃出塞河陽橫笛增哀商婦調絃溢口

青衫暗濕何則情由聲感思以意通故同病相
憐戾夫爲之垂涕而孤衷所激壯髮怒而衝冠
悲憤攸鍾古今一轍茲有王姬秀先生長薊北
垂髻而昏墊相尋轉徙江南中道而衣襦不測
幸脫河伯之娶反爲東家所樓甫十三而去母
離兄未二七而忍幽蒙垢自嗟良家子身已失
于學歌安知可憐人禍更慘於獻璞雖齊臺電
擊庶女之恨少甦而谷水風清琵琶之行未奏
於是僕本恨士哀此矜人感而賦詩聊以傳諸

同好云爾

燕姬十三顏如花雙蛾耀月鬢窺鴉折腰不數
良家舞振素全凌西子紗自謂輕盈嬌掌上安
知淪落向天涯身為荆玉翻遭別客豈鴟夷與
泛槎紅顏薄命有如此琵琶哀怨因茲始覺廢
難期入漢宮嫣然猶足迷吳市秋波欲轉魂應
消紅袖不翻香自起初疑佚女來瑤臺復似靈
妃興洛水生平一顧千金酬陳王飛轡自應留
玉容寂寞誰爲侶窮巷端居還獨愁水輪半掩

光非減白壁蒙瑕誰見收輕裾舞月情猶在羅
襪凌波事總休古人坎壈良非一爲爾作歌兼
自述晉臺鶴下聲虛傳魯史麟成明已失風墮
名花徒見憐春生腐草終無日愁來淚洒秋江
渾詩就聲邀寒月出君不見漢家名妃入虜廷
至今塚上草猶青楚館秦樓多少恨非君此日
獨飄零

傳

籍隱先生傳

籍隱先生居五茸之張溪去郡不百里郡人罕有識其廬者不慕榮利好讀書自娛人稱籍隱先生云唐子聞而造其廬曰漁者之設筌也將以得魚也吾子隱於籍而無所聞無乃狃於筌乎先生笑曰余非狃於筌也思得任公子魚而後忘之耳出諸草示予予讀而壯之因次爲傳按先生名山民字逸一譜稱吳太伯之裔世業儒多貴高祖韶祖漸俱諸生以博雅聞先生少善病七歲未能步尋失怙爲宗人所掠簪履無

遺旣長去之浙舌耕以養寡母未幾室於張張氏賢不以食貧爲戚拮据米鹽以佐朝夕飭粥稍贍乃還故里脫簪珥復曩所亡產廿畝卜築秦望山之陰繞籬植花竹諸果爲棲隱計計口而田度身而織歲無所餘性好山水每耕暇輒乘小艇往來吳越間舟中惟圖書數卷無長物值時卉吐芳峰巒聳翠顧景徘徊幾忘去住嘗曰畢吏部思載千斛酒陸鴻漸思品天下茶迂而無當我憇石挹泉適情而止又奚藉彼茗醪

哉行武林深山值虎鬪樵者驚疾走先生獨倚
樹縱觀詫以爲竒又嘗見隔溪有好梅欲就賞
之涉冰而往冰裂墮溪中觀者咸排笑之先生
自若也先生少困羸疾長邁家難自慨經生業
不就復不屑爲破琴者流以故削跡丘園徧訪
古蹟絕不與軒冕接其客浙袁駕部坤儀與先
生祖父交厚請見不往而謝以詩遊棹所經止
無常處不欲人踪跡之嘯詠自適而已所著有
蓬飛林棲紀遊籍隱諸草體尚渾厚不喜與流

俗人競新巧又箋釋杜詩五言古議論出虞趙
上余著唐詩解間以疑義相質多所發明云
瞽史氏曰隱之途殊矣曼倩長卿隱於吏步兵
彭澤隱於酒嚴光志和隱於釣季主君平隱於
卜伯休龐公隱於藥沮溺丈人隱於耕牆東王
公隱於販至於緯蕭鬻屨賣漿博徒託於一技
者不可勝數曾未有以籍名者先生之隱皇甫
士安之儔與王元美贊逸士至隋桃椎止唐以
下幾於無人而先生沉默殺青介然塵外不遊

大人以成名豈欲超近代逸軌而上之耶桃李不言下自成蹊因論次其傳如此

顧處士傳

顧處士華亭人名懷忠字義卿別號一泓農家子也有弟穉解耕處士習博士家言又善病力不能操耒父欲其食力析之居處士舌耕自給斗粟不以干人歲饑親友強周之弗却稍有入卽償其周終無受也鄉人愛其誠信爭延之家墾居數年所積饒於弟之耕食惟藜藿衣惟布

褐踰分之事銖寸不爲非分之獲一介不取爲人曾有志凡物理有未明經傳有未解者仰屋思之至忘寢食必得其理乃已久之忽大悟諸所疑悉如破竹蓋彼實有得於聖學非獵諸口耳者所可同日語也唯模古多拘習迂成癖每事爲俗所擲揄而以固滯呼之才乏疏朗便於口而拙於筆以故苦心時藝二十年卒不能合有司矩度竟以舌耕終老云嘉靖中倭夷掠海上松最慘胡宗憲節兩江左得以便宜從事處

士以爲用人之秋譔禦倭十策求獻無由進乃
詣軍門作蠻語衛士疑其間諜反接之見胡公
至前卽呼曰非敢爲奸求獻策耳公令釋其縛
出所獻策讀而善之謂曰若無遠有所之我將
召汝爲參謀矣處士退刻竹爲刀扇戶而習之
日夜誦孫吳不休胡以其策示松守方廉廉惡
其不詣已乃曰策雖善迂談耳公以迂談擢此
人恐縱橫長短之流接踵管門令披堅執銳者
解體胡竟不召然則處士蓋數奇者不專以時

藝拙也獨其策泯泯無由睹其經畫惜哉處士
壽終於家遺命不以浮屠治喪生平敝衣衣體
外悉納棺中不以焚其子夢桃循禮以葬

瞽史氏曰余自垂髫觀先君家伯氏從處士遊
每一接談日昃忘返余從傍竊聽其議論亦媿
媿不倦及成童先君延處士爲家弟汝謚師得
以就質經義口授離騷文選請拜床下執弟子
禮處士輒辭曰子敏吾方避子一頭地安敢師
遂相與爲忘年交處士賞余文余賞處士之明

理凡余不覩字形而了其義處士實有以磨礪
之夫古人所稱三不朽立德爲上然閭巷巖穴
之士能自見於後世者必以言何哉徒以世不
尚德俾獨行好修之士湮滅無聞耳吾觀處士
之學行不在季次原憲下而世莫能知終與草
木同腐故次其傳嗟乎蔣詡卧竹求羊焉文仲
蔚淪蒿劉龔孰識身後之事聽之名山可也

記

偕老園記

偕老園者先君子及先孺人偕隱處也先君子
少精時藝爲邑諸生不第年且艾乃歎曰人生
行樂耳須富貴何時卽謝去諸生郡之南爲春
申浦渡浦四里許五畝宅在焉以其半築室半
爲園棄郡中屋徙居之園之南有溪曰梅家涇
鑿池引水北折以繞園園之小不能三畝栽竹
半之半植雜卉菊又半之雜卉之外樹橙橘香
櫞之屬秋得其實冬取其蔭望之森然蒼翠之
色掩映數里園之中構精舍三楹面花背竹爲

讀書處舍之西築土臺于溪側高可隱結草亭其上以望遠下爲水檻以觀鯈魚之出游每晨起一小童汲水手自灌園灌已操一編坐竹下課童刪草培花及剪竹木之繁者知有園而已不問園外事也林筍初抽每慮其不爲竹欲烹食市諸鄰家僮之黠者竊園筍屬隣父以售先君不復知爲已園物也或以告先君曰寧彼竊之我不忍戕此新綠所植卉不求異惟取先後不絕嘗曰歐陽公云我欲四時携酒去莫教一

日不花開我無杖頭錢以沽酒而花朵在目亦足了一生矣然先君雖貧每一花開必邀親友或隣僧舉觴其下藜藿不飽歡然自適也至籬菊舒黃編瓦爲百餘筒植菊環書齋中嘯詠其間或經月不出曰諸花宜露獨此可延入室真吾友也先君雖寄情花竹手未嘗釋卷欲纂諸小說成一家言以不得玄晏之藏而止然手所抄錄亦幾盈篋矣先君居是園三十年亦時有乏絕先孺人躬課婢紡績以易粟庶幾梁孟之

同志云初高祖北園公暨高祖母宋孺人皓首
齊眉嘗繪北園偕老圖子孫罕有繼者至先君
與孺人俱大耋始續其慶中翰顧仲方爲圖以
贈因以名園自先君見背不孝兄弟糊口四方
不三年花木臺榭無一存者過之傷心因書之
以示後人

可賦亭記

唐子移家白門也比部許稚則虛別墅而館之
有如斗之室四僅容妻孥託足客來坐樹下稚

則謂外有隙地可亭者遂與儀部黃貞父民部
孟若木叅軍王體咸王薌叔友人潘文子各損
貲而以軒扉櫺檻輓甃之屬餉者纍纍也象地
形爲六角亭不旬日亭成亭之東爲演武場西
卽秦淮水西南有橋曰珍珠淮之傍別有溪折
而左又折而北入武場爲小渠水之央圓沙如
掌架木以行名曰圯上度圯入竹扉垂楊覆之
編蘆而居者曰柳楠柳楠之西開畸徑于松下
二十武許而及亭亭面以古木殿以叢竹而清

流環繞之八窓臨風甕牖納月由中而望則鍾山之高武塲之曠閭閻之稠禁城之迥歷歷在目而車馬之喧闐市塵之混雜則一衣帶水隔之若涇渭殊趨近而不相黷也春則芳卉夏則綠陰秋則落葉冬則積雪鳥轉蟲鳴灘瀨泠泠者亭間之絲竹也剪韭烹葵焚魚酌醴者亭間之燕賓也客至而林扉開客去而松徑寂書聲浪浪出乎柳桷者唐子之課兒也日高而起徙倚亭樹剝啄丁丁當圯而扣者主人吟成而

徵文之謙至也昔少陵居蜀築草堂浣花溪嚴季膺輩從之遊其詩遂爲千古絕唱予詩不及子美而諸公出季膺上者指不勝屈賦此亭者日盛豈不千載旦暮哉儀部因采少陵已公茅齋語名亭而贈之以歌

志銘

否極子墓志銘

始余憇五茸逆旅出歸視門隙間有刺稱否極子沈士炳異之徧詢居人無識者又數月否極

子來謁余氣豪甚若不可一世居因言已昔爲
讎家所中禍至滅門冤結不覩天日者三十年
日夜切齒求噬其肉而讎人已死余亦老矣憤
世之迫阨將入窮林深谷群麋鹿啖草實以與
恒附青雲以傳而世之赫赫者咸我所恥吾子
窮臥而有文真我所願從遊敢以殺青相託余
謝不敏贈以否極子歌留余家數日而去居歲
餘西郊傳言斜塘傍有道死者懷中有詩稱否

極子馳至其所果死矣卽殯之道周遣覓其子
得之璜溪爲錫工初不知有父予責而歸其尸
葬施氏塚時萬曆壬子冬十月也謀爲勒石貧
不能舉又五年余客金陵數夢否極子若有所
求因憶曩昔殺青之託爲作志按沈氏之先有
曰夫長創居華亭之璜溪不知幾傳而及否極
子據歌稱高祖以歲貢除某州別駕孫甲娶施
氏蚤卒遺腹生乙施氏寡依其兄典史竹泉公
竹泉無子以甥乙爲嗣蒙舅姓爲施生二子長

不知其名次卽否極子諱士炳字明卿夙有志
操堅忍不可奪好商販遊四方者累年會姊夫
婁江利外家產謀陷明卿兄于獄遂死焉獄疫
所漸合門俱隕獨明卿及一子存屬其子于友
奔控臺使者事下邑令令受託坐以誣髡爲城
旦亭長知其寃稍弛約束得爲人縫衣及泔泔
統以食期竣歸里蕭然無家矣乃嘆曰錢可通
神若是耶彼殺我母兄我終不與共戴天將詣
闕上疏或謂曰子目不識丁奚以干貴人聽乃

從塾師習句讀取許慎說文顧野王

點辨畫解久而旁通盡曉六書音義以少不知
書不能結合而成文欲草一歌以吐生平之寃
累歲不能就就則文理詰屈不可讀非天實限
之耶雖然以目不識丁之人一發憤而盡識字
宙間字斯其志亦足悲也矣久之姊夫死明卿
自以讎不獲報已不勝其憤又悲世風薄惡每
有陷海沉淵意往來崇明諸島間莫可踪跡其
死斜塘也絕不知所從來或曰以病歸里未至

而革故道死噫明卿等其身於鴻毛垂死而思
歸其骨乎抑不受嗟來食而至此耶余旣收其
尸出所著避世歌於懷中語雜俚雅而憤激之
聲悽然其曰雲間吾沈本勛臣世襲錦衣爲百
戶表所出也其曰竹泉典史璜溪彥紀易姓之
由也其曰荳萁煮豆何相煎昭厥姊之惡也其
曰多麥之翁易糟糠採薪之妻厭貧窶慨世風
之薄也其曰門戶四傳纔一息風塵萬死得餘
生則又令人泣下矣余交明卿淺不全覩其爲

人然與言音節偉行必軒髯鼓掌願爲執鞭言
勢利卽怒髮上指欲唾其面言生計薄如秋雲
許人以諾不避湯火嘗曰寧爲伯玉使不作孟
嘗賓其抱負類如此以生平所遇皆窮故自號
否極子沈氏族在雲間者俱絕明卿承父姓稱
施而施氏塚獨存遂以葬生卒日時俱缺享年
在者艾間也初明卿罹家難一子在襁褓卽寄
食於人後遂呼彼爲父納室生子視明卿若途
人銘曰

視生若遺走死若驚枕戈不遑以母兄故雖平
尸弗鞭而伍員之聲樹身膏野草寧智士之所
懼非古狷者流而今時之砥柱耶

銘

良齋銘

有引

良齋者新安程子燕息處也程子以止
爲氏而以良名齋蓋取成始成終之義
諸縉紳先生爲記而解之矣予因作銘
浮浮者化榮榮者謝而不動仁者所合

布物載陶載甄震而出之良而成焉惟良之德
以止爲則不妄其行行乃莫測譬之諸山凝峙
若頑潤礎與雲草庶木繁吾友程子德健而止
以良名齋有味厥旨齋中何物琴書逍遙書止
于悟琴止于調亦復嗜竒龍文鳥跡浩瀚焉從
鍾王標的時止而止翱翔藝林時行而行用汝
作霖昂哉程子飭躬自此動靜以時天錫爾祉

疏

求刻唐詩解疏

竊聞志士期沒世名君子喜成人美是故左丘
著傳得元凱而彌彰揚雲擬經藉侯芭而始重
閔予小子追蹤古人雖曰榮名無翼而飛實賴
有力負之而走略陳固陋敢告高明伏念汝詢
少罹天刑長希人益扣盤測日見嗤三尺之童
支策歌風夙抱千秋之操大雅久不作頗存微
尚於編蓬斯文幸在茲思援前修而託乘濟南
之刪述稱約慮有遺珠晉陵之箋釋雖煩大都
批牒獵華忘實安在歌詠性情矧方爲圓詎可

逡巡軌轍於是哀采唐什券合古文旣遡流以
尋源抑摹情而逆志遂作唐詩解五十卷傾耳
代目二酉典籍全披借腕成書三冬文史足用
草歲增而數易故人之硯猶穿梧日據而苦吟
童豎之唇亦腐西河亥豕神遇輒知東國雕龍
辨窮斯服兩目不見物間里笑其迂謀千載獨
鑿空菰苑詫爲竒事黔驢之標技止此爾何能
爲井蛙之窺天幾何人誰知者伏冀社中親友
海內賢豪發哀憫於墨池作津梁於苦海或投

錢掛樹立奏膚公或緩頰嗑枯共成勝舉開唐
人三百年之秘奧展病夫二十載之苦心若僅
藏之名山名亦不朽倘得傳之好事好爾無涯

募海潮寺齋僧疏

蓋聞吾人轉輪以生借光三昧僧衆不耕而食
寄命十方行者勞生以求坐者枵腹而待況海
潮爲息心之勝地某人乃潔行之比丘隨緣甘
鳥鳥之飢期千萬人之一飽臨轍想鮒魚之涸
乞斗升水于三江伏冀諸檀越念衆緣之宐結

計一餐之易捐損何侯席上之珍優鉢盛而不
竭去石氏厨中之爨闍黎用而有餘因果堪期
福田無量

檄

補王子安鬪鷄檄

有引

唐沛王除子安爲府修撰時諸王鬪鷄
子安戲爲文檄英王鷄高宗以爲交構
之漸黜出府今按唐二史及本集俱不
載其文因爲儷語補之

蓋聞物不素具不可以應機威不預宣不可以
言戰是故鍊形似木凡品驚奔昂首塗膏羣儔
反走又況分死士之勇氣藉大王之雄風振翮
長鳴奮迅欲傾平樂豎毛思鬪飛騰直擣羊溝
所向無前監危莫敵蠢茲小醜敢抗大邦若而
霧解風靡雉經鼠竄庶免斷尾之慘并寬脫幘
之刑升雲期拔宅以相將迎日許棲桃而偕樂
倘驕心未化虛氣頓張犯我封疆撓我徒衆則
當整孟孫之金距掃漢武之玉堦日若奔星勢

如掣電一號破陣血流司曉之冠九戰長驅羽
插徵兵之檄亟來臣服首領獲全猶復逗留噬
臍何及

贊

五賢贊

有引

志同則慕病同則憐予尚友者止於五
賢因作贊

文學之科授詩於聖縣鷄自安道戰而勝進宰
莒父退老西河編蓬築壤匡坐絃歌何辜于天

哭子明喪一序揚芬千古神王

右卜子夏

周網解結權屬素王獲麟絕筆王道已彰三千
之徒疇爲良史左丘失明克闡厥旨文艷而富
矯矯千秋目如電者未足與謀

右左丘明

虞庭之石擊而獸舞晉臺之琴鼓而致雨夔以
勛著曠以技名希世之寶不逢聖明生不知日
白鳥焉辨纂述成書亦足自見

右師子野

飲南之客狗徒自好彼擊筑者同聲異調壯士
不返匿跡而傭匪作之苦抒忿無從撲寧有成
唯豈能創俠烈雄風庶幾博浪

右高漸離

司業工詩清真寥廓調方王勝名依韓作貞元
之際風雅浸淪公力振之樂府僅存天奪其明
惟名是畀身後一編莫之能廢

右張文昌

袁居士贊

居士吳人各大有字伯豐精數術沈少宗伯有傳

九苞罕覲藏羽爲德百莖希逢能知吉凶逝矣
居士克顯于世威鳳其踪靈著其藝於赫厥先
勒助燕然敝蹤丹紱妍覃先天東 匪茹騷我
徒御大衆皇皇莫之能慮千里車迎惟處士微
一筮而決不戰其寧勃鼠窟社傾我大夏聯璽
耀庭居然物化丹青爾形竹帛爾聲今之管輅
古之樊英

痴先生像贊

新安汪杲叔名東陽

盲者不識日君貌焉能如乞盲者之題像始悟
君之真痴雖然四大本虛六合烏有本來面目
誰好誰醜孰非妄身而問肖否俠客之風雕蟲
之手眇千金于一擲被百結而自守惟願君爲
浮江之瓠而不受惠施之剖視旣借目書復倩
人歸休乎君余何補于君之真

編蓬後集卷之十二

終

編蓬後集卷之十三

華亭唐汝詢仲言父著
臨川范立朝道行父校

書

與許公周翰

金閭辭訣情極依依泐水回舟精爽若失殆與
檠戟俱逝也秋杪遇還役浪傳入洛之期頃敝
郡有致書左右者賤民以詩代書附布惓惓不
獲報春仲讀邸報則有言曾參殺人者此不足

爲公累適足爲 朝廷累耳夫 朝廷立法考績不聞考心考績以心與防口何異時事亦幾岌岌矣左圖右書公自足樂奚以神羊爲也不肖詢盲癡跽伏譬寒巖腐草永絕回春之望而公曲爲抽揚俾得舒光螢照之末知遇之渥足垂千秋獨恨王生無竒不能爲渤海君畫策致使青蠅交加鷹隼橫擊雖然照膽之鏡磨瑩始明公之清操不益皎然乎編蓬集雖已災木未獲玄晏一序終難傳諸大都便中幸緘寄唐詩

解功在九仞正屬借目唔咿際此書若成賤姓名或不至湮滅縱無好事者傳之而名山足藏也陸使報訃附詢起居倩腕削牘不及覩縷

又

陸使歸得拜手書慰誨勤懇銀鈞爛然詢雖無目不覩其形命子孫守之足爲唐氏世寶矣東南民力日敝踐更者不聊生每與言癸卯以前政輒噫吁嘆息或有流涕者召伯之仁久而始著理固然也凡人不近火宅罔知涼臺之佳不

履寒冰罔知粵室之樂今黔庶思公如此敵郡
之近火履冰可知詢拙謀生先世遺汗邪二畹
屢割市爲童穉食茲且盡旣無產則無征徭得
免伍伯之訶怒亦一樂也編蓬集序業許搦管
久不見擲此書尚未敢示人政以潛蘭不芬夜
繡無采入仲尼室而弗冠章甫可乎幸毋倚馬
之餘爲唐生惜也吳中寇盜克斥至有嘯聚公
行踰城而出者拙詩綠林語不妄此亦黎元思
公之一事并以告

候楊侍御

昔人謂去德滋遠思德滋深詢荷台臺寵渥懷
肌骨之誓久矣自何士抑園一覲龍光便有躡
屩從遊意尋又晉謁由拳舟次燕語移日不獨
禮數屏絕覺形骸幾忘雖歌非越人賦非三都
而鄂君之遇玄晏之褒斯實過之爾時擬鼓棹
追隨陪數日言笑謬以輶軒尚留京口後會有
期遂辭而返踰月之潤則台臺已謝客門戒森
嚴咫尺萬里聊欲駐舟鐵甕候台旌之發以歌

渭城而行橐蕭然兼乏磨鏡之具有懷怏怏徒
託之夢寐耳及何孝廉附到拙卷又辱尺一之
復雅意惓惓則不以失祖而見譽也於是拮据
詩刻惟患不能卒業以爲知己累左支右吾閱
歲而剗剗粗竣未及行世聞白下謀翻其書俵
俵千里與賈豎爭言賴諸當路設禁其事幸已
因得謁長公于成均悉起居狀遂相抵掌談詩
秉燭繼晷咀英嚼藻口吻生香詩名仍出杜家
郎語不虛矣知己難值欲移家從遊乃長公忽

命楚中之駕握手繾綣不忍歌驪欲以獻歲卜
居白下俟長公前旌之至第恐萍梗之踪恒無
定所未能預決之東皇也太公縣弧將近真氣
塞乎洞庭曩所投百韻以不知誕辰不及布時
景頗有玷於香山台臺休沐之暇意多汗青詩
解序非藉椽筆恐難千秋特望頒稿以便刊行
此書所以遲遲未發者尚有待也貧窶廢人無
物可獻扇頭俚語聊當一芹江南蒼赤去思過
于漢內史每輟耕壟上相與私祝公其遂躋三

獨仗鉞作霖東南庶有瘳乎幸毋久戀東山泉石也假腕作書草率不悉

與楊文弱

槐市光遇握手談詩吟臥連床幾忘晝夜私願永執鞭弭而門下遠有庭闈之覲臨岐嗚咽離魂黯然班馬悲鳴驪駒罷唱期以獻歲相迓秦淮至是果移家入都門下已有輦下之擢矣天北天南邈然離隔緬懷瓊樹無緣再攀聊欲草八行問訊而賤微貧窶驛使所忽且有殷洪喬

故事以故二稔不獲走一緘非緣久別而有遐心也每念不肖詢天刑之餘淪跡草野苦志殺青而未能成名譬隱谷之蘭蕪沒衆草太老公祖旣援琴以猗之門下復紉佩而寵之俾束薪之質頓爲王者香所以抽揚隱淪階引巖穴雖古之信陵不能過恨監門無狀不能吐胸中奇重公子於天下而鏤心結草圖報餐花亦足羞也今卜居烏衣矣結一草亭秦淮傍榜曰可賦清流竹樹環繞之白下諸公枉駕頗不乏嚴季

鷹自許此部雅則坐萋斐黃儀部貞父操文衡
二公行後茹亭損輝而考功孫伯闇水部劉玉
受接踵至極新知樂二公亦雅善轡龍獨恨不
得門下執牛耳斯心惓惓無夕不在燕市中也
孟冬季望偶還梓里遇生洲汪先生五茸下卜
夜盡歡索緘許附得布區區搦管倩人百不宣
一北風送鴈竚埃報音

答王幼中

不肖詢雲間廢人也日不見日月者五十年雖

苦志殺青垂老不怠而借人口吻該博未能以
故不能多有所撰述就燥髮所聞作唐詩解五
十卷及海上姑蔑編蓬三集而已他若藝圃雕
龍今代樂府有稿而未竟也編蓬一集大都少
年發憤之作當時對鏡自照謂能抗衡七子及
楚人新聲一出此集覆瓿不暇今仁丈手教謬
相許可乃復披冬日之絺綌耶閩中多才晉安
猶盛家談巷說罔非唐聲國初十家稱雄海內
仁丈旣窺漢魏開元之竅而又手撿今代名家

之雋腴是能超十家而上者也。風韻佳什溫雅有致，不作今人務華絕根語。是亦剝之碩果，否之苞桑也。不佞妻其以風之締絡得丈而生南薰矣。敢不布其區區竊以先輩之詩風骨爲主。今人之詩才情稱佳，風骨勝者渾渾莫測，未易輕議。然一於風骨而不附以才情，其流必至於浮觀于鱗，集中優孟古人而露其蹊徑者是也。才情勝者開門見山，夷險立辨，然一於才情而不主於風骨，其流必至於俚。今效顰中郎而

辭者是也。夫失之浮者猶存古人之糟粕，所謂刻鵠不成，尚類鶩者也。失之俚者便同乞丐之謳歌，所謂畫虎不成，反類狗者也。僕老矣，不能作近來新聲，又不敢啖古人糟粕，聊寫我性情所自得者，錄數章呈覽，丈以是擬編蓬，何如得無夫故步否。借腕附報，草率不恭，幸諒。

與周逸之

客歲以剗劂之役，廁姚氏丙舍，卽聞螺冠先生之名，未遑請謁。然私心已往之矣。昨者兒歸承

示佳集擬議洪博足使文通喪氣雖然竊亦有說焉夫詩之道有二曰作曰述楚之騷漢之樂府齊梁之新聲開元之律絕宋之詞元之曲作也吾明李何王李輩兼而有之則述矣然皆用其法而離其辭或摹其辭而易其字未有用其詞而兼用其韻者也夫用韻始于元白盛于蘇黃王元美已力黜其當廢夫用之近體且不可況用之南薰擊壤以追漢魏六朝之樂府乎公之用心幾於徒苦也雖然弁州廣擬止于七十

而公百倍之可爲包羅宇宙來誠能去筌蹄存魚兔而又推敲損益共文成一家言庶幾千秋而下稱雄就李者必螺冠子也公所賜覽凡四種賦海補遺浩矣博矣加以評堪與事類賦抗衡獨恨采擇未當標名未妥公喜短賦而厭長篇則二京三都不采宜矣若莊之月連之雪江之恨潘之秋興最清簡而不采何耶若以文選爲家談巷說而均不采可也然平子之歸田仲宣之登樓大家之東征又曷爲而擬之乎凡

書正集所不備而另編者爲補遺今此集云云則賦海另有一書矣豈不伎寡聞未嘗覩此書乎否者此書之名尚當更定者也古歌一句中有纔易一兩字者何以謂之擬優孟學孫叔敖尚能抵掌談語藉令起叔敖朽骨而雕飾之楚王可以爲相乎竊謂南薰獲麟諸歌所當必刪者也凡擬樂府用其題而更其意如漢郊祀饒歌橫吹琴調等篇魏晉而下不下千數百篇今公曰擬某人擬某人何所見而擇取之耶竊意

竟用古題足矣不當更露諸家體色獨擬太白諸篇差有風致存之可也近體來集不多見如秋興八首極有風韻獨乏酒莫消愁竊謂易之作無易莫作可不審公意以爲何如詠物諸作大得題意此書足爲後學指南間有一二不妥終爲美璧之玷幸汰其冗雜可也孟子曰不直則道不見吾且直之公求質於僕故敢盡其迂狂幸勿罪

與陳眉公

昔左氏論都籍傳玄晏季公著諾見重曹直益
青蠅附驥而致千里應龍得雲而騰九天同聲
相濟今古一轍是以唐之昌黎宋之眉山我明
王元美諸公獎借後進抽揚隱淪惟恐勿逮若
文昌東野魯直茂秦輩得旗鼓中原揚芬蕝苑
者三君子啓之也夫三君子果藉以成名耶正
以龍弗得雲無以弘其變耳今眉公之名盈海
內矣眉公之文縣日月矣四方之士斂衽操觚
稽首龍門之下矣抽揚隱淪非蘇君之時哉不

佞少罹天刑正宜沒沒牖下顧不自廢而妄意
殺青之業以世趨近體新聲而風雅浸薄于是
挾十代名家之扁作擬古百篇以世多務華絕
根莫識古人用字之義於是採二十一史稗官
小說作唐詩箋釋以世多不解解詩指唐音爲
虛器俾古人微言與旨泯而弗傳于是叅以時
事合諸性情作唐詩解詢僅僅一盲人耳視必
寄目書必倩腕能自爲詩稱我 明張籍足矣
又附響古人作李杜忠臣無論其書可傳與否

卽其苦心仁丈能不哀憐之且詩發于情得其情而剖析之何傷于解詞原于古採古文而互證之何傷于繁李善書籠也而文選之注傳劉履學究也而選詩補注傳不佞兼二家之說良亦不至覆瓿也不佞遇甚窮命甚阨郡遭祝融而不佞兩被其災集板燬于書肆衡茅復類池魚頻年羈客蒯緱蕭然黃口嗷嗷朝不謀夕所以強顏稱人不忍遽填溝壑者將以藉諸有力以展生平之願也往歲晉謁仁丈蒙許玉成此

刻嗣後經年不敢請者廢人貧窶未見信于諸君恐疑以此市利今海上友人旣梓三分之一則此舉不虛故敢進尺一之牘倘仁丈矜其艱窘挽枯就生令此書得傳通邑不佞伏死巖穴無恨夫以仁丈之重望誠一緩頰猶順風之呼其應必疾此書之成在反覆手耳貧人女曰我無以買燭而子之燭光幸有餘子可分我餘光無損子明而得一斯便焉不佞生不識天日潛巖穴久矣唯仁丈以餘光振之幸甚幸甚書序

俟刻成叩請此未敢褻

與張房山茂卿

夏季有東及四絕附尊公所計且到偶入留都
謁青明立先生稱足下近聲籍甚貂璫居縣境
爲民蠹有年矣臺使者弗能逐而丈能驅除之
此不可與今之從政同日語夫今之從政者循
軌轍嚴催科求當上人意止耳何暇掃積弊以
除民患乎况懲熱吹蠶俗之常態丈於失吏後
而治行益超盤錯益鍊是豈尋常能令耶太丘

朝歌且鴈行也上計近矣房山逼輦轂政已升
聞未審當局者虛何等席待君君雖不以此芥
蒂然十年不調古人所戚輦下豈無一爰中郎
拔之哉弟今歲失館穀童稚不能無飢色幸詩
解成得作書賈入白下曰下諸公亦有倒屣者
今將卜築秦淮就臯伯通而居如梁伯鸞故事
然伯鸞力能任舂而僕之寸管尚假腕於人資
身之策不幾拙乎秋初莊兒舉子僕已抱孫亦
丈所欲聞者身在苦海無他好懷不能作七言

寄憶聊借腕勒數行以通近况

與沈茂之

白苧之別離魂黯然京口之遇出自望外然一
交臂而散去則亦夢中語也弟此行落寞殆甚
獨以得見知己爲快猶恨不得解裘貫酒爲客
中歡徒寄情二十八字耳剖袂後卽解維歸不
復求謁齏使者歲杪至海上遍索長安音乃有
訛言沸騰令人錯愕尋造唐晉卿遇足下姻婭
從都門來倍道兄客中起居狀此中少安然猶

未得入行也入郡元常遣使致足下箋併拜十
三絕倩人讀之浪浪然燕市中擊筑聲也按節
歌之令人泣下讀手書深得澤雉樊中狀弟亦
知兄不能作塵中人但吾輩旣無資身策不得
不藉徑寸翰耕三寸舌旣欲耕三寸舌不得不
在貴人傍况陽羨君折節下士稱賢主人正宜
與福二三歲作飢粥計素衣雖緇未可拂之而
去也弟廢人以不忍妻孥凍餒墮身苦海中欲
出不得今唐詩解成欲挾之以干貴人得陸生

橐中裝爲四男產此時方可從足下枕石漱流
羣麋鹿採薇蕨第頭顱半百矣前途有限未審
造化小兒果與我一日之間否也元常小試落
魄杜門忽忽效蘇君揣摩弟以此兄于帖括不
甚習又無貲作府縣苞苴吶唔藝林便足了一
生不當因此七尺足下以爲何如初秋當入金
陵僕與足下各居一都河山當不生色耶答足
下詩羞澁不能佳愁賦或可讀南來鴻便希嗣
德音

又

客歲接手教再弟亦三致書俱不浮沉否
別兄期來秋當返秋再徂春再至矣客行
樂不如早旋歸何久戀京都爲也近況何
客無歸心賓主之相得可知此外有所交
硯田筆稅歲有所儲以爲三徑資客久亦
也弟貧日甚逋日深食指日繁硯田日荒
都而莫售于五侯而莫識子不知耕婦不
將何以聊生哉無聊之極與元常輩十二

一社名曰雅社足下雖居遠亦在列每月議二
題附寄屬草遺我庶幾天涯比隣稍慰落寞耳
五言布臆無惜報瓊



國家圖書館, NATIONAL CENTRAL LIBRARY, TAIWAN, R.O.C.

編蓬後集卷之十四

華亭唐汝詢仲言父著
新安程至善于止父校

啓

啓 齋臺楊侍御脩齡

伏審星纏執法日麗熬波登車而萬里澄清川
岑改色流盼而百城震肅木石動容渺矣螢光
企茲龍燭恭惟臺下文移斗煥望倚岱齊浮澗
皆花地占秦人之綺繡生階必玉世高荆岫之

珍奇徵瑞應於黃衣恩榮三葉廣國華於青簡
篇什千秋穎露未而邑有龔黃筆如椽而臺推
桓鮑攀檻絕沽名之想諫草恒焚牽裾進自牖
之忠副封輒白爰辱覆甌之簡監臨和鼎之需
威稜飛暑路之霜鼠鼯出社爽朗掛秋空之月
鱗介仰流澤沛無涯膏黍苗而伐枳棘部行有
序先二浙以及三江謝公之丘壑難忘蹄痕沒
石范子之煙波在望鷁首凌風餐霞華嶺之標
銷夏洞庭之曲心懷靡及聽公事於流水聲中

徂異遄歸戀魏闕於江湖深處豈金芝之足采
庶玉燭之應調汝詢明喪五齡貧惟百結醢鷄
在甕安知日月之有明鼯鼠處山未信技能之
已竭藉箕裘於式穀因棣萼之孔懷遇或有神
解辨渡河之三豕眇非能視竊聆映雪之千言
書成濫卜夏之蓬編梧臺自寶箋就擬匡衡之
願解都邑無知藉非驥附青蠅奚免瓢沉碧水
劍埋塵土已經啓匣於張華張大叅叔翹崔有
斑痕私望餐花於楊寶汗顏削牘昧死布誠

謝嵯臺贈匾并賚刻贊

伏以徵幽揚陋固嘗詢度於皇華發瞽披聾乃
誤品題乎腐草感見知之特達愧朽質之非宜
拜命若驚省躬增惕切念詢少罹天譴長鮮人
憐伏草三十年不知世代之有漢讀書五千卷
莫辨點畫之爲丁儲粟屢空兒啼門而妻處桶
賦詩不輟視借目而書倩人心未寒灰形將槁
木抱病絕資生之策羨織屨於桃椎居貧饒取
樂之方欣鼓琴於榮啓篠宜入詠遠懷疎放之

狂夫葵不堪餐一任淒涼之稚子雖曰陶情敝
帚終難廁跡詞場異挽古以成名遂刪詩而作
解擴範圍於高李浦罕遺珠訂訛舛於蔣程籍
傾羣玉一羊手牧嘗躬牽以借書五鹿脣乾方
竊笑其好辨汗青之業謬竟覆瓿之慮彌深豈
意乘驄特褒叩角茲蓋伏遇老公祖台臺玄成
夢鳥學著銜鱸楚實有材弱冠眼空江漢吳雖
多士中原膽慄鼓旗投詩弔孝女之精靈淥波
神泣起草徵孤臣之淚筆白晝霜凝屈子怨聲

宣布千秋之幽憤瑯琊良史表章一代之雍熙
國典既昭人文特煥鴻業已垂乎竹素冥搜乃
及於蒿蓬繩甕臨溪謬荷使君之題額縹緗在
篋竊叨柱史之命鐫信覆載之特恩實草茅之
奇遇廬非段干木文侯軾而荆華光生書豈左
太冲玄晏序而洛陽紙貴肌骨可誓結草無從
山斗漸遙拜袞何日

公有弔曹娥詩刻滿令集楚騷弇州史料故語及之

賀許憲副擢拜符卿

伏以明光草制帝庭六璽生輝廊廟得人天日

九重增色恩隆聖鑒寵近御床瞻依徧乎寰區
欣躍達於岩穴恭惟台臺聲馳岱北文似濟南
擬詞藻於干將爐嘗百鍊展經綸於竹帛勲擅
千秋發劓剖刺史之符在省題仙郎之柱惟茲
白苧既深沐乎陽春縱有青蠅亦何傷於日月
豹偶潛而成變龍起卧而益神出宣三晉之霜
稜入祝九如之天壽持衡惟臬亮國憲之宜操
鄰朕須卿喜金甌之特簡禁中尚璽纍纍絕五
鹿之賓日底封泥旦旦護六龍之駕卽金莖之

屢及調玉燭其何難詢貧甚含藜賤惟披褐囊
空懸磬羨子美之剩錢居沒燎原愧相如之有
壁因蟲雕而獻技豈鳳舉之能攀爰辱高明特
加盼睐載分祿米政范生絕粒之秋遙寄綈袍
亦宋叟負暄之候恩高覆載感切銘鐫未跬步
以叩龍門聊緘書以當燕賀伏冀慶宗平格廟
藉謀謨錫重耳之彤弓康侯三接拜穆公之巨
鬯天子萬年

謝郡大夫朱公啓

伏以寒谷生春久沐如天之澤夷門枉駕獨追
曠古之踪愧白社之非倫豈青雲之得附捫心
增惕支策拜嘉恭惟臺下文驅班馬品埒夔龍
四明之泉石多奇生一申特秀二酉之圖書入覽
擬謝彌工念軫蒼黔已樹河陽之桃李寵深密
勿遂作海畔之金湯提虎竹以專城與人歌起
翼麟符而卧閣晏寢香凝溟漲波清絕島夷之
嘯聚齊臺風息白庶文之寃號策五馬以朝天
行旌遄發憐一夫之在草淑貺遙頒誤承日月

之垂光敢謂非葑之足採詢質非千里明喪五
齡幸藉父兄弓冶之餘竊窺典籍糠粃之緒據
梧忘寢似獲心印於胸中讀豕知訛爰發目光
於耳際推奇數而值亢陽之九敢云傲世於小
冠思立言而效不朽之二妄欲序詩於壤室於
是研覃六藝箋釋三唐旣傷覆瓿之見嘲復苦
投瓢之無託豈其朽腐謬屬抽揚捧珠玉之長
箋鶉衣生色拜朱提之上幣魚釜然灰但舉足
張俚願樞趨而未敢廻懷情耿耿託毫素以上

陳未宣結草之私且效編蓬之獻龍門雖峻
知禮數之能寬麟閣非遙竊異鞭弭之有日臨
風加額仰斗銘心

上張郡侯編蓬集啓

伏以岱嶽峻嶒或有資於土壤潢汙清淺非無
意於朝宗審高下而非倫究精誠其無格伏念
詢受刑坎塲遘疾支離探數十而九奇資身百
無一遇纔離襁褓失明特甚於左丘塊處衡茅
被燎復同乎靖節悵萍跡之無寄幸蓬心之未

灰日借懸珠神遇而知蚪蚪歲傾羣玉耳視而
徹古今每倚樹而長吟遂編蓬而成帙矚百家
之堂室夢交古人總十代之音聲擬茲今草文
非卜夏敢期風雅堪傳愁類虞卿竊快襟懷有
託徒云老不曉事豈曰窮而後工非藉岩廊以
游揚安辭間巷之湮滅茲蓋伏遇老公祖臺下
文藻揆天經綸緯地借四明之岩峻高自標持
礪九岫之峰巒弘施陶冶勞來還集騰頌聲於
鴻雁之歌灑沈澹災起黎庶於龍蛇之窟設長

平以齊物價宛朱夫子經國之謀猷起廬舍以
處邊氓盡富鄭公救荒之委曲立康屯蹇無難
盤錯樹勳坐致泰豐益信陽春有脚苟羣生其
並育豈一草之獨枯就黷枯桐妄冀中郎之聽
附鹽羸馬浪思伯樂之收錐未處乎囊中瓢已
傾於閣下倘郢曲不遺乎下里而雲韶有采乎
巴歛庶俾詠史袁宏得竟秋江之技商歌甯戚
永無長夜之悲枯朽再陽恩私罔極

上申少師和落花詩啓

伏以亭毒勳成戢龍鱗於綠野芳菲興洽振鸞
藻於丹葩卓大雅之既陳豈小儒之敢擬恭惟
相公閣下經綸呈象呼吸回春補天而錦石騰
文浴日而扶桑散彩培賢如樹羅桃李於公門
奏事生香植芝蘭於華省非杞梓梗楠之獨擢
抑春華秋實之兼收既勇退於急流益揚芬於
藝苑紅乍飛而穿幙率爾抽毫翠漸密而浮空
俄然成詠拈韻徧休文之譜吟芳極孝武之搜
調固超凡聲真寡和詢五齡抱疾一介非夫汗

竹有心看花無目偕孤山而嗣響

林若撫先和落花予嗣賦

故稱孤山

浪擬陽春仰東閣而馳神敢期月旦

啓陳大叅子有求作唐詩解序

伏以龍門造斗深羅萬古之奇蛙井窺天未淺
九霄之慕物固有小草而遠志士必遊大人以
成名敢布腹心冒干觀聽恭惟台臺三江砥柱
萬代詞宗摘藻揆天出西京諸士之右鳴金擲
地居東晉羣英之先文既掩乎班揚勛復叅夫
伊呂含香秋署朝端多集雉之祥正色銓曹關

內鮮爛羊之誚剖兵符於薊北并銷九塞之撓
搶握文柄於天中盡拔二州之砥厄儲俊乂以
培邦本思尊鱸而賦郊居日涉名園長菊松於
三徑汗青成帙垂竹素於千秋蒲輪繫 聖主
之思屢飛溫詔桂樹協老臣之性猶戀空山望
切蒼生龍卧猶防未穩寵深密勿鶴書端擬重
頒幸承調鼎之餘閒願賜采葑之末照詢受天
嚴譴爲世廢人五歲喪明經未傳乎尼父三冬
好古詩偶繼夫卜商六書之形象罔知任爲魚

而爲魯五際之音聲解辨孰爲雅而爲風每謂
三百篇世遠而難宗十九首文高而寡和諧諸
六律獨採三唐正以濟南之編選多遺晉陵之
訓詁頗謬詩亾其旨而可解不可解之論興文
不尋源致金根金銀之訛作西漢之文具在張
公子詎能與武帝同遊南梁之選易窺劍閣銘
豈可謂班生所勒於是慮後人之註誤慨前哲
之蒙塵纂集百家彙成一帙旣字箋而句釋復
揣意以摹情敢期匡鼎之解願竊附左丘之發

憤貧方寄食誰爲千古之鍾期業已成編敢丐
一詞於玄晏倘附鹽而果驥必能動伯樂之嗟
苟在爨而非桐疇敢邀中郎之聽仰祈崇照俯
賜鑒憐

上鄭大尹啓

伏以陽和並沐芳含比屋之花潛逸兼收色動
寒岩之草期借恩於露采敢奏技於編蓬恭惟
臺下華國多文康時以道蘊淳風於靈谷應運
生巾振麗藻於臨川揚芬擬謝銀章剖兔旣霑

霖雨於九華金闕飛鳧特借福星於三泖侯服
久虛保障望切來蘇民力獨敝東南渴如得飲
跡能邁軌轍月到雲而倍明心自擬夷齊泉經
軟而愈潔三征有序阡陌省勞吏之饗殮二石
惟清閭巷絕戴盆之寃抑挺長松於蔓草邑頌
神君作砥柱於狂瀾鄰呼慈母明庭奏最知御
屏之已書藝苑持衡喜俊乂之俱擢勲漸隆乎
鼎鼐言不廢夫芻蕘某存世棄餘被天刑質想
日月於襁褓或不至捫燭而知決勝負於南風

竊自謂叩絃而得聽非子野謬施六律於詞場
說祖雅圭浪陳五際於唐什雖岩耕有幸已見
采於揚雲而捷徑不由未受知於言偃藉無左
氏之三賦卽覆瓿其何辭儻察然明之一言豈
登堂之敢讓敬陳赤牘冒奏丹誠

司李吳公茲勉被徵求郡中先達贈言啓
竊以虞廷風動在二典以加褒吳地霜清宜九
重之特召行將留犢餞擬歌驪惟茲側陋銜恩
敢丐高明作頌吾郡吳公祖才推帝弼文借天

孫下筆輒千言自足倒流巫峽讀書破萬卷真
能探遍玉峰碧漢情懸每陟泰山而捧日滄溟
運會遂舒脩翮以搏風爰拜命於紫泥俾明刑
於白苧下車牡鍵收魴鯉而遠陽喬照乘有珠
甍窮鳩而詰悍鷓刻園梧而成象人樂平反擊
野殪而生秋威先阡陌心如木而門亦如水清
畏人知歲有餘而月亦有餘聲由天起都梁凝
燕寢雲擁牙籤滬瀆借鳴琴花明玉案持文衡
於建業燕臺喜得駿之良牧多士於方城京岫

鮮抱珩之戚俊又兩經噓植詞曹十倍光華廟
謨思申甫之儔銓署虛裴王之席徵書電驚夙
駕星馳棘在如棠鏡無私而益戴裝輕似葉石
雖廉而不攜紳衿相率以攀輶閭巷爭先而卧
轍若汝詢者莠林畸士聖世逸民下澤狂歌每
寄情於白社北窓散髮良無慕於朱門因蒿目
以求賢乃菲根之備採吏傳手板導盲史以及
堦客禮荷衣延杖藜以入室閱編年於魯史謬
許左丘賞流水於晉臺誤褒子野灰不然而焰

作草方腐而春回知特達以無加恩覆載其殆
甚感北梁之黯別奏東野之俚音寓環報於寸
毫祗同蟬翼藉袞褒於椽筆不啻龍雕謹勒短
牋特煩先達荷香點硯催別思於陽關柳色侵
衣送美人於南浦拈少陵之七字用侑驪觴翻
隱侯之四聲要歡祖帳入朝披霧將期御鼎之
銘掛席生風聊試棹歌之唱旌麾遄發梨棗待
刊速賜玉音以壯行色

啓吳逸一

伏以律調仲呂羣芳未減於青陽月始生明三
宿已臨乎朱火覩桃夭之已實異瓠葉之可烹
恭惟逸一先生身隱名全文高和寡羽藏秦望
信鳳德之非衰鱗戢張川快虬姿之不乍默幼
安于東海每畏人知歌孟浩之南山不期帝聽
若詢者枯桐煨燼腐草餘灰念稗子之恒饑極
知齊大撫矜人而加憫遂賜晉盟敢云射雀之
有人實以雕蟲之同好既諧柯斧合命罇罍試
湘南澗之蘋復剪東園之韭貧家多草中庭新

綠成茵窮巷無花鄰舍落紅送酒出腐儒之粗
糲難期上客淹留聽車牽之間關堪慰生平饑
渴滌觴已潔擁篲相將謹啓

趙侍御懷東巡歷還都損俸以餉謝啓

伏以皇華言邁 帝里榮旋露湛霜凝遐邇思
威並著江清海宴提封詢度無遺擁豸所施枯
鱗畢及恭惟侍御臺下文以德昭略不世出名
馳三晉凌臯樂而走清漳聲籍兩都先縣花而
後臺柏飭星輶于侯甸輪埋而豺虎俱潛率天

塹以周流驄至而魚龍亦避河潤九里澤被一
夫詢谷水遺氓鍾山羈客售雕蟲以爲食室每
倒懸作書蠹以自娛人多謬許豈其高雅憫及
顛連損餉陸離火舉有塵之甌拜嘉溫渥春生
臥雪之廬感覆載之莫酬計涓埃之可獻刪詩
作解編蓬成書浪爭價于大都敢效誠于鈞閣
仰祈垂察曷任主臣

謝高兵憲孩之贈詩集啟

伏以海康革偃開文藪之昭融璧餉珠投拜齊

謳公集名

之鴻達鼎臨墟而自下棘集鳳其非宜

氣奪小巫藏惟什襲恭惟老公祖臺下五龍蘊

秀一鶚摩空恢東表之泱泱風高營阜奏南薰

之習習響答虞廷中嶽分符吏迷花而實隱

公

盧氏有

陪京主計郎善草而稱潛

公在部有

宣

經濟于篇章藏江湖于魏闕 帝求民瘼思莫

切于東南臣任賢勞籌獨宜于屏翰特頒節鉞

俾涖菰蘆練士勵兵陣接海天鶯鶴輕裘緩帶

信敷澤國豚魚當乾坤息戰之秋正廊廟陳詩

之日校書馬隊後先廬岫二郎託興龍雕彷彿
婁江二美賡朝端之喜起進擬臯夔聞草際之
伊唔下詢郊島路遙千里緘致一編詢生顛鴉
盲遇惟鷗泛冥然長夜已難明處求明眇矣餘
生復自客中作客因編蓬而得句浪已傳都偶
結草而爲亭亦云可賦捧輿璠而思報慚瓴甃
之非倫鈴閣森嚴匪杖藜之敢謁公門孔邇豈
拜袞之無期削尺牘以上陳聊當芹曝鐫寸心
于罔極永戴恩私

上華亭章大尹魯齋啟

伏以春回長谷堯間雉乳和鳴月皎遙空蒿下
鸞斯求奮衆沾恩而弗覺客在遠而懷歸恭惟
老父母臺下文采星羅才華天啓彭蠡波含萬
頃寫入襟懷匡廬峯插五枝幻成標格鴈題日
表兔剖雲間以積衰成敝之鄉值利刃發劓之
始工于起廢絲雖亂而無棼妙在得情鏡不疲
于屢照手牋書而目詞訟敏故能兼朝受命而
夕飲水清惟徹底鋤強扶弱擊勁薤以起涸鱗

續遠後身 卷十四
五
擿伏發奸去城狐而逐社鼠挺貞松于蔓草昂
野鶴于群鷄異已過三宜憲府之騰剡奇堪奏
十知御屏之必書詢抱疾編氓去家遊子栖白
門而思白苧澤滿粉榆戴杜母而羈杜陵心宜
毫素匪蓬編之足獻冀蒿日之垂憐海不擇流
豈潢汙之獨却土堪成器惟大冶之兼容謹布
腹心仰祈照察

謝王參軍薌叔雪中饋炭啟

朔風宵怒急雪晨飛雲黃驟失鍾山花白盡成

柳巷寒鑪火盡僵已類夫袁安幕府情深憂懼
及乎東野爰損酌霞之獸用資起粟之人寒谷
生溫鄒生鳴律堪擬曲身成直安國死灰頓然
呵凍命書銘心以謝

謝劉玉受除夜惠酒啟

寒威匝地夕霰乍零晷度周天歲星將改設椒
迎四始已羨他家典綌辦五辛未呼歡伯命兒
擎榼捫杖頭其久虛謀婦開尊藏斗許其烏有何
來剝喙忽走輿臺蹠發赫蹠特齋醴醪先拜嘉

而食指動尋少試而枯腸疏旨可無朋或異翮
人燕饗清堪擬聖滋增騷客顛狂極守歲之歡
娛難忘大德應蒲城之乞貸敢異重頒

謝陳司城冲虛賚葛啟

單谷萋萋施條莫莫入曲想陳思之種爲締感
周母之勤越國獻而天顏舒唐宮頒而侍臣喜
詎期當暑念及被裘揮汗拜嘉披向風而神爽
銜知銘骨未蔽體而心涼衣君衣懷君憂有志
勿克清我肌坦我腹無斃是期

邑侯魯齋章公餉買山貲謝啟

伏以涸轍聞呼饑同圉吏邑金下貸息邁河侯
辱覆載其何堪俯賤微而增愧伏念詢天盲朽
質地隱浮踪耕賴舌存每藉高門爲畎畝爨因
人熟屢空陋巷之簞瓢游太末而容鍾陵身惟
萍梗去黃龍而家朱雀夢繞鄉關何計能首丘
季子原無負郭可依卽樂土馮生徒有蒯緱百
堵未期集澤已慙夫鴻雁一枝數徙巢林深羨
夫鷓鴣凋旅鬢其誰憐緇素衣而莫惜詎期茂

宰特召流人當調絃解愠之秋正吹律生暄之日駐雙鳧之駕念及翳桑卜一畝之宮貲分錄事寧獨孤蓬罷轉抑使寒灰更然重見家山聞信而妻孥色喜再聯詩社拜嘉而儕耦歡呼信曠世之竒逢實明時之盛事西河枉駕不聞金幣之貽南野開荒永荷丘園之賁詢敢不鏤心結草圖報餐花灌壇期王者之師勲庸五岳湛露頌賢侯之澤尸祝千秋

編蓬後集卷之十四

終

編蓬後集卷之十五

華亭唐汝詢仲言父著

上海喬拱微仲垣父校

誄

萬憲副誄

有序

萬曆乙卯冬安成萬憲副心源公卒明年八月
其子植來白門稱公生平所好者文遍徵名公
歌詠以爲挽授簡于余余草澤氓史無能爲公
重而公夙好士正欲藉隱淪以成其高因不敢

辭而爲之誅按公諱一貫字汝唯別號心源舉
進士爲中書舍人擢御史按鹺兩浙以忤權貴
補外臺歷官憲副致仕家居三十年惟棊酒自
適及卒面如生術家以爲尸解云

誄曰惟昔畢萬勲載晉乘厥裔舛訛以諱爲姓
炎漢而降潛顯莫稽至宋始大列位太師由是
以還朱紱代作厚山市義堂構彌擴本固條鬱
源濬流清篤生吾公維國之楨鸞龍其文琬琰
其質如彼桃李迎秋而實如彼驂騮空羣而軼

試宅中秘授詞太乙

帝曰茂哉汝宜司直用

助朕躬母畏鱗逆公居柱下神氣激揚匪簡之
握詞吐則霜匪豸之觸邪佞竄藏煮海之利東
南稱沃官滯于販人私其橐 帝曰欽哉汝往
詢度廉奸懲宄俾遵矩矱公徂吳越發蒙振落
効鷁之橫起鱗于涸檻折輪埋巖廊寡諧冥冥
飛鴻振翮遠排臬楚藩蜀鷹隼莫猜爰表爰樹
自愜于懷東粵之擢乃賦歸來一丘藤蘿三徑
松菊棊局靜陳玄醴初熟旣奕旣觴亦絲亦竹

鐘鼎山林于焉止足績繼先哲經傳後人聚族
厥胤訓與嗣均庭幃之下芝玉嶙峋巖壑棲遲
俄然更世如木之喬如嶽之時邦藉其表人賴
其庇梁木壞矣泰山頽矣人之云亡命之衰矣
嗚呼哀哉先民有言三立不朽公之令聞碑在
人口古之至人厭世而仙公之蟬蛻彷彿稚川
大皇之埜無窮之門公之精靈千古常存

龍大章誄

余仲甥杜黃門道執嘗爲海鹽令盛稱其佐龍

大章之能當時良六百石不能過惜其無內援
三騰薦剡而以衛幕終然其治行文章亦足表
表當世矣予聞而慕其人已而之留都遇大章
許比部穉則座談若縣河風雅迭出且有把臂
入林意及予構亭秦淮傍大章時乘肩輿挈榼
提壺從予綠楊脩竹下遊甚得也予抱病希出
別不二旬大章竟以竒疾不起時萬曆丁巳五
月也夫子夙慕大章方以從遊爲快乃不三月
而哭公於逆旅人琴之慘有如是乎古人誄逝

者之行表之素旗予安敢以寡聞廢因按大章
諱希夔生於嘉靖壬子至是享年六十有六初
以太學生除海鹽丞遷羅定州倅鳳陽衛經歷
爲人慷慨有氣節雅工於詩所交盡海內名士
及卒李本寧先生題其旌曰靖憲且爲作誌予
遂誄之

誄曰在昔董父豢龍事虞劉累習御厥職與俱
虞夏旣衰五行廢制二國裔孫以龍爲氏伯高
仕漢剖竹零陵博士避難遂去唐京卜居社陂

厥後繁衍歷七百年紆紳勿殄逮於南岡諫垣
斯顯翼我 肅皇不避屯蹇抗疏激昂官邪期
剪權相側目出之遐荒於宦則拙於臣則良間
氣之餘篤生大章少而岐嶷長而通方乾惕修
業旦夕不遑傾慕長者惟恐勿見室物芝蘭遊
殫英彥顯親揚名請誌立傳瑯琊椽筆賞公而
健翮就思飛賦成待獻天步崎嶇屢蹶公車仕
不擇祿一命是趨爰涖鹽官二邑銅魚令寔坐
嘯丞不松吁章辨其僞軍樂其需狐鼠屏跡庚

癸絕呼獲彼有罪釋此無辜瀕海之邑民慮倭
奴陡起訛言奔者爭途公攝縣符勿怖勿惑出
令撫綏喻以非敵俄而無警人伏其識當路善
之薦剡三飛世都竽好瑟不見奇翩翩長離惟
棘之棲邊州別駕豈分之宜公也恬然不驚寵
辱周悉民隱無爽故局羅定山居戰鬼夜哭公
行禱焉伯有竄伏民安於治守獎其勤簡書時
下去而參軍公志用世屢嬰佗倖至是翻然投
傳而逝歸來三徑松菊婆娑棣華結社其樂如

何聿念黃門忠蓋未錄剗劖彈章瞽宗尸祝近
憩白門遠過衡嶽山水之趣操觚削牘一觴一
詠披襟鼓腹人生幾何吾願亦足思返園田莚
桑植竹龍蛇妖夢踐之何促嗚呼哀哉人間金
馬不以屬公泉下修文何遽追從安知冥府不
勝區中嗚呼哀哉公之音容於今已矣公之懿
行毫不勝紀焚券還金義堪著史慨慷類俠動
止合禮劇孟朱家匪肩可比詢也羈旅卜築秦
淮邂逅從遊傾倒襟懷松間野酌惠然肯來詩

題蕉葉坐就莓苔豈伊禮數兼忘形骸願言永
好昕夕趨陪君之訪予落花盈麓予來覓公蒲
酒初綠門可設羅登堂聞哭嗚呼哀哉越鳥巢
南胡馬戀北魂今安之應返故域旅櫬將還歐
田之澤白日慘精浮雲無色靈輜渡江升沈永
隔庶幾德音千秋竹帛

張長輿孺人徐氏誄

昔耆萊著書伉儷俱逸伯鸞避地德曜齊眉雖
曰刑于之化使然實賴思齋之音克嗣吾友長

輿先生文超魏晉道賁丘園潛豹霧以全身拂
駕絃以同調孺人徐氏女德性成內政躬苦我
負子戴追偕隱以興歌左圖右書藉緝纊以易
粟奈彼蒼不憖張白頓炊而仇好難忘莊盆罷
鼓汝詢之于先生交忝忘年知稱特達人哭亦
哭悼背諼之早彫憫之念之幸庭蘭之已苑于
是述孺人行事而作誄

誄曰惟徐之先莫稽所樹劍解延陵厥姓始著
南州高士貞觀賢妃清芬洋溢郁郁菲菲孺人

稚節閨閣有截纘女維勤率理不越天作之合
日嬪于張符鳳之應和鳴鏘鏘夫子操觚如花
摘藻孺人旁觀大義輒了夫子龍性時不易馴
孺人相之明德維新夫子孤介矜然塵表孺人
步趨不啖隣棗夫子儒素簞瓢晏如孺人裝篋
綦縞無餘昕夕勤劬操作自適將順伯鸞敝屣
逢掖慈而嚴毅庭闈肅雍一物失所身不自容
玉笋雙抽循母之訓鵲起芹池家聲日振由拳
連璧平輿二龍鄉之輿論歸美九熊宜齊古人

稱高石姬年未及稀溘焉朝露嗚呼哀哉詢與
夫子惠好夙敦欽內淑德更生所尊敢操管彤
素旌是勒庶幾千秋中壺之則

祭文

祭錢封公靜菴文

嗚呼交以道合哀以情生疇昔之歲隨公遠行
公行何從嗣君作宰綢繆署中燧火三改公貌
則古公文則雄老而耽詩下筆卽工余亦蟲雕
爰談爰賦公唱余酬幾忘旦暮余懷桑梓辭公

而征長歌悵別雲爲之停公樂林泉倦棲官舍
尋亦還山逍遙白社余每棹雪謁公海陬沈李
值夏羨尊以秋嗣君戀幃迎養弗克千里傳餐
使者絡繹 帝嘉義方綸綍示旌公時杖國榮
與壽并賓友稱觴酌以大斗南山諸篇半出余
手及余徂京音問稍踈夢或把袂飲不共壚登
高之辰還自白下問訊青林公竟物化嗚呼傷
哉憶公生平無懷自許言不踰規步不越矩矜
青而滯儒久則貧韞茲靈寶以貽後人公嗣龍

驥孫亦鳳舉含笑九京寧復悲楚所可恨者舊
好永乖病不及省殯不及哀人琴亡矣悵焉曷
極巖壑無光松筠失色貧乏鷄黍代以生芻憑
几長號幽明兩途

祭許太翁文

嗚呼鹽官負海厥土惟砥陲起羣峰爲許氏里
靈貺攸鍾代不乏雄公之淳古直追鴻蒙燥髮
窮經芹池鵲起厭世紛華林泉自喜殆庶之匹
巢居之倫盟花友竹用全吾真隱不自文謙得

其柄用韜強弩以啓厥胤厥胤伊何白雲仙郎
攀龍繡虎邦家之光鞭笞班揚陵轢盧駱蘭避
其芬桃遜其灼舉世忌直如弦見疑一仕三黜
退甘如飴竭來朝端有人者進明珠暗投按劍
莫信衆人則戚令子則忻定省久曠歸寧我親
在昔黔婁未疾而悸垂翅之歸孝感所致公幾
耄耄無復何求有子在側得瞑雙眸小智喁喁
恩綸未沐九京可輝不在華屋公固達者寵辱
不驚第五何減驃騎何增詢也鰥生見知比部

邂逅成均傾蓋如故丙辰初歲登堂謁公一揖
而別懷想仁風其秋西遊白門託足圯上之居
仙郎豫卜割酒而飲損祿以供圖報無時祝公
非熊稱觴未期聞訃錯愕不淺藏舟夜半去壑
嗚呼傷哉古人絮酒千里不辭支離病質俛莫
能之身滯秦淮神馳几側靈其有知鑒我心赤
祭沈茂之太孺人文

嗚呼語有之不知其母視其子孺人之德溫惠
有則孺人之操偕隱稱高我負爾戴夫子是賴

身隱焉文屬之嗣君嗣君爲誰實維茂之卓矣
茂之詢等之友交踰十年肝膽畢剖雍穆自持
得母之慈學淵而博熊丸所擴喜愠不形胎教
有徵鳳藏其羽隱德素與嗟嗟母儀視子而知
傷哉貧乎孝不獲展菽水鮮充筆耕黽勉昔戀
庭闈離不一宿今客長安春草再綠陟屺增勞
瞻雲倦目何其卒然竟悲風木嗚呼傷哉靈之
爲婦德耀之儔靈之爲母綿上名流何伯鸞健
食而靈掩松楸嗚呼傷哉靈之家督立言不朽

三都之文膾炙人口靈之仲嗣吐劍冲斗小吳
貴達易於反手靈其真掖以大厥後朋友之親
生拜死哭雞黍未期生芻遂束有愧巨卿登堂
獻祝靈不我愆歆此醴醪

祭婦翁包少雲文

嗚呼士不論賢愚有勢者稱貴家不論門閥無
錢者憔悴嗟嗟我翁簪裾之裔乃祖綰符中牟
稱異何獨坎珂罹此季世翁貌傀偉氣復縱橫
少邁家難書記姓名失岵之始烝烝無依出去

稅存困于胥靡鵠鶚難馴在厄能奮糾糾土豪
歛翮退遜生平無好唯酒自耽杖頭屢空典裘
亦酣蹭蹬風塵七十有九身僵路隅卒死于酒
嗚呼傷哉翁非無子老而自養婿復食貧斗粟
鮮餉生苦無樂死亦何傷追惟曩昔恩不能忘
婿未喪明別締姻好俄而叛盟鰥居將老翁女
擇配幸不見遺琴瑟克調迄今齊眉兒媳成行
咸翁之德聞訃愴惶零淚沾臆在昔黔婁歛不
覆體婿之厝翁掩棺而已寸心徒結綿力已殫

翁其無悲歸骨卽安酌以清醕薦以鷄炙一哭
登舟千秋永隔

冬日掃墓文

萬曆丙辰八月不孝汝詢爲白門之遊比部許
稚則儀部黃貞甫于帝城之玳珠橋結屋居
之因留焉遣莊兒取家室未得踵墓而告明年
仲冬八日還自都下謹以隻鷄清酒敢昭告于
顯考邑庠生府君顯妣孺人顧氏之靈曰嗚呼
土着重遷飢驅易徙兒拙謀生產爲逋褫餒妻

飢穉哀號可憐硯田能耕而不逢年艾顯則服
蘭隱則捐貴耳賤目我里爲然惟昔移家北郭
之左懷珠思投路暗莫可累歲無聞復厄于火
去而栖野門掩蒿蓬糠覈日啖瓶粟屢空父兮
母兮倏焉見背窀穸而歸惟骨與泪錐立無所
青殺有成二三知己相遇陪京或借一枝或分
祿米淮上之居浣花堪擬家室則安兒心則酸
丘壟日遠祭掃爲難昔徂秋暮今來歲闌寒風
擊人涕不勝彈見考篇籍古不墓祭世俗之饗

每以春季兒方蓬轉留詎幾晨祭不及廟掃不
及春荒草穢埏荆棘成榛丙舍頽毀葺者何人
衰替之感慘不忍陳伯兄晚暮壯心猶昔仲子
沉淪埳壑已極弓弛宜張井渫必革門戶之振
非仕勿克親豈無知而忘引掖兒今行矣何當
復還非敢遠親鉏瓜無田栖集之期間之蒼天

雅社約

乙卯歲杪偶憇海上愁霖晦冥客居寡歡日與
元常諸君悲歌相答酒酣耳熱愴然興懷正以

嘉會難長良儔莫逆藉非寄情高詠奚以託好
千秋於是舉生平所與操觚藝林墳笈調合者
得十二人爲雅社推長輿先生爲盟主嗣後每
有一題在遠必告毋畏難而閣筆毋託事以廢
吟萬里比隣詩筒絡繹庶幾元白之風不專美
於唐代也然科條不立無所遵守謹著社約十
四條於左

一曰定風格

吾明詩格愈變愈下于鱗尚聲調而影響蹈

襲之弊與中郎任才情而俚俗險怪之實鑿
夫白雪黃金旣以起人之厭而車車馬馬詎
謂得詩之神近來年少毀李師袁勢當然矣
然所造句非饑犬餓貓即蝨之蛙出此又步
驟中郎而駢拇者也吾黨須痛革此弊以古
人爲式性情爲用譬良御而得善馬始有一
發千里之勢若曰去其轡斷其鑣雖有龍媒
奚所用之詭遇獲禽者吾不取也

二曰備諸體

續清溪集 卷十五
青蓮稱七言不如五言五言不如四言爲其
漸近古也今作者專工近體罕集古風終是
管中窺豹吾黨必先精騷選次及律絕始可
入大乘法門

三曰輪擬題

唐人佳句因題而得題不廣句且局矣凡我
社友每月輪擬二題轉相傳付他若燕飲或
送別須各分賦一物如太白西施石李願烏
孫佩刀之類就題造意伎倆自別譬雁蕩諸

峰竒峭各殊令觀者駭目

四曰懇月旦

凡人未經品題則無所奮發不經裁抑則罔
識砥礪吾曹旣推盟主每一題集爲卷以呈
長輿先生請得高下其議論月易其品目自
滿者抑之自怯者揚之庶幾後進知所指歸
云

五曰許互訂

人有好尚詩不易評盟主旣品題矣十二人

又當轉相叅訂不惟使詩篇盡善亦朋友責善一端

六曰稽課程

士朝而受業晝而講貫夕而習復夜而計過無憾而後卽安此一日之課也由日而月由月而歲豈容無所稽考詩雖一藝然不立課程則無所遵守每以一月爲率誦選詩若干近體若干須精熟合社共賦者爲公題人自命篇者爲私題公題每月二篇不可缺私題

任興難限其數就公題所得一歲二十四首一社合之當得三百篇復以私題人之會成一帙歲終呈盟主定其殿最庶可以無憾矣

七曰戒面諛

古人藉苦口爲良藥今人藉諛言爲芳餌吾曹以千秋相許豈宜有所諛詩之好醜各宜據實庶幾敬禮之文得訂於陳思老嫗之論有補於香山也

八曰敦游揚

昔東野詩名得韓而起魯直聲價因蘇而高
吾曹亦宜揄揚先達薦寵後輩期無愧於韓
蘇云

九日禁談短

汝無面從退有後言虞舜之戒也吾黨以詩
相規一字一句悉面質之無得退而非議其
短

十日重緘寄

吾儕索居經歲一集復有留寓遐方者非藉

折麻奚稱倚玉八行嗣音千里如面亦雅社
之急務也

十一日期雅集

以文會友志不在飲以酒陶情草蔬亦佳每
會肴不過五品或人操一物不貴多而貴精
飲期微醺不至酪酊足稱雅集矣

十二日廣同志

昔惠遠社白蓮却康樂而邀靖節靖節復攢
眉而去之何則道不同不相爲謀吾黨結社

不敢有所却復不敢有所邀調諧者聽其入韻殊者任其去孟氏之設科是矣然吾郡家擅龍雕人操牛耳社寧止於十二惟諸君不鄙而俯就焉

十三曰懲懈弛

詩稱靡不有初鮮克有終此懈弛所當懲也雅社之舉倡自不佞盟雖戒石車不停軌儻留寓與鄉盟散約解不能無憂惟諸友善始善終之

十四曰崇交誼

夫立名之士論行而交同氣之求久要無爽吾曹雖以稱詩而結社實期著信於藝林既約之後得失相規患難相惜休戚相關有無相共毋以細故而棄大德毋以契濶而有遐心挽頽風于末俗存古道于草莽防蕭朱之後嫌起張范而無愧俾千秋不以詞藻稱而以交誼顯則雅社之本意也



國家圖書館, NATIONAL CENTRAL LIBRARY, TAIWAN, R.O.C.

編蓬後集卷之十五終

系...後集 卷之十五